

Le₂la₂ ca₂jmo₃ dsa₂ i₂chen₄ quián₅ Jesús

Jág₁ a₂cuě₄ a₂chen₃ Diú₄ Jme₂dsí₂ Jñi₃ó₅

¹ Ne₄ si₂ a₂ca₂jmo₃ jniá₂ le₂'uig₅₄, gui₅₄ Teófilo,*
ca₂juá'₃ jniá₂ ca₂le₃jě₃ a₂ca₂jmo₃ Jesús ca₂le₃
ca₂jme₃lióg₃ ca₂jme₃tag₂₃,

² ca₂lia'₂ ca₂tě₂ jmig₄ a₂ca₂ñái'₃ guei'₅₄ i₂juíg₃. Né'₃
a₂dsáin'₃ guei'₅₄ i₂juíg₃, ca₂quióin'₂ dsig₂uia₃-tín₂
i₂chen₄† quián₅, ca₂chei₃ dsí₂'ě₂ jág₁. Jaun₂ ca₂cuě₃
jág₁ tě₂le₃ quián'₅₄ Jme₂dsí₂ Jñi₃ó₅, ca₂le₃jě₃ 'e₂ 'nió'₅
jmo₃ chi'₂ dsig₂uia₃-tín₂ 'éi₂.

³ Cang₂ jme₁ca₂join₃, jme₁ma₂jein'₅₄ táng₃, ca₂ñi₃
tě₂láu₃ jmig₄ qui₂jme₂jniai₂₃ qui₂cuě'₅ jág₁ dsau₅
chi'₂ dsig₂uia₃-tín₂ a₂tě₃dsón'₂ bá₄ chain₂ ma₂jein'₅₄
táng₃; jaun₂ qui₂ca₂dsia₃ jág₁ quiain'₅₄ 'éi₂ jui₁lia'₂ 'a₂
lia'₂ lě₅ ja₁gon₂ Diú₄.

⁴ Jme₁'en₅₄ guě₄ Jesús quiain'₅₄ chi'₂ dsig₂uia₃-tín₂
quián₅, jaun₂ ca₂juá'₂ ca₂tsí'₃ 'éi₂ a₂tsá₃ dsí₃lein₃
dsí₂jui₅ juig₂ Jerusalén. Jaun₂ ca₂juá'₂:

—Jñia₄ 'nia'₂, jui₁le₂ti₃ de'₂ jág₁ quió'₅ Ñe'₃
a₂ma₂juíg₂ 'nia'₂.

⁵ Dsau₅ bá₄ ca₂tióg₃ Juan₅₄ ca₂tiáin₂ jmig₂ dsa₂, la₁
'nia'₂ guě'₂ ně₃ tióg₂ Diú₄ Jme₂dsí₂ Jñi₃ó₅, tě₃jě₄ la₂.

*Ca₂ñá'₃ Jesús guei'₅₄ i₂juíg₃
(Marcos 16:19; Lucas 24:50-53)*

* **1:1** Teófilo: o, “ne₂ i₂'nióg'₃ Diú₄.” † **1:2** griego: apóstolous.

⁶ Co₂ráun₂ tion'₅₄ chi'₂ dsi₂guia₃-tín₂ le₁ñi'₂ ja₁'en₅₄
Jesús, jaun₂ ca₂ñi'₃ Jesús:

—Te₁gui'₅₄, ¿ma₂tě₂ ja₁jmó'₂ 'ne₂ a₂lión₂ dsa₂ juig₂
Israel?

⁷ Jaun₂ ca₂ñag₃ Jesús:

—Tsá₃ ca₂tín'₂ 'nia'₂ le₃ñi'₅₄ 'a₂lia'₂ jmo₃ Diú₄ Jmei₂
'éi'₃ ca₂le₃jě₃ 'e₂ 'ió'₄, 'e₂ jmi₃g₄ ně₃. 'Nio₅ bá₄ Diú₄
Jmei₂ ñi₅ a₂jaun₂.

⁸ Jě₁ma₂ca₂guen'₅₄ 'nia'₂ Jme₂dsi₂ quián₅ Diú₄,
guéi'₁ 'nia'₂ ju₅bí₂, jaun₂ qui₂o₁nóg'₅ qui₂o₁'ě'₃ jág₁
dsau₅ quió₃ juig₂ Jerusalén, le₂tan₅₄ juig₂ 'uě₃ Judea,
'uě₃ Samaria, ca₂le₃jě₃ juig₂ ta₁caun₂ mi₂güig₃ ně₃.

⁹ Jme₁ma₂dsan₃ juá'₂ Jesús le₂ně₅, ca₂uig₂ ju₅
guei'₅₄ i₂juig₃, ca₂ñái'₃ ca₂lioin₂ jnei₅.

¹⁰ Tě₃tión₂ jaun₂ chi'₂ dsi₂guia₃-tín₂ jág₅ guei'₅₄
jme₁ñá'₃ Jesús, con'₂ tsá₃ jáin₅ jme₁ca₂jñin₂ on₃ dsa₂
le₁qui'₂ 'mi'₂ tiog₂ jau₂, tión₂ cau₅ quió'₅.

¹¹ Jaun₂ ca₂juá'₂ dsa₂ on₃ 'éi₂:

—'Nia'₂ dsa₂ chan₂ Galilea, tsá₃ ma₃ta₁ jmo₃ tión'₂
guě'₄ 'nia'₂ uě₂ jág'₂ guei'₅₄. 'Nio₅ Jesús ně₅ i₂ñá'₅
guei'₅₄ i₂juig₃ tě₃jñin'₄ 'nia'₂, le₂ně₅ bá₄ jiá₃ táng₃
jě₁ma₂tě₂ rě₁jiá₃, ju₁lia'₂ ně₂jñin'₅₄ 'nia'₂ ñái'₅ ně₅.

Ca₂quión'₂ dsa₂ Matías a₂jmo₃ ta₁ a₂jme₁lín₄ Judas

¹² Jaun₂ ně₃ ca₂'u₁in₂ má'₂ ja₁chei₂ Olivos,
ca₂o₃lein₃ táng₃ juig₂ Jerusalén, a₂niog₅ uíng₂ con'₂
ja₁'i₄ 'éi'₃ i₃nio₄ dsa₂ jme₁jmig₄ sa₅₄.[‡]

¹³ Jme₁ca₂o₃lein₃ Jerusalén jaun₂, ca₂uig₂ cuarto
guei'₅₄ ja₁ca₂jñia₃. Dsa₂ 'éi₂ jme₁chein₂ Pe₄, Jacobo,
Juan₅₄, Dré₄, Fe₂li₄, To₁má₄, Bartolomé, Tě₅₄, Jacobo

[‡] **1:12** Con'₂ tí₅ caun₂ kilómetro.

ja₁ŋi'⁵⁴ Alfeo, Si₂mu₅₄ i₂lín₅ cananista, § quian'⁵⁴ Judas rin'⁵⁴ Jacobo.

14 Ca₂le₃jín₃ le₂jaun₂ jme₁ŋi'² i₂gú'³ co₂lě₅ quian'⁵⁴ o₁rin'⁵⁴ Jesús, María chog₅₄ Jesús, ca₂le₃jín₃ guě₄ 'io₅₄ sián'² ně₃, a₂jme₁tsí'⁵ Diú₄.

15 Co₂ráun₂ jme₁lě₂ con'² caun₂ 'ŋiá₂-lón₂ rě₂dsí₂ guión₂ (120) dsa₂ 'én₂ i₂jme₁le₁ŋi'². Jaun₂ ca₂nau₂ Pe₄ těj₃ě₄ jaun₂, jaun₂ ca₂juá'² ca₂tsí'³ dsa₂:

16 —Rin'⁵⁴ jniog₄, co₂ně₅ lě₅ Si₂, tion₅₄ ca₂rě₃ti₃ jág₁ a₂ma₂'ě₂ Jme₂dsí₂ quián₅ Diú₄ těj₃le₃ quian'⁵⁴ 'lag₄ David, a₂ca₂'iin₃ Judas i₂ca₂ŋia₃ dsa₂ i₂ca₂i₁te₂ Jesús chi₁'ŋei'².

17 I₂jme₁quian'⁵⁴ bá₄ jniog₄ 'éi₂, jme₁lě₄ rin'⁵⁴ jniog₄, i₂jme₁jmo₅ ta₁ le₂la₂ bá₄ 'éi₂ ján₃.

18 La₁ quian'⁵⁴ cu₄ 'lig'⁵⁴ a₂ca₂lí'³ Judas a₂ca₂'ni₃ Jesús, ca₂lá₃ 'uě₃. 'Uě₃ jaun₂ ca₂jmo₃ ca₂táin'² těj₃ chi₁jín₂, qui₂ca₂'uě₂ ca₂le₃jě₃ a₂jme₁tio'⁵⁴ tú'⁵.

19 Jme₁ca₂rě₃ŋi₅ dsa₂ juig₂ Jerusalén, ca₂tě'³ 'uě₃ jaun₂ Acéldama, co₂'nió'⁴ a₂juá'²: 'Uě₃ Jm₁₂, quian'⁵⁴ jág₁ jmei₅ quió'⁵.

20 Ia₁ le₂la₂ juá'² ne₄ Si₂ Salmos:

Jui₁těj₂tsi'⁵⁴ 'ŋiog₅ 'né₅ quió'⁵,

ia₁ 'i₁jan₂ tsá₃ 'ein₂ le₃tian'³. *

Ján₃ guě'² juá'² táng₃:

Dsa₂ sián'² ju₁jmo₅₄ ta₁ a₂jme₁lín₄. †

§ 1:13 griego: celotes, co₂'nió'⁴ dsa₂ i₂nau₂ quen₅; jan₂ i₂'nio₃ táun₂ 'uě₃ 'éi'³ quió'⁵ Roma. Jma₃quén₅ ca₂quioin₃ le₃on₃ Si₂mu₅₄ 'éi₂, ia₁ ŋi₄ lě₃ mei'² tsá₃ ca₂ne₅₄ a₂chein₂. * 1:20 Salmo 69:25. † 1:20 Salmo 109:8.

21 'Chan₂ bá₄ dsa₂ jë₄ la₂ quián₂ jniog₄ dsa₂
i₂ma₂ca₂jme₃quiong'₅₄ ca₂le₃jë₃ jmi_g₄ lia'₂ con'₂
jme₁quian'₅₄ jniog₄ Te₁gui'₅₄ Jesús,

22 ca₂le₃ ca₂jñó₂ Jesús jmi_g₂ a₂ca₂cho₃ Juan₅₄,
ca₂lia'₂ jme₁ca₂úig₂ Jesús guei'₅₄ i₂juí_g₃. Jaun₂ tion₅₄
'nió'₅ dsa₂ 'éi₂, jme₃quiong'₅₄ jniog₄, jaun₂ jáng'₃ jág₁
dsau₅ a₂ca₂jen'₅₄ táng₃ Jesús.

23 Jaun₂ ca₂jmo₃ jág₁ ca₂'iin₃ jan₂ i₂chen₂ José
i₂të'₂ Barsabás i₂të'₂ Justo në₃, quian'₅₄ jan₂ i₂chen₂
Matías.

24 Jaun₂ ca₂tsí'₃ Diú₄ ca₂le₃jíin₃, ca₂juá'₂ le₂la₂:

—Te₁gui'₅₄, 'ne₂ bá₄ i₂cuing'₂ të₂dsí₅ ca₂le₃jín₃ dsa₂,
'in₅₄ jnia'₅₄ 'ein₂ dsa₂ on₃ la₂ i₂ma₂quion'₅₄ 'ne₂,

25 ia₁jaun₂ jmo₃ ta₁ léin₂ chi'₂ dsi₂guia₃-tín₂
quiáng'₂ a₂jme₁lín₄ Judas, 'uig₅₄ dsáu₁ ca₂i₃'éin₂,
ca₂ñái'₃ ja₁ca₂tín₂.

26 Jaun₂ ca₂tóin'₂ ca₂co₃, ca₂dsi₂ jág₁. Jaun₂
i₂chen₂ Matías bá₄ ca₂tín₂ ta₁ jaun₂. Dsi₂jui₅ le₂jaun₂
bá₄ ca₂jme₃quian'₅₄ dsa₂ guia₃-ján₃ i₂jme₁lë₂ guë₄
dsi₂guia₃-tín₂ i₂chen₄ quián₅ Jesús.

2

Jme₁guan₃ Jme₂dsí₂ quián₅ Diú₄

1 Jme₁ca₂të₂ Jmi_g₄ Të₂láu₃-guiá₂, caun₂ bá₄
ja₁jme₁tion'₅₄ le₁ñi'₂ ca₂le₃jín₃ dsa₂ i₂'én₂.

2 Con'₂ tsá₃ jáin₅ jme₁ca₂nág₂, ca₂lë₃ gau₂ ca₂jan₃
guei'₅₄ lia'₂ lë₅ jë₁'ei₅ dsi₂ tiá₂ lin₃ ca₂lë₃, ca₂né'₂
ta₁caun₂ dsi₂néi₂ ja₁jme₁tion'₅₄ dsa₂.

3 Jaun₂ co₂tan₅₄ dsi₂jui₅ le₂jaun₂ qui₂ca₂séi'₂ tsi'₄
si₂ qui₂të₁tsi'₅₄ ne₄ quió'₅ dsa₂ 'éi₂, le₂jain₂ le₂jain₂.

4 Jaun₂ ca₂le₃jín₃ qui₂ca₂cain'₂ quian'₅₄ Jme₂dsí₂ Jníó₅. Jaun₂ ca₂jme₃lióg₃ dsa₂ qui₂ca₂dsia₃ jág₁ jmei₅ síá'₂, lia'₂ con'₂ lě₅ ca₂cuē₃ Jme₂dsí₂ a₂juá'₂ dsa₂.

5 Jmíg₄ jaun₂ jme₁tion'₅₄ dsa₂ judíos juig₂ Jerusalén, i₂ja₂lén₂ ta₁caun₂ mi₂güig₃, a₂jme₂ti₃ con'₂ tag₄ chí'₅ quió'₅.

6 Jme₁ca₂nág₂ mi'₅₄ a₂ca₂lě₃ jaun₂, qui₂ca₂ñi'₂ dsa₂, tsá₃ caun₂ ca₂i₃jio₅ dsí₅, ia₁ ca₂le₃jín₃ bá₄ dsa₂ 'éi₂ jma₃quén₅ qui₂ca₂nág₂ jág₁ jmei₅ quió'₅ a₂qui₂ca₂dsia₃ dsa₂ i₂tion'₅₄ 'éi₂.

7 Jaun₂ dsí₃gó'₃ dsí₅ 'ñio₅ lin₃, qui₂ca₂dsia₃ jág₁ guioin₅₄ quian'₅₄ riin'₅₄, ca₂juá'₂:

—¿On₁jua'₅₄ dsa₂ chan₂ Galilea ca₂le₃jín₃ dsa₂ i₂dsia₅ jág₁ ně₅?

8 ¿'A₂ bá₄ lia'₂ né'₂ dsia₂₃ jág₁ jmei₅ quió'₅ juig₂ go₄ jniog₄ le₂jau₂ le₂jau₂?

9 Dsa₂ i₂tion'₅₄ ja₁lá₃ i₂chan₂ juig₂ Partia, dsa₂ chan₂ Media, dsa₂ chan₂ Elam, dsa₂ chan₂ Mesopotamia, i₂chan₂ Judea, i₂chan₂ Capadocia, dsa₂ chan₂ Ponto, dsa₂ chan₂ 'uē₃ Asia,

10 dsa₂ chan₂ Frigia quian'₅₄ Panflia, dsa₂ ja₂lén₂ 'uē₃ Egipto quian'₅₄ juig₂ 'uē₃ Africa* a₂niog₅ uíng₂ con'₂ guē₄ Cirene. Ján₃ bá₄ tion'₅₄ dsa₂ chan₂ Roma i₂ma₂tián'₅ ja₁lá₃. I₂lin₅₄ 'éi₂ jme₁ma₂lín₅ judíos; i₂lin₅₄ guē'₂ ma₂gue₃ juá'₅ quió'₅ dsa₂ judíos.

11 Ján₃ bá₄ tion'₅₄ dsa₂ chan₂ 'uē₃ Creta, dsa₂ chan₂ Arabia ně₃. La₁ ca₂le₃jág₃ bá₄ jniog₄ néi₁ quian'₅₄ jág₁ jmei₅ quián₂ a₂dsia₅ dsa₂ ně₅ ca₂le₃jě₃ a₂jlá'₁ a₂'io'₂ a₂jmo₅ Diú₄.

* 2:10 griego: Libia.

12 Jaun₂ 'ŋio₅ dsi₂gó'₃ dsí₅ dsa₂, tsá₃ caun₂
qui₂ca₂ág₂ dsí₅. Jnia'₅₄ qui₂ŋí'₅ riin'₅₄:

—Ĵ'E₂ 'nió'₄ juá'₂ ca₂le₃jě₃ a₂ně₅?

13 I₂lin₅₄ guë'₂ tsá₃ 'éin₂, jnia'₅₄ qui₂jmóg'₂ burlas,
jaun₂ ca₂juá'₂:

—I₂le₁'en₅ bá₄ i₂ně₅.

Jág₁ a₂ca₂juá'₂ Pe₄ ca₂tsí'₃ dsa₂

14 Jaun₂ ca₂nau₂ Pe₄ jë₄ jme₁guá₄ quiain'₅₄ guë₄
guia₃-ján₃ chi'₂ dsi₂guia₃-tín₂ riin'₅₄. Jaun₂ ca₂juá'₂
tiá₂ ca₂tsí'₃ dsa₂:

—'Nia'₂ dsa₂ chan₂ Judea quian'₅₄ ca₂le₃jíng'₃
i₂tián'₅ Jerusalén ně₃, jui₁le₂ŋi'₅₄ 'nia'₂ jág₁ la₂. Nei₂
'nia'₂ dse₃ a₂juá'₄ jniá₂ la₂.

15 Tsá₃ le₁'en₅ dsa₂ la₂ jui₁lia'₂ lín'₂ 'nia'₂, ia₁ con'₂
hora ŋí₁ ŋi₃ tē₂ o₃'iog₂† bá₄ guë₄ la₂.

16 Tē₂le₃ a₂rē₂ti₃ con'₂ lě₅ jág₁ a₂ca₂'ě₂ Joel ma₂líg'₂,
lia'₂ con'₂ jme₁ca₂juá'₂:

17 Jë₁ca₂tó'₂ jmíg₄, juá'₂ Diú₄,
tsing₅₄ Jme₂dsí₂ quiáng₃ jaun₂ sióin₃
ne₄ quió'₅ ca₂le₃jín₃ dsa₂ mi₂güí₃.

Ja₂ŋí'₂ 'nia'₂, ja₁míg'₄ ně₃
qui₃dsia₃ o₄quió₃ jniá₂.

Dsó₂ chí'₂ quián'₂ 'nia'₂ ně₃
a₂lë₁qui₃jág₃ 'e₂ qui₃jág₃,
dsi₂gui'₅₄ can'₅₄ guë'₂ qui₃qui₃.

18 Jmíg₄ jaun₂, qui₁'íng₄ Jme₂dsí₂ quiáng₃
ne₄ quió'₅ dsa₂ ŋe'₂, dsa₂ mí₂ ně₃
i₂jme₂ti₃ ta₁ ne₃,

jaun₂ guë₄ qui₃dsia₃ o₄quió₃ jniá₂.

† 2:15 lit. “hora 'ni₅.”

19 Dsi₁ guei'₅₄ guë'₂ qui'₁ ë'₄ jniá'₂ dsa'₂
 cosas a₂ dsi₃ gó'₃ dsí'₅.

Ne₄ gua'₅₄ 'uë'₃ guë'₂
 jmo₅₄ jniá'₂ lé'₂ léi'₄,
 jui'₁ lia'₂ jmi'₂, si'₂, jnei'₅ lë'₅ jme₁ ñi₁ në'₃.

20 'Iog₂ guë'₂ co₂ dsia'₅ le₃ lia'₂.
 Tsi'₂ guë'₂ lé'₂ guéin'₂ lia'₂ lë'₅ jmi'₂.

Ca₂ le₃ jë'₃ a₂ në'₅ lé'₂ né'₃ guë'₄
 a₂ guá'₂ jmi₄ quió'₅ Te₁ gui'₅₄.

Jmi₄ jaun'₂ lé'₂ caun'₂ jmi₄ juë'₂ a₂ gau'₂.

21 Jaun'₂ ca₂ le₃ jin'₃ dsa'₂ i₂ mi'₅ chi₂ lén'₂ Te₁ gui'₅₄,
 líoin'₂ bá'₄.[‡]

22 "Nia'₂ dsa'₂ chan'₂ Israel, nei'₂ 'nia'₂ ca₂ le₃ jë'₃
 a₂ juá'₄ jniá'₂ la₂. Jesús chan'₂ Nazaret dsa'₂ dsen'₃
 quián'₅ Diú'₄, i₂ ca₂ cuë'₃ 'éi'₃ ca₂ chein'₃ jin'₄ 'nia'₂.
 Ca₂ jmo'₃ Diú'₄ ca₂ le₃ jë'₃ léi'₄ juë'₂, ca₂ le₃ jë'₃ 'e₂ dsí'₂ gó'₃
 dsí'₅ dsa'₂, qui₂ ca₂ jmo'₃ tē₂ le₃ quian'₅₄ Jesús jin'₄ 'nia'₂.
 A₂ ñi'₅₄ rē₂ bá'₄ 'nia'₂ jaun'₂.

23 La₁ jme₁ ca₂ jáng'₂ dsa'₂ o₄ gog'₂ 'nia'₂ con'₂
 jme₁ ma₂ lë'₅ jág'₁ quió'₅ Diú'₄ a₂ ma₂ ñi'₅ le₂ jniá'₅, 'nia'₂
 në'₃ ca₂ chang'₂ i₂ 'éi'₂, ca₂ te'₅₄ chi₁ 'ñei₂₃, ca₂ i₁ jin'₅₄
 'nia'₂ o₄ gú'₃ dsa'₂ 'lin'₅₄ i₂ tsá'₃ ñéi'₂ dsí'₅. Jaun'₂ ca₂ jñag'₃
 ca₂ tion'₃ cróg'₄.

24 La₁ Diú'₄ ca₂ jme₃ jein'₅₄ táng'₃, ca₂ líó'₂ ne₄ 'mú'₃.
 Ia₁ tsá'₃ lé'₂ jua'₅₄ a₂ tē₃ roin'₅₄ a₂ rē₃ join'₅ co₂ tan'₅₄ jin'₄
 'lag'₄.

25 Ia₁ ca₂ juá'₂ 'lag₄ Rag₅₄ David a₂ 'iin₂₃ Jesús,
 ca₂ juá'₂:

Ia₁ jin'₄ bá'₄ jniá'₂ tián'₂ Te₁ gui'₅₄
 cau'₅ quió'₃.

'Éi'₂ bá'₄ guá'₅ tē₂ le₃ gu₃ ne₁,

[‡] 2:21 Joel 2:28-32.

ia₁jaun₂ 'i₁jan₂ tsá₃ 'ein₂ lé₂ jmóg'₂ jleng₃,
'i₅ dsi₃.

26 Jaun₂ lë₃, 'ŋio₅ lin₃ ca₂jmo₃ jniá₂ 'io'₂,
jaun₂ ca₂juá'₃ quian'₅₄ le₁tsi'₃
jág₁ a₂jéin₅ lián'₂.

Jaun₂ lë₃ tsá₃ 'i₅ dsi₃ jë₁ma₂ca₂jon₃ ni₁ŋi₃.

27 Ia₁ tsá₃ cué'₁ jmig₄ a₂ŋia₃ jme₂dsí₂ quiáng₃
ja₁tion'₅₄ 'lag₄, §

on₃ gué'₂ cué'₁ jmig₄ a₂siá'₃ ni₁ŋi₃ jniá₂,
dsa₂ŋjió₅ quiáng'₂ i₂'nióg'₃.

28 Ca₂'ë'₅₄ ca₂jme₁tag'₂ ju₁₅ ja₁tín'₄ jme₂dsí₂ quiáng₃.

Jaun₂ jmó'₂ jéin₄ lián'₂ jë₁ma₂'eng₅₄ ja₁cong'₂.*

29 'Rin'₅₄ jniog₄, léi₄ dsón'₂ bá₄ ca₂jon₃ tsi₁jon₂ jmei₂
jniog₄ David, jaun₂ ca₂'oin₃. Në₅ bá₄ chí'₅ gué'₂ tau₂
'ŋio₅ quió'₅ quian'₅₄ jniog₄ rë₂në₃.

30 La₁ David 'éi₂ jme₁lín₄ jan₂ i₂jme₁'ë₂ jág₁ quián₅
Diú₄, jaun₂ jme₁ŋi₅ rë₂ a₂ca₂cué₃ Diú₄ jág₁ 'iin₂₃
'ŋiog₅, a₂le₃chan₂ jë₄ quió'₅ ja₁ŋi'₅₄ chí'₂ dsio₅₄, jan₂
i₂lín₅ I₂rë₂ 'ín₁ quián₅ Diú₄. Jaun₂ i₂'éi₂ guá₃ goin₃ ne₄
ne₄ta₁ ja₁jme₁guá₄ 'ŋiog₅ David.

31 Co₂'nió'₄ a₂ma₂jág₂ bá₄ David le₂ŋjiá₅, ca₂juá'₂
a₂jen'₅₄ I₂rë₂ 'ín₁ quián₅ Diú₄. Jaun₂ ca₂juá'₂ ján₃
a₂tsá₃ ŋjia₃ jme₂dsí₂ quió'₅ jŋ₄ 'lag₄, † on₃ gué'₂
dsi'₃én₂ ni₁ŋi₁₂ jua'₅₄ a₂siá'₃.

32 Ia₁ Diú₄ bá₄ ca₂jmo₃ ca₂jen'₅₄ táng₃ 'ŋiog₅ Jesús
'éi₂. Ca₂le₃jág₃ bá₄ ŋnia'₅₄ ca₂të₂ ne₄, jaun₂ lë₃ cuë₂
jág₁ dsau₅.

33 Jaun₂ ca₂chó'₂ Diú₄ quian'₅₄ gu₂ ne₁,
ca₂jme₃juag'₂. Jaun₂ Diú₄ Jmei₂ ca₂cuin₃ Jme₂dsí₂

§ 2:27 Salmo 16:18-11. * 2:28 Salmo 16:18-11. † 2:31 griego:
hades, co₂'nió'₄, a₂juá'₂, ja₁quió'₄ 'lag₄.

quiáin₅ ca₂cu₃in₃ Jesús, lia'₂ con'₂ lě₅ jág₁ quió'₅
ma₂cu₃ē₃. Jaun₂ ca₂le₃jě₃ a₂ně₅ a₂ma₂jag'₅₄
a₂ma₂nei'₂ 'nia'₂, já₅ ne₄ 'éi₂ bá₄.

34 Ia₁ on₃jua'₅₄ David ca₂uíg₂ guei'₅₄ i₂juíg₃, ia₁
'ŋiog₅ David ca₂juá'₃:

Ca₂juá'₂ Diú₄ ca₂tsí'₃ Te₁gui'₅₄ quiáng₃:
“Né₂ con₂ jniá'₂ tē₂le₃ gu₃ ne₁,

35 ca₂lia'₂ ca₂tě₂ jmíg₄
a₂tón'₁ jniá'₂ dsa₂ i₂'iog₅₄ o₄tag'₄”.[‡]

36 Jui₁le₂ŋi₅ rē₂ ca₂le₃jín₃ dsa₂ chan₂ juíg₂ Israel,
jaun₂ tsá₃ jui₁'ei₅₄ caun₂-tín₃ dsí₅, ia₁ 'ŋiog₅ Jesús
'éi₂ bá₄, i₂ca₂tión'₃ 'nia'₂ cróg₄, Diú₄ ně₃ ma₂jmo₃
ma₂lín₅ lia'₂ Te₁gui'₅₄ lia'₂ rē'₂ I₂rē₂'ín₁ quiáin₅.

37 Jme₁ca₂nág₂ dsa₂ le₂ně₅ tioen'₅₄, qui₂ca₂tá'₂ 'lia'₂
dsí₅ 'ŋio₅ lín₃. Jaun₂ ca₂ŋí'₃ Pe₄ quiain'₅₄ chi'₂
dsi₂guia₃-tín₂ rín'₅₄ ca₂juá'₂:

—Rín'₅₄ jniog₄, ě₂'e₂ 'nió'₅ jmó₁ jnia'₅₄?

38 Jaun₂ ca₂ŋag₃ Pe₄:

—Jme₁tsín₄ 'nia'₂ 'au'₂, jen'₄ 'nia'₂ tē₂le₃ quió'₅
Diú₄, chon₅₄ 'nia'₂ jmíg₂ le₂jang'₂ le₂jang'₂ lia'₂ con'₂
lě₅ 'éi'₃ quió'₅ Jesús, cu₃ē'₅₄ léi₄ a₂qui₂ma₂'én₂ dsáu'₂
'nia'₂. Jaun₂ gu₄ē₄ cu₃in₃ Diú₄ Jme₂dsí₂ Jŋi₅ quiáin₅.

39 Jág₁ ně₅ ca₂cu₃ē₃ Diú₄ quián'₂ 'nia'₂ ca₂le₃jíng'₃,
ca₂le₃jín₃ chi'₂-guein₂ quián'₂ 'nia'₂ ně₃, quian'₅₄
ca₂le₃jín₃ gu₄ē₄ dsa₂ i₂chan₂ úing₂. Jág₁ ně₅ quió'₅
ca₂le₃jín₃ dsa₂ i₂'nio₃ Te₁gui'₅₄ Diú₄ quián₂ jniog₄ tē₂.

40 Quian'₅₄ jág₁ la₂, quian'₅₄ 'lióng₂ gu₄ē₄ jág₁ siá'₂,
ca₂juá'₂ Pe₄ tion₅₄ ca₂tsí'₃ dsa₂:

—Lion₄ 'nia'₂ jin₄ dsa₂ i₂ma₂i₂cón'₅ rē₂ně₃.

[‡] 2:35 Salmo 110:1.

41 Jaun₂ ca₂le₃jín₃ i₂ca₂tón'₃ jui₅ ca₂nág₂ jág₁ dse₃ ca₂juá'₂ Pe₄, qui₂ca₂ñói₂ jmíg₂. Jmíg₄ jaun₂ con'₂ 'ni₅ mei₅ dsa₂ i₃ton'₅₄ të₂le₃ jin₄ dsa₂ i₂ma₂'én₂ të₂le₃ quió'₅ Jesucristo.

42 Ca₂le₃jín₃ dsa₂ ca₂jña'₃ tiá₂ ca₂le₃jě₃ jág₁ a₂jme₂tag₅ chi'₂ dsi₂guia₃-tín₂. Caun₂ bá₄ jág₁ quió'₅ ca₂jmo₃ ca₂le₃jín₃, chi₂lén'₂ Diú₄, qui₂tóin'₅ co₂lě₅, jmo₂₃ dsóg₁ i₁ñí'₄.

'A₂ lia'₂ jme₁chan₂ dsa₂ le₂'uig₅₄ i₂'én₂ jág₁ dse₃

43 'Ni₅ i₂gó'₃ dsí₅ dsa₂ ca₂le₃jě₃ léi₄ a₂qui₂ca₂jmo₃ Diú₄ të₂le₃ quián'₅₄ dsi₂guia₃-tín₂ i₂chen₄§ quiáin₅.

44 Ca₂le₃jín₃ dsa₂ i₂ma₂'én₂, caun₂ bá₄ jág₁ 'ei₅ quió'₅, jaun₂ ca₂le₃jě₃ a₂jme₁cha₂ quió'₅, jme₁lě₄ quió'₅ ca₂le₃jín₃ riin'₅₄.

45 Ca₂le₃jě₃ 'e₂ cosa cha₂ quió'₅, qui₂ca₂'nag₃, jaun₂ jme₁qui₂dsi₂ó'₅ cu₄ jaun₂ 'ein₂ riin'₅₄ 'nió'₅ quió'₅.

46 Ca₂le₃jě₃ jmíg₄ jme₁ñi'₂ i₁dsi₅ guá'₅ templo. Dsi₂néi₂ quió'₅ ně₃, jme₁dsi₂ó'₅ i₁ñí'₄ jme₁guě'₅ co₂dsia₅, ca₂le₃jín₃ jmo₂₃ 'io'₂, caun₂ bá₄ 'ei₅ dsí₅.

47 Ca₂le₃jín₃ jme₁cuě'₅ ti₁'mag'₄ Diú₄, jaun₂ ca₂le₃jín₃ dsa₂ sián'₂ jme₁'nioi₃ dsa₂ 'éi₂. Jaun₂ ca₂le₃jě₃ jmíg₄ bá₄ jmo₅ Te₁gui'₅₄ caun₂ dsi₂juín₂ dsa₂ i₂lón₂.

3

Ca₂'lón₂ jan₂ dsa₂ 'lian'₂

1 Co₂ráun₂ dsióg₃ Pe₄ quiain'₅₄ Juan₅₄ guá'₅ templo con'₂ hora ñí₁ 'ni₅ të₂le₃ ca₂'láu₂,* ia₁ hora jaun₂ jme₁ñi'₂ dsa₂ tián₂ chi₂lén'₂ Diú₄.

§ 2:43 griego: apóstolous. * 3:1 lit. "hora ñi₃."

2 Ca₂le₃jě₃ jmig₄ jme₁dsi₂ɲia₃ dsa₂ jan₂ dsa₂ 'lian'₂ i₂tsá₃ lé₂ ɲi₃, le₂jaun₂ jme₁ma₂lín₅ lia'₂ con'₂ jme₁ca₂rě₃cháin₃, jme₁dsi₃jiog₃ dsa₂ o₄'né₄ i₁dsi₅ guá'₅, ja₁tě'₂ dsa₂ O₄'né₄ Jlá'₁. Ja₁jaun₂ jme₁qui₂mi₅ dsa₂ 'lian'₂ 'éi₂ cu₄ quió'₅ dsa₂ i₂dsi₂lén₂ guá'₅.

3 Jme₁ca₂jág₃ dsa₂ dso'₅₄ 'éi₂ ca₂ɲó₃ Pe₄ quiain'₅₄ Juan₅₄ a₂dsi₃toin'₅₄ i₁dsi₅ guá'₅, jaun₂ ca₂mi₃ cu₄ quió'₅ dsa₂ on₃ 'éi₂.

4 Jaun₂ ca₂nau₂ Pe₄, Juan₅₄ ně₃, ca₂jín₂ dsa₂ 'éi₂. Jaun₂ ca₂juá'₂ Pe₄:

—Dse₃ jag₄ jnia'₅₄.

5 Jaun₂ guá'₅ dsa₂ 'éi₂ qui₂jín₂ Pe₄ quian'₅₄ Juan₅₄, ia₁ lín₂ cuē₃ dsa₂ ca₂la₂ cu₄.

6 La₁ jaun₂ ca₂juá'₂ Pe₄:

—Tsá₃ cu₄tiog₂, on₃ guē'₂ cu₄nióg₄ cha₂ quió'₃ cuē₅₄. La₁ con'₂ a₂cha₂ quió'₃, cuē₅₄. Quian'₅₄ 'éi'₃ quió'₅ Jesucristo chan₂ Nazaret, nau₂, ɲi₄.

7 Jaun₂ ca₂jɲa'₃ Pe₄ mi₂gu₂ ne₁ dsa₂ 'éi₂, ca₂jme₃'o₅₄ ca₂chó'₂. Dsi₂ju₅ le₂jaun₂ ca₂rě₃bén₂ mi₂tag₄ dsa₂ 'éi₂.

8 Jaun₂ ca₂ráun₂ ca₂nau₂ jaun₂ ca₂jme₃lióg₃ ca₂ɲi₃. Jaun₂ ca₂'í₃ i₁dsi₅ guá'₅ quiain'₅₄ dsa₂ on₃ 'éi₂, qui₂ca₂ɲi₃ qui₂ca₂ráun₂ qui₂ca₂cuē'₃ ti₁'mag'₄ Diú₄.

9 Ca₂le₃jín₃ dsa₂ i₂tion'₅₄ ja₁jaun₂, ca₂jín₂ dsa₂ 'éi₂ ɲi₂₃ cuē'₅ ti₁'mag'₄ Diú₄.

10 Jaun₂ dsi₂gó'₃ dsí₅ 'ɲio₅ lín₃, ia₁ ma₂ɲi₂₃. Ma₂cu₂₃in₂₃ bá₄ dsa₂ 'éi₂ i₂gua₂ tián₂ o₄'né₄ chei₂ Jlá'₁ qui₂mi₂₃ cu₄.

Jág₁ ca₂ton₃ Pe₄ corredor ja₁tě'₂ dsa₂ quió'₅ Sa-lomón

11 Caun₂ 'en₅₄ le₂jaun₂ bá₄ dsa₂ i₂jme₁'lian'₂ 'éi₂ quiain'₅₄, tsá₃ téin₂ Pe₄, Juan₅₄ ně₃. Jaun₂ ca₂l₃lén₂

co₂chi'₅₄ juin₅ dsa₂ dsi₂gó'₃ dsí'₅ ca₂ton₂ guá'₅ ja₁chei₂
Corredor quió'₅ Salomón, ja₁jme₁'en₅₄ Pe₄ quiain'₅₄
Juan₅₄ ně₃.

12 Jme₁ca₂jág₃ Pe₄ le₁ñi'₂ dsa₂ juin₅, jaun₂ ca₂juá'₂
ca₂tsí'₃ dsa₂ 'éi₂:

—'Nia'₂ dsa₂ juig₂ chan₂ Israel, ¿'E₂ lě₃ ñi'₄ dsi₂gó'₃
'au'₂ 'nia'₂? ¿'E₂ lě₃ jag'₅₄ 'nia'₂ jnia'₅₄ le₂ně₅?
On₃jua'₅₄ bí₂ a₂tag₂ jnia'₅₄ guio₅₄ a₂ca₂'lón₂ dsa₂ ně₅
a₂ma₂lé₂ ñi₃, jua'₅₄ a₂lág₅ jnia'₅₄ dsa₂ o₂dsan₂.

13 La₁ia₁ Diú₄ quián₅ tsi₁jon₂ jmei₂ jniog₄ Abra-
ham, Isaac, Jacob ně₃, Diú₄ 'éi₂ ca₂jme₃juin'₂
'ñio₅ lin₃ Jesús ja₁ñi'₅₄, i₂ca₂jñ'₅₄ 'nia'₂ ne₄ dsi₂tan₅₄.
Jme₁'nio₃ gué₄ Dsi₄má'₂ Pilato jme₁lió₂, la₁ tsá₃
ca₂gue'₅₄ 'nia'₂.

14 'Nió'₄ jme₁lon'₄ 'nia'₂ dsa₂ jñió₅ i₂tsá₃ 'e₂ dso₄ rin₂
'éi₂, jě₂ bá₄ dsa₂ i₂ma₂jñi'₃ dsa₂ ca₂mi'₅₄ 'nia'₂ lión₂.

15 Jaun₂ le₂ně₅ ca₂jñi'₃ 'nia'₂ dsa₂ i₂cuē₅ jme₂dsi₂.
La₁ Diú₄ ca₂jme₃jain'₅₄ táng₃ jñ₄ 'lag₄, jaun₂ ca₂le₃jě₃
a₂ně₅ ca₂tě₂ ne₄ jnia'₅₄.

16 Quian'₅₄ bí₂ quió'₅ 'ñiog₅ Jesús 'éi₂ ca₂'lión₂ dsa₂
i₂cuin'₂ 'nia'₂ i₂jñ'₄ 'nia'₂ ně₅, ia₁ a₂'éin₂ jnia'₅₄ tě₂le₃
quió'₅ Jesús. 'Éi₂ bá₄ ně₂cuē₃ bí₂ quió'₅ dsa₂ ně₅,
jaun₂ ca₂'lón₂, co₂ñei'₅₄, ju₁lia'₂ jñin'₅₄ 'nia'₂ ně₅.

17 'Guion₄ bá₄ jniá₂ dse₃, rin'₅₄ jniog₄, a₂ca₂jmo'₅₄
'nia'₂ caun₂ jág₁ quian'₅₄ dsa₂ can'₅₄ quián'₂ 'nia'₂,
a₂ca₂jñi'₃ 'nia'₂ Jesús, ca₂jmo'₅₄ 'nia'₂ le₂jaun₂ ia₁
a₂tsá₃ ñi'₅₄ bá₄ 'nia'₂ 'e₂ jmo'₂.

18 La₁ ca₂rě₃ti₃ jág₁ a₂ma₂'ě₂ Diú₄ le₂jñiá₅ tě₂le₃
quian'₅₄ dsa₂ i₂jme₁'ě₂ jág₁ quián₅, a₂tion₅₄ ñág₃ uig₅
dsa₂ I₂rě₂'ín₁ quián₅.

19 Jaun₂ ně₃, jme₁tsín₄ 'nia'₂ 'au'₂, jen'₅₄ 'nia'₂ tě₂le₃

quió'₅ Diú₄, ia₁jaun₂ 'én₂ dsáu'₂ 'nia'₂. Jaun₂ bá₄
jiá₃ jmig₄ cuē₃ Te₁gui'₅₄ a₂le₃güin'₂ jme₂dsí₂ quián'₂
'nia'₂,

20 a₂chein₃ táng₃ Jesús i₂lín₅ I₂rē₂'in₁ quián₅ Diú₄,
i₂ma₂lē₅ jág₁ le₂jñiá₅ jiá₃ quián'₂ 'nia'₂,

21 o₁jñia'₅₄ la₂ rē₂ně₃ tion₅₄ 'nió'₅ guá₃ Jesús guei'₅₄
i₂juíg₃ ca₂lia'₂ ca₂jmo₃ Diú₄ rē₂ ca₂le₃jě₃ lia'₂ con'₂ lě₅
jág₁ ma₂'ě₂ dsa₂ jñió₅ quián₅ ma₂líg'₂.

22 Le₂la₂ ca₂juá'₂ 'lag₄ Moisés ca₂tsí'₃ dsa₂ quián₂
jniog₄ ma₂dsi₃jo₃: “A₂chen₃ Te₁gui'₅₄ Diú₄ jan₂ dsa₂
i₂'ě₂ jág₁ quián₅, i₂lín₅ dsa₂ go'₄ 'nia'₂ guiong'₅₄,
jui₁lia'₂ ca₂chei₃ jniá₂. Jaun₂ tón'₂ 'nia'₂ jui₅ jme₁tí'₄
'nia'₂ ca₂le₃jě₃ con'₂ 'éi'₃ a₂jmo₃ 'éi₂.

23 Ia₁ ca₂le₃jín₃ i₂tsá₃ jui₅ tón'₂ jág₁ quió'₅ dsa₂
i₂chen₄ quián₅ 'éi₂, dsi₃'éin₂, 'uín₃ jui₂ Israel.”†

24 Jaun₂ le₂ně₅ ca₂'ě₂ Samuel jág₁ le₂'ui₅g₅₄,
ca₂le₃jín₃ guě₄ dsa₂ i₂jme₁'ě₂ jág₁ quián₅ Diú₄
i₂ca₂o₃lén₂ cang₂ guě₄ jaun₂, qui₂ca₂juá'₂ lia'₂ lé₂
jmig₄ ně₃.

25 Jág₁ a₂ca₂cuē₃ Diú₄ tē₂le₃ quian'₅₄ dsa₂ i₂jme₁'ě₂
jág₁ quián₅, ca₂cuě'₃ 'nia'₂ bá₄. A₂dse₃ quián'₂ 'nia'₂
bá₄ ca₂jmo₃ Diú₄ caun₂ jág₁ quian'₅₄ dsa₂ can'₅₄
quián₂ jniog₄ ma₂líg'₂, jui₁lia'₂ ca₂tsí'₃ Abraham:
“Ca₂le₃jín₃ chi'₂-guein₂ dsa₂ mi₂güíg₃ le₃chain₂ dse₃
tē₂le₃ quian'₅₄ chi'₂ dsió'₂.”‡

26 Lia'₂ con'₂ jme₁ca₂chón'₂§ Diú₄ Ja₁ñi'₅₄,
ca₂chein₃ le₂'ui₅g₅₄ jin'₄ 'nia'₂, ia₁jaun₂ jme₃gu'₅₄,
ia₁jaun₂ tí'₄ 'nia'₂ le₂jang'₂ le₂jang'₂ ca₂le₃jě₃ dso₄
qui₂'nau'₂ 'nia'₂.

† 3:23 Deuteronomio 18:15,18-19. ‡ 3:25 Génesis 22:18; 26:4.

§ 3:26 o₃, “jme₁ca₂jme₃jen'₅₄.”

4

Pe₄ quiain'₅₄ Juan₅₄ tióin₂ ne₄ dsi₂tan₅₄

1 Pe₄ quiain'₅₄ Juan₅₄ tsá₃ ma₂dsan₃ bá₄ guě₄ tsí'₅ dsa₂ jág₁, jme₁ca₂dsi₃lén₂ jme₂dsa₂ quiain'₅₄ juig₅₄ chi'₂ 'i'₅₄ quián₅ guá'₅, dsa₂ saduceos ně₃.

2 Le₁'néi₃ 'ñio₅ lín₃, ia₁ jme₂tín₅ 'éi₂ dsa₂ a₂jen'₅₄ dsa₂ jin₄ 'lag₄ jui₁lia'₂ ca₂lě₃ léi₄ ca₂jen'₅₄ Jesús.

3 Jaun₂ ca₂jñau'₃ chi'₂ 'i'₅₄ ca₂tág₃ ca₂i₁tio'₂ né'₃ 'má₃ ca₂tě₂ jme₁jnia₃, ia₁ ca₂'láu₂ bá₄ jmig₄ jaun₂.

4 La₁ juin₅ bá₄ dsa₂ i₂ca₂nág₂ ca₂rě₃'éin₂ jág₁. Con'₂ 'ñiá₂ mei₅ dsa₂ i₂ca₂rě₃'én₂ 'éi₂, jme₁ca₂cáun₂ dsa₂ 'í₁ jmá'₃ dsa₂ ñe'₂.

5 Jme₁jnia₃ jaun₂, ca₂ñi'₂ ca₂le₃jín₃ dsa₂ dsen₅₄ i₂jmo₅ 'éi'₃ quián₅ dsa₂ judíos, dsi₂gui'₅₄ can'₅₄, tě₅juá'₅ ně₃.

6 Ján₃ bá₄ jaun₂ jme₁'en₅₄ Anás i₂lín₅ jme₂dsa₂ dsen₅₄, Caifás, Juan₅₄, Alejandro ně₃, ca₂le₃jín₃ guě₄ i₂lín₅ o₁rín'₅₄ jme₂dsa₂ dsen₅₄.

7 Jme₁ma₂le₁ñi'₂ jin₂, jaun₂ guě₄ ca₂i₁dsein₂₃ Pe₄ quiain'₅₄ Juan₅₄, jaun₂ ca₂chei'₃ dsi₂jo₂ ja₁le₁ñi'₂ jaun₂. Jaun₂ ca₂ñag₃:

—'Ein₂ ca₂cuě₃ 'éi'₃, o₃ 'ein₂ ca₂cuě₃ jág₁ a₂i₂nio'₄ 'nia'₂ jme₂tíng'₁ dsa₂, a₂jmo'₂ 'nia'₂ 'e₂ jmo'₂ i₂niog'₅₄?

8 Jaun₂ ca₂juá'₂ Pe₄, rě₂rín₅ Jme₂dsí₂ Jñi₅ó₅ tě₂dsí₅, ca₂tsí'₃ dsa₂ i₂le₁ñi'₂ 'éi₂:

—'Nia'₂ dsa₂ dsen₅₄ quián₅ juig₂, 'nia'₂ dsa₂ can'₅₄ quián₅ juig₂ Israel ně₃:

9 Chi₂jua'₂ a₂jaun₂ ñag'₅₄ 'nia'₂ ia₁ ca₂jmó₁ jnia'₅₄ caun₂ a₂dse₃ quió'₅ jan₂ dsa₂ dso'₅₄ i₂tsá₃ lé₂ jme₁ñi₃, chi₂jua'₂ 'niog'₂ 'nia'₂ le₃ñi'₅₄ 'a₂ lia'₂ ca₂lě₃ a₂ca₂'lón₂,

10 ju₁le₃ŋi'₅₄ bá₄ 'nia'₂, ju₁le₃ŋi'₅ bá₄ ca₂le₃jín₃
 dsa₂ juig₂ Israel ně₃, a₂chén'₅ dsa₂ ně₅ jin'₄ 'nia'₂
 ca₂'lón₂quian'₅₄ bí₂quió'₅ Jesucristo chan₂ Nazaret
 i₂ca₂tión'₃ 'nia'₂ cróg₄, i₂ca₂jme₁jen'₅₄ táng₃ Diú₄ jin₄
 'lag₄.

11 Jesús 'éi₂:

lín₅ ni₁cang₁ a₂tsá₃ jen'₅₄ 'nia'₂,
 i₂lín'₅ tē₅ i₂chi'₅ tsi'₁né₅,

la₁ ca₂dsióg₃ ca₂lē₃ ni₁cang₁ a₂dsen₅₄ guē₄.*

12 Ia₁ 'i₁jan₂ i₂sián'₂ tsá₃ chan₂ i₂le₃lión₂ dsa₂. Ia₁
 'i₁jan₂ i₂sián'₂ tsá₃ ca₂cuin₃ Diú₄ ne₄ gua'₅₄ 'uē₃ la₂,
 a₂lé₂ 'iin₄ jniog₄ a₂mí₁ ne₄ Diú₄ ia₁jaun₂ tág'₄ guei'₅₄
 i₂juíg₃, jŋia'₅₄ lia'₂ jan₂ Jesús bá₄.

13 Jme₁ca₂jág₃ dsa₂ can'₅₄ dsi₂gó'₃ dsí₅ ca₂jín₂
 Pe₄ quian'₅₄ Juan₅₄ 'a₂ lia'₂ tiá₂ dsí₅ 'éi₂ ŋag₂₃ ne₅₄
 le₂jaun₂, jaun₂ ca₂rē₃lí'₄ a₂lín₅ 'éi₂ dsa₂ tsá₃ lín₄
 quen₅, i₂tsá₃ lín₄ si₂cuí'₅ ně₃, jaun₂ guē₄ ca₂rē₃cuin₂₃
 a₂lín₅ 'éi₂ dsa₂ i₂jme₁i₂nio₄ quian'₅₄ Jesús.

14 Ia₁ jaun₂ bá₄ jme₁chén'₄ dsa₂ i₂ca₂'lón₂ 'éi₂ jē₄
 jaun₂, jaun₂ lē₃ tsá₃ cuin₅ jmig₄ jua'₅₄ a₂juá'₂ dsa₂
 can'₅₄ a₂tsá₃ dsau₅.

15 Jaun₂ ca₂'u₁in'₂ bá₄ Pe₄ quian'₅₄ Juan₅₄ jē₄ jaun₂,
 jaun₂ ca₂jmo₃ jág₁ guioin₅₄ 'a₂ lia'₂ jmo₃.

16 Ca₂dsia₃ jág₁, juá'₂:

—ǎ₂ lia'₂ jmó₁ quian'₅₄ dsa₂ ně₅ jaun₂? Ia₁
 ca₂le₃jín₃ bá₄ dsa₂ juig₂ Jerusalén ma₂le₁ŋi₅ a₂jmo₅
 i₂nē₅ léi₄ juē'₂, jaun₂ tsá₃ lé₂ jua'₅₄ a₂jua'₅₄ jniog₄
 a₂tsá₃ dsau₅.

17 La₁ ia₁jaun₂ tsá₃ ma₃caun₂ qui₃dsi₃'ag₅ jág₁ jin₄
 dsa₂ juig₂, 'nió'₅ quia₁n₅₄ jniog₄ juē'₅ ia₁jaun₂ tsá₃

* 4:11 Salmo 118:22.

ma₃i₃nioi₅₄ qui₃'i_{in}₃ guě₄ Jesús a₂tsí'₃ dsa₂ le₃ne₄ jui₅
ja₁dsau₅₄ ně₅.

18 Jaun₂ ca₂tě₃ dsa₂ i₂le₁ŋi'₂ 'éi₂ ca₂tě'₃ táng₃ Pe₄
quian'₅₄ Juan₅₄, jaun₂ ca₂jmo₃ 'éi'₃ ca₂tsí'₃ dsa₂ on₃
'éi₂, a₂tsá₃ ma₃dsia₃ co₂ŋei'₅₄ on₃ guě'₂ jme₃t_{in}₂₃ dsa₂
a₂'i_{in}₂₃ Jesús.

19 La₁ jaun₂ ca₂ŋag₃ Pe₄ quian'₅₄ Juan₅₄ ca₂juá'₂:

—'Nio'₄ 'nia'₂ 'au'₂ chi₂jua'₂ 'ŋio₅ guě₄ dse₃ jniá₂
ne₄ Diú₄, a₂néi₁ jnia'₅₄ gau₂ jág₁ quián'₂ 'nia'₂, 'nió'₄
a₂jme₁néi₁ jnia'₅₄ gau₂ jág₁ quió'₅ Diú₄.

20 La₁ jnia'₅₄ ně₃ tsá₃ lé₂ tí₄ a₂dsiá₁ ca₂le₃jě₃
a₂ma₂jag₅₄, a₂ma₂néi₁ ně₃.

21 Jaun₂ ca₂quiong₃ dsi₂tan₅₄ juě'₅, la₁ ca₂lió₂
bá₄ jaun₂ ně₃. Ia₁ tsá₃ ca₂dsó'₂ 'a₂ lia'₂ 'ě₂ uig₅,
ia₁ ca₂le₃jín₃ bá₄ dsa₂ ma₂qui₂cuě'₃ ti₁'mag'₄ Diú₄
a₂ca₂tě₂ ne₅₄ a₂ca₂lě₃ jaun₂.

22 Jaun₂ dsa₂ ŋe'₂ i₂ca₂'lón₂ 'éi₂ quian'₅₄ léi₄
a₂dsi₂gó'₃ dsi₅, jme₁'ein₅₄ lě₅ guě₄ tē₂láu₃ ŋi₂.

Ca₂mi₃ dsa₂ 'én₂ a₂cuě₃ guě₄ Diú₄ bí₂ quió'₅

23 Jme₁ma₂lón₂ Pe₄ quian'₅₄ Juan₅₄, ca₂i₃léin₂
ja₁tion'₅₄ riin'₅₄, jaun₂ ca₂dsia₃ ca₂le₃jě₃ 'e₂ ca₂juá'₂
juig₅₄ jme₂dsa₂ quian'₅₄ dsi₂gui'₅₄ can'₅₄ a₂ca₂tsí'₃ 'éi₂.

24 Jme₁ca₂nág₂ jág₁ jaun₂, ca₂le₃jín₃ ca₂mi₃ co₂lě₅
ca₂tsí'₃ Diú₄ ca₂juá'₂:

—Te₁gui'₅₄ quián₂ jniog₄, 'ne₂ bá₄ líng'₅ Diú₄
i₂ca₂jmo'₅₄ guei'₅₄ i₂juig₃, quian'₅₄ gua'₅₄ 'uě₃, jmi₁ŋí'₄
ně₃, ca₂le₃jě₃ guě₄ 'e₂ a₂cha₂.

25 'Ne₂ bá₄ ca₂jua'₅₄ quian'₅₄ Jme₂dsí₂ Jŋi₁ó₅
quiáng'₂, jme₁ca₂juá'₂ 'lag₄ David dsa₂ quiáng'₂:

¿'E₂ lě₃ tion'₅₄ dsi₂nau₂ co₂mi'₅₄?

¿'E₂ lě₃ dsi₂jio₅ dsí₅ dsa₂ chan₂ mi₂güí₃

ca₂le₃jě₃ ne₅₄ a₂'lig'₅₄ a₂tsá₃ ta₁ tí₄?

26 Ca₂le₃jín₃ rag₅₄ ne₄ gua'₅₄ 'uě₃
qui₂ca₂quin'₂ jág₁;

Ca₂le₃jín₃ dsí₂tan₅₄ quián₅ juig₂
qui₂ca₂nau₂ 'nei₂ ja₁con₂ Te₁gui'₅₄,
ja₁con₂ I₂rě₂ 'ín₁ quián₅ ně₃.†

27 'Dsau₅ dsón'₂ bá₄ ca₂jmo₃ caun₂ jág₁ Rag₅₄
Herodes quian'₅₄ Dsi₄má'₂ Poncio Pilato juig₂ la₂
quian'₅₄ dsí₂nau₂, dsa₂ israelitas ně₃. Ca₂quin'₃ jág₁
ca₂jme₃'ñiai₅₄ Jesús Ja₂ñí'₂ jñi₅ i₂rě₂ 'ín₁ quiáng'₂.

28 Quian'₅₄ a₂ně₅, ca₂jme₃ti₃ dsa₂ can'₅₄ 'éi'₃
ca₂le₃jě₃ a₂'i₄ 'éi'₃ niog₅ lé₂.

29 Jaun₂ ně₃ Te₁gui'₅₄, jag₄ a₂quiong₅ dsa₂ juě'₅
jnia'₅₄. Cuě₄ bí₂ jnia'₅₄ dsa₂ quiáng'₂ ia₁jaun₂ tián₂
qui₂jme₁tin₅ guě₄ jnia'₅₄ dsa₂ jág₁ quiáng'₂, tsá₃
ju₁le₂go₃.

30 Cuě₄ bí₂ quiáng'₂ a₂lé₂ jme₁'lion₅₄ jnia'₅₄ dsa₂
dso'₅₄, a₂lé₂ jmó₁ léi₄ dsí₂gó'₃ dsí₅ quian'₅₄ bí₂ 'éi'₃
quió'₅ Jesús, dsa₂ jñi₅ i₂jme₂ti₃ quiáng'₂.

31 Jme₁ca₂dsan₃ chi₂lén'₂ Diú₄ le₂ně₅, ca₂i₁bi₅₄
ja₁tioin'₅₄, jaun₂ ca₂le₃jín₃ qui₂ca₂cain'₂ Jme₂dsí₂
Jñi₅. Jaun₂ tsá₃ ma₃juě'₅ 'i₄ dsí₅ qui₂ca₂'ě₂ jág₁ dse₃
quió'₅ Diú₄.

Ca₂le₃jě₃ 'e₂ cha₂jme₁lě₄ quió'₅ ca₂le₃jín₃

32 Ca₂le₃jín₃ dsa₂ i₂ma₂'én₂, caun₂ bá₄ a₂dsí₂jio₅
dsí₅, caun₂ bá₄ 'ei₅ jme₂dsí₂ quió'₅ ca₂le₃jín₃. 'I₁jan₂
tsá₃ jua'₅₄ a₂jmo₂₃ quió'₅ 'ñiog₅ 'e₂ caun₂ a₂cha₂
quió'₅. Jmo₂₃ bá₄ dsí₅ a₂quió'₅ co₂dsia₅ quian'₅₄
riin'₅₄ ca₂le₃jě₃ 'e₂ a₂cha₂ quió'₅.

† 4:26 Salmo 2:1-2.

33 Caun₂ ca₂'ág₂ tiá₂ dsí₅ qui₂ca₂cuë₃ jág₁ dsau₅ dsi₂guia₃-tín₂ i₂chen₄‡ quián₅ Diú₄ 'éi₂, 'a₂ lia'₂ ca₂jen'₅₄ Te₁gui'₅₄ Jesús. Jaun₂ caun₂ qui₂ca₂cuë₃ Diú₄ bí₂ 'ñi₅ lin₃ quió'₅ ca₂le₃jín₃ dsa₂ i₂'én₂.

34 'I₁jan₂ tsá₃ 'ein₂ jua'₅₄ cha₂ qui₂ca₂rë'₃nió'₅ quió'₅, ia₁ dsa₂ i₂cha₂ 'uë₃, o₃ i₂tióng₂ 'né₅ quió'₅ ně₃, qui₂ca₂'nag₃.

35 Jaun₂ ca₂o₃can₅ cu₄ jaun₂, ca₂jín'₃ dsa₂ guia₃-tín₂ i₂chen₄ quián₅ Jesús 'éi₂, jaun₂ ca₂dsió'₃ ca₂cuë'₃ le₂jan₂ le₂jan₂ 'a₂ con'₂ 'nió'₅ quió'₅.

36 Jme₁chan₂ jin₄ dsa₂ 'éi₂ jan₂ dsa₂ levita i₂jme₁chen₂ José i₂chan₂ Chipre. Dsa₂ i₂chen₄ ně₃ ca₂quiain₃ Sě₄ 'éi₂ Bernabé, co₂'nió'₄ a₂juá'₂ dsa₂ i₂jmo₅ lián'₂, i₂jme₂'o₅₄.§

37 Bernabé 'éi₂ ca₂'nag₃ caun₂ 'uë₃ quió'₅ a₂jme₁cha₂. Ca₂le₃jě₃ cu₄ jaun₂ ca₂o₃can₅ ca₂cuë'₃ dsa₂ guia₃-tín₂.

5

Dso₄ a₂ca₂'nú₂ Ananías quiain'₅₄ Safira

1 La₁ jan₂ dsa₂ sián'₂ i₂jme₁chen₂ Ananías quiain'₅₄ Safira 'io₅₄ quiáin₅, ca₂'nag₃ caun₂ 'uë₃ quió'₅.

2 Dsa₂ ñe'₂ 'éi₂ ca₂'ma₃ ca₂dsio₄ cu₄ jaun₂ 'ñiog₅, jaun₂ ca₂dsio₄ bá₄ ca₂i₁cuë'₂ dsa₂ guia₃-tín₂ i₂chen₄* quián₅ Jesús, lia'₂ jag₄ bá₄ a₂i₁can₅ ta₁jě₂. Ján₃ bá₄ ñi₅ 'io₅₄ quiáin₅.

3 Jaun₂ ca₂juá'₂ Pe₄ ca₂tsí'₃ Ananías:

‡ 4:33 griego: apóstolous. § 4:36 lit. “jaun₅ lián'₂.” * 5:2 griego: apóstolous.

—¿'E₂ lē₃ ca₂'í₃ Satanás tē₂'au'₂ jaun₂ jmo'₂ jág₁ tē₂jág₁ ne₄ Jme₂dsí₂ Jñi₅ó₅, a₂ca₂'ma'₅₄ ca₂dsio₄ cu₄ a₂ca₂quí₃ dsa₂ 'lia'₅₄ 'uē₃ quiáng'₂?

⁴ ¿On₁jua'₅₄ quiáng'₂ 'uē₃ a₂nē₂'nag'₅₄? ¿On₁jua'₅₄ quiáng'₂ cu₄ jaun₂ ně₃? ¿'E₂ lē₃ ca₂i₃jio₅ 'au'₂ jmó'₂ le₂nē₅? Diú₄ bá₄ nē₂chei'₅₄ 'ne₂ jág₁ tē₂jág₁, on₃jua'₅₄ dsa₂ mi₂güí₃.

⁵ Dsi₂ju_{i5} jme₁nē₂néi₂ Ananías le₂nē₅, ca₂quín'₃ ca₂join₃. Jaun₂ ca₂le₃jín₃ dsa₂ i₂ca₂rē₃ñi₅ a₂ca₂lē₃ le₂jaun₂ ca₂rē₃gó'₅ 'ñio₅ lín₃.

⁶ Jaun₂ ca₂o₃lén₂ on₃-ún₂ chi'₂ dsa₂ ñe'₂, ca₂lio₃ 'mi'₂ ni₁ñi₁₂, jaun₂ ca₂i₁'ó₄.

⁷ Tsá₃ jaun₂ ñi₅ 'io₅₄ quián₅ Ananías a₂ca₂lē₃ le₂jaun₂, jaun₂ ca₂dsi₃óg₃ con'₂ 'ni₅ hora cang₂ jaun₂.

⁸ Jaun₂ ca₂ñag₃ Pe₄ ca₂ñí'₃ 'io₅₄:

—Jua'₅₄ dsón'₂. ¿'Ma'₅₄ jaun₂ nē₂'nag'₅₄ 'nia'₂ 'uē₃ con'₂ lē₅ jág₁ juá'₂ 'nia'₂?

Jaun₂ ca₂ñag₃ 'io₅₄:

—Ján₅. 'Ma'₅₄ jaun₂ dsón'₂ bá₄ i₂'nag₄.

⁹ Jaun₂ ca₂juá'₂ táng₃ Pe₄:

—¿'E₂ lē₃ nē₂jmo'₅₄ 'nia'₂ caun₂ jág₁ a₂cáng'₄ táu₂ Jme₂dsí₂ quián₅ Te₁gui'₅₄? Ca₁'né₄ nē₅ ma₂ja₂len₃ táng₃ dsa₂ i₂ma₃i₁'ón₄ dsi₂i₂gog'₂. Nē₃ guě₄ tē₂ táng₃ 'ne₂.

¹⁰ Dsi₂ju_{i5} le₂jaun₂ ca₂quín'₃ 'io₅₄ ca₂join₃ ja₁chén'₄ Pe₄ jaun₂. Jme₁ca₂i₃ton'₅₄ chi'₂ dsa₂ ñe'₂ 'éi₂, ma₂jón₅ bá₄ 'io₅₄, jaun₂ ca₂tág₃ táng₃ jaun₂ ca₂i₁'ó₄ cau₅ ja₁rē₂'on₅ dsi₂i₂gu₂.

¹¹ Jaun₂ ca₂rē₃gó'₅ 'ñio₅ lín₃ ca₂le₃jín₃ dsa₂ 'én₂ i₂lín₅ guá'₅, ca₂le₃jín₃ guě₄ dsa₂ sián'₂ i₂ca₂rē₃ñi₅ a₂ca₂lē₃ jaun₂.

'Lióng₂ léi₄ juë'₂ a₂dsi₂gó'₃ dsi₅ ně₃, ca₂lě₃

12 Quian'₅₄ bí₂ quió'₅ Diú₄ ca₂jmo₃ dsa₂ i₂chen₄ quián₅ Jesús 'lióng₂ léi₄ juë'₂ a₂dsi₂gó'₃ dsi₅ jñ₄ dsa₂. Jaun₂ jme₁ñi'₂ dsa₂ i₁dsi₅ guá'₅ templo ja₁lě₄ corredor ja₁tě'₂ dsa₂ quió'₅ Salomón.

13 'I₁jan₂ tsá₃ ca₂tiá'₂ dsi₅ jme₃quian'₅₄ dsa₂ i₂'én₂ 'éi₂, la₁ jme₁jme₂go₃ bá₄.

14 La₁ juñ₅ bá₄ dsa₂ ñe'₂, lia'₂ dsa₂ mǐ₂ ně₃, ca₂rě₃'én₂ tē₂le₃ quió'₅ Te₁gui'₅₄.

15 Ca₂lia'₂ jme₁dsi₂jñiai₃ jě₄ calle dsa₂ dso'₅₄ tián'₅ ne₄ cama, ne₄ tsi₁jein₁ ně₃, ia₁jaun₂ tsá₃ a₂nag₅₄ jñia'₅₄ 'én'₁ quió'₅ bá₄ Pe₄ tē₅₄ quió'₅ i₂lin₅₄ dsa₂ dso'₅₄ 'éi₂.

16 Ján₃ bá₄ ca₂o₃lén₂ juñ₅ dsa₂ chan₂ juig₂ ma₂quián₅ Jerusalén, le₁jñiai₂₃ dsa₂ le₁dso'₅₄, dsa₂ i₂tion'₅₄ jme₂dsi₂ 'lin'₅₄ tē₂dsi₅ ně₃, ca₂o₃lén₂. Jaun₂ ca₂le₃jñ₃ dsa₂ 'éi₂ qui₂ca₂'lón₂.

Ca₂co₃'ein₃ dsa₂ quió'₅ Pe₄ quian'₅₄ Juan₅₄

17 Jaun₂ ca₂rě₃'iog₅₄ 'ñio₅ lin₃ jme₂dsa₂ dsen₅₄, quian'₅₄ riin'₅₄ i₂jme₁lín₄ saduceos.

18 Jaun₂ ca₂jñai'₃ dsa₂ i₂chen₄ quián₅ Jesús, ca₂i₁tio'₂ 'né₅ 'má₃.

19 La₁ a₂'uě₂ jaun₂, ca₂ñe₄ jan₂ ángel quián₅ Te₁gui'₅₄ ca₂niá₃ 'né₅ 'má₃, ca₂'uín'₂ dsa₂ i₂chen₄ 'éi₂, ca₂juá'₂:

20 —O₂nó'₅ 'nia'₂ i₁dsi₅ guá'₅ templo, o₂nau₂ o₂chei'₅₄ 'nia'₂ dsa₂ jág₁ dse₃ quió'₅ Jui₅ 'mǐ₂ la₂.

21 Jme₁ca₂nág₂ jág₁ ně₅, tē₃ o₃'iog₂ jme₁jñia₃ jaun₂ ca₂i₁lein₅₄ guá'₅ ca₂i₁jme₁tñ₂₃ dsa₂.

Jmīg₄ jaun₂ ca₂të₃ jme₂dsa₂ dsen₅₄ ca₂ñí'₂
 dsí₂tan₅₄ quián₅ guá'₅, jaun₂ ca₂jmo₃ 'éi'₃ i₁të₂ dsa₂
 i₂chen₄ quián₅ Jesús i₂tion'₅₄ 'né₅ 'má₃ 'éi₂.

22 La₁ jme₁ca₂dsi₃lén₂ 'lióg₂† 'né₅ 'má₃, tsá₃
 ma₃dsa₂ i₂jme₁tion'₅₄ chan₂. Jaun₂ ca₂i₃lein₃ táng₃
 i₁con₂ jág₁,

23 juá'₂:

—Jme₁chi₁jnág₅ dse₃ bá₄ o₄'né₄ 'né₅ 'má₃,
 jme₁tió_{n2} bá₄ guë'₂ 'lióg₂ jmo₂₃ 'í₁ cau₅ o₄'né₄
 ně₃. La₁ jme₁ně₂tió'₄ jnia'₅₄ dsí₂néi₂, tsá₃ ma₃dsa₂
 i₂jme₁tion'₅₄ chan₂ 'i₁jan₂.

24 Jme₁ca₂nág₂ juig₅₄ jme₂dsa₂, juig₅₄ chi'₂ 'í'₅₄
 quián₅ guá'₅ ně₃, jaun₂ dsí₂gó'₃ dsí₅ qui₂ca₂ñí'₃ ríin'₅₄
 'a₂ dsí₁quén'₅ ca₂le₃jě₃ a₂ně₅.

25 Jaun₂ ca₂dsióg₃ jan₂ dsa₂ quian₅ jág₁, jaun₂
 ca₂juá'₂:

—Dsa₂ i₂ca₂jne'₅₄ 'nia'₂ 'né₅ 'má₃, ó₃ bá₄ ma₂tióin₂
 i₁dsí₅ guá'₅ jme₂tín₂₃ dsa₂.

26 Jaun₂ ně₃ ca₂i₃lén₂ chi'₂ 'í'₅₄ quiain'₅₄ juig₅₄
 quián₅, jaun₂ ca₂i₁chong'₅₄ táng₃ lia'₂ 'i₄ rě₂ jág₁. Tsá₃
 uig₅ ca₂jmog'₂, ia₁ gó'₅ qui₃jnáu'₂ cang₄ dsa₂ i₂le₁ñí'₂
 ja₁jaun₂.

27 Jme₁ca₂dsi₃lein₃ le₁te₂ dsa₂ 'éi₂, jaun₂ ca₂chei'₃
 dsí₂jó₂ ja₁le₁ñí'₂ dsí₂tan₅₄ quián₅ guá'₅. Jaun₂ ca₂juá'₂
 jme₂dsa₂ dsen₅₄ ca₂tsí'₃ dsa₂ 'éi₂:

28 —Ca₂jne₅₄ jnia'₅₄ co₂ñei'₅₄ a₂tsá₃ ma₃jme₁tín'₅
 'nia'₂ dsa₂, jua'₅₄ a₂'ín'₄ guë'₄ 'nia'₂ Jesús 'éi₂. ¿'E₂
 ma₂jmo'₅₄ guë'₂ 'nia'₂? Caun₂ qui₂jme₂tín'₁ 'nia'₂
 dsa₂, tsá₃ jág₁ cán'₁, ca₂lia'₂ ta₁caun₂ juig₂ Jerusalén

† 5:22 o₃, chi'₂ 'í'₅₄ quián₅ guá'₅.

ma₂rë₂rî₅ quiain'₅₄ já₁ a₂jme₂tîin'₁ 'nia'₂. A₂'niog'₂ 'nia'₂ bog'₅₄ jnia'₅₄ dso₄ a₂ca₂jon₃ dsa₂ 'éi₂.

29 Jaun₂ ca₂ŋag₃ Pe₄ quiain'₅₄ dsa₂ i₂chen₄ rîin'₅₄:

—'Ŋi₅ guë₄ dsen₅₄ ta₁ jme₁ti₁ jnia'₅₄ 'éi'₃ quió'₅ Diú₄, con'₂ guë₄ 'éi'₃ quió'₅ dsa₂ mi₂gü₃g₃.

30 Diú₄ quián₅ dsa₂ can'₅₄ quián₂ jniog₄ ma₂líg'₂, Diú₄ 'éi₂ bá₄ ca₂jme₃jen'₅₄ Jesús i₂ca₂jŋí'₃ 'nia'₂ ca₂tióin'₃ cróg₄.

31 Diú₄ ně₃ ma₂ca₂chó'₂ guei'₅₄, jaun₂ ma₂guá₅ cau₅ quió'₅ tē₂le₃ gu₂ ne₁, jaun₂ ma₂dsiog₃ a₂lén₂ juig₅₄ jniog₄ i₂lió₂, ia₁jaun₂ cuin₃ jmig₄ jme₃tsín₃ dsí₅ dsa₂ juig₂ Israel ia₁jaun₂ 'én₂ dsáu₁.

32 Ca₂le₃jág₃ bá₄ jnia'₅₄ ca₂tě₂ ne₄ a₂ně₅, já₃n₃ bá₄ já₃ng'₅ já₁ dsau₅ Jme₂dsí₂ Ŋjió₅ i₂ma₂cuin₃ Diú₄ quió'₅ dsa₂ i₂nag₅ gau₂ jme₂ti₃ já₁ quió'₅.

33 Ca₂rë₃'né₃ 'ŋi₅ lîn₃ dsa₂ can'₅₄ jme₁ca₂nág₂ le₂ně₅, a₂'nio₃ jme₁jme₃dsiain₂₃ dsa₂ i₂chen₄ quián₅ Jesús 'éi₂.

34 La₁ jë₄ quió'₅ dsí₂tan₅₄ jaun₂, jme₁'en₅₄ jan₂ dsa₂ fariseo i₂jme₁chen₂ Gamaliel, dsa₂ i₂lîn₅ tē₅juá'₅, jaun₂ jme₁jme₂go₃ dsa₂ 'ŋi₅ lîn₃. Jaun₂ ca₂nau₂ dsa₂ 'éi₂ jë₄ quió'₅ dsí₂tan₅₄, ca₂mi₃ a₂'uîin'₂ ca₂tiá₂ dsa₂ i₂chen₄ 'éi₂.

35 Jme₁ca₂'uîin'₂ 'éi₂, jaun₂ ca₂juá'₂ Gamaliel ca₂tsí'₃ dsí₂tan₅₄:

—'Nia'₂ dsa₂ chan₂ juig₂ Israel, jmo₄ 'nia'₂ 'í₁ a₂jma'₅₄ 'nia'₂ dsa₂ ně₅.

36 Dsá₂ 'au'₂ 'nia'₂ jmo₄ a₂ca₂lë₃, ma₂ŋó₃ ca₂la₂ 'lióng₂ ŋi₂, ca₂nau₂ Teudas a₂juá'₂ a₂lîin₅ dsa₂ 'uan'₂ dsa₂ dsen₅₄. Jaun₂ ca₂jme₃quiong'₅₄ con'₂ quén₂

'ñiá₂-lón₂ dsa₂ ñe'₂. La₁ jme₁ca₂jñag'₃ dsa₂, ca₂le₃jín₃ dsa₂ i₂jme₁quaiain'₅₄ ně₃ ca₂i₃léin₂ jma₃quén₅.

37 Cang₂jaun₂, jmig₄jme₁ca₂tion₃ dsa₂ si₂, ca₂nau₂ Judas i₂chan₂ Galilea. Ján₃ bá₄ le₂jaun₂ juin₅ dsa₂ ca₂jme₃quiong'₅₄ quió'₅. La₁ ján₃ bá₄ ca₂jñag'₃ dsa₂. Ca₂le₃jín₃ bá₄ dsa₂ i₂jme₁quaiain'₅₄ ně₃ ca₂i₃léin₂ tsi₁rě₂jain₅₄ táng₃ jme₁ma₂jon₅'éi₂.

38 Jaun₂ lě₃, tsá₃ 'e₂ jmag'₅₄ dsa₂ ně₅, tsá₃ lě₁tón'₂ 'nia'₂ m'₅₄ quaiain'₅₄. Ia₁ ně₁jua'₂ jág₁ ně₅ lě₅ cosa quió'₅ dsa₂ mi₂güig₃, a₂lě₁dsi₃'én₂ bá₄ ně₅.

39 La₁ia₁ ně₁jua'₂ lě₅ cosa quió'₅ Diú₄, tsá₃ a₁jaun₂ le₃qui'₅₄ 'nia'₂ jmig₄ a₂'éng'₄. Jaun₂ 'í₁ jmo₄ ia₁ con'₂ tsá₃ ñó₅ ně₁jua'₂ quian'₅₄ Diú₄ quín'₂ 'nia'₂.

40 Jaun₂ ca₂nág₂ jág₁ jaun₂ ca₂le₃jín₃. Jaun₂ ca₂tě'₃ táng₃ dsa₂ i₂chen₄ quián₅ Jesús 'éi₂. Jaun₂ ca₂jmo₃ dsi₂tan₅₄ 'éi'₃ a₂bóg₂ dsa₂. Jaun₂ ca₂jné₃ táng₃ tsá₃ cuě₂₃ jmig₄ jua'₅₄ a₂'ě₂ guě₄ dsa₂ 'éi₂ jág₁ a₂'iin₂₃ Jesús. Jaun₂ ca₂lió₂ bá₄ jaun₂ ně₃.

41 Jme₁ca₂'uin₂ dsa₂ i₂chen₄ quián₅ Jesús 'éi₂, jin₄ dsi₂tan₅₄, jmo₂₃ 'io'₂, ia₁ ca₂cuě₃ Diú₄ jmig₄ ca₂i₃ñí₂ o₂guí'₃ o₄quió'₄ Jesús.

42 Jaun₂ caun₂ ca₂i₁nioi₁₂ bá₄ jme₂tiin₂₃ dsa₂ jág₁ dse₃ quió'₅ Jesucristo ca₂le₃jě₃ jmig₄, lia'₂ i₁dsi₅ guá'₅ templo, lia'₂ dsi₂néi₂ quió'₅ dsa₂ ně₃.

6

*Ca₂'nai'₂ guion₃ dsa₂ i₂jme₃'o₅₄**

1 Jm_{ig}₄ jaun₂ caun₂ dsi₂juín₂ bá₄ dsa₂ i₂'én₂. Jaun₂ dsa₂ i₂dsia₅ jág₁ jmei₅ griego ca₂jí₂ ca₂tsí'₃ dsa₂

* 6: o₃, diáconos. 'Nio'₂ ja₁ton₅ Hechos 21:8; Filipenses 1:1.

i₂dsia₅ jág₁ jmei₅ arameo. Ca₂juá'₂ 'iín₂₃ 'io₅₄ 'nág₂ chan₂ quiáin₅ tsá₃ lín₄ dse₃ jme₁cuë'₅ dsa₂ jui₁lia'₂ 'e₂ má₃ dsió'₅ ca₂le₃jě₃ jmig₄.

² Jaun₂ ta₁guia₃-tín₂ dsa₂ i₂chen₄† quián₅ Jesús ca₂ñí'₂ ca₂le₃jín₃ dsa₂ i₂'én₂, jaun₂ ca₂juá'₂:

—Tsá₃ dse₃ jua'₅₄ a₂tí₅ jnia'₅₄ a₂'ě₄ jnia'₅₄ jág₁ quió'₅ Diú₄ a₂jme₁ti₁ jnia'₅₄ ne₄ mesas a₂dsio'₅₄ jnia'₅₄ má₃.

³ Jaun₂ lě₃ rin'₅₄ jniog₄, 'in₅₄ 'nia'₂ guion₃ dsa₂ tě₃jín'₄ 'nia'₂, i₂'ei₅ jág₁ a₂'en₅₄ dsí₅, a₂rě₂rin₅ Jme₂dsí₂ Jñi₅ tě₂dsí₅, jaun₂ cuë'₅₄ 'nia'₂ ta₁ ně₅.

⁴ Jnia'₅₄ guë'₂ caun₂ qui₁chei₅₄ Diú₄, caun₂ qui₂jme₁tín₅ jnia'₅₄ dsa₂ jág₁ quió'₅ Diú₄.

⁵ Jaun₂ ca₂le₃jín₃ dsa₂ ca₂tě₂ dsí₅ a₂ně₅, jaun₂ ca₂quióin'₂ dsa₂ i₂chen₂ Esteban i₂'én₂ 'ñio₅ lín₃, i₂rě₂rin₅ Jme₂dsí₂ Jñi₅ tě₂dsí₅; Fe₂li₄ ně₃, Prócoro, Nicanor, Timón, Parmenas, Nicolás ně₃ i₂lín₅ jan₂ dsa₂ chan₂ Antioquía i₂jme₁ma₂gue₃ le₂jñiá₅ 'Éi'₃ Juá'₅ quió'₅ dsa₂ judíos.

⁶ Jaun₂ ca₂o₃jñia₃ dsa₂ dsa₂ guion₃ i₂ca₂'iín₃ 'éi₂ ja₁tión₂ dsa₂ guia₃-tín₂, jaun₂ qui₂ca₂quiog₂ gu₂ ne₄ quió'₅ dsa₂ guion₃ 'éi₂, ca₂chi₃lén'₂ Diú₄.

⁷ Jaun₂ caun₂ ca₂i₃'ág₃ jág₁ quió'₅ Te₁gui'₅₄ jě₄ juig₂ Jerusalén, jaun₂ caun₂ ca₂i₃juín₂ bá₄ dsa₂ i₂ca₂rě₃'én₂, ca₂tě₂ i₂jme₁lín₄ jme₂dsa₂ quián₅ dsa₂ judíos ca₂guein₃ jág₁, ca₂rě₃'én₂ juín₅.

Ca₂jñá'₃ dsa₂ Esteban

⁸ Esteban, dsa₂ i₂'ñio₅ lín₃ ma₂cuë₃ Diú₄ jui₅bí₂, ma₂jme₂'o₅₄ ně₃, i₂'éi₂ jme₁jmo₂₃ 'lióng₂ léi₄ dsi₂gó'₃ dsi₅ jin₄ dsa₂ juig₂.

† 6:2 griego: apóstolous.

⁹ Jaun₂ i₂lin₅₄ dsa₂ quián₅ guá'₅ sinagoga i₂jme₁tě'₂ dsa₂ Libertinos, quiain'₅₄ i₂lin₅₄ dsa₂ chan₂ Cirene, i₂lin₅₄ i₂chan₂ Alejandria, i₂chan₂ Cilicia, i₂chan₂ juig₂ ja₁tén₄ 'uë₃ Asia ně₃, ca₂jme₃lióg₃ ca₂tsín₂ quian'₅₄ Té₂.

¹⁰ La₁ tsá₃ ca₂tio₃, ia₁ a₂nio₅ dsi₄ 'éi₂, tiin₂ 'a₂ lia'₂ ŋag₃, ia₁ Jme₂dsi₂ Jñió₅ bá₄ cuë₅ bí₂.

¹¹ Jaun₂ ca₂lái₂ dsa₂ i₂jáng'₃ jág₁ tě₂jág₁, a₂juá'₂ a₂ma₂nág₂ juá'₂ Té₂ 'iin₂₃ 'lig'₅₄ Moisés, 'iin₂₃ 'lig'₅₄ Diú₄ ně₃.

¹² Jaun₂ le₂jaun₂ ca₂tóin'₂ co₂mi'₅₄ jin₄ dsa₂ juig₂ quian'₅₄ dsi₂gui'₅₄ can'₅₄, tě₅juá'₅ ně₃, ca₂jmaí'₂ mi'₅₄ Té₂, ca₂ŋau'₃, ca₂i₁jo₅₄ ne₄ dsi₂tan₅₄ quián₅ guá'₅.

¹³ Jaun₂ ca₂'nai'₂ ján₃ dsa₂ i₂jmo₃ jág₁ tě₂jág₁ a₂'ni₃ Té₂. Jaun₂ ca₂juá'₂:

— Dsa₂ ně₅ caun₂ qui₂juá'₂ 'lig'₅₄ 'ě₂₃ guá'₅ jñió₅, 'ě₂₃ 'Éi'₃ Juá'₅ ně₃.

¹⁴ Ján₃ bá₄ ma₂ca₂néi₁ jnia'₅₄ juá'₂ i₂ně₅ a₂'én₂ Jesús chan₂ Nazaret guá'₅ a₂jme₃tsín₃ tag₄ chí'₅ ca₂quiog₂ Moisés.

¹⁵ Jaun₂ dsi₂tan₅₄ quiain'₅₄ ca₂le₃jín₃ guě₄ dsa₂ i₂jme₁tion'₅₄ le₁ŋi'₂ ja₁jaun₂, ca₂jín₂ Té₂, a₂ma₂jniá₂ dsi₂ne₄ 'éi₂ lia'₂ jniá₂ jan₂ ángel.

7

Jág₁ ca₂ton₃ Esteban

¹ Jaun₂ ca₂ŋag₃ jme₂dsa₂ dsen₅₄ ca₂ŋí'₃ Té₂:

— ¿Dson'₂ dsau₅ ca₂le₃jě₃ a₂juá'₂ dsa₂ ně₅?

² Jaun₂ ca₂ŋag₃ 'éi₂:

— Rín'₅₄ jniog₄, 'nia'₂ dsa₂ can'₅₄ quián₂ ně₃, nei₂ 'nia'₂ a₂juá'₄ jniá₂ la₂. Diú₄ 'uan'₂ quián₂ jniog₄ ca₂jme₃jniai₂₃ ne₄ jmei₂ jniog₄ Abraham lia'₂ con'₂

jme₁'ein₅₄ 'uë₃ Mesopotamia né₃ a₂dsi₃guá₃ juig₂ Harán.

³ Jaun₂ ca₂juá'₂ Diú₄: “Tí₃ 'uë₃ quiáng'₂, tén₃ ca₂le₃jín₃ o₁rín_g'₂, gua₂ jui₅ 'uë₃ ja₁i₁'ë₃ jniá₂.”*

⁴ Jaun₂ ca₂ηó₃ Abraham ca₂o₃'iin₃ 'uë₃ Caldea jaun₂, ca₂i₁gua₂ juig₂ Harán. Cang₂ jaun₂ ca₂jon₃ bá₄ jmei₂. Jaun₂ Diú₄ bá₄ ca₂o₃jñia₃ Abraham 'uë₃ la₂ ja₁tián'₄ 'nia'₂ rē₂nē₃.

⁵ La₁ tsá₃ jua'₅₄ 'e₂ ca₂cuë₃ Diú₄ 'uë₃ la₂, on₃ guë'₂ ja₁chi'₃ caun₂ tag₅₄ jua'₅₄ ca₂cuë₃. La₁ ca₂cuë₃ bá₄ Diú₄ já_g₁ quió'₅ a₂cuë₃ 'uë₃ la₂, a₂jmo₃ le₃cha₂ quió'₅ chi'₂ quián₅ bá₄ Abraham jē₁ma₂join₂₃, o₁jñia'₅₄ guë'₂ jmig₄ jaun₂ tsá₃ chi'₂ quián₅ Abraham jme₁chan₂ 'i₁jan₂.

⁶ Jaun₂ ca₂juá'₂ Diú₄ já_n₃, ca₂le₃jín₃ chi'₂ dsio₄ Abraham tiain'₃ ju₁lia'₂ ja₁tián'₄ dsi₂nau₂ caun₂ 'uë₃ a₂tsá₃ cuí'₅, qui₃ñág₃ uig₅ con'₂ quén₂ 'ñiá₂-láu₂ ηi₂ a₂lē₁jmo₃ ta₁ jme₂ti₃ ta₁ ne₄ dsa₂.

⁷ La₁ já_n₃ bá₄ ca₂juá'₂ Diú₄ ca₂tsí'₃ Abraham: “Jniá₂ bá₄ 'ë₄ uig₅ ne₄ juig₂ i₂jmá'₂ dsa₂ quiáng₃ i₂tion'₅₄ i₂lē₁jme₂ti₃ ta₁ ne₅₄. Cang₂ jaun₂ guion₅₄ dsa₂ juig₂ quiáng₃ 'uín₃ juig₂ jaun₂, jaun₂ ja₃lén₂ jme₃ti₃ ta₁ ne₃ ja₁lá₃.”†

⁸ Já_n₃ bá₄ ca₂jmo₃ Diú₄ caun₂ já_g₁ quian'₅₄ Abraham, a₂ti₃ ni₁lo₁ ta₁jín₂ chi'₂ dsa₂ ηe'₂ tsi₁jon₂ quián₅, a₂li'₅₄ já_g₁ a₂tē₃ron₅₄. 'Uig₅₄ jaun₂, jme₁ca₂rē₃chán₃ ja₁ñi'₅₄ i₂ca₂rē₃chén₃ Isaac, ca₂ti₃ Abraham ni₁lo₁ Isaac jme₁ma₂'ein₅₄ jñia₃ jmig₄. Já_n₃ bá₄ le₂jaun₂ ca₂jmo₃ Isaac quian'₅₄ Jacob ja₁ñi'₅₄. Já_n₃ bá₄ le₂jaun₂ ca₂jmo₃ Jacob quian'₅₄ ta₁guia₃-tín₂ ja₁ñi'₅₄

* 7:3 Génesis 12:1. † 7:7 Génesis 15:13-14.

i₂ca₂lin₃ jmei₂ ta₁guia₃-tín₂ juig₂ ja₁tén₄ Israel.

9 'Ca₂le₃jín₃ chi'₂ ja₁ñi'₅₄ Jacob i₂jme₁lín₄ jmei₂ jniog₄ ma₂líg'₂ 'éi₂, ca₂i₃uig₅₄ dsí₅ jiin₂ Sě₄ riin'₅₄. Jaun₂ ca₂'ni₃ 'éi₂ jaun₂ ca₂tág₃ dsa₂ ca₂tě₂ 'uě₃ Egipto. La₁ Diú₄ bá₄ ca₂jmo₃ 'í₁ quió'₅ Sě₄,

10 qui₂ca₂lió₂ ca₂le₃jě₃ 'e₂ ca₂i₃ñi'₂ ca₂jmo₃ ca₂rě₃ñi'₂ dsí₅ 'ñio₅ lin₃. Ján₃ bá₄ ca₂jmo₃ Diú₄ a₂chéin'₅ dse₃ quiaín'₅₄ i₂tě'₂ dsa₂ Faraón, i₂lín₅ rag₅₄ quián₅ 'uě₃ Egipto. Rag₅₄ 'éi₂ ca₂'iin₃ Sě₄ a₂léin₂ dsi₄má'₂ 'uě₃ Egipto. Ján₃ bá₄ ca₂jmo₃ a₂nio₃ ne₄ 'éi₂ dsi₂néi₂ quió'₅.

11 'Cang₂ jaun₂ ca₂gua₃ ñi₂ a₂ca₂ñág₃ uig₅ 'ñio₅ lin₃ a₂ca₂rě₃'ín₃ a₂guě'₃ dsa₂ ta₁caun₂ 'uě₃ Egipto quian'₅₄ 'uě₃ Cana'án. Jaun₂ ca₂le₃jín₃ jmei₂ jniog₄ ma₂líg'₂ tsá₃ ma₃'e₂ jnio'₂ a₂guě'₃.

12 Jme₁ca₂rě₃ñi₅ Jacob a₂cha₂ trigo 'uě₃ Egipto, jaun₂ ca₂chein₃ chi'₂ ja₁ñi'₅₄ ja₁jaun₂, i₂ca₂lin₃ jmei₂ jniog₄ ma₂líg'₂. A₂jaun₂ guě₄ le₂'uig₅₄ ca₂i₁lein₅₄.

13 Jme₁ca₂tě₂ tin₃ ráun₂i₁len₅₄ rñn'₅₄ Sě₄ 'uě₃ Egipto, jaun₂ ca₂jmo₃ Sě₄ a₂ca₂rě₃ñi₅ a₂lě₅ riin'₅₄ dsa₂ 'éi₂. Jaun₂ guě₄ ca₂rě₃ñi₅ rag₅₄ quián₅ Egipto 'e₂ tsi₁jón₂ lín₅ Sě₄.

14 Jaun₂ guě₄ ca₂tsí'₃ Sě₄ dsó₂ riin'₅₄ a₂dsi₃quiaín₂ gui'₅₄ Jacob jmei₂, quian'₅₄ ca₂le₃jín₃ o₁rñn'₅₄ i₂jme₁lě₂ 'nag'₂ ne₂guióg₂ rě₂dsí₂ guia₃-ñiá₂ (75) dsa₂.

15 Le₂jaun₂ ca₂lě₃ a₂ca₂ñó₃ Jacob ca₂i₁gua₂ 'uě₃ Egipto. Ja₁jaun₂ ca₂join₃ cang₂ jaun₂. Jaun₂ ja₁jaun₂ bá₄ qui₂ca₂dsan₃ chi'₂ quiaín₅ i₂'nió'₄ jmei₂ jniog₄ ma₂líg'₂.

16 Ni₁mu₁₂ ca₂o₃con₃ dsa₂ cang₂ jaun₂ ja₁chei₂ Siquem. Ca₂o₃'ó₃ tau₂ 'ŋio₅ a₂ca₂l_á₃ Abraham quió'₅ tsi₁jon₂ chi'₂ quián₅ Hamor ja₁chei₂ Siquem jaun₂, quian'₅₄ caun₂ 'ma'₅₄ a₂ca₂l'₃.

17 'Jme₁ja₂quián₃ jmig₄ le₃ti₃ jág₁ ca₂cuë₃ Diú₄ 'iin₂₃ 'ŋiog₅ ca₂cuë'₃ Abraham, ca₂i₃juín₂ 'ŋio₅ lin₃ dsa₂ israelitas 'uë₃ Egipto.

18 Jaun₂ ca₂guá₂ jan₂ rag₅₄ i₂tsá₃ cuin₅ Së₄, ca₂jme₃lióg₃ jmo₂₃ 'éi'₃ 'uë₃ Egipto.

19 Rag₅₄ 'éi₂ ca₂jme₃gain₂₃ dsa₂ go₄ jniog₄, ca₂jmái'₂ dsa₂ can'₅₄ quián₂ jniog₄ ca₂jmo₃ 'éi₂ tion₅₄ a₂téin₂ guein₂ dsa₂ ŋe'₂ i₂të₂ca₂rë₃chán₃, ia₁jaun₂ dsiáin₃.

20 'Jmig₄ jaun₂ ca₂rë₃chán₃ Moisés. Guein₂ 'éi₂ ca₂të₂ dsí₅ Diú₄, jaun₂ ca₂jme₃juag'₂ chog₅₄-jmei₂ 'ni₅ tsi'₂ dsi₂néi₂ quió'₅.

21 Jme₁ca₂të₂ jmig₄ a₂tóin₂ guein₂ 'éi₂, jaun₂ ja₁míg₄ 'ŋiog₅ rag₅₄ quián₅ Egipto ca₂tág₃ ca₂jme₃juag'₂ co₂'nió'₄ ja₁ŋi'₅₄ 'ŋiog₅.

22 'Uig₅₄ jaun₂, ca₂rë₃tín₃ Moisés ca₂le₃jë₃ a₂ŋi₅ dsa₂ chan₂ Egipto, jaun₂ ca₂rë₃'uáin'₃, 'ŋio₅ lin₃ ŋi₅ 'e₂ jág₁ dsia₃, ŋi₅ a₂ca₂jmo₃ në₃.

23 'Jme₁ma₂'ein₅₄ të₂láu₃ ŋi₂, jaun₂ ca₂ŋe₄ Moisés ca₂i₁jii₁₂ dsa₂ go₅₄ dsa₂ israelitas.

24 Ja₁jaun₂ ca₂jii₂ jan₂ dsa₂ chan₂ Egipto jmái'₂ uig₅ cuë'₅ jan₂ dsa₂ go₅₄. Jaun₂ ca₂nau₂ Moisés 'nei₂ quian'₅₄ i₂cuë'₅ riin'₅₄, ca₂jŋi'₃ dsa₂ 'éi₂, ca₂lióin₂ dsa₂ go₅₄.

25 Ia₁ ca₂i₃jio₅ dsí₅ jaun₂ le₃l'₄ dsa₂ israelitas riin'₅₄, a₂jmo₃ Diú₄ lió₂ të₂le₃ quian'₅₄ 'éi₂. La₁ tsá₃ ca₂rë₃l'₄ guë'₂ dsa₂.

26 Jme₁jnia₃ jaun₂, ca₂jen'₂ Moisés on₃ dsa₂ israeli-
tas i₁tion'₅₄ quín'₂. Jaun₂ jme₁'nio₃ Moisés dsioin₃
mi'₅₄. Jaun₂ ca₂juá'₂: “Rín'₂ bá₄ 'nia'₂. ¿'E₂ lë₃
qui₂jma'₅₄ 'nia'₂ uig₅ le₂jang'₂ le₂jang'₂?”

27 'Jaun₂ i₂jme₁'en₅₄ cuë'₅ rin'₅₄ ca₂'liain'₃ Moisés
cau₅, jaun₂ ca₂juá'₂: “¿'Ein₂ ca₂cuë'₃ 'ne₂ ta₁ líng'₅
dsi₂tan₅₄ i₂qui₂dsi₅ 'éi'₃ ja₁con₂ jnia'₅₄?”

28 ¿'Niog'₂ jnág'₄ jniá₂ ján₃ jui₁lia'₂ ca₂jñíg'₃ dsióg₂
dsa₂ chan₂ Egipto 'éi₂?”‡

29 Jme₁ca₂nág₂ Moisés le₂në₅, co₂tan₅₄ ca₂cuing₃
ca₂ñó₃ jui₅ 'uë₃ ja₁chei₂ Madián. Ja₁jaun₂ ca₂i₁gua₂
co₂'nió'₄ a₂lín₅ dsi₂nau₂. Ja₁jaun₂ ca₂rë₃chán₃ on₃
chi'₂ quiáin₅.

30 'Të₂láu₃ ñi₂ cang₂ jaun₂, caun₂ ja₁lë₄ 'uë₃ quein₂
quián₅ má'₂ ja₁chei₂ Sinaí, ja₁jaun₂ ca₂jme₃jnia₅
jan₂ ángel jë₄ si₂ chi₁guí'₂ caun₂ ni₁'ma₂ taun₅ a₂cau₂.

31 Jaun₂ ca₂i₃gó'₃ dsí₅ Moisés jme₁ca₂jág₃ a₂në₅,
jaun₂ jme₁ca₂jme₃quiáin₃ guë₄ ia₁ 'nio₃ jme₁jág₃
guë₄ dse₃. Të₃jë₄ ñó₃ jaun₂ jme₁ca₂nág₂ jág₁ quió'₅
Te₁gui'₅₄ a₂ca₂juá'₂:

32 “Jniá₂ bá₄ líng₅ Diú₄ quián₅ dsa₂ quiáng'₂
ma₂líg'₂, Diú₄ quián₅ Abraham, quián₅ Isaac, quián₅
Jacob në₃.”§ Jaun₂ ca₂jme₃lióg₃ ca₂jlen₃ Moisés
ca₂rë₃gó'₅ 'ñio₅ lín₃, tsá₃ ma₃tiá₂ dsí₅ jág₃.

33 'Jaun₂ ca₂juá'₂ táng₃ Te₁gui'₅₄: “Jniá'₃ lau₂ ton₅
tag'₅₄, ia₁ 'uë₃ jñió₅ bá₄ ja₁chéng'₄ në₅.

34 Jág₅ bá₄ jniá₂ a₂chan₂ uig₅ dsa₂ quiáng₃ 'uë₃
Egipto, qui₂nag₅ bá₄ jniá₂ a₂qui'₂-o₂₃. Jaun₂ lë₃

‡ 7:28 Éxodo 2:14. § 7:32 Éxodo 3:6.

ca₂sióng₃ ia₁ a₂loin₅₄. Nia₅, ia₁jaun₂ tsag₅₄ jniá₂ guang'₅₄ ju₅ Egipto".*

35 'O₁ñia'₅₄ la₂ tsá₃ jme₁'nio₃ dsa₂ go₄ Moisés le₂jniá₅, ia₁ ca₂juá'₂: “¿'Ein₂ ca₂'in₃ 'ne₂ a₂líng'₅ dsi₂tan₅₄ i₂qui₂dsi₅ 'éi'₃ ja₁con₂ jnia'₅₄?” la₁ Diú₄ ně₃ ca₂chein₃ Moisés a₂lín₅ co₂'nió'₄ dsi₂tan₅₄ i₂lió₂, tē₂le₃ quian'₅₄ ángel i₂ca₂jme₃jnia₅ jē₄ ni₁'ma₂ taun₅ jaun₂.

36 Moisés bá₄ dsa₂ i₂ca₂'uín'₂ dsa₂ can'₅₄ quián₂ jniog₄ ma₂líg'₂ 'uē₃ Egipto i₂qui₂ca₂jmo₃ ján₃ 'líong₂ léi₄ juē'₂ a₂dsi₂gó'₃ dsi₅ ně₃. Léi₄ jaun₂ ca₂jmo₃ Moisés 'uē₃ jaun₂, quian'₅₄ ne₄ Jmi₁ñí'₄ Guéin₂,† quian'₅₄ 'uē₃ quein₂ co₂'ñiog₅ ja₁ca₂i₁nioi₁₂ tē₂láu₃ ñi₂.

37 Jaun₂ 'ñiog₅ Moisés 'éi₂ bá₄ ca₂tsí'₃ dsa₂ israelitas: “A₂chen₃ Diú₄ jan₂ dsa₂ i₂'ē₂ jág₁ quián₅, i₂lín₅ dsa₂ go'₄ 'nia'₂ guiong'₅₄, ju₁lia'₂ ca₂chei₃ jniá₂. Jaun₂ tón'₂ 'nia'₂ ju₅ jág₁ quió'₅ 'éi₂.”‡

38 Ján₃ bá₄ Moisés 'éi₂ jme₁'en₅₄ quian'₅₄ dsa₂ juig₂ 'uē₃ quein₂ co₂'ñiog₅ jaun₂. Jme₁'ein₅₄ quian'₅₄ ángel i₂ca₂juá'₂ jág₁ má'₂ Sinaí. Ján₃ bá₄ jme₁'ein₅₄ quian'₅₄ 'lag₄ tsi₁jon₂ jmei₂ jniog₄. Moisés 'éi₂ bá₄ ján₃ i₂ca₂gue₃ jág₁ ca'₅₄, jaun₂ guē₄ ca₂ñág₃ tē₂le₃ quián₂ jniog₄ táng₃.

39 'La₁ dsa₂ quián₂ jniog₄ ma₂líg'₂ ně₃, tsá₃ ma₃ca₂jme₃ti₃, tsá₃ ma₃ca₂ñág₂ gau₂ jág₁ quió'₅ Moisés. Ca₂chei'₃ cau₅, jme₁'nio₃ jme₁dsi₃lein₃ táng₃ ju₅ 'uē₃ Egipto.

* 7:34 Éxodo 3:5,7,8,10. † 7:36 Ján₃ bá₄ chei₂ Jmi₁ñí'₄ 'Ma₂ta₅.

‡ 7:37 Deuteronomio 18:15.

40 Jaun₂ ně₃ ca₂tsí'₃ Aarón§ ca₂juá'₂: “‘Niog₂ jnia'₅₄ jmog'₅₄ diú₄ dsa₂ lag₄ i₂dsi₃lén₂ ne₄ jui₅ quián₂ jniog₄. Ia₁ tsá₃ ne₄ 'e₂ ca₂jén'₃ Moisés 'éi₂ i₂ca₂'uág'₂ jniog₄ 'uë₃ Egipto.’”*

41 Jaun₂ ca₂jmó'i'₂ jan₂ guein₂ ca₁jui₅ co₂'nió'₄ i₂lín₅ diú₄, qui₂ca₂jme₃dsiain₂₃ já'₂ quiáin₅ qui₂ca₂cuin₃ diú₄ lag₄ 'éi₂. Jaun₂ ca₂jmo₃ 'io'₂ quian'₅₄ a₂ca₂jmo₃ quian'₅₄ gu₂ guoin₅₄.

42 Jaun₂ co₂ñei'₅₄ ca₂jmo₃ Diú₄ cau₅, tsá₃ ma₃ca₂jme₃quian'₅₄ dsa₂ 'éi₂, ju₁jmo₁₂ bá₄ con'₂ tñin₂ guoin₅₄. Jaun₂ ca₂jme₃lióg₃ dsa₂ 'éi₂ ca₂chi₂ca₂lén'₂ nei₅ a₂le₁'ág₄† guei'₅₄. Ia₁ le₂ně₅ rē₂ton₅ ne₄ Si₂ a₂ca₂jmo₃ dsa₂ i₂jme₁'ě₂ jág₁ quián₅ Diú₄ ma₂líg'₂:

'Nia'₂ dsa₂ chan₂ Israel, ¿'e₂ lín'₂ 'nia'₂?

¿Ca₂jme₁dsian'₅ 'nia'₂ já'₂

ca₂dsia'₅₄ ca₂jén'₅₄ 'nia'₂ ne₃ jniá₂

lia'₂ con'₂ jme₁quian'₅₄ jniá₂ 'nia'₂

tě₂láu₃ ñi₂ 'uë₃ quein₂ co₂ñiog₅ jaun₂?

43 On₃jua'₅₄ le₂jaun₂.

Ia₁ guá'₅ chéi₂ quió'₅ diú₄ Moloc bá₄ ca₂quian'₂ 'nia'₂

quian'₅₄ nei₅ diú₄ Renfán,‡

nió'₄ a₂qui₂ca₂jmo'₅₄ 'nia'₂ guiong'₅₄,

a₂jaun₂ bá₄ ca₂chi₂ca₂len'₄ 'nia'₂.

'Uig₅₄ jaun₂, 'uín'₄ jniá₂ 'nia'₂ 'uë₃ quiáng'₂,

tsag₅₄ jniá₂ tě₂le₃ ó₃ guě₄ ja₁niog₅ 'uë₃ Babilo-

nia.§

§ 7:40 Jme₁lín₄ Aarón rin'₅₄ Moisés. 'Nio'₂ ja₁ton₅ Éxodo 4:14.

* 7:40 Éxodo 32:1. † 7:42 nei₅: Lia'₂ chi₁ton₅ ne₄ Si₂ quió'₅ Diú₄,

lě₅ caun₂ cosa a₂tsá₃ 'i₄jme₂dsí₂. ‡ 7:43 Renfán: co₂'nió'₄ a₂jme₁tě'₂

dsa₂ egipcios planeta Saturno, ca₂jme₃juag'₂ dsa₂. § 7:43 Amós

5:25-27.

44 "Uë₃ quein₂ jaun₂, dsa₂ can'₅₄ quián₂ jniog₄ ma₂líg'₂ jme₁quian₅ guá'₅ tabernáculo ja₁jme₁rë₂'ma₄ ni₁cang₁ a₂le₁ton₅ ta₁guia₃ 'Éi'₃ Juá'₅. Guá'₅ tabernáculo jaun₂ ca₂lë₃ con'₂ lë₅ jág₁ ca₂cuë₃ Diú₄ ca₂cuë'₃ Moisés, jme₁ca₂'ë₃ Diú₄ nió'₄ le₂jniá₅ 'a₂ lia'₂ lé₂.

45 Dsa₂ quián₂ jniog₄ ma₂líg'₂ ca₂gue₃ guá'₅ jaun₂ co₂'nió'₄ ca₂ñág₃ dsa₂ can'₅₄ quián₅. Jaun₂ dsa₂ i₂jme₁quian'₅₄ Josué ně₃ ca₂cáun₃ lia'₂ con'₂ jme₁ca₂lí'₃ 'uë₃ quió'₅ dsa₂ juig₂ siá'₂, i₂ca₂'uín'₂ Diú₄ ia₁jaun₂ cha₂ ja₁tian'₃ 'éi₂. Le₂jaun₂ ca₂lë₃ ca₂lia'₂ ca₂të₂ jmig₄ a₂ca₂rë₃chán₃ David.

46 Ca₂jmo₃ Diú₄ dse₃ dsí₅ ja₁con₂ Rag₅₄ David, jaun₂ 'éi₂ ně₃ jme₁'nio₃ jmóg'₃ caun₂ ja₁guá₃ Diú₄ quián₅ Jacob.

47 La₁ Salomón bá₄ i₂ca₂chi'₃ 'né₅ quió'₅ Diú₄.

48 'La₁ Diú₄ i₂juin'₂ guë₄ lin₃ tsá₃ guá₅ dsi₂néi₂ guá'₅ a₂jmóg'₅ dsa₂ mi₂güig₃. Jui₁lia'₂ ca₂juá'₂ Diú₄ tē₂le₃ quian'₅₄ dsa₂ i₂jme₁'ë₂ jág₁ quián₅ ma₂líg'₂:

49 Guei'₅₄ i₂juig₃ bá₄ ja₁gua₁₂
ja₁lë₄ ne₄ta₁ quió₃,

gua'₅₄ 'uë₃ ně₃ jui₁lia'₂ ja₁tióng₂ tag₃.

¿'E₂ bá₄ 'né₅ jmó'₂ 'nia'₂ quió₃? juá'₂ Te₁gui'₅₄,

¿O₃ já'₄ bá₄ lé₂ le₃jan₄ jniá₂?

50 ¿On₁ jniá₂ bá₄ ca₂jmo₃ quian'₅₄ gu₃-tag₃
ca₂le₃jë₃ 'e₂ a₂cha₂?*

51 (Jaun₂ caun₂ ca₂juá'₂ bá₄ Té₂ tsí'₅ dsa₂):

—'Nia'₂ ně₃, lia'₂ ma₂ja₂nó'₅ jaun₂ bá₄ 'nia'₂ cang₄ dsei'₂, jaun₂ lë₅ rë₂guá'₄ 'nia'₂ quian'₅₄ tē₂'au'₂

* 7:50 Isaías 66:1-2.

ju₁lia'₂ dsa₂ i₂tsá₃ cui_{n5} Diú₄.† Caun₂ 'ñia'₅₄ co₂tan₅₄
bá₄ 'nia'₂ Jme₂dsí₂ Jñi_{ó5}. I₂co₂rín'₂ bá₄ 'nia'₂ quiang'₅₄
dsa₂ can'₅₄ quiáng'₂ ma₂líg'₂.

52 ¿'Ein₂ dsa₂ i₂jme₁'ě₂ jág₁ quián₅ Diú₄ jua'₅₄
i₂tsá₃ ca₂jma'₂ dsa₂ can'₅₄ quián'₂ 'nia'₂ ma₂líg'₂?
Qui₂ca₂jme₃dsiain₂₃ bá₄ dsa₂ i₂qui₂ca₂'ě₂ jág₁ le₂jñiá₅
ca₂'in₃ jan₂ i₂dsen₃ lín₃, i₂jiá₃. La₁ jme₁guan₃ i₂'éi₂
ně₃, ca₂jñin'₅₄ 'nia'₂ jaun₂ ca₂jñí'₃.

53 'Nia'₂ guë'₂ i₂ca₂gue'₅₄ 'Éi'₃ Juá'₅ të₂le₃ quian'₅₄
ángeles, tsá₃ jme₂tí'₁ guë'₂ 'nia'₂ 'Éi'₃ jaun₂.

Ca₂jon₃ Té₂

54 Jme₁ca₂nág₂ jág₁ a₂ca₂juá'₂ Té₂ jaun₂, ca₂rë₃'néi₃
'ñio₅ lín₃ ca₂lia'₂ qui₂ca₂qui_g'₂ mi₂jan₅₄ a₂'ñiai₅₄ Té₂.

55 La₁ Té₂ ně₃, rë₂rín₅ Jme₂dsí₂ Jñi_{ó5} të₂dsí₅,
ca₂chóg'₃ ne₅₄ guei'₅₄ i₂juí_{g3} jaun₂ ca₂jág₃ a₂co₂tág₅
co₂'né'₅ quió'₅ Diú₄, jaun₂ ca₂jñin₂ Jesús chéin'₅ të₂le₃
gu₂ ne₁ quió'₅ Diú₄ Jmei₂.

56 Jaun₂ ca₂juá'₂ táng₃ Té₂:

—iJag₄! —juá'₂—. Jág₅ jniá₂ rë₂na₄ guei'₅₄ i₂juí_{g3}.
Jin₄ jniá₂ Jaun₅ dsa₂ mi₂güí_{g3} 'ein₅₄ të₂le₃ gu₂ ne₁
quió'₅ Diú₄.

57 La₁ dsa₂ 'éi₂ qui₂ca₂jne₃ rë₂gua₅₄, tsá₃ 'nio₃ nag₃,
qui₂ca₂tóin'₂ co₂mi'₅₄ ca₂guió'₃ jmái'₂ Té₂.

58 Jaun₂ ca₂dsei₂₃ 'ni'₂ juí_{g2}. Jaun₂ ja₁jaun₂
ca₂jñag'₃ quian'₅₄ cang₄. Jaun₂ dsa₂ i₂qui₂ca₂jnú'₂
cang₄ ně₃ ca₂dsia₃ ni₁tsin'₅₄ o₄gú₃ jan₂ dsó₂ chi'₂
i₂jme₁chen₂ Saulo.

59 Të₁lia'₂ tioen'₅₄ qui₂cuë'₅ Té₂ cang₄, jaun₂ ca₂mi₃
Té₂ ca₂tsí'₃ Diú₄ ca₂juá'₂:

† 7:51 lit. “ju₁lia'₂ dsa₂ i₂tsá₃ lo₄ rë₂uing₄.”

—Te₁gui'₅₄ Jesús, guen'₅₄ jme₂dsí₂ quió₃.

⁶⁰ Jaun₂ guë₄ ca₂chi₃jné₃, jaun₂ ca₂guió'₃ tiá₂ ca₂juá'₂:

—Te₁gui'₅₄, tsá₃ jme₁cain'₅₄ dso₄ la₂.

Jme₁ca₂lë₃ juá'₂ le₂në₅, ca₂join₃ jaun₂ në₃.

8

Co₂'en₅ Saulo dsa₂ i₂ma₂'én₂

¹ Jaun₂ caun₂ bá₄'ei₅ jág₁ quió'₅ Saulo a₂ca₂ñi'₃ dsa₂ Té₂. Dsi₂jui₅ jmig₄ jaun₂ bá₄, ca₂jme₃lióg₃ dsa₂ qui₂co₂'ein₃ 'ñio₅ lin₃ ta₁caun₂ nió'₃ dsa₂ i₂lín₅ guá'₅ jë₄ juig₂ Jerusalén. Ca₂le₃jín₃ dsa₂ 'éi₂ ca₂i₃lén₂ tsi₁rë₂jain₅₄ le₂tan₅₄ 'uë₃ Judea quian'₅₄ Samaria. Jñia'₅₄ lia'₂ dsa₂ guia₃-tín₂ i₂chen₄ quián₅ Jesús bá₄ ca₂ñia₃ guë₄ juig₂ Jerusalén.

² I₂lin₅₄ dsa₂ dsen₃ i₂'nio₃ Diú₄ ca₂'óin₂ Té₂, qui₂ca₂'o₃ 'ñio₅ lin₃ o₄quió'₄ 'éi₂.

³ Të₁lia'₂ jaun₂, i₂ñi₅₄ Saulo quiaín'₅₄ r'in'₅₄ qui₂co₂'ein₂₃ dsa₂ i₂'én₂, qui₂dsi₂toin'₅₄ të₂ dsi₂néi₂ qui₂'uín'₂ dsa₂ tsi₁cuin'₂, lia'₂ dsa₂ ñe'₂ lia'₂ dsa₂ m'í₂, qui₂të₂ a₂to'₂ 'né₅ 'má₃.

Ca₂'ë₂ dsa₂ jág₁ dse₃ juig₂ Samaria

⁴ La₁ ca₂le₃jín₃ dsa₂ i₂ca₂'uin₂ juig₂ Jerusalén, ca₂le₃jë₃ ja₁ca₂i₁lein₅₄ qui₂ca₂'ë₂ jág₁ dse₃.

⁵ Jan₂ 'éi₂, i₂chen₂ Fe₂li₄, ca₂ñó₃ caun₂ juig₂ ja₁tén₄ 'uë₃ Samaria ca₂dsia₃ jág₁ tsí'₅ dsa₂ ja₁jaun₂, 'iin₂₃ Cristo.*

⁶ Jaun₂ jme₁ñi'₂ dsa₂ jmo₂₃ tei₄ ca₂le₃jín₃, të₅ dsí₅ nag₂₃ jág₁ a₂juá'₂ Fe₂li₄, ia₁ ján₃ bá₄ ca₂jág₃ dsa₂ léi₄ dsi₂gó'₃ dsi₅ a₂jme₁jmo₅ 'éi₂.

* 8:5 o₃, I₂rë₂'ín₁ quián₅ Diú₄.

7 Ia₁ juin₅ i₂tion'₅₄ jme₂dsí₂ 'lin'₅₄ tē₂dsí₅
qui₂ca₂'lóin₂. Ca₂le₃jín₃ jme₂dsí₂ 'lin'₅₄ 'éi₂
qui₂ca₂'u_{in}₂ qui₂guió'₅. Ján₃ bá₄ juin₅ dsa₂ 'lian'₂,
dsa₂ guian'₅₄ ně₃, qui₂ca₂'lóin₂.

8 'Uig₅₄ jaun₂ 'nio₅ 'io'₂ ca₂jmo₃ dsa₂ juig₂ jaun₂.

9 Juig₂ jaun₂ jme₁chan₂ jan₂ dsa₂ i₂jme₁chen₂
Si₂mu₅₄, i₂jme₁jmo₅ ta₁ a₂chan₂ dsí₅ le₂jñiá₅,
jme₁jme₂gain₂₃ dsa₂ juig₂ Samaria, a₂juá'₂ a₂lín₅
dsa₂ dsen₅₄.

10 Ca₂le₃jín₃ dsa₂, lia'₂ dsa₂ can'₅₄ lia'₂ chi'₂ ně₃,
jme₁nag₂₃ tē₅ dsí₅ jág₁ quió'₅, qui₂dsia₂₃:

—Dsa₂ ně₅ tiin₂ quian'₅₄ juí₅bí₂ quió'₅ Diú₄.

11 Jme₁tón'₂ dsa₂ juí₅ jág₁ quió'₅ gui'₅₄ 'éi₂, ia₁
ma₂líg'₂ bá₄ ma₂já₅ qui₂jme₂gain₂₃ dsa₂ quian'₅₄ bí₂
a₂chan₂ dsí₅.

12 La₁ dsí₂juí₅ jme₁ca₂rě₃'én₂ dsa₂ jág₁ dse₃ quió'₅
Jesucristo a₂ca₂'ě₂ Fe₂li₄ juí₁lia'₂ ja₁gon₂ Diú₄, jaun₂
qui₂ca₂jñó₂ dsa₂ jmig₂ lia'₂ dsa₂ ñe'₂ lia'₂ dsa₂ mí₂.

13 Ján₃ bá₄ ca₂rě₃'én₂ 'nio₅ Si₂mu₅₄ 'éi₂, ca₂jñó₂
jmig₂ ján₃. Jaun₂ guě₄ ca₂jme₃lióg₃ ca₂jme₃quian'₅₄
Fe₂li₄, qui₂jág₅ dsí₂gó'₃ dsí₅ léi₄ juě'₂ a₂jmo₅ 'éi₂.

14 Jme₁ca₂rě₃ñi₅ dsa₂ i₂chen₄ quián₅ Jesús i₂tion'₅₄
Jerusalén, a₂ma₂'én₂ dsa₂ chan₂ 'uě₃ Samaria jág₁
quió'₅ Diú₄, jaun₂ ca₂chein₃ ja₁jaun₂ Pe₄ quian'₅₄
Juan₅₄.

15 Jme₁ca₂dsi₃lén₂ 'éi₂ 'uě₃ Samaria, jaun₂ ca₂mi₃
ca₂tsí'₃ Diú₄ o₄quió'₄ dsa₂ i₂ma₂'én₂ ja₁jaun₂, ia₁jaun₂
guen₃ dsa₂ 'éi₂ Jme₂dsí₂ Jñi₅ ján₃.

16 Ia₁ 'i₁jan₂ dsa₂ 'éi₂ tsá₃ Jme₂dsí₂ Jñi₅ ma₂guan₅
guě₄ ne₄ quió'₅. Jñia'₅₄ con'₂ ma₂jñó₂ jmig₂ bá₄ lia'₂
con'₂ lě₅ 'éi'₃ quió'₅ Te₁gui'₅₄ Jesús.

17 Jaun₂ ně₃ Pe₄ quaiain'₅₄ Juan₅₄ qui₂ca₂quiog₂ gu₂ ne₄ quió'₅ dsa₂ 'éi₂, jaun₂ guě₄ ca₂guein₃ Jme₂dsí₂ Jñi₅.

18 Jme₁ca₂jág₃ Si₂mu₅₄ a₂ca₂sión₃ Jme₂dsí₂ Jñi₅ jme₁ca₂quiog₂ dsa₂ i₂chen₄ 'éi₂ gu₂ ne₄ quió'₅ dsa₂, jaun₂ ca₂jen'₂ cu₄,

19 ca₂juá'₂:

—Cuě₄ jniá₂ ján₃ jui₁lia'₂ bí₂ a₂tín'₂ 'nia'₂ ně₅, ia₁jaun₂ lé₂ le₃jmo₅₄ jniá₂ ján₃ a₂guen₃ dsa₂ Jme₂dsí₂ Jñi₅ jě₁ma₂ca₂co₃ gu₃ ne₄ quió'₅ chi₂jua'₂ 'ein₂.

20 Jaun₂ ca₂ṇag₃ Pe₄ ca₂tsí'₃ dsa₂ 'éi₂:

—Jui₁dsi₂'éng'₂ co₂dsia₅ quian'₅₄ cú'₂ ia₁ 'e₂ lě₃ dsi₂jio₅ 'au'₂ le₂ně₅, a₂líng'₂ a₂lé₂ lá₃ dsa₂ quian'₅₄ cu₄ bí₂ a₂cuě₅ Diú₄.

21 Tsá₃ ca₂tín'₂ 'ne₂ a₂ně₅, ia₁ tsá₃ dse₃ 'ei₅ 'au'₂ ne₄ Diú₄.

22 Co₂dsia₅ tí₃ ca₂le₃jě₃ a₂'lig'₅₄ a₂dsi₂jio₅ 'au'₂ ně₅. Mi₄ ne₄ Te₁gui'₅₄ chi₂jua'₂ 'éin₂ dsáu'₂ 'e₂ lě₃ dsi₂jio₅ 'au'₂ le₂ně₅.

23 Ia₁ léi₄ jniá₂ rě₂rin₅ cosa 'lig'₅₄ tě₂'au'₂; quian'₅₄ dsáu'₂ ně₅ jmo₅ chi₁'ṇeg'₂.

24 Jaun₂ ně₃, ca₂ṇag₃ Si₂mu₅₄:

—Mi₄ 'nia'₂ chei'₅₄ Te₁gui'₅₄ o₄quió₃, ia₁jaun₂ tsá₃ jui₁dsi₂ṇíg₂ a₂ma₂ně₂jua'₅₄ 'nia'₂ ně₅.

25 Jme₁ca₂dsan₃ jáng'₅ Pe₄ quian'₅₄ Juan₅₄ jág₁ dsau₅ a₂dsia₂₃ jág₁ quió'₅ Diú₄, jaun₂ guě₄ ca₂i₃lein₃ jui₅ Jerusalén. Le₂'i₄ jui₅ ja₁i₃lein₃ jaun₂, qui₂ca₂'ě₂ guě₄ jág₁ dse₃ a₂lión₂ dsa₂ le₂tan₅₄ juig₂ ja₁tén₄ 'uě₃ Samaria.

Fe₂li₄ quaiain'₅₄ dsa₂ chan₂ Etiopía

26 Cang₂ jaun₂, ca₂juá'₂ jan₂ ángel quián₅ Te₁gui'₅₄ ca₂tsí'₃ Fe₂li₄:

—Nau₂, gua₂ jui₅ ja₁'uin₂ dsa₂ Jerusalén a₂dsióg₄
'uë₃ Gaza.

Jui₅ jaun₂ dsó₅ jë₄ 'uë₃ quein₂.

27 Jaun₂ ca₂nau₂ Fe₂li₄ ca₂ηó₃. Le₂'i₄ jui₅ ja₁ηó₃
jaun₂, ca₂jein'₂ jan₂ dsa₂ chan₂ Etiopía, i₂jme₁lín₄
jan₂ dsa₂ eunuco, dsa₂ dsen₅₄ i₂niog₅ gu₂ cu₄ quió'₅
'io₅₄ Candace i₂gon₂ 'uë₃ Etiopía. Dsa₂ 'éi₂ ηei₅₄
i₁chi₂i₁lein'₄ Diú₄ juig₂ Jerusalén.

28 Ma₂'ein₅₄ jui₅ ηái'₄ juig₂ go₅₄ guá₅ ne₄ carroza
quió'₅, 'i₂₃ Si₂ quió'₅ Isaías i₂jme₁'ë₂ jág₁ quió'₅ Diú₄
ma₂líg'₂.

29 Jaun₂ ca₂juá'₂ Jme₂dsí₂ quián₅ Diú₄ ca₂tsí'₃
Fe₂li₄:

—Gua₂ le₃jén'₃ cau₅ carro në₅.

30 Ca₂dsióg₃ Fe₂li₄ cau₅, jaun₂ ca₂nág₂ i₁'i₅ dsa₂ 'éi₂
Si₂ quió'₅ Isaías. Jaun₂ ca₂ηag₃ Fe₂li₄:

—¿'Níg'₂ 'e₂ juá'₂ si₂ a₂'i₂?

31 Jaun₂ ca₂ηag₃ táng₃ dsa₂ 'éi₂:

—¿'A₂ bá₄ lia'₂ le₃ηí'₂ jniá'₂? Tsá₃ guë'₂ 'ein₂ chan₂
i₂juá'₂ 'e₂ jein₅ jág₁ a₂juá'₂ si₂ la₂.

Jaun₂ ca₂tsí'₃ Fe₂li₄ a₂uíg₂ 'éi₂ guei'₅₄ a₂guá₃ co₂lë₅
quiong'₅₄.

32 Jme₁'i₅ dsa₂ 'éi₂ Si₂ quió'₅ Diú₄ ja₁juá'₂ le₂la₂:
Ca₂jio₃ dsa₂ i₁ηag'₂ jui₁lia'₂ jñi'₅ dsa₂ já'₂ cha'₂.
Ján₃ guë'₂ jui₁lia'₂ tsá₃ guió'₅ guein₂ já'₂ cha'₂

të₁lia'₂ chéi₅ dsa₂ ηñí₁,

ján₃ bá₄ le₂jaun₂ tsá₃ 'e₂ ca₂juá'₂ i₂'éi₂.

33 Ca₂cuë₃ dsa₂ o₂guí'₃,

tsá₃ 'éi'₃ rë₂ ca₂të₁dsi₅₄ quió'₅;

chi'₂ tsi₁jon₂ quiáin₅ guë'₂ në₃,

¿'ein₂ bá₄ lé₂ le₃dsia₃ 'iin₃ chi'₂ dsio₅₄?

ton'₂ ca₂jñióg'₂ bá₄ guë'₂ dsa₂

ne₄ gua' ₅₄ 'uë₃ la₂.†

34 Jaun₂ ca₂juá' ₂ dsa₂ dsen₅₄ 'éi₂ ca₂tsí' ₃ Fe₂li₄:

—Jmo₄ dse₃ 'au' ₂, jua' ₅₄ 'e₂ jein₅ jág₁ a₂juá' ₂ si₂ la₂.
¿'Ein₂ 'in₅ dsa₂ quián₅ Diú₄ i₂ca₂jmo₃ si₂ la₂? ¿A₂'iin₂₃
'ñiog₅, O₃ a₂'iin₂₃ i₂sián' ₂ 'e₂?

35 Jaun₂ ca₂jme₃lióg₃ Fe₂li₄ ca₂juá' ₂ 'e₂ juá' ₂ ne₄ Si₂
ja₁jme₁'i₅ dsa₂ dsen₅₄ 'éi₂, qui₂ca₂cuë₃ jág₁ dse₃ 'iin₂₃
Jesús.

36 Jme₁ca₂dsi₃lén₂ caun₂ ja₁cha₂ jmig₂, jaun₂
ca₂juá' ₂ dsa₂ dsen₅₄ 'éi₂ ca₂tsí' ₃ Fe₂li₄:

—Cha₂ jmig₂ ja₁lá₃. ¿Cha₁ 'e₂ lë₃ jua' ₅₄ tsá₃ lé₂ tsón₄
jniá₂ jmig₂?

37 Jaun₂ ca₂juá' ₂ Fe₂li₄:

—Chi₂jua' ₂ 'éng' ₂ dsón' ₂ ca₂le₃jě₃ 'au' ₂, lé₂ bá₄.

Jaun₂ ca₂ñag₃ táng₃ dsa₂:

—'Én₂ bá₄ jniá₂ a₂lín₅ Jesucristo Ja₁ñi' ₅₄ Diú₄.‡

38 Jaun₂ ca₂jmo₃ 'éi' ₃ ca₂jñia₃ carroza quió' ₅. Jaun₂
ca₂sióin₃ le₂oin₃ chei' ₅₄ jmig₂, jaun₂ ca₂cho₃ Fe₂li₄
jmig₂ § quió' ₅ dsa₂ 'éi₂.

39 Jme₁ca₂'u_{in}₂ jmig₂, jaun₂ Jme₂dsí₂ quián₅
Te₁gui' ₅₄ ca₂tág₃ Fe₂li₄, jaun₂ dsí₂tan₅₄ 'éi₂ tsá₃
ma₃ca₂jág₂ mei' ₂. La₁ 'io' ₂ bá₄ jmo₂₃ le₂'i₄ jui₅ ja₁ñái' ₄.

40 Fe₂li₄ ně₃ ma₂'ein₅₄ caun₂ juig₂ ja₁chei₂ Azoto,
jaun₂ le₂tan₅₄ guë₄ juig₂ te₁'i₁ ja₁jaun₂ ca₂ñei₅₄
qui₂ca₂'ë₂ jág₁ dse₃ a₂lión₂ dsa₂, ca₂lia' ₂ ca₂dsióg₃
ca₂të₂ juig₂ Cesarea.

† 8:33 Isaías 53:7-8. ‡ 8:37 A₂lín₅₄ chog₅₄ si₂ tsá₃ chi₁ton₅ versículo
37. § 8:38 lit. “ca₂tióg₃ Fe₂li₄ jmig₂.”

9

Ca₂jme₃tsín₃ Saulo dsí₅
(Hechos 22:6-16; 26:12-18)

¹ Tē₁lia'₂ jaun₂, dsa₂ i₂chen₂ Saulo caun₂
 qui₂quai₂₃ juē'₅ a₂'nio₃ jme₃dsiáin₃ dsa₂ i₂'én₂ jág₁
 quió'₅ Te₁gui'₅₄. Jaun₂ lē₃, ca₂ŋei₅₄ i₁jīn₂₃ jme₂dsa₂
 dsen₅₄.

² Ca₂mi₃ ne₄ 'éi₂ caun₂ si₂ a₂cuē₃ bí₂ a₂dsó₃ guá'₅
 sinagogas quió'₅ dsa₂ juig₂ Damasco a₂dsi₃'niai'₂
 dsa₂ i₂tion'₅₄ tē₂le₃ quió'₅ Ju₅ quió'₅ Te₁gui'₅₄.
 Jme₁'nio₃ Saulo dsi₃te₅₄ dsa₂ chi₁'ŋei'₂ ca₂tē₂
 Jerusalén, lia'₂ dsa₂ ŋe'₂ lia'₂ dsa₂ mí₂.

³ La₁ jme₁ja₂quián₃ dsió₄ juig₂ Damasco, con'₂
 tsá₃ jáin₅ jme₁ca₂tág₃ caun₂ si₂ tág₅ jmá'₅ ne₄ quió'₅.
 Si₂ jaun₂ a₂já₃ ju₅ guei'₅₄ i₂juíg₃.

⁴ Co₂tan₅₄ ca₂quin'₃ Saulo, jaun₂ ca₂nág₂ juá'₂ jág₁
 jē₄ si₂ jaun₂:

—Saulo, Saulo, ¿'e₂ lē₃ co₂'éin'₅ jniá'₂?

⁵ Jaun₂ ca₂ŋag₃ Saulo:

—¿'Ein₂ 'ne₂, gui'₅₄?

Jaun₂ ca₂ŋag₃ táng₃ jág₁ né'₂ jē₄ si₂:

—Jesús bá₄ jniá'₂ i₂co₂'én'₅ 'ne₂ ŋi'₂. Jŋia'₅₄ jmag'₅₄
 uig₅ 'ŋiag'₂ bá₄ jmo'₂ ju₁lia'₂ jmo₅ ca₁ju₅ jē₁ma₂jnáu₃
 ni₁'ma₂ chen'₂.

⁶ Jaun₂ ca₂jlen₃ Saulo, ca₂rē₃gó'₅, ca₂juá'₂:

—Te₁gui'₅₄, ¿'e₂ 'niog'₂ 'ne₂ jmo₅₄ jniá'₂?

Jaun₂ ca₂ŋag₃ táng₃ Te₁gui'₅₄:

—Nau₂, 'ú₅ juig₂ Damasco. Jē₁ma₂dsióg'₃, ja₁jaun₂
 bá₄ juá'₂ dsa₂ 'e₂ jmó'₂.

⁷ Dsa₂ i₂jme₁quian'₅₄ Saulo ně₃, 'ŋio₅ lin₃
 ca₂rē₃gó'₅, ia₁ ca₂nág₂ jág₁ a₂juá'₂ jē₄ si₂ jaun₂, ton'₂
 'i₁jan₂ guē'₂ tsá₃ 'ein₂ ca₂jīn₂.

8 Jaun₂ ca₂nau₂ Saulo, la₁ jme₁ca₂nau₂ jaun₂, tsá₃ ma₃lé₂ jág₃, tsá₃ ma₃jníá₂ mi₂ne₅₄. Dsa₂ i₂jme₁quiain'₅₄ bá₄ ca₂tág₃ le₁chan'₂ gu₂, ca₂jio₃ tē₂ juig₂ Damasco.

9 Ja₁jaun₂ ca₂'í₃ tein₅₄ 'ni₅ jmig₄, tsá₃ 'e₂ ca₂gué'₃, on₃ gué'₂ 'e₂ ca₂'in'₃ 'i₁caun₂.

10 Juig₂ Damasco jaun₂, jme₁guá₄ jan₂ dsa₂ i₂'én₂ i₂jme₁chen₂ Ananías. I₂'éi₂ ca₂jén'₃ ca₂jín₂ Te₁gui'₅₄ i₂ca₂juá'₂:

—¡Ananías!

Jaun₂ ca₂ḡag₃ 'éi₂:

—Ja₁lá₃ bá₄ 'eng₅₄, Te₁gui'₅₄.

11 Jaun₂ ca₂juá'₂ táng₃ Te₁gui'₅₄:

—Nau₂, gua₂ calle chei₂ Co₂dsau₅ ja₁quió'₄ dsa₂ chen₂ Judas. Ja₁jaun₂ o₂'nia'₂ jan₂ dsa₂ chan₂ Tarso i₂chen₂ Saulo, i₂'en₅₄ chi₂lén'₂ Diú₄ con'₂ lē₅ la₂.

12 Ia₁ ma₂qui₃ a₂ma₂jín₂ jan₂ dsa₂ i₂chen₂ Ananías ca₂'í₃ ca₂quiog₂ gu₂ ne₄ quió'₅ ia₁jaun₂ jnia₃ táng₃ mi₂ne₅₄.

13 Jme₁ca₂nág₂ Ananías le₂nē₅, jaun₂ ca₂juá'₂:

—Te₁gui'₅₄, juin₅ dsa₂ ma₂tság₃ jniá₂ ca₂le₃jě₃ 'e₂ 'lig'₅₄ a₂jmo₅ dsa₂ 'éi₂ a₂jmái'₂ dsa₂ chan₂ Jerusalén i₂'én₂ jág₁ quiáng'₂.

14 Ta₁ jaun₂ já₅ 'éi₂ ja₁lá₃ quian'₅₄ 'éi'₃ quió'₅ juig₅₄ jme₂dsa₂ ia₁jaun₂ tē₂ le₁'ḡe₅ ca₂le₃jín₃ dsa₂ quiáng'₂ i₂'in₅ 'ne₂.

15 La₁ jaun₂ ca₂juá'₂ táng₃ Te₁gui'₅₄:

—La₁ gua₂, ia₁ i₂ma₂quion'₄ jniá₂ 'éi₂ ia₁ 'nio₃ jniá₂ dsó₃ qui₂dsi₃'ag₃ jniá₂ lia'₂ jin₄ dsí₂nau₂ lia'₂ ne₄ rag₅₄ quiáin₅, jin₄ dsa₂ israelitas ně₃.

16 Ia₁ jniá₂ bá₄ 'ě₄ 'a₂ lia'₂ tion₅₄ niog₅ ḡág₃ uig₅ 'ḡio₅ lin₃ o₄quió₃ jniá₂.

17 Jaun₂ guě₄ nǒ₃ Ananías ja₁chí'₄ tsi₁'né₅ ja₁jme₁'en₅₄ Saulo. Ca₂'í₃ dsi₂'né₂, ca₂quiog₂ gu₂ ne₄ quió'₅ Saulo, jaun₂ ca₂juá'₂:

—Saulo rǎn'₅₄ jniog₄, Te₁gui'₅₄ Jesús i₂ca₂jeng'₂ le₂'i₄ jui₅ lia'₂ con'₂ nǝ'₃, nǝ₂chei₃ jniá'₂ ia₁jaun₂ jnia₅₄ táng₃ mi₂'ne'₅₄, jaun₂ guéng'₄ Jme₂dsí₂ Jñió₅ nǝ₃.

18 Co₂tan₅₄ dsi₂jui₅ jaun₂ qui₂ca₂séi'₂ jui₁lia'₂ tsi₁ mi₂'ne₄ Saulo, co₂tan₅₄ ca₂jág₃ táng₃. Jaun₂ guě₄ ca₂nau₂ Saulo, ca₂i₁choin₃ jmig₂.

19 Jaun₂ ca₂guě'₃, ca₂tíin'₃ táng₃ bí₂. Jaun₂ ca₂'í₃ bá₄ guě₄ tin₃'-ni₅ jmig₄ quiain'₅₄ dsa₂'én₂ i₂jme₁tián'₄ juig₂ Damasco jaun₂.

Ca₂'ě₂ Saulo jág₁ dse₃ juig₂ Damasco

20 Dsi₂jui₅ bá₄ ca₂jme₃lióg₃ Saulo ca₂nǝi₅₄ guá'₅ sinagogas ca₂i₁jme₁tiin₂₃ dsa₂ a₂juá'₂ a₂lín₅ Jesús Ja₁nǝi'₅₄ Diú₄.

21 Ca₂le₃jín₃ dsa₂ i₂ca₂nág₂ ca₂i₃gó'₃ dsí₅, qui₂ca₂dsia₃:

—¿On₃jua'₅₄ dsa₂ nǝ₅ i₂nǝ'₄ lǝ₃ jme₁nǝi₅ juig₂ Jerusalén qui₂co₂'ein₂₃ dsa₂ i₂'én₂ le₃quió'₅ Jesús? ¿On₃jua'₅₄ i₂nǝ₅ 'nǝi_{og}₅ i₂ma₂guan₅ ja₁lá₃ a₂qui₂tǝ₂ le₁'nǝ₅ dsa₂ jaun₂ qui₂dsi₂jang'₅₄ o₄gú₃ juig₅₄ jme₂dsa₂?

22 La₁ tǝ₂le₃ lǝ₅ guě₄ ca₂'ág₂ tiá₂ dsí₅ Saulo, qui₂ca₂'ě₂ jág₁ a₂lín₅ dsón'₂ Jesús I₂rǝ₂'ín₁ quián₅ Diú₄. Ca₂lia'₂ ca₂i₃cón'₅ dsí₅ dsa₂ judíos i₂jme₁tián'₄ juig₂ Damasco ia₁ ca₂'ě₂ Saulo jág₁ le₂jaun₂.

Ca₂lón₂ Saulo o₄gú₃ dsa₂ judíos

23 'Lióng₂ jmig₄ cang₂ jaun₂, ca₂jmo₃ dsa₂ judíos caun₂ jág₁ a₂jme₁nǝi₃ Saulo.

24 A₂jmi₂ a₂'uë₂ qui₂ca₂jñiai₃ Saulo o₄'né₄ o₄jui₅ jui₂g₂ jaun₂, ia₁jaun₂ jñag₃. La₁ ca₂rë₃ñi₅ bá₄ Saulo.

25 Jaun₂ dsa₂ 'én₂ riin'₅₄ ně₃, ca₂to'₂ 'ñi₃o'₃ caun₂ tsi₁mi'₂ pa₁, jaun₂ a₂'uë₂ ca₂si₃óin₂ 'éi₂ jui₅ ne₄ ni₁'ia'₂ a₂jme₁lë₄ le₃lág'₃ jui₂g₂. Jaun₂ le₂në₅ ca₂l₃óin₂.

Ma'en₅₄ táng₃ Saulo jui₂g₂ Jerusalén

26 Jme₁dsián'₃ Saulo Jerusalén, jme₁'nio₃ jme₃quiain'₅₄ dsi₂jui₅ dsa₂ 'én₂ ja₁jaun₂. La₁ ca₂le₃jín₃ dsa₂ 'éi₂ ně₃ ca₂rë₃gain₃ 'éi₂, ia₁ tsá₃ jaun₂ líin₂ a₂ma₂'én₂ Saulo jág₁ dse₃.

27 La₁ia₁ dsa₂ i₂chen₂ Bernabé ca₂jio₃g₃ ne₄ dsa₂ gua₃-tín₂ i₂chen₄ 'éi₂. Jaun₂ ca₂dsia₃ 'a₂ lia'₂ ca₂lë₃ a₂ca₂jme₃jain'₂ Te₁gui'₅₄ le₂'i₄ jui₅, 'e₂ jág₁ a₂ca₂juá'₂ ně₃, 'a₂ lia'₂ ca₂dsia₃ Saulo ján₃ tiá₂ dsí₅ jui₂g₂ Damasco ca₂'ě₂ jág₁ 'iin₂₃ Jesús.

28 Jaun₂ bá₄ ca₂'í₃ Saulo jui₂g₂ Jerusalén ca₂jme₃quiain'₅₄ dsa₂ 'éi₂.

29 Caun₂ ca₂dsia₃ tiá₂ dsí₅ bá₄ qui₂ca₂'ě₂ jág₁ 'iin₂₃ Te₁gui'₅₄ qui₂ca₂dsia₃ jág₁ qui₂ca₂tsín₂ quian'₅₄ dsa₂ judíos i₂dsia₅ jág₁ jme₁5 griego. La₁ dsa₂ 'éi₂ ně₃ caun₂ 'nio₃ jme₁jñi'₃ bá₄ Saulo.

30 Jme₁ca₂rë₃lí'₄ rin'₅₄ Saulo a₂jaun₂, jaun₂ ca₂jio₃g₃ jui₅ jui₂g₂ Cesarea. A₂'ein₅₄ gué₄ ja₁jaun₂ ca₂dsi₃óg'₂ riin'₅₄ jui₂g₂ go₅₄ ja₁chei₂ Tarso.

31 Jaun₂ ca₂le₃jín₃ guá'₅, dsa₂ i₂'én₂, le₂tan₅₄ ja₁tén₄ 'uë₃ Judea, Galilea, Samaria ně₃, tei₄ bá₄ 'ei₅ tion'₅₄ dsa₂, caun₂ ca₂rë₃béin₂ ján₃. Jme₁jme₂gain₃ bá₄ Te₁gui'₅₄ ti₃oin'₅₄. Quian'₅₄ bí₂ qui₃ó'₅ Jme₂dsí₂ Jñi₃ó₅, caun₂ qui₂ca₂juín₂ bá₄ dsa₂ i₂'én₂.

Ca₂'lón₂ dsa₂ chen₂ Eneas

32 Lia'₂ con'₂ ηᵢ₅ Pe₄ qui₂ dsi₂ jīin'₅₄ riin'₅₄, ca₂ l₁ jīin'₁₂ ján₃ dsa₂ i₂ ma₂ 'én₂ jág₁ dse₃ i₂ jme₁ tián'₄ juig₂ ja₁ chei₂ Lida.

33 Ja₁ jaun₂ ca₂ jīin'₂ jan₂ dsa₂ 'lian'₂ i₂ jme₁ chen₂ Eneas i₂ ma₂ tē₂ jñia₃ ηᵢ₂ ron₅, ia₁ tsá₃ lé₂ ηᵢ₃.

34 Jaun₂ ca₂ juá'₂ Pe₄ ca₂ tsí'₃ dsa₂ 'éi₂:

—Eneas, Jesucristo jme₂ 'lió₂. Nau₂, jmo₄ dse₃ tsí₁ cama quiáng'₂.

Jaun₂ dsi₂ juᵢ₅ le₂ jaun₂ ca₂ nau₂ Eneas.

35 Jaun₂ ca₂ le₃ jín₃ dsa₂ i₂ tián'₅ Lida quian'₅₄ juig₂ Sarón ca₂ jág₃ a₂ ca₂ 'lón₂ 'éi₂, jaun₂ ca₂ jéin'₃ le₃ quió'₅ Te₁ gui'₅₄.

Ca₂ jen'₅₄ 'io₅₄ Dorcas

36 Jmᵢg₄ jaun₂ jme₁ chan₂ jan₂ 'io₅₄ i₂ 'én₂ jē₄ juig₂ Jope i₂ jme₁ chen₂ Tabita. Quian'₅₄ jág₁ jmeᵢ₅ griego jme₁ tē'₂ dsa₂ Dorcas. 'Io₅₄ 'éi₂ lia₂ con'₂ chain₂ jme₁ jmo₂₃ dse₃ jme₂ 'oin'₅₄ dsa₂ te₂ ηé₂.

37 Tē₃ jē₄ jmᵢg₄ jaun₂, ca₂ rē₃ dso'₅₄ Dorcas, ca₂ join₃ bá₄ jaun₂ ně₃. Cang₂ jme₁ ca₂ lē₃ sei₅ dsa₂, jaun₂ ca₂ i₁ quió₂₃ caun₂ dsi₂ néi₂ jē₁ ca₂ tē₂ tin₃ juín₃.

38 Juig₂ Jope ma₂ quián₅ bá₄ ja₁ niog₅ juig₂ Lida ja₁ 'en'₅₄ Pe₄. Jaun₂ jme₁ ca₂ rē₃ ηᵢ₅ dsa₂ 'én₂ a₂ 'en'₅₄ Pe₄ ja₁ jaun₂, jaun₂ ca₂ chein₃ on₃ riin'₅₄ ca₂ i₁ te'₂ 'éi₂:

—Ñia₅ tē₂ ně₃ cón'₅ juᵢ₅ Jope.

39 Jaun₂ ηó₃ Pe₄ co₂ lē₅ quian'₅₄ dsa₂ 'éi₂. Jme₁ ca₂ dsióg₃, ca₂ i₁ jiog₃ dsa₂ ja₁ rē₂ quian'₅ 'lag₄. Ja₁ jaun₂ tion'₅₄ le₁ ηᵢ'₂ ca₂ le₃ jín₃ 'io₅₄ 'nág₂ qui'₂-'o₂₃, qui₂ ca₂ 'é'₃ Pe₄ 'mi'₂ tsin'₅₄ dsa₂, ta₁ a₂ jme₁ jmo₅ Dorcas lia₂ con'₂ chain₂.

40 Jaun₂ ca₂ jmo₃ Pe₄ 'éi'₃ ca₂ 'uin₂ dsa₂ dsi₂ néi₂ ja₁ rē₂ quian'₅ 'lag₄. Jaun₂ ca₂ chi₃ jné₃ ca₂ chi₃ léin'₂ Diú₄. Jaun₂ gué₄ ca₂ jīin'₂ 'lag₄, ca₂ juá'₂:

—Tabita, nau₂.

Dsi₂jui₅ jaun₂ ca₂ján₃ 'io₅₄ jme₁ne₁₂. Jme₁ca₂jín₂
Pe₄ ca₂guá₂ 'io₅₄ jaun₂ ně₃.

⁴¹ Jaun₂ ca₂ŋa₃ Pe₄ mi₂gu₂ 'io₅₄, ca₂chó₂. Jaun₂
ca₂tě₃ táng₃ Pe₄ riin₅₄, 'io₅₄ 'nág₂ ně₃, jaun₂ ca₂jín₂
'io₅₄ 'éi₂, la₁ ma₂jein₅₄ bá₄.

⁴² Ta₁caun₂ juig₂ Jope ca₂i₃ág₃ jág₁ a₂ca₂lě₃
le₂jaun₂. Jaun₂ juin₅ lín₃ dsa₂ ca₂rě₃'én₂ jág₁ quió₅
Te₁gui₅₄.

⁴³ Ca₂'í₃ bá₄ guě₄ Pe₄ 'lióng₂ jmig₄ jaun₂ ja₁quió₄
jan₂ dsa₂ i₂chen₂ Si₂mu₅₄ i₂jme₂dse₃ lo₄ já₂.

10

Pe₄ quian₅₄ Cornelio

¹ Juig₂ Cesarea jme₁chan₂ jan₂ dsa₂ i₂jme₁chen₂
Cornelio, i₂jme₁lín₄ juig₅₄ co₂nió₃ 'lióg₂ i₂tě₂ dsa₂
i₂chan₂ Italia.

² Juig₅₄ 'lióg₂ 'éi₂ jme₁jme₂gain₃ Diú₄ co₂lě₅
quian₅₄ dsa₂ dsi₂néi₂ quió₅. Ján₃ bá₄ jme₁dsi₁ó₅
cu₄ jme₁jme₂'oin₅₄ dsa₂ judíos. Ca₂le₃jě₃ jmig₄ ně₃,
jme₁chi₁lén₂ Diú₄.

³ Co₂ráun₂ con₂ hora ŋí₁ 'ni₅ le₃ca₂'láu₂,*
a₂lě₁ca₂jén₃ ca₂jág₃ ca₂jín₂ jan₂ ángel quián₅ Diú₄
ca₂'í₃ dsi₂néi₂ ja₁'ein₅₄. Jaun₂ ca₂juá₂ ángel:

—¡Cornelio!

⁴ Jaun₂ ca₂jág₃ Cornelio gó₅ 'ŋio₅ lín₃ ca₂jín₂ ángel.
Jaun₂ ca₂ŋag₃ ca₂juá₂:

—¿'E₂ lě₅, gui₅₄?

Jaun₂ guě₄ ca₂juá₂ ángel:

—A₂nag₅ bá₄ Diú₄ a₂juig₂ a₂chi₂lein₅₄. Já₅ bá₄
a₂jmo₂ dse₃ 'au₂ jme₂'ong₅₄ dsa₂ te₂ŋé₂.

* **10:3** lit. “hora ŋi₃.”

5 Jaun₂ lē₃ chen₅ dsa₂ juig₂ Jope dsi₃ quiáin₂ dsa₂ i₂chen₂ Si₂mu₅₄ i₂té'₂ dsa₂ Pe₄ ján₃.

6 I₂'en₅₄ ja₁ quió'₄ Si₂mu₅₄ sián'₂ i₂jmo₅ dse₃ lo₄ já'₂, i₂chí'₅ 'ne₄ chei'₅₄ jmi₁ñí'₄.

7 Jme₁ma₂ñá'₅ ángel, jaun₂ ca₂té'₃ Cornelio on₃ dsa₂ mozo quiáin₅, jan₂ gué'₂ 'lióg₂, dsa₂ jme₂ti₃ i₂jme₂gan₃ Diú₄ ján₃.

8 Jaun₂ ca₂dsia₃ Cornelio ca₂tsí'₃ dsa₂ a₂ca₂jén'₃, jaun₂ ca₂chein₃ dsa₂ jui₅ juig₂ Jope.

9 Jme₁jnia₃ jaun₂, ca₂i₃lén₂ dsa₂ 'éi₂. Pe₄ ně₃ ca₂uíg₂ le₃co'₅₄ tsi₁'né₅ con'₂ dsi₃ñí'₃† a₂chi₃lén'₂ Diú₄.

10 I₁cón'₅ 'ñio₅ lín₃. Tē₁lia'₂ jmo₅ dsa₂ má₃ ně₃, jaun₂ a₂lē₁ca₂jén'₃ ca₂jág₃ Pe₄

11 ca₂niá₃ guei'₅₄ i₂juíg₃. Jaun₂ ca₂sió₃ jui₁lia'₂ caun₂ tsi₁'mi'₂ pa₁ a₂rē₂quein₅ ta₁quén₂ qui'₅₄.

12 'Nió'₃ jaun₂, jme₁tion'₅₄ ca₂le₃jín₃ ne₅₄ já'₂: já'₂ cha₂ quén₂ mi₂tag₄, já'₂ i₂tsé'₅ quió'₅, já'₂ i₂'in₅ guei'₅₄ ně₃.

13 Jaun₂ ca₂nág₂ Pe₄ jág₁ ca₂juá'₂:

—Nau₂ Pe₄, jme₁dsian₅ já'₂, quíng'₄.

14 Jaun₂ ca₂ñag₃ Pe₄:

—Jan₂'ón₄, Te₁gui'₅₄. Ia₁ 'i₁co₂ráun₂ tsá₃ ma₂ca₂gué'₃ jniá₂ ni₁ñi₁ já'₂ a₂jmo₅ a₂rē₂'ñio₅ dsa₂.

15 Jaun₂ ca₂ñag₃ táng₃ jág₁ a₂juá'₂:

—Tsá₃ lē₁juá'₂ 'ne₂ 'lig'₅₄ cosa a₂ma₂jmo₃ Diú₄ le₁jé₃.

16 'Ni₅ ráun₂ ca₂lē₃ le₂jaun₂, jaun₂ gué₄ ca₂ñáu'₃ táng₃ tsi₁'mi'₂ jui₅ guei'₅₄.

17 Tē₁lia'₂ guá₅ Pe₄ 'no'₂ dsí₅ 'e₂ léi₄ jáng'₅ a₂ca₂jág₃ jaun₂, jme₁ca₂dsi₃lén₂ dsa₂ i₂chen₄ quián₅ Cornelio o₄'né₄ quió'₅ Si₂mu₅₄, a₂ñag₂₃ a₂já'₄ chí'₅ 'ne₄ Si₂mu₅₄.

† 10:9 lit. “hora jñéi₂.”

18 Jme₁ca₂dsi₃lén₂ dsa₂ 'éi₂, ca₂ŋag₃ juá'₂ tiá'₂ chi₂jua'₂ 'en₅₄ ja₁jaun₂ jan₂ dsa₂ i₂chen₂ Si₂mu₅₄ i₂té'₂ dsa₂ Pe₄ ján₃.

19 Tē₁lia'₂ jaun₂ caun₂ qui₂'no'₂ dsí₅ Pe₄ a₂ca₂jág₃, jaun₂ ca₂juá'₂ Jme₂dsí₂ Jñió₅:

—Jag₄; ún₂ dsa₂ o₂lén₂ 'nau'₂.

20 Nau₂, sión₅, gua₂ quiain'₅₄, tsá₃ lē₁jmo₂ 'i₅ 'au'₂ jua'₅₄ líng'₂ a₂tsá₃ tí₅ jág₁, ia₁ jniá₂ bá₄ nē₂tsín₂.

21 Jaun₂ ca₂sión₃ Pe₄ ca₂i₁jñin₁₂ dsa₂ i₂chen₄ quián₅ Cornelio, jaun₂ ca₂juá'₂ Pe₄:

—Jniá₂ bá₄ 'éi₂ i₂'na' 'nia'₂. ¿Cha₁ ta₁ ja₂nó'₅ 'nia'₂?

22 Jaun₂ ca₂ŋag₃ táng₃ dsa₂:

—Gui'₅₄ juig'₅₄ 'lióg₂ Cornelio bá₄ ca₂chei₃ jnia'₅₄ ja₂náu₅. Dsa₂ dsen₃ bá₄ 'éi₂, i₂jme₂gan₃ Diú₄; 'nio₃ dsa₂ judíos 'ñio₅ lín₃, jme₂go₃ ně₃. Jan₂ ángel i₂chen₄ quián₅ Diú₄ ca₂juá'₂ a₂té'₂ 'ne₂ ja₁quió'₄ jaun₂ nag₃ 'e₂ jág₁ cuē'₅₄.

23 Jaun₂ ca₂juá'₂ Pe₄ tón'₃ dsa₂ 'éi₂ dsi₂néi₂, jaun₂ ja₁jaun₂ ca₂ñia₃ dsa₂ 'éi₂ quiain'₅₄ Pe₄ a₂'uē₂ jaun₂. Jme₁ñia₃ jaun₂ guē₄ ca₂ŋó₃ Pe₄ quiain'₅₄ dsa₂ 'éi₂. Ca₂jme₃quiong'₅₄ guē₄ i₂lín₅₄ dsa₂ riin'₅₄ i₂jme₁'én₂ i₂jme₁tián'₄ juig₂ Jope.

24 Jme₁ñia₃ jaun₂ guē₄ táng₃, ca₂dsi₃lén₂ juig₂ Cesarea ja₁guá₄ Cornelio. 'Éi₂ guē'₂ ně₃ jme₁ma₂chi₁jñiog₂₃ quiain'₅₄ co₂nió'₃ o₁riin'₅₄ a₂mei₅₄ quián₅ i₂jein'₂ 'ñio₅ lín₃ quiain'₅₄ ně₃, i₂ca₂té'₃.

25 Jme₁ca₂dsióg₃ Pe₄ o₄'né₄, co₂tan₅₄ ca₂o₃'ín₃ Cornelio ca₂guei₃, ca₂chi₃jnë₃ ne₄ 'éi₂, ca₂jme₃juag'₂.

26 La₁ Pe₄ ně₃ ca₂chó'₂, ca₂juá'₂:

—Nau₂, ia₁ dsa₂ mi₂güig₃ bá₄ jniá₂, jui₁lia'₂ 'ne₂ ján₃.

27 Të₃ dsia₅ jág₁ Pe₄ quiong'₅₄, ca₂'í₃ dsi₂néi₂, jaun₂ ca₂jág₃ juin₅ bá₄ dsa₂ ma₂le₁ñi'₂ dsi₂néi₂.

28 Jaun₂ ca₂juá'₂ Pe₄ ca₂tsí'₃ dsa₂:

—Ñi'₅₄ bá₄ 'nia'₂ jaun₂ tsá₃ cuë₅ jmig₄ 'Éi'₃ Juá'₅ quió'₅ dsa₂ judíos jua'₅₄ a₂ñi'₂ quian'₅₄ dsi₂nau₂, on₃ guë'₂ lé₂ ñi₃ dsi₂néi₂ quió'₅. La₁ Diú₄ ma₂'ë₃ a₂tsá₃ tē₄ jniá₂ 'i₁jan₂ dsa₂ tsá₃ le₁jín₃.

29 Jaun₂ lë₃ dsi₂jui₅ bá₄ guio₃ jme₁ca₂dsi₃lén₂ dsa₂ quiáng'₂, tē₂. Tsá₃ nē₂jan₅₄ uē₂. Jaun₂ jme₁'nio₃ le₃guion₅₄ 'e₂ lë₃, 'e₂ ta₁ nē₂tē'₂.

30 Jaun₂ ca₂ñag₃ Cornelio:

—Ma₂quén₂ jmig₄, con'₂ hora la₂ jme₁'eng₅₄ dsi₂néi₂ la₂ quió'₃, jme₁jme₂'ing₅₄, tsá₃ ca₂guë'₃. Jme₁'eng₅₄ chi₁leng'₄ Diú₄ tē₂le₃ ca₂'láu₂. Jaun₂ a₂lë₁ca₂jéin₃ ca₂jing₅₄ jan₂ dsa₂ qui'₂ 'mi'₂ tiog₂ jau₂.

31 Jaun₂ ca₂juá'₂ ca₂tság₃ jniá₂: “Cornelio, a₂nág₅ bá₄ Diú₄ a₂juig'₂. Já₅ bá₄ a₂jmo'₂ dse₃ 'au'₂ jme₂'ong'₅₄ dsa₂ te₂ñé₂.

32 Jaun₂ lë₃, chen₅ dsa₂ juig₂ Jope dsi₃quiáin₂ dsa₂ i₂chen₂ Si₂mu₅₄ i₂té'₂ dsa₂ Pe₄ ján₃. I₂'en₅₄ ja₁quió'₄ Si₂mu₅₄ sián'₂ i₂jmo₅ dse₃ lo₄ já'₂, i₂chí'₅ 'ne₄ chei'₅₄ jmi₁ñi'₄. Jë₁ma₂guain₂₃, dsia₃ jág₁ quian'₅₄ 'ne₂.”

33 Jaun₂ bá₄ lë₃ ca₂tsíng₂ dsa₂ dsi₂jui₅ a₂i₁'niai'₂ 'ne₂ nē₃. Dse₃ bá₄ lia'₂ nē₂jmo'₅₄ ñe'₃. Jaun₂ lë₃ tio'₅₄ jnia'₅₄ ca₂le₃jág₃ le₁ñag'₂ ne₄ Diú₄ ia₁ 'niog₂ jnia'₅₄ néi₁ jág₁ a₂ma₂cuë₃ Te₁gui'₅₄ a₂juig'₅₄ jnia'₅₄.

Jág₁ a₂ca₂ton₃ Pe₄ dsi₂néi₂ quió'₅ Cornelio

34 Jaun₂ ca₂jme₃lióg₃ Pe₄ ca₂juá'₂ ca₂tsí'₃ dsa₂:

—Në₃ guë₄ dsón'₂ ma₂ñi'₂ jniá₂, tsá₃ jma₃quén₅ jín₂ Diú₄ dsa₂ mi₂güí₃.

35 Ia₁ ca₂le₃jě₃ juig₂ ja₁jme₂gan₃ dsa₂ Diú₄, nag₅ dsa₂ gau₂ jág₁ quió'₅, jmo₂₃ dse₃ ně₃, dsa₂ le₂'éi₂ bá₄ guén'₂ Diú₄.

36 Ca₂juá'₂ Diú₄ ca₂tsí'₃ tsi₁jon₂ quián₅ Israel, ca₂'ě₂ jág₁ a₂tian'₃ dsa₂ tei₄ tē₂le₃ quian'₅₄ Jesucristo i₂lín₅ Te₁gui'₅₄ quián₅ ca₂le₃jín₃.

37 Ní'₅₄ rē₂ bá₄ 'nia'₂ 'e₂ ca₂lē₃ ta₁caun₂ juig₂ go₄ dsa₂ judíos, a₂ca₂jme₃lióg₃ 'uě₃ Galilea, cang₂ jme₁ma₂'ě₂ Juan₅₄ jág₁, ca₂choin₃ dsa₂ jmig₂ ně₃.

38 Ní'₅₄ bá₄ 'nia'₂ 'a₂ lia'₂ ca₂cuě₃ Diú₄ ca₂cuě'₃ Jesús chan₂ Nazaret ju₁₅bí₂ quió'₅ Jme₂dsí₂ Jñi₀₅; 'a₂ lia'₂ ca₂ñi₃ jmo₂₃ dse₃, jme₂'lióin₂ ca₂le₃jín₃ dsa₂ i₂jme₁chan₂ jmi₁uig₅ jmóg'₂ i₂sě₃dsen₃. Ca₂le₃jě₃ a₂ně₅ ca₂jmo₃ ia₁ jme₁quiain'₅₄ Diú₄.

39 Ca₂tě₂ ne₄ jnia'₅₄ ca₂le₃jě₃ a₂ně₅ a₂ca₂jmo₃ Jesús, lia'₂ jě₄ juig₂ Jerusalén, lia'₂ le₂tan₅₄ ja₁tián'₄ dsa₂ chan₂ Judea. Cang₂ jaun₂ ca₂jñag'₃ dsa₂ ca₂tion₃ cróg₄.

40 La₁ jě₁ca₂tě₂ 'ni₅ jmig₄, ca₂jme₃jein'₅₄ táng₃ Diú₄ Jmei₂, ca₂jmo₃ ca₂jme₃jnia₅ 'éi₂ jin₄ jnia'₅₄.

41 Tsá₃ ca₂jme₃jniai₂₃ jin₄ ca₂le₃jín₃ dsa₂. Jmá'₃ lia'₂ jě₄ quián₂ jnia'₅₄ bá₄ con'₂ dsa₂ i₂ca₂quióin'₂ le₂jñiá₅ i₁tě₃ ne₄. Ca₂que₅₄ guě₄ jnia'₅₄ co₂lē₅ quiain'₅₄ jme₁ma₂jein'₅₄ táng₃ jin₄ 'lag₄.

42 Jaun₂ ca₂jmo₃ 'éi'₃ a₂qui₂dsi₁'ě₄ jnia'₅₄ jág₁, a₂dsi₁jang'₅₄ jág₁ dsau₅ jin₄ dsa₂: Diú₄ ma₂dsiain₃ Jesús a₂qui₃dsi₅ 'éi'₃ quió'₅ dsa₂ i₂chan₂, quió'₅ i₂ma₂dsan₃ ně₃.

43 Ján₃ bá₄ le₂ně₅ jáng'₅ jág₁ dsau₅ ca₂le₃jín₃ dsa₂ i₂jme₁'ě₂ jág₁ quián₅, a₂qui₃'én₂ Diú₄ dsáu₁ ca₂le₃jín₃ dsa₂ i₂'én₂ jág₁ quió'₅.

Ca₂guei₃ dsi₂nau₂ ca₂guein₃ Jme₂dsí₂ Jñió₅

44 Tě₃jě₄ 'ě₂ guě₄ Pe₄ jág₁, jme₁ca₂sión₃ Jme₂dsí₂
Jñió₅ ne₄ quió'₅ ca₂le₃jín₃ dsa₂ i₂tion'₅₄ nag₅ jág₁.

45 Dsa₂ judíos[‡] i₂jme₁'én₂ i₂ca₂o₃lén₂ quian'₅₄ Pe₄,
tióin₂ jág₅ dsi₂gó'₃ dsí'₅, ia₁ ján₃ guě'₂ ca₂guen₃
dsi₂nau₂ Jme₂dsí₂ Jñió₅.

46 Ia₁ nag₂₃ dsia₅ dsa₂ jág₁ jmei₅ siá'₂, jme₂juiin'₂
Diú₄.

47 Jaun₂ ca₂juá'₂ Pe₄:

—¿Lé₂ le₃jua'₅₄ tsá₃ jmig₂ lé₂ tsón₃ dsa₂ ně₅, ton'₂
ma₂ně₂guein₃ bá₄ guě'₂ Jme₂dsí₂ Jñió₅, co₂rě₂ bá₄
jui₁lia'₂ jniog₄?

48 Jaun₂ ca₂jmo₃ 'éi'₃ a₂tsón₃ dsa₂ 'éi' jmig₂, lia'₂
con'₂ lě₅ 'éi'₃ quió'₅ Jesucristo. Jme₁co₂lág₂ jaun₂,
ca₂mi₃ dsa₂ ca₂tsí'₃ Pe₄ a₂jñia₃ guě₄ tin₃-ni₅ jmig₄
quiong'₅₄.

11

Jág₁ ca₂'ě₂ Pe₄ jin₄ dsa₂ 'én₂ juig₂ Jerusalén

1 Ca₂rě₃ñi₅ jág₁ dsa₂ i₂chen₄ quián₅ Jesús, quiaín'₅₄
riin'₅₄ i₂tion'₅₄ Judea, a₂ma₂ca₂rě₃'én₂ dsi₂nau₂ jág₁
quió'₅ Diú₄ ján₃.

2 Jme₁ca₂dsián'₃ táng₃ Pe₄ juig₂ Jerusalén, jaun₂
ca₂le₃jín₃ dsa₂ judíos i₂'én₂ ca₂jí₂ quió'₅

3 ca₂juá'₂:

—¿'E₂ lě₃ neg'₅₄ ja₁con₂ dsi₂nau₂* i₁que'₅₄ quiaín'₅₄
ně₃?

4 Jaun₂ ca₂juá'₂ Pe₄ ca₂tsí'₃ dsa₂ ca₂le₃jě₃ 'a₂ lia'₂
ca₂lě₃, ca₂juá'₂:

‡ 10:45 lit. “dsa₂ i₂rě₂uing₄ lo₄.”

* 11:3 lit. “ja₁con₂ dsa₂ i₂tsá₃ lo₄
rě₂uing₄.”

5 —Juig₂ Jope bá₄ jme₁'eng₅₄, chi₁leng'₄ Diú₄.
Të₃jë₄ jaun₂, ca₂jéin₃ ca₂jág₃ jui₁lia'₂ caun₂ tsi₁'mi'₂
tióg₃ pa₁ a₂rë₂quein₅ le₃quén₂ qui'₅₄, ca₂sió₃ jui₅
guei'₅₄, ca₂të₂ cau₅ quió₃.

6 Jme₁ca₂jág₃ jniá₂ dse₃ 'e₂ tio'₅₄ 'ŋió'₃, jua'₂
ca₂le₃jín₃ ne₄ já'₂ bá₄ tion'₅₄: já'₂ cha₂ quén₂ mi₂tag₄,
já'₂ tsáu₂ dsí₅, já'₂ i₂tsé'₅ quió'₅, já'₂ i₂'in₅ guei'₅₄ ně₃.

7 Jaun₂ ca₂nag₃ jág₁ a₂ca₂juá'₂ ca₂tság₃ jniá₂:
“Nau₂ Pe₄, jme₁dsian₅ já'₂, quíng'₄.”

8 Jaun₂ ca₂ŋag₄ jniá₂: “Jan₂'ón₄, Te₁gui'₅₄. Ia₁
'i₁co₂ráun₂ tsá₃ ma₂'í₅ 'o₃ 'i₁caun₂ a₂'lig'₅₄ a₂jmo₅
a₂rë₂'ŋio₅ dsa₂.”

9 Jaun₂ ca₂ŋag₃ táng₃ jág₁ a₂já₅ guei'₅₄, ca₂juá'₂:
“Jui₁lia'₂ a₂ma₂jmo₃ Diú₄ le₁jě₃, tsá₃ lë₁juá'₂ 'ne₂
'lig'₅₄.”

10 'Ni₅ ráun₂ ca₂lë₃ le₂jaun₂, jaun₂ guě₄ ca₂ŋáu'₃
táng₃ ca₂le₃jě₃ jui₅ guei'₅₄.

11 Të₃jë₄ jaun₂ ca₂dsi₃lén₂ ún₂ dsa₂ 'né₅
ja₁jme₁'eng₅₄, i₂chen₄ quián₅ dsa₂ chan₂ Cesarea
a₂'nau'₂ jniá₂.

12 Jaun₂ Jme₂dsí₂ quián₅ bá₄ Diú₄ ca₂chei₃ ca₂ŋó₃
quiáng'₅₄ dsa₂ 'éi₂, caun₂ bá₄ 'ei₅ dsi₃ ŋó₃. Ján₃ bá₄
i₁len₅₄ jŋé₂ rin'₅₄ jniog₄ la₂ quiong'₅₄ jniá₂. Jaun₂
ca₂tió'₄ jnia'₅₄ ca₂le₃jág₃ dsi₂néi₂ quió'₅ dsa₂ chan₂
Cesarea 'éi₂.

13 Dsa₂ 'éi₂ ca₂dsia₃ ca₂tság₃ jnia'₅₄ 'a₂ lia'₂ ca₂jíin₂
jan₂ ángel jme₁chén'₄ dsi₂néi₂ quió'₅ i₂ca₂juá'₂:
“Chen₅ dsa₂ juig₂ Jope a₂dsi₃quiáin₂ Si₂mu₅₄ i₂tě'₂
dsa₂ Pe₄ ján₃.

14 Dsa₂ 'éi₂ juá'₂ 'a₂ lia'₂ jmó'₂, ia₁jaun₂ líong'₂,
quiáng'₅₄ dsa₂ dsi₂néi₂ quiáng'₂.

15 Jme₁ca₂jme₁lióg₄ jniá₂ juig₂ jág₁, jaun₂ ca₂sión₃

Jme₂dsi₂ Jñi₅ ne₄ quió'₅ dsa₂ 'éi₂, jui₁lia'₂ ca₂guain₃ ne₄ quián₂ jniog₄ le₂'uig₅₄.

16 Jaun₂ guě₄ ca₂dsáu'₃ dsi₃ a₂ma₂ca₂juá'₂ Te₁gui'₅₄ le₂jñiá₅: “Dsau₅ bá₄ ca₂tióg₃ Juan₅₄ ca₂tiáin₂ jmi₂g₂ dsa₂, la₁ 'nia'₂ guě'₂ ně₃ tióg₂ Diú₄ Jme₂dsi₂ Jñi₅.”†

17 Jaun₂ chi₂jua'₂ co₂rě₂ bá₄ ca₂cuě₃ Diú₄ ca₂cuě'₃ dsa₂ 'éi₂ jui₁lia'₂ a₂ma₂cuě₃ jniog₄ i₂ma₂'én₂ tē₂le₃ quió'₅ Te₁gui'₅₄ Jesucristo, ¿i₂'ein₂ bá₄ jniá₂ jua'₅₄ jniá₂ jni₅g₅₄ 'éi'₃ quió'₅ Diú₄?

18 Jme₁ca₂nág₂ dsa₂ jág₁ ně₅, tei₄ bá₄ ca₂jmo₃. Jaun₂ ca₂jme₃juin'₂ Diú₄, ca₂tsí'₃ riin'₅₄:

—ján₃ guě₄ ma₂cuě₃ Diú₄ jmi₂g₂ quió'₅ dsi₂nau₂, a₂jme₂tsiin₃ dsí₅ ia₁jaun₂ tñin'₄ le₃chain₂ co₂tan₅₄!

Dsa₂ 'én₂ i₂chan₂ juig₂ Antioquía

19 Lia'₂ con'₂ jme₁ca₂jñi'₃ dsa₂ Esteban, caun₂ qui₂ca₂co₃'ein₃ bá₄ dsa₂ quió'₅ ca₂le₃jín₃ dsa₂ i₂'én₂. Jaun₂ tion₅₄ bá₄ ca₂cuing₃ ca₂i₃lén₂ ca₂tē₂ Fenicia, Chipre, Antioquía ně₃. La₁ jmá'₃ dsa₂ judíos bá₄ ca₂cuě'₃ jág₁ dse₃.

20 La₁ i₂lin₅₄ dsa₂ 'én₂ i₂chan₂ Chipre quian'₅₄ Cirene ca₂dsi₃lén₂ juig₂ Antioquía ca₂dsia₃ jág₁ quian'₅₄ dsa₂ chan₂ Grecia, ca₂'ě₂ jág₁ dse₃ ca₂'iin₃ Te₁gui'₅₄ Jesús.

21 Ca₂jme₃'on₅₄ Te₁gui'₅₄ dsa₂ 'éi₂ ja₁jaun₂ quian'₅₄ bí₂ quió'₅, jaun₂ lě₃ juin₅ lin₃ dsa₂ ca₂jéin'₃ le₃quió'₅ Te₁gui'₅₄.

22 Jme₁ca₂rě₃ñi₅ dsa₂ 'én₂ i₂tion'₅₄ Jerusalén, jaun₂ ca₂chein₃ Bernabé ca₂tē₂ Antioquía.

23 Jme₁ca₂dsióg₃ Bernabé ja₁jaun₂, jaun₂ ca₂jág₃ a₂dse₃ dsí₅ Diú₄ a₂ca₂jmo₃ ja₁con₂ dsa₂ 'éi₂, jaun₂ lě₃

† 11:16 Hechos 1:5.

ca₂jmo₃ 'io'₂. Jaun₂ ca₂toin'₂ dsa₂ jág₁ dsia₃ tiá₂ dsí₅, tsán'₂ tiá₂ jág₁ 'ein₃ Te₁gui'₅₄.

24 Ia₁ dsa₂ dsen₃ bá₄ jme₁lín₄ Bernabé, jme₁rē₂rín₅ Jme₂dsí₂ Jñió₅ të₂dsí₅, jme₁'éin₂ 'ñio₅ lín₃. Jaun₂ le₂nē₅ juin₅ dsa₂ ca₂jén'₃ të₂le₃ ja₁con₂ Te₁gui'₅₄.

25 Cang₂ jaun₂ ca₂ñó₃ Bernabé juig₂ Tarso a₂ca₂i₁'niai'₂ Saulo. Jme₁ca₂dsáin'₂ 'éi₂, jaun₂ ca₂tág₃ juig₂ Antioquía.

26 Ja₁jaun₂ ca₂tóin'₂ caun₂ ñi₂ quiaín'₅₄ dsa₂ i₂'én₂ ja₁jaun₂, qui₂ca₂jme₃tín₂₃ juin₅ lín₃ dsa₂. Juig₂ Antioquía jaun₂ bá₄ ja₁le₂'uig₅₄ ca₂quiong₃ dsa₂ ca₂quiaín₃ dsa₂ i₂'én₂ “cristianos”.

27 Jmig₄ jaun₂, i₂lín₅₄ dsa₂ i₂jme₁cuē₅ jág₁ dse₃ a₂ma₂gue₃ quió'₅ Diú₄ ca₂'uín₂ juig₂ Jerusalén ca₂i₁leín₅₄ Antioquía.

28 Jan₂ i₂chen₂ Agabo ca₂nau₂ jin₄ ríin'₅₄. Jaun₂ quian'₅₄ bí₂ quió'₅ Jme₂dsí₂ Jñió₅, ca₂'ë₂ jág₁ a₂le₃'in₂ a₂guē'₃ dsa₂ ta₁caun₂ mi₂güig₃. Jaun₂ le₂jaun₂ ca₂rē₃ti₃ nē₃ jmig₄ lia'₂ con'₂ jme₁guá₄ gui'₅₄ emperador Claudio.

29 Jaun₂ ca₂le₃jin₃ dsa₂ 'én₂ i₂chan₂ Antioquía ca₂jmo₃ caun₂ jág₁ ca₂jme₃'oin₅₄ ríin'₅₄ i₂jme₁tián'₄ Judea, 'a₂ con'₂ jñia'₅₄ qui'₅₄ jmig₄ cuē₃ le₂jain₂ le₂jain₂.

30 Jaun₂ le₂nē₅ ca₂jmo₃. Ca₂chein₃ cu₄ ne₄ dsa₂ can'₅₄‡ quián₅ dsa₂ 'én₂, ca₂i₁can₅ Bernabé quian'₅₄ Saulo.

12

Ca₂jon₃ Jacobo, Pe₄ guē'₂ ca₂jné₂ dsa₂ 'né₅ 'má₃

‡ 11:30 griego: presbíteros.

1 Jmíg₄ jaun₂ ca₂jme₃lióg₃ Rag₅₄ Herodes qui₂ca₂jmái'₂ dsa₂ i₂'én₂.

2 Ca₂jmo₃ 'éi'₃ ca₂ñi'₃ dsa₂ Jacobo rin'₅₄ Juan₅₄, quian'₅₄ ñi₁tág₂.

3 Jme₁ca₂jág₃ Herodes a₂ca₂tě₂ dsí₅ dsa₂ judíos, jaun₂ ca₂jmo₃ táng₃ 'éi'₃ ca₂ñja'₃ dsa₂ Pe₄ ján₃. Ca₂le₃jě₃ a₂ně₅ ca₂lě₃ lia'₂ con'₂ jmo₅ dsa₂ jmíg₄ a₂guě'₅ dsa₂ i₁ñí'₄ 'ua'₂ a₂tsá₃ levadura quian'₅₄.

4 Jme₁ma₂ně₂chán'₂ dsa₂ Pe₄, jaun₂ ca₂jmo₃ Herodes 'éi'₃ ca₂to'₂ 'né₅ 'má₃, jaun₂ ca₂tón'₂ quén₂ nió'₃ 'lióg₂ i₂lě₂ jma₃quén₂ le₂caun₂ nió'₃, qui₂ca₂jmo₃ 'í₁ Pe₄. Jme₁dsi₂jiog₅ dsí₅ Herodes jme₁dsei₂₃ tě₃jin₄ dsa₂ juig₂ jě₁ma₂ca₂ñi₂ Jmíg₄ Tě₂'in₅₄.

5 Jaun₂le₂ně₅ 'en₅₄ Pe₄ né'₃ 'má₃, lě₅ 'í₁ dse₃lin₃. La₁ dsa₂ rin'₅₄ ně₃ caun₂ chi₂lěin'₂ Diú₄ bá₄ tioin'₅₄ mi₂₃ 'ñio₅ lin₃ o₄quió'₄ 'éi₂.

Ca₂lión₂ Diú₄ Pe₄ 'né₅ 'má₃

6 Caun₂ 'uě₂, jui₁lia'₂ 'ióg₃ jme₁ma₂lě₅ jág₁ jme₁dsei₅ Herodes jin₄ dsa₂ juig₂, a₂'uě₂ jaun₂ jme₁rě₂quian₅ Pe₄ rě₂gü₁in₃ rě₂ñei₂₃ dse₃ lin₃ quian'₅₄ tin₃ cadenas jě₄ quió'₅ on₃ 'lióg₂. 'Lióg₂ sián'₂ guě'₂ jme₁tion'₅₄ o₄'né₄ jmo₂₃ 'í₁ 'né₅ 'má₃.

7 Tě₃jě₄ jaun₂, ca₂jme₃nia₅ jan₂ ángel quián₅ Te₁gui'₅₄, jaun₂ ca₂tág₃ si₂ta₁caun₂ dsi₂néi₂ 'né₅ 'má₃. Jaun₂ ca₂quén'₃ ángel dsi₂con₂ Pe₄ a₂ca₂ñei₃. Jaun₂ ca₂juá'₂:

—Nau₂ tě₂ně₃ cón'₅.

Jaun₂ ca₂séi'₂ 'uě₃ ni₁ñí₁ cadenas a₂jme₁tio'₅₄ gu₂ Pe₄.

8 Jaun₂ ca₂juá'₂ táng₃ ángel:

—Dse₃ 'ñei₂ tog'₂, tio'₂ lau₂ tag'₅₄.

Jme₁ca₂lë₃ jmo₅ Pe₄ a₂jaun₂, jaun₂ ca₂juá'₂ táng₃ ángel:

—Qui'₂ 'mi'₂ dsiog₂ quiáng'₂, 'éin₃ jniá₂.

⁹ Jaun₂ ca₂o₃'ín₃ Pe₄ chi₁co'₅₄ quió'₅ ángel. Tsá₃ jaun₂ ŋi₅ chi₂jua'₂ dsón'₂ dsi₂jó'₃ a₂ca₂jmo₃ ángel le₂jaun₂, ia₁ a₂lë₁ca₂jág₃ bá₄ líin₂.

¹⁰ Jaun₂ ca₂ŋi₅ ja₁le₂'uig₅₄ tion'₅₄ 'lióg₂, ja₁ca₂të₂ táng₃ ně₃. Jme₁ca₂dsi₃lëin₂ o₄'né₄ a₂lë₅ quian'₅₄ ni₁ŋí₁, ja₁'uin₂ dsa₂ jë₄ calle, a₂lë₁ca₂niá₃ 'ŋiog₅ bá₄ o₄'né₄. Ca₂'u₁in₂ bá₄ jaun₂ ně₃. Jme₁ma₂in₁oi₅₄ caun₂ calle, jaun₂ ca₂ŋá'₃ ángel 'éi₂, ca₂téin₂ Pe₄.

¹¹ Jaun₂ guë₄ ca₂rë₃lí'₄ Pe₄, ca₂juá'₂:

—Në₃ guë₄ dsón'₂ guion₄ jniá₂ a₂në₂chen₃ Te₁gui'₅₄ ángel quiáin₅ a₂në₂lió₂ ja₁con₂ Herodes, ca₂le₃jë₃ guë₄ 'e₂ jme₁'nio₃ dsa₂ judíos jmóg'₂.

¹² Të₃ dsi₂jio₅ dsí₅ le₂jaun₂ Pe₄, ca₂ŋó₃ jui₅ ja₁quió'₄ María chog₅₄ Juan₅₄ i₂chen₂ Marcos ján₃. Ja₁jaun₂ jme₁tion'₅₄ dsa₂ le₁ŋi'₂ chi₂lëin'₂ Diú₄.

¹³ Jme₁ca₂quein₃ Pe₄ o₄'né₄ i₁dsi₅, jaun₂ ca₂o₃'ín₃ jan₂ 'io₅₄ bë'₅₄ i₂chen₂ Rode i₃jág₂ 'ein₂ të₂.

¹⁴ La₁ jme₁ca₂nág₂, ca₂rë₃cuí'₅ jág₁ quió'₅ Pe₄ ně₃, jaun₂ tsá₃ ca₂niá₃ dsi₂jui₅, ia₁ ŋí₄ lë₃ ca₂jmo₃ 'io'₂. Jaun₂ ca₂ŋá'₃ bá₄ táng₃ dsi₂néi₂ i₁con₂ jág₁, Pe₄ bá₄ 'éi₂ ca₂dsióg₃.

¹⁵ Jaun₂ ca₂juá'₂ dsa₂ ca₂tsí'₃ 'io₅₄ bë'₅₄ 'éi₂:

—¡A₂lë₁të₂'i'₂ bá₄ 'ne₂!

La₁ caun₂ ca₂juá'₂ bá₄ 'io₅₄, a₂dsón'₂ bá₄ 'éi₂. Jaun₂ ca₂ŋag₃ táng₃ dsa₂, ca₂juá'₂:

—¿'A₂ bá₄ lia'₂ jaun₂? On₃jua'₅₄ 'éi₂ ně₅. 'In₁ ángel quiáin₅ bá₄ ně₅.

16 Të₁lia'₂ jaun₂, caun₂ i₁të₅₄ bá₄ Pe₄ o₄'né₄ i₁chéin'₄. Jme₁ca₂niá'₃, ca₂jíin'₂ Pe₄, jaun₂ ca₂i₃gó'₃ dsí'₅.

17 La₁ jaun₂ ca₂jmo₃ 'éi₂ léi₄ quian'₅₄ mi₂gu₂ a₂ca₂juá'₂ a₂jmo₃ dsa₂ tei₄. Jaun₂ ca₂dsia₃ 'a₂ lia'₂ ca₂lë₃ ca₂jmo₃ Te₁gui'₅₄ a₂ca₂i₁dsei₂₃ 'né₅ 'má₃. Jaun₂ ca₂juá'₂:

—O₂dsia₄ 'nia'₂ o₂chei'₅₄ Jacobo,* ca₂le₃jín₃ guë₄ rin'₅₄ jniog₄.

Jaun₂ ca₂o₃'ín₃ táng₃, ca₂ḡó₃ ja₁siá'₂.

18 Jme₁jnia₃ jaun₂, ca₂tón'₂ 'lióg₂ go₂'i₃, ia₁ tsá₃ ḡi₅ 'e₂ ca₂lë₃ quian'₅₄ Pe₄.

19 Jaun₂ Herodes ca₂chein₃ dsa₂ dsí₃'niog'₂. La₁ia₁ tsá₃ ma₃ca₂dsáu'₂. Jaun₂ jme₁ca₂cáun₂ jág₁ dsau₅ quió'₅ 'lióg₂ i₂jme₁jmo₅ 'í₁ 'éi₂, ca₂jmo₃ 'éi'₃ ca₂jme₃dsiog₅ dsa₂. Cang₂ jaun₂, ca₂o₃'ín₃ Herodes 'uë₃ Judea, jaun₂ ca₂ḡó₃ ca₂i₁gua₂ Cesarea.

Ca₂jon₃ Herodes

20 Jme₁'ne₂ Herodes quian'₅₄ dsa₂ i₂jme₁tián'₄ Tiro quian'₅₄ Sidón. La₁ dsa₂ 'éi₂ ně₃ ca₂jmo₃ caun₂ jág₁ ca₂i₁lein₅₄ ca₂jme₁jniai₂₃ ne₅₄. Ca₂jme₃'uáin₂ dsí'₅ jan₂ i₂chen₂ Blasto a₂jmo₃ dse₃ dsí'₅. Jme₁lín₄ Blasto jan₂ dsí₂tan₅₄ juin'₂ quián₅ Rag₅₄ Herodes. Ca₂nau₂ ne₄ jág₁, ca₂mi₃ dsian₅ mi'₅₄. Ia₁ juig₂ go₄ rag₅₄ bá₄ jme₁rau₂ a₂guë'₅ dsa₂ chan₂ Tiro quian'₅₄ Sidón.

21 Herodes ně₃ ca₂të₃, ca₂tióng₃ caun₂ jmig₄ a₂chi₁jniog₂₃ dsilén₂ dsa₂. Jme₁ca₂të₂ jmig₄ jaun₂,

* 12:17 o₃, Santiago. Rin'₅₄ Jesús. I₂sián'₂ bá₄ Jacobo rin'₅₄ Juan₅₄ (ja₁ḡi'₅₄ Zebedeo) i₂ca₂jḡag'₃ Herodes, Hechos 12:1.

ca₂quí'₂ Herodes tsin'₅₄ a₂rë₂lin₅₄ a₂lín₅ rag₅₄, jaun₂
ca₂l₁gua₂ ne₄ ne₄ta₁ quió'₅, jaun₂ ca₂ton₃ jág₁.

22 Jaun₂ ca₂jme₃lióg₃ dsa₂ juig₂ qui₂ca₂guió'₃
ca₂juá'₂:

—i₂juá'₂ ně₅, on₃jua'₅₄ dsa₂ mi₂güig₃! Jan₂ diú₄
bá₄ ně₅.

23 Co₂tan₅₄ ds₂i₂ju₅ le₂jaun₂ ca₂jmo₃ ángel
i₂chen₄ quián₅ Te₁gui'₅₄ a₂ca₂rë₃dso'₅₄ Herodes,
ia₁ ca₂cuë₃ jmig₄ a₂jme₃juag'₂ dsa₂ 'ñiog₅, 'nió'₄
a₂jme₁jme₃juin'₂ Diú₄. Ca₂join₃ bá₄ jaun₂ ně₃,
ca₂dsó'₃ i₁ja'₅₄ quió'₅.

24 La₁ jág₁ dse₃ quió'₅ Te₁gui'₅₄ ně₃ caun₂ ca₂i₃'ág₃
bá₄, qui₂ca₂'ě₂ dsa₂ 'lióng₂ juig₂.

25 Jme₁ca₂lë₃ ta₁ jaun₂ quió'₅ Bernabé quian'₅₄
Saulo, jaun₂ ca₂'u_{in}₂ Jerusalén ca₂i₃lein₃† jñiai₂₃
i₂jme₁chen₂ Juan₅₄ i₂jme₁të'₂ dsa₂ Marcos ján₃.

13

*Ca₂jme₃lióg₃ Bernabé quian'₅₄ Saulo ca₂jmo₃ ta₁
a₂'ě₂jág₁ dse*

1 Co₂nió'₃ dsa₂ i₂'én₂ jág₁ quió'₅ Jesús, i₂jme₁tián'₄
juig₂ Antioquí₄, jme₁chan₂ dsa₂ i₂jme₁'ě₂ jág₁
quián₅, të₅ ně₃, ju₁lia'₂ Bernabé quian'₅₄ Si₂mu₅₄
(i₂të'₂ dsa₂ dsa₂ lia'₂); Lucio i₂chan₂ Cirene; Manaén
ně₃ (i₂co₂lë₅ ca₂can'₅₄ quian'₅₄ Herodes i₂lín₅
dsi₄má'₂ 'uë₃ Galilea);* quian'₅₄ Saulo ně₃.

2 Co₂ráu₂ tióin'₅₄ le₁ñi'₂ jme₂juin'₂ Te₁gui'₅₄,
a₂jme₂'in₅₄, jaun₂ ca₂juá'₂ Jme₂dsí₂ Jñió₅:

—Con'₂ chén'₂ 'nia'₂ Bernabé quian'₅₄ Saulo,
ia₁jaun₂ ds₂i₃jmo₂ ta₁ a₂ma₂të₃ jniá₂ jmo₃.

† 12:25 A₂lin₅₄ chog₅₄ si₂: “jaun₂ ca₂i₃lein₃ Jerusalén.”
griego: Herodes tetrarca.

* 13:1

³ Jaun₂ jme₁ca₂lë₃ chi₂lëin'₂ Diú₄, a₂jme₂'iin₅₄ në₃, qui₂ca₂quiog₂ gu₂ ne₄ quió'₅ dsa₂ 'éi₂, jaun₂ guë₄ qui₂ca₂'ág'₃ jág₁ riin'₅₄.

Dsa₂ i₂chen₄ quián₅ Jesús 'ë₂ jág₁ të₂ Chipre

⁴ Jaun₂ ca₂chei₃ Jme₂dsí₂ Jñió₅ ca₂chein₃ Bernabé quián'₅₄ Saulo a₂ca₂i₃lëin₂ juí₅ Seleucia. Ja₁jaun₂ ca₂tóin'₂ ni₁barco a₂ca₂i₃lëin₂ caun₂ 'uë₃ a₂niog₅ jë₄ jmi₁ñí'₄, ja₁chei₂ Chipre.

⁵ Jme₁ca₂dsi₃lëin₂ ja₁jaun₂, caun₂ juig₂ a₂niog₅ chei'₅₄ jmi₁ñí'₄ ja₁të'₂ dsa₂ Salamina, ja₁jaun₂ ca₂jme₃lióg₃ qui₂ca₂'ë'₃ dsa₂ jág₁ dse₃ quió'₅ Te₁gui'₅₄ dsi₂néi₂ guá'₅ sinagogas quió'₅ dsa₂ judíos. Jme₁quiain'₅₄ bá₄ Juan₅₄ ján₃ i₂lín₅ dsa₂ i₂jme₂'o₅₄ quió'₅.

⁶ Ca₂i₁nioi₂ ta₁caun₂ 'uë₃ jaun₂, ca₂dsi₃lëin₂ caun₂ juig₂ ja₁të'₂ dsa₂ Pafos. Ja₁jaun₂ ca₂jein'₂ jan₂ dsa₂ judío, jan₂ dsa₂ i₂chan₂ dsí₅, i₂tin₂ jág₁ të₂jág₁, a₂jme₁jme₂gain₂₃ dsa₂ a₂juá'₂ a₂lín₅ jan₂ i₂'ë₂ jág₁ quián₅ Diú₄. Dsa₂ 'éi₂ jme₁të'₂ dsa₂ Barjesús.†

⁷ Jme₁ quiain'₅₄ dsi₄má'₂ i₂chen₂ Sergio Paulo. Dsi₄má'₂ 'éi₂ jme₁lín₄ jan₂ dsa₂ i₂niog₅ dsi₄ 'ñio₅ lín₃. Co₂ráun₂ ca₂të'₃ Bernabé quián'₅₄ Saulo, ia₁ a₂'nio₃ nag₃ jág₁ dse₃ quió'₅ Diú₄.

⁸ La₁ Barjesús 'éi₂ në₃, i₂të'₂ dsa₂ Elimas ján₃, tsá₃ jme₁'nio₃ a₂le₃'én₂ dsi₄má'₂. Jaun₂ jme₁jné₅ juí₅.

⁹ Jaun₂ Saulo, i₂të'₂ dsa₂ Pablo ján₃, rë₂rin₅ Jme₂dsí₂ Jñió₅ të₂dsí₅, ca₂jín₂ tiá₂ dsa₂ 'éi₂,

¹⁰ jaun₂ ca₂juá'₂:

† 13:6 Barjesús: a₂jein₅ jág₁ “ja₁ñí'₅₄ Jesús” quián'₅₄ jág₁ jmei₅ arameo.

—i'Ne₂ dsa₂ tē₂jág₁, dsa₂ quián₅ i₂sē₃dsen₃, i₂'io'₅₄ ca₂le₃jě₃ cosa dse₃! ħ'E₂ lē₃ qui₁jni_g'₄ jui₅ co₂dsau₅ quió'₅ Te₁gui'₅₄?

11 Tē₂nē₃ cón'₅ 'ě₂ Te₁gui'₅₄ jmi₁ui_g'₅ quiáng'₂, co₂dsia₅ téng'₂, co₂'na₂ tsá₃ ma₃lé₂ jag'₅₄ si₂ quió'₅ 'iog₂.

Dsi₂jui₅ jaun₂ ca₂téin₂ co₂dsia₅, qui₁né'₃ ca₂jén'₃. Jaun₂ jme'₁nai'₂ jan₂ i₂tē₂ tsán'₂ gu₂.

12 Jme₁ca₂jág₃ gui'₅₄ dsi₄má'₂ a₂ca₂lě₃ jaun₂, ca₂rě₃'éin₂ ca₂nág₂ dsi₂gó'₃ dsi₅ jág₁ dse₃ quió'₅ Te₁gui'₅₄.

Pablo quian'₅₄ Bernabé toin'₅₄ Antioquía ja₁tén₄ Pisidia

13 Ca₂'í₃ Pablo quian'₅₄ riin'₅₄ 'nió'₃ ni₁barco juig₂ Pafos, ca₂i₃lén₂ jui₅ Perge, juig₂ tén₅ 'uě₃ Panfilia. Ca₂tén₂ Juan₅₄ riin'₅₄ ja₁jaun₂, jaun₂ ca₂ñái'₃ jui₅ Jerusalén.

14 Ca₂'uin₂ riin'₅₄ Perge ca₂dsi₃lén₂ táng₃ Antioquía, juig₂ tén₅ 'uě₃ Pisidia. Jaun₂ ca₂i₃toin'₅₄ guá'₅ sinagoga caun₂ jmi_g'₄ sa₅₄, jaun₂ ca₂tián'₂ dsi₂néi₂.

15 Jme₁ma₂ca₂lě₃ 'i₅ dsa₂ Si₂ 'Éi'₃ quió'₅ Diú₄ quian'₅₄ Si₂ a₂ca₂jmo₃ dsa₂ i₂jme'₁'ě₂ jág₁ ma₂líg'₂ ně₃, jaun₂ ca₂chen₃ jág₁ dsa₂ can'₅₄ quián₅ guá'₅ sinagoga, ca₂juá'₂:

—Rin'₅₄ jniog₄, chi₂jua'₂ cha₂ jág₁ dse₃ quián'₂ 'nia'₂ a₂cué'₅₄ dsa₂, lé₂ bá₄ jua'₅₄ 'nia'₂.

16 Jaun₂ ca₂nau₂ Pa₄ ca₂jmo₃ léi₄ quian'₅₄ gu₂ a₂mi₂₃ a₂jmo₃ dsa₂ tei₄, jaun₂ ca₂juá'₂:

—Nei₂ 'nia'₂ dsa₂ israelitas, 'nia'₂ guě₄ dsa₂ sián'₂ i₂gan₃ Diú₄:

17 Diú₄ quián₂ jniog₄ dsa₂ lág₅ juig₂ Israel ca₂quióin'₂ dsa₂ can'₅₄ quián₂ jniog₄ ma₂líg'₂.

Ca₂jmo₃ Diú₄ ca₂i₃juín₂ dsa₂ 'éi₂ lia'₂ con'₂ jme₁tián'₄ 'uë₃ Egipto a₂lín₅ dsi₂nau₂. Cang₂ jaun₂ ca₂lë₃ caun₂ juig₂ pa₁. Diú₄ ně₃ ca₂lió₂ quian'₅₄ bí₂ quió'₅, ca₂'uág'₂ 'uë₃ jaun₂.

18 Ca₂jme₃juín'₂ Diú₄ dsí₅ quiong'₅₄† tē₂láu₃ ŋi₂ tē₁lia'₂ jme₁i₂nioi₅₄ gua'₅₄ quein₂,

19 ca₂'éin₂ guio₃ juig₂ go₄ dsa₂ i₂jme₁tián'₄ 'uë₃ Cana'án, 'uë₃ jaun₂ ně₃ ca₂cuë'₃ dsa₂ can'₅₄ quián₂ jniog₄ i₂jme₁chan₂ ma₂líg'₂.

20 'Cang₂ jaun₂ ca₂dsin₃ con'₂ quén₂ 'hiá₂-láu₂ rē₂dsí₂ tē₂láu₃-guiá₂ (450) ŋi₂, ca₂qui₃dsi₅ Diú₄ 'éi'₃ jin₄ dsa₂ 'éi₂ tē₂le₃ quian'₅₄ juë₄ ca₂lia'₂ ca₂tē₂ jmig₄ a₂ca₂rē₃chán₃ Samuel i₂qui₂ca₂'ě₂ jág₁ quió'₅ Diú₄ cang₂ jaun₂.

21 Jaun₂ ca₂mī₃ jan₂ rag₅₄. Jaun₂ Diú₄ ně₃ ca₂cuin₃ Saúl ja₁ŋi'₅₄ Cis, tsi₁jon₂ Benjamín; ca₂jmo₃ 'éi'₃ con'₂ tē₂láu₃ ŋi₂.

22 Cang₂ jaun₂ ca₂jhiá'₂ Diú₄ ta₁ quió'₅ Saúl a₂jme₁lín₄. Jaun₂ David bá₄ ca₂chein'₃ ca₂lín₃ rag₅₄. Jaun₂ ca₂juá'₂ Diú₄ 'in₂₃ Rag₅₄ David: “Ca₂dsó'₂ jhiá₂ ja₁con₂ David ja₁ŋi'₅₄ Isaí, a₂lín₅ jan₂ dsa₂ i₂lë₅ dsí₅ lia'₂ lë₅ dsí₃ jhiá₂, jan₂ dsa₂ i₂jmo₃ a₂'ŋio₂ dsí₃.”

23 'Jaun₂ ně₃ rin'₅₄ jniog₄, jan₂ chi'₂ dsio₄ David 'éi₂ bá₄ lín₅ Jesús i₂ca₂chen₃ Diú₄ a₂lióin₂ dsa₂ juig₂ Israel lia'₂ con'₂ lë₅ jág₁ quió'₅ ma₂cuë₃ le₂jhiá₅.

24 Né'₃ a₂guán₂ Jesús, ca₂'ě₂ Juan₅₄ jág₁ ca₂tsí'₃ ca₂le₃jín₃ dsa₂ Israel a₂'nió'₅ qui₃choin₃ jmig₂, dsí₃quén'₅ dsí₅ ně₃.

† 13:18 A₂lin₅₄ chog₅₄ si₂ juá'₂: “ca₂jmo₃ Diú₄ 'í₁ quió'₅.”

25 Jaun₂ ca₂juá'₂ Juan₅₄ jme₁ja₂quián₃ jóin₂:
 “On₃jua'₅₄ 'éi₂ jniá'₂ jui₁lia'₂ dsi₂jio₅g₅ 'au'₂ 'nia'₂ lín₅
 jniá'₂. La₁ i₂já'₅ chi₁co'₅₄ quió'₃ ně₃, 'éi₂ bá₄ i₂'uan'₂
 guě'₄ lia'₂ con'₂ guě'₄ jniá'₂, ca₂lia'₂ jnia'₅₄ lau₂ ton₅
 tag₅₄ bá₄ tsá'₃ ca₂tíng₂ tsi'₅₄ quió'₅.”Š

26 'Rin'₅₄ jniog₄, ca₂le₃jín'₃ guě'₄ 'nia'₂ i₂lín₅ chi'₂
 dsio₄ Abraham, quian'₅₄ ca₂le₃jín'₃ guě'₄ 'ein₂ chan₂
 quián'₂ 'nia'₂ i₂jme₂gan₃ Diú₄: a₂quián'₂ 'nia'₂ bá₄
 jág₁ dse₃ la₂ a₂ca₂'ě₂ Diú₄ a₂lión₂ dsa₂.

27 Dsa₂ i₂jme₁tián'₄ Jerusalén quian'₅₄ dsa₂ can'₅₄
 quiáin₅, tsá'₃ ca₂rě₃ŋi₅ 'ein₂ 'éi₂ jme₁chen₂ Jesús, on₃
 guě'₄ ca₂rě₃ŋi₅'₂ jág₁ a₂qui₂ca₂'ě₂ dsa₂ i₂chen₄ quián₅
 Diú₄ le₂jñiá'₅. Jaun₂ lě₃, jág₁ jaun₂ a₂'i₂₃ ne₄ Si₂
 ca₂le₃jě₃ jmig₄ sa₅₄ ca₂jme₃ti₃ guoin₅₄ jme₁ca₂jmo₃
 'éi'₃ a₂jñi₃'₃ Jesús.

28 'I₁caun₂ dsáu₁ Jesús tsá'₃ 'e₂ ca₂dsó'₂ dsa₂ jua'₅₄
 a₂'i₄ 'éi'₃ a₂jñag'₃, la₁ tion₅₄ bá₄ ca₂mi₃ dsa₂ jág₁ ne₄
 Pilato a₂jmo₃ 'éi₂ 'éi'₃ a₂jñag'₃.

29 Jaun₂ ně₃ jme₁ma₂lě₅ 'a₂ con'₂ lě₅ juá'₂ ne₄ Si₂
 quió'₅ Diú₄ a₂'in₂₃ Jesús, jaun₂ ca₂sió'₂ dsa₂ ne₄ cróg₄,
 jaun₂ ca₂i₁'ó₄.

30 La₁ Diú₄ ně₃, ca₂jme₃jein'₅₄ táng₃ jin₄ 'lag₄.

31 'Lióng₂ jmig₄ bá₄ qui₂ca₂jme₃jnia₅ Jesús ne₄
 dsa₂ i₂jme₁quiain'₅₄ lia'₂ con'₂ jme₁ca₂ŋó₃ tě₂ Galilea
 ca₂dsióg₃ tě₂ Jerusalén. Jaun₂ ně₃ dsa₂ 'éi₂ bá₄
 i₂jáng'₅ jág₁ dsau₅ tsí'₅ dsa₂ rě₂ně₃.

32 'Jaun₂ le₂ně₅ bá₄ a₂cuě'₂ jnia'₅₄ jág₁ dse₃ 'nia'₂,
 jág₁ a₂ca₂cuě'₃ Diú₄ ca₂cuě'₃ dsa₂ quián₂ jniog₄
 ma₂líg'₂ jaun₂,

33 ma₂ca₂rě₃ti'₅₄ Diú₄ ja₁con₂ jniog₄ i₂lág₅ chi'₂₋
guein₂ quián₅ dsa₂ 'éi₂, jme₁ca₂jme₃jein'₅₄ Jesús
con'₂ lé₅ jág₁ tio'₅₄ jě₁ca₂tě₂ tin₃ Salmo, a₂juá'₂:

'Ne₂ líng'₅ jón₃ quiáng₃;

jmi₄g ně₃, ca₂lin₃ jniá₂ ηéi'₅ 'ne₂. *

34 'Ca₂juá'₂ Diú₄ le₂jñiá₅ a₂jme₃jein'₅₄ jin₄ 'lag₄
ia₁jaun₂ tsá₃ dsi₃'én₂ quió'₅. Ju₁lia'₂ juá'₂ ne₄ Si₂
quió'₅ Diú₄:

Ján₃ bá₄ cuě₄ jniá₂ 'nia'₂

ca₂le₃jě₃ 'e₂ cosa dse₃

a₂jme₁ti₁ jág₁ quió₃ a₂ca₂cuě₃ David.†

35 'Jaun₂ lě₃, ján₃ guě'₂ juá'₂ ne₄ Si₂ Salmos ja₁siá'₂
táng₃:

Tsá₃ cuě'₁ jmi₄g₄

a₂dsi₃guí'₂ quió'₅ dsa₂ jñi₅'éi₂ quiáng'₂

i₂jme₂ti₃ ta₁ ne'₅₄.‡

36 'David ně₃ ca₂jme₃ti₃ bá₄ jág₁ ne₄ dsa₂ quián₅
tě₁lia'₂ ca₂rě₃chán₃ jmi₄g jaun₂, ju₁lia'₂ 'éi'₃ ca₂juá'₂
Diú₄. La₁ ca₂jon₃ bá₄ David ně₃, jaun₂ ca₂i'₁ó₄ dsa₂
ja₁le₁'on₅ dsa₂ can'₅₄ quián₅, ca₂siá'₃ bá₄ ni₁ñi₁ 'éi₂
ně₃.

37 La₁ ni₁ñi₁ Jesús ně₃, i₂ca₂jme₃jen'₅₄ Diú₄, tsá₃ 'e₂
ca₂'en₃.

38 'Jaun₂ ně₃ rin'₅₄ jniog₄, tion₅₄ 'nió'₅ le₃ñi'₅₄ 'nia'₂
jág₁ a₂'ě₅ jniá₂: tě₂le₃ quian'₅₄ Jesús bá₄ dsón'₂ 'én₂
dsáu'₂ 'nia'₂.

39 Tě₂le₃ quian'₅₄ 'éi₂, ca₂le₃jín₃ i₂'én₂ tě₂le₃ quió'₅,
rě₂'én₄ ca₂le₃jě₃ dsáu₁ a₂tsá₃ o₂'én₂ dso₄ cha₂ quián'₂
'nia'₂ tě₂le₃ quian'₅₄ 'Éi'₃ quió'₅ Moisés.

* 13:33 Salmo 2:7. † 13:34 Isaías 55:3. ‡ 13:35 Salmo 16:10.

40 'Í₁ jmo₄ 'nia'₂, ia₁jaun₂ tsá₃ dsi₃ŋí'₂ 'nia'₂ ju₁lia'₂ juá'₂ dsa₂ i₂jme₁'ě₂ jág₁ quián₅ Diú₄, jme₁ca₂juá'₂ ne₄ Si₂:

41 Jag₄ 'nia'₂ dsa₂ i₂táun₂ 'lig'₅₄,
ju₁dsi₂gó'₃ 'au'₂, ju₁dsian'₂ 'nia'₂.

Ia₁jniá₂ i₂líng₅ Diú₄ jmo₅₄ léi₄ juě'₂
jmig₄ tē₁lia'₂ chan'₂ 'nia'₂.

La₁léi₄ jaun₂, 'i₁jan'₂ 'nia'₂ tsá₃ le₃'én₂,
o₁ŋia'₅₄ 'a₂ guě'₂ lia'₂ chan₂ i₂dsia₃.§

42 Jme₁ca₂o₃'ín₃ Pa₄ quiain'₅₄ riin'₅₄ guá'₅ sinagoga
quió'₅ dsa₂ judíos, jaun₂ ca₂mi₃ dsa₂* a₂ja₃lén₂ táng₃
'éi₂ jmig₄ sa₅₄ caun₂ a₂ja₃'ě₂ jág₁ jaun₂.

43 Jme₁ca₂dsan₃ le₁ŋí'₂ dsa₂ dsi₂néi₂ guá'₅, jaun₂
juin₅ lin₃ dsa₂ judíos quian'₅₄ dsa₂ i₂ma₂gue₃
i₂ma₂tió₂ tiá₂ juá'₅ quió'₅ dsa₂ judíos, ca₂'ein₃ Pa₄
quian'₅₄ Bernabé, ca₂jme₃quiong'₅₄. Jaun₂ ca₂juá'₂
dsa₂ i₂chen₄ quián₅ Jesús 'éi₂ ca₂tsí'₃ dsa₂ ca₂cuě'₃ bí₂
a₂tion₅₄ 'nió'₅ tsán'₂ tiá₂ jág₁ dse₃ quió'₅ Diú₄ i₂'ua₁
dsí₅.

44 Caun₂ semana cang₂ jaun₂, jme₁ca₂tě₂ táng₃
jmig₄ sa₅₄, jaun₂ qui₂ca₂ŋí'₂ mei'₂ tsá₃ ca₂le₃jín₃ dsa₂
juig₂ a₂ca₂o₃néi₃ jág₁ quió'₅ Diú₄.

45 La₁ jme₁ca₂jág₃ dsa₂ judíos juin₅ lin₃ dsa₂ tion'₅₄,
jaun₂ ca₂rě₃'néi₃ a₂dsí'₅ 'ŋio₅ lin₃, tē₂le₃ jen₅ bá₄
qui₂ca₂ŋag₃ jág₁ a₂juá'₂ Pa₄, qui₂ca₂jnú'₂ jág₁ uig₅
ně₃.

46 Jaun₂ ca₂juá'₂ Pa₄ quian'₅₄ Bernabé, ca₂dsia₃
tiá₂ dsí₅ ca₂tsí'₃ dsa₂:

—Tion₅₄ 'nió'₅ jniá₅ de'₂ jín'₄ 'nia'₂ con'₂ dsa₂ i₂lín₅
judíos, ca₂tág₂ jnia'₅₄ 'ě₄ jág₁ dse₃ quió'₅ Diú₄. La₁

§ 13:41 Habacuc 1:5. * 13:42 A₂lin₅₄ chog₅₄ si₂: “ca₂mi₃ dsi₂nau₂.”

tsá₃ guë'₂ 'niog'₂ 'nia'₂ guéi'₁, jaun₂ ma₂ léi₄ bá₄ a₂ tsá₃
lé₂ tín'₄ 'nia'₂ guei'₅₄ i₂juíg₃. Jaun₂ lë₃, dsi₁ná₄u₄ jnia'₅₄
ja₁con₂ dsi₂nau₂.

47 Ia₁ le₂në₅ bá₄ 'éi'₃ ca₂cuë₃ Te₁gui'₅₄ jme₁ca₂juá'₂:
Ju₁lia'₂ si₂ bá₄ lín'₅ 'ne₂
i₂ca₂dsiáng₃ quió'₅ dsi₂nau₂,

ia₁jaun₂ 'ë'₅₄ dsa₂ chan₂ ta₁caun₂ mi₂güíg₃
ju₁i₅ ja₁tín'₄ dsa₂.†

48 Jme₁ca₂nág₂ dsi₂nau₂ jág₁ në₅, qui₂ca₂jmo₃
'io'₂, qui₂ca₂dsia₃, dsón'₂ bá₄ dse₃ jág₁ quió'₅
Te₁gui'₅₄. Jaun₂ ca₂rë₃'én₂ ca₂le₃jín₃ i₂con'₂ 'i₄ 'éi'₃
tín'₄ ja₁le₃chain₂ co₂tan₅₄.

49 Jaun₂ le₂në₅ ca₂i₃'ág₃ jág₁ dse₃ quió'₅ Te₁gui'₅₄
ta₁caun₂ 'uë₃ jaun₂.

50 La₁ dsa₂ judíos në₃ ca₂jmo₃ jág₁ quian'₅₄ i₂lín₅₄
'io'₅₄ dsen₃ i₂jme₂go₃ dsa₂ juíg₂, quian'₅₄ i₂lín₅₄
dsa₂ can'₅₄ në₃, ia₁jaun₂ jme₃'iog₅₄ jme₃'ñiai₅₄ Pa₄
quian'₅₄ Bernabé. Jaun₂ le₂në₅ bá₄ ca₂jme₃lióg₃
ca₂jmo₃ jág₁ a₂qui₂ca₂co₃'ein₃ Pa₄ quian'₅₄ Bernabé
ca₂lia'₂ ca₂'uin₂ 'éi₂ juíg₂ jaun₂.

51 Jaun₂ 'éi₂ në₃ qui₂ca₂séi'₂ 'liog₂ mi₂tag₅₄.‡
Ca₂'uin₂ bá₄ jaun₂, ca₂i₃lén₂ ju₁i₅ Iconio.

52 La₁ ca₂le₃jín₃ dsa₂ i₂ca₂rë₃'én₂ në₃, 'io'₂ jmo₂₃,
rë₂rín₅ Jme₂dsí₂ Jñió₅ tē₂dsí₅.

14

Pablo quian'₅₄ Bernabé tío'₅₄ juíg₂ Iconio

† 13:47 Isaiás 49:6. ‡ 13:51 Co₂'nió'₄ a₂ca₂jmo₃ léi₄, guion₅₄ bá₄
dsa₂ juíg₂ ma₂rë₂cáin'₄ ia₁ tsá₃ ca₂gue₃ jág₁ quió'₅ Diú₄. 'Nio'₂ ja₁ton₅
Marcos 6:11, Lucas 9:5, 10:11, Hechos 18:6.

1 Ca₂'í₃ Pablo co₂lě₅ quian'₅₄ Bernabé dsi₂něi₂ guá'₅ sinagoga quió'₅ dsa₂ judíos juig₂ Iconio. Ja₁jaun₂ ca₂jme₃tiin₂₃ táng₃ dsa₂ jág₁ dse₃ quió'₅ Diú₄. Juin₅ bá₄ dsa₂ ca₂rě₃'én₂, lia'₂ dsa₂ judíos lia'₂ dsi₂nau₂ ně₃.

2 La₁ dsa₂ judíos i₂tsá₃ 'én₂ ně₃, ca₂tsí'₃ dsi₂nau₂ a₂chi₃'iin₃ 'lig'₅₄ dsa₂ i₂'én₂.

3 Jaun₂ lě₃, uě₂ bá₄ ca₂'í₃ Pa₄ quian'₅₄ Bernabé. Ca₂dsia₃ tiá₂ dsí₅ quian'₅₄ bí₂ quió'₅ Te₁gui'₅₄, qui₂ca₂'ě₂ jág₁; jaun₂ Diú₄ ně₃ ca₂cuě₃ bí₂ ca₂jmo₃ 'éi₂ léi₄ juě'₂ a₂dsi₃gó'₃ dsi₅, ia₁jaun₂ le₃lí'₄ dsa₂, jág₁ dsau₅ a₂dse₃ dsí₅ Diú₄ bá₄ 'ě₂ 'éi₂.

4 La₁ dsa₂ juig₂ 'éi₂ jme₁lě₄ le₁dson'₅₄ i₂jme₁tión₂ le₃quió'₅ dsa₂ judíos, i₂jme₁tión₂ le₃quió'₅ dsa₂ i₂chen₄ quián₅ Jesús 'éi₂ ně₃.

5 Jaun₂ ca₂jmo₃ caun₂ jág₁ dsa₂ judíos quian'₅₄ dsi₂nau₂, quian'₅₄ dsi₂tan₅₄, a₂tsí'₃ jág₁ uig₅ dsa₂ 'éi₂, a₂qui₃jnáu'₂ cang₄ ně₃.

6 La₁ jme₁ca₂rě₃ŋi₅ Pa₄ quian'₅₄ Bernabé, ca₂cuing₃ juí₅ Listra, juí₅ Derbe ně₃, tin₃ juig₂ ja₁tén₄ Licaonia, ca₂i₁nioi₁₂ le₂tan₅₄ 'uě₃ jaun₂,

7 qui₂jme₂tiin₂₃ dsa₂ jág₁ dse₃ a₂lión₂ dsa₂.

Ca₂cuě₃ dsa₂ cang₄ ca₂cuě'₃ Pablo juig₂ Listra

8 Juig₂ Listra jme₁chan₂ jan₂ dsa₂ i₂tsá₃ lé₂ ŋi₃. Lia'₂ jaun₂ lín₅, lia'₂ con'₂ jme₁ca₂rě₃cháin₃, guá'₅ ja₁jaun₂, 'i₁cón'₂ tsá₃ ma₂ca₂ŋi₃ ca₂le₃jě₃ jmig₄ a₂chain₂,

9 Ca₂näg₂ dsa₂ 'éi₂ jág₁ a₂ca₂dsia₃ Pa₄, Jaun₂ Pa₄ ně₃ ca₂jág₃ tiá₂ ca₂jín₂ dsa₂ 'éi₂, jaun₂ ca₂rě₃lí'₄ Pa₄ a₂'én₂ dsa₂ 'éi₂ a₂lé₂ 'lión₂.

10 Jaun₂ ca₂juá'₂ tiá₂ ca₂tsí'₃ dsa₂ 'éi₂:

—Rě₂ nau₂. Co₂dsau₅ chí'₂ mi₂tag'₅₄.

Jaun₂ dsi₂jui₅ ca₂ráun₂ ca₂nau₂ dsa₂ 'éi₂,
ca₂jme₃lióg₃ ca₂ŋi₃.

11 Jme₁ca₂jág₃ dsa₂ a₂ca₂jmo₃ Pa₄ jaun₂, ca₂tóin'₂
co₂mi'₅₄, ca₂guió'₃ quian'₅₄ jág₁ jmei₅ quió'₅ dsa₂
chan₂ Licaonia, ca₂juá'₂:

—iDiú₄ i₂lín₅ dsa₂ ca₂sión₃ jë₄ quián₂ jniog₄!

12 Juá'₂ dsa₂ a₂lín₅ Bernabé diú₄ Júpiter, Pa₄ guë'₂
lín₅ diú₄ Mercurio* ia₁ 'éi₂ bá₄ i₂juá'₂ guë'₄ jág₁.

13 Jaun₂ jme₁chí'₄ guá'₅ quió'₅ diú₄ Júpiter
ja₁dsi₁lén₂ dsa₂ juig₂ jaun₂. Dsa₂ i₂lín₅ jme₂dsa₂
quián₅ Júpiter ca₂dsióg₃ quian'₅₄ juin₅ dsa₂ le₁ŋiai₂₃
ca₁jui₅ le₁quian₅ lí₁ ně₃, a₂jme₁'nio₃ jme₃dsiain₂₃
ca₁jui₅ a₂jme₁jén'₂ ne₄ Pa₄ quian'₅₄ Bernabé.

14 La₁ jme₁ca₂rë₃lí'₄ Pa₄ quian'₅₄ Bernabé i₂chen₄
quián₅ Jesús, a₂ma₂tion'₅₄ dsa₂ jmo₂₃ le₂jaun₂, jaun₂
ca₂jme₃lióg₃ ca₂gág₃ tsin'₅₄† Jaun₂ ca₂tóin'₂ jin₄ dsa₂
ca₂guió'₃ ca₂juá'₂:

15 —iNei₂ 'nia'₂! ¿'E₂ lë₃ jmo'₂ 'nia'₂ le₂në₅? Dsa₂
mi₂güí₃ bá₄ jnia'₅₄, jui₁lia'₂ 'nia'₂. A₂le₁quian₁ jág₁
dse₃ bá₄ jnia'₅₄ ja₂náu₅, a₂chei₅₄ 'nia'₂ a₂ŋiá'₄ 'nia'₂
ca₂le₃jë₃ a₂në₅ a₂tsá₃ 'e₂ ta₁ tí₄, a₂jen'₅₄ 'nia'₂ të₂le₃
quió'₅ Diú₄ jén'₃ i₂ca₂jmo₃ guei'₅₄ i₂juí₃, gua'₅₄ 'uë₃,
jmi₁ŋi'₄ ně₃, ca₂le₃jë₃ guë'₄ 'e₂ a₂cha₂ ja₁jaun₂.

16 'Niog₅ Diú₄ ca₂cuë₃ jmi₃g₄ ma₂líg'₂ ca₂cuë'₃
ca₂le₃jín₃ dsa₂ chan₂ gua'₅₄ 'uë₃ a₂jmo₃ con'₂ lë₂ dsí₅
guoin₅₄.

17 La₁ Diú₄ ca₂'ë'₃ dsa₂ 'ein₂ lín₅, ca₂jmo₃ bá₄ léi₄
të₂le₃ quian'₅₄ ca₂le₃jë₃ a₂dse₃ a₂qui₂ca₂jmo₃. 'Éi₂

* 14:12 griego: Hermes. † 14:14 ca₂gág₃ tsin'₅₄: le₂jaun₂ jme₁jmo₅
dsa₂ léi₄ chi₂juá'₂ 'e₂ tsá₃ të₅ dsí₅.

bá₄ jmo₅ a₂tang₂ jmí₅ ia₁jaun₂ qui₃ráu₃ ca₂le₃jě₃
a₂qui₂guě'₃ dsa₂. 'Éi₂ bá₄ jmo₅ a₂le₁'ág₄ dse₃ dsí₅ dsa₂.

18 Ja₂lag₃ le₂jaun₂ bá₄ ca₂tió'₃ ca₂jme₃'uáin₂ dsí₅
dsa₂, a₂tsá₃ ma₃qui₃jéin'₂ já'₂ ne₅₄.

19 Jaun₂ ca₂dsilén₂ i₂lin₅₄ dsa₂ judíos i₂chan₂
Antioquía, quian'₅₄ i₂chan₂ Iconio, qui₂ca₂toin'₂
jág₁ dsa₂, ca₂jmo₃ jág₁. Jaun₂ ca₂cuě'₃ cang₄ Pa₄,
ca₂tsi₂cuang'₂ tē₂'ni'₂ juig₂, a₂ma₂ně₂jag'₃ bá₄ lín₂.

20 La₁ jme₁ca₂ñi'₂ dsa₂ i₂'én₂ riin'₅₄ ja₁rě₂quaiin₂₃,
ca₂nau₂ Pa₄, ca₂ñó₃ táng₃ jui₅ jě₄ juig₂. Jme₁jnia₃
jaun₂ guě₄, ca₂o₃'iin₃ juig₂ jaun₂ quaiin'₅₄ Bernabé,
ca₂i₃lén₂ jui₅ Derbe.

21 Jui₅ dsa₂ chan₂ juig₂ Derbe ca₂rě₃'éin₂
jme₁ca₂nág₂ ca₂'ě₂ dsa₂ 'éi₂ jág₁ dse₃ a₂tín'₄ dsa₂.
Jaun₂ ca₂'uiin₂ ja₁jaun₂, ca₂i₃lén₂ táng₃ jui₅ Listra,
jui₅ Iconio ně₃, a₂ca₂dsi₃lén₂ táng₃ Antioquía.

22 Le₂tan₅₄ juig₂ ja₁jaun₂ qui₂ca₂cuě'₃ bí₂ dsa₂
i₂'én₂. Qui₂ca₂toin'₂ jág₁ dsa₂ a₂'nió'₅ tsán'₂ dsa₂ tiá₂
jág₁ dse₃. Ca₂juá'₂:

—Tion₅₄ 'nió'₅ ñag'₅₄ de'₂ 'nia'₂ jmi₁uig₅ mi₂güig₃
la₂, né'₃ guě₄ a₂dsi₁no'₃ 'nia'₂ ja₁gon₂ Diú₄.

23 Ján₃ bá₄ ca₂'in₃ dsa₂ dsa₂ can'₅₄† lia'₂ caun₂
guá'₅. Jaun₂ cang₂ jme₁ca₂lě₃ chi₂lén'₂ dsa₂ Diú₄,
a₂jme₂'iin₅₄ ně₃, ca₂dsiain₃ riin'₅₄ i₂'én₂ 'éi₂ o₄gú₃
Te₁gui'₅₄, ia₁ tē₂le₃ quió'₅ Te₁gui'₅₄ bá₄ ma₂'én₂ dsa₂.

*Pa₄ quian'₅₄ Bernabé ca₂i₃lein₃ táng₃ Antioquía
ja₁tén₄ Siria*

24 Cang₂ jaun₂ ca₂ñi₃ jui₅ 'uě₃ Pisidia, jaun₂
ca₂dsi₃lén₂ 'uě₃ Panfilia.

† 14:23 griego: presbíteros.

25 Qui₂ca₂'ě₂ jág₁ juig₂ Perge, jaun₂ ca₂i₃lén₂ juig₂ Atalia.

26 Ja₁jaun₂ ca₂tóin'₂ ni₁barco a₂ca₂i₃lein₃ táng₃ Antioquía, juig₂ ja₁ca₂jáng'₂ dsa₂ riin'₅₄ o₄gú₃ Diú₄ le₂njiá₅, a₂jmo₃ ta₁, co₂'nió'₄ ta₁ a₂ma₂ca₂lě₃ jmo₂₃.

27 Jme₁ca₂dsi₃lein₃ Antioquía, ca₂ñí'₂ ca₂le₃jín₃ riin'₅₄. Jaun₂ ca₂dsia₃ ca₂le₃jě₃ 'e₂ ca₂jmo₃ Diú₄ quiong'₅₄, 'a₂ lia'₂ ca₂niá₃ Diú₄ jui₅ quió'₅ dsi₂nau₂, ia₁jaun₂ le₃'én₂ 'éi₂ ján₃.

28 Jaun₂ uě₂ bá₄ ca₂'í₃ Pa₄ ja₁jaun₂, Bernabé ně₃ quiaín'₅₄ dsa₂ i₂'én₂.

15

Ca₂ñí'₂ riin'₅₄ Jerusalén

1 Jmí₄ jaun₂ i₂lín₅₄ dsa₂ chan₂ Judea ca₂dsi₃lén₂ juig₂ Antioquía, ca₂jme₃lióg₃ ca₂jme₃tíin₂₃ riin'₅₄ ja₁jaun₂, ně₁jua'₂ tsá₃ ti₅ dsa₂ ni₁lo₁ dsa₂ ñe'₂ lia'₂ con'₂ lě₅ Si₂ 'Éi'₃ quió'₅ Moisés, tsá₃ lé₂ tíin'₄.

2 Pablo quian'₅₄ Bernabé ca₂tsíin₂ 'ñio₅ lín₃ quian'₅₄ dsa₂ 'éi₂. Jaun₂ ca₂'in₃ dsa₂ Pa₄ quian'₅₄ Bernabé, quiaín'₅₄ i₂lín₅₄ guě₄ dsa₂ sián'₂ ně₃, a₂dsi₃lén₂ Jerusalén a₂jme₃rě₃ jág₁ jaun₂ quiaín'₅₄ dsa₂ riin'₅₄ i₂chen₄* quían₅ Jesús quian'₅₄ dsa₂ can'₅₄† quían₅ dsa₂ 'én₂.

3 Co₂nió'₃ dsa₂ i₂'én₂ juig₂ Antioquía ca₂'ág'₃ jág₁ riin'₅₄ i₂ca₂'iin₃ 'éi₂, jaun₂ 'éi₂ ně₃ ca₂i₁noi₁₂ 'uě₃ Fenicia quian'₅₄ 'uě₃ Samaria. Ja₁jaun₂ ca₂dsia₃ 'a₂ lia'₂ ca₂rě₃'én₂ dsi₂nau₂. Jaun₂ lě₃, 'ñio₅ lín₃ 'io'₂ ca₂jmo₃ dsa₂ riin'₅₄ jme₁ca₂rě₃ñi₅.

* 15:2 griego: apóstolous. † 15:2 griego: presbíteros.

4 Jme₁ca₂dsióg₃ Pa₄ quiain'₅₄ Bernabé juig₂ Jerusalén, ca₂guei₃ ca₂le₃jín₃ dsa₂ 'én₂ ja₁jaun₂, dsa₂ ríin'₅₄ i₂chen₄ quián₅ Jesús, dsa₂ can'₅₄ quián₅ dsa₂ 'én₂ ně₃. Jaun₂ ca₂dsia₃ Pa₄ quian'₅₄ Bernabé ca₂tsí'₃ ríin'₅₄ 'a₂ lia'₂ ma₂jmo₃ Diú₄ quiong'₅₄.

5 La₁ qui₂ca₂nau₂ i₂lin₅₄ dsa₂ fariseos i₂ma₂'én₂, jaun₂ ca₂juá'₂:

—Ca₂tín₂ dsí₂nau₂ tí₃ dsa₂ ní₁lo₁₂, jaun₂ 'nió'₅ nag₃ a₂jme₃tí₃ Si₂ 'Éi'₃ quió'₅ Moisés.

6 Jaun₂ ca₂ñi'₂ dsa₂ i₂chen₄ quián₅ Jesús, quian'₅₄ dsa₂ can'₅₄ ně₃, ia₁jaun₂ 'no'₂ dsí₅ 'a₂ lia'₂ jmo₃ juí₁lia'₂ jág₁ jaun₂.

7 Jme₁ma₂ně₂dsia₃ jág₁ 'ñio₅ lín₃, ca₂nau₂ Pedro jaun₂ ca₂juá'₂:

—Rín'₅₄ jniog₄, ñi'₅₄ bá₄ 'nia'₂ jaun₂, jniá₂ dsa₂ i₂ca₂quión'₂ Diú₄ jin'₄ 'nia'₂ ma₂1jáun₃, ia₁jaun₂ cuě₄ jniá₂ jág₁ dse₃ dsí₂nau₂, ia₁jaun₂ le₃'éin₂.

8 Jaun₂ Diú₄ ně₃, i₂cuí'₅ dsí₅ dsa₂, ca₂jmo₃ léi₄ a₂guei₃ bá₄, ca₂cuin₃ Jme₂dsí₂ Jñio₅ quián₅, ca₂cuin₃ dsa₂ 'éi₂ juí₁lia'₂ ma₂cuag₃ jniog₄.

9 Tsá₃ jma₃quén₅ 'nio₃ Diú₄ jniog₄ quian'₅₄ dsa₂ 'éi₂, ia₁ján₃ bá₄ ca₂rang₃ jme₂dsí₂ quió'₅ dsa₂ 'éi₂ ia₁ ca₂rě₃'éin₂.

10 Jaun₂ ně₃, ¿'e₂ lě₃ dsí₂jio₅ 'au'₂ 'nia'₂ a₂tsá₃ dsau₅ a₂ma₂jmo₃ Diú₄? ¿'E₂ lě₃ lín'₂ 'nia'₂ a₂tion₅₄ 'nió'₅ jme₃tí₃ dsa₂ i₂'én₂ 'éi₂ Si₂ 'Éi'₃, ton'₂ ca₂lia'₂ jñia'₅₄ dsa₂ can'₅₄ quián₂ jniog₄ tsá₃ ca₂tió'₃ jme₃tí₃, on₃ guě'₂ jniog₄ tián₂ jme₁ti₁?

11 La₁ ne₄ jniog₄, a₂dse₃ dsí₅ Te₁gui'₅₄ Jesús bá₄ a₂tág'₄, co₂rě₂ quian'₅₄ dsa₂ 'éi₂.

12 Jaun₂ ca₂jmo₃ dsa₂ tei₄, jaun₂ ca₂nág₂ tē₁lia'₂
ca₂juá'₂ Bernabé quian'₅₄ Pablo ca₂le₃jě₃ léi₄ jué'₂
a₂ma₂jmo₃ Diú₄ tē₂le₃ quiong'₅₄, jin₄ dsi₂nau₂.

13 Jme₁ca₂dsan₃ juá'₂ 'éi₂, jaun₂ ca₂juá'₂ táng₃ Ja-
cobo:

—Rin'₅₄ jniog₄, nei₂ 'nia'₂ a₂juá'₄ jniá₂:

14 Ma₂ně₂dsia₃ Si₂mu₅₄ Pe₄ 'a₂ lia'₂ ca₂jmo₃ Diú₄
dse₃ dsí₅ jē₁le₂'uig₅₄ tē₂le₃ quió'₅ dsi₂nau₂, 'a₂ lia'₂
ca₂quióin'₂ ján₃ jin₄ dsa₂ 'éi₂, co₂nió'₃ dsa₂ i₂lén₂ dsa₂
quián₅ 'ŋiog₅.

15 Le₂ně₅ bá₄ lě₅ jág₁ quió'₅ dsa₂ i₂jme'₁ě₂ jág₁
quián₅ Diú₄, ju₁lia'₂ ca₂tióng₃ ne₄ Si₂:

16 Guio₅₄ táng₃ cang₂, jaun₂ jmóg'₄ táng₃ ne₄ta₁

quió'₅ Rag₅₄ David a₂ma₂qui'₃;

tsi'₅₄ táng₃ ni₁cang₁ a₂ma₂gon₃ quió'₅,

17 ia₁jaun₂ ca₂le₃jín₃ dsi₂nau₂ 'nai'₂ Te₁gui'₅₄,

ca₂le₃jě₃ juig₂ ně₃,

dsa₂ i₂chen₂ dsa₂ quián₅ Diú₄.

18 Le₂ně₅ bá₄ juá'₂ Te₁gui'₅₄

i₂jmo₅ ca₂le₃jě₃ a₂ně₅,

a₂ma₂cuí'₅ dsa₂ ca₃ma₂líg'₂.‡

19 'Jaun₂ ně₃ lín₂ jniá₂ —juá'₂ Jacobo—, tsá₃ dse₃
cue₅₄ jniog₄ o₂me'₅₄ dsi₅ dsi₂nau₂ i₂ma₂jén'₂ tē₂le₃
quió'₅ Diú₄.

20 Tió'₅ me'₂ a₂ŋia'₅₄ jmó₁ jniog₄ caun₂ si₂ a₂chei₅₄
jniog₄ a₂tsá₃ ma₃guě'₃ má₃ a₂tsá₃ dsi₂ten₅₄ guě'₃
ju₁lia'₂ a₂dsia₅ dsa₂ ne₄ ne₄chei₂ quió'₅ diú₄ lag₄.
Dse₃ chei₅₄ jniog₄ a₂tsá₃ nió'₃ jág₁ quian'₅₄ dsa₂ i₂tsá₃
lín₅ dsi₂i₂gu₂, on₃ guě'₂ guě'₃ má₃ a₂tsá₃ dsi₃ten₅₄
guě'₃ dsa₂ judíos, ju₁lia'₂ já'₂ i₂güí'₅ dsa₂ dsi₂lag₄, on₃
guě'₂ jmi₄ já'₂ ně₃.

‡ 15:18 Amós 9:11-12.

21 Ia₁ ma₂líg'₂ bá₄ ma₂tu₁ja₂lén₂ dsa₂ qui₂'ě₂ 'Éi'₃ Juá'₅ quió'₅ Moisés le₂caun₂ le₂caun₂ juig₂, qui₂'i₂₃ dsi₂néi₂ guá'₅ sinagogas ca₂le₃jě₃ jmig₄ sa₅₄.

22 Jaun₂ ně₃, ca₂tě₁gua₁ jág₁ quió'₅ dsa₂ i₂chen₄ quián₅ Jesús, quian'₅₄ dsa₂ can'₅₄, ca₂le₃jín₃ guě₄ dsa₂ i₂lín₅ guá'₅ a₂'in₃ i₂lin₅₄ jě₄ quió'₅ rin'₅₄, i₂chein₃ quian'₅₄ Pablo, Bernabé ně₃, jui₅ Antioquía. Jaun₂ ca₂'in₃ dsa₂ Judas i₂chen₂ Barsabás ján₃, quian'₅₄ i₂chen₂ Silas i₂lín₅ dsa₂ i₂quian₅ ne₄ jui₅ jě₄ quió'₅ dsa₂ i₂'én₂.

23 Jaun₂ quian'₅₄ 'éi₂ ca₂chein₃ si₂ carta a₂juá'₂ le₂la₂:

Jnia'₅₄ con'₂ lág₅ dsa₂ chen₄ quián₅ Jesús, quian'₅₄ dsa₂ can'₅₄ quián₂ jnia'₅₄, ca₂le₃jín₃ guě₄ rin'₅₄ jnia'₅₄ i₂'én₂, chen₄ jnia'₅₄ si₂ la₂ ne'₅₄ 'nia'₂ dsi₂nau₂ rin'₅₄ jniog₄ i₂tián'₅ juig₂ Antioquía, quian'₅₄ i₂tián'₅ 'uě₃ Siria, quian'₅₄ i₂tián'₅ 'uě₃ Cilicia ně₃. Cuín₅ jnia'₅₄ Diú₄ 'nia'₂.

24 Ma₂ca₂rě₃ne₄ jnia'₅₄ jág₁ a₂i₁len₅₄ i₂lin₅₄ dsa₂ chan₂ ja₁láš, on₃juá'₅₄ i₂chen₄ quián₂ jnia'₅₄. Ma₂dsi₃lėin₂ cuě'₅ o₂me'₅₄ dsi₅ 'nia'₂ quian'₅₄ jág₁ quió'₅ a₂tsí'₅ 'nia'₂ a₂tion₅₄ 'nió'₅ ti₃ dsa₂ ni₁lo₁ dsa₂ ŋe'₂, a₂jme₁ti'₄ 'nia'₂ 'Éi'₃ quió'₅ Moisés ně₃.

25 'Uig₅₄ jaun₂, ca₂jmó₁ jnia'₅₄ caun₂ jág₁, ca₂'ín₄ jnia'₅₄ rin'₅₄ jě₄ quián₂ jnia'₅₄ a₂dsi₃lėin₂ co₂lě₅ quian'₅₄ Bernabé quian'₅₄ Pa₄ i₂'nio₄ lin₃ quián₂ jnia'₅₄, a₂dsi₃jın₅₄ 'nia'₂. Ia₁ le₂jaun₂ bá₄ dse₃, lág₂ jnia'₅₄.

26 Ma₂le₁'ág₄ caun₂ dsí₅ gue₃ 'mú₃ o₁quió'₄ Te₁gui'₅₄ Jesucristo quián₂ jniog₄.

27 Jaun₂ chen₄ jnia'₅₄ Judas quian'₅₄ Silas ně₃, jaun₂ i₂ně₅ bá₄ juá'₂ quian'₅₄ jág₁ tio'₅₄ 'o₅₄ ca₂le₃jě₃

a₂jua'₂ jnia'₅₄ la₂.

28 Jaun₂ ně₃, Jme₂dsí₂ Jñió₅ bá₄ ca₂jme₃o₅₄
a₂'niog'₅₄ jnia'₅₄ dsí₅, jaun₂ dse₃ bá₄ lág₂ jnia'₅₄
a₂tsá₃ cuë₅₄ jnia'₅₄ 'nia'₂ 'éi'₃ guei₂, jñia'₅₄ lia'₂ jmá'₃
lia'₂ a₂léi₄ 'nió'₅ quián'₂ 'nia'₂ la₂:

29 A₂tsá₃ quë'₅₄ 'nia'₂ ni₁ñí₅ a₂ma₂dsia₃ dsa₂ ne₄
ne₄chei₂ quió'₅ diú₄ lag₄; já₃ bá₄ tsá₃ quë'₅₄ 'nia'₂
jmi₄ já'₂, on₃ guë'₂ ni₁ñi₁ já'₂ i₂dsan₂ i₂güí'₅ dsa₂
dsi₂lag₄. Tsá₃ nió'₄ 'nia'₂ já₃ quián'₅₄ dsa₂ i₂tsá₃ lín₅
dsi₂i₂gog'₂. Nē₁jua'₂ ca₂jme₁ti'₄ 'nia'₂ já₃ la₂, dse₃ bá₄
le₃chan'₂ 'nia'₂.

Co₂nē₅ bá₄ já₃.

30 Jaun₂ ně₃, le₂nē₅ bá₄ ca₂tón'₂ 'éi₂ juí₅, ca₂i₃lén₂
juí₅ Antioquía. Jaun₂ ca₂ñí'₂ dsa₂ i₂én₂ ja₁jaun₂.
Jaun₂ ca₂jín'₃ dsa₂ si₂ carta a₂jme₁quian₅.

31 Jme₁ca₂'í₂ riin'₅₄ si₂, qui₂ca₂jmo₃ 'io'₂ o₁quió'₄
jág₁ a₂cuë₅ lián'₂ dsí₅ jaun₂.

32 Ia₁ Judas quian'₅₄ Silas, i₂jme₁'ě₂ já₃ a₂cuë₅
Diú₄ já₃, ca₂cuë₃ 'lióng₂ já₃ dse₃ a₂ca₂jmo₃ ca₂'ág₂
dse₃ dsí₅ riin'₅₄, 'ñio₅ lin₃ ca₂cuë₃ bí₂ ně₃, quian'₅₄ já₃
quió'₅.

33 Jme₁ma₂tě₂ 'lióng₂ jmig₄ tioen'₅₄ ja₁jaun₂,
ca₂dsióg'₂ táng₃ dsa₂ caun₂ tei₄ ja₁con₂ riin'₅₄
i₂ca₂chei₃.§

35 La₁ ca₂jñia₃ Pa₄ quian'₅₄ Bernabé juig₂ Antio-
quía, qui₂jme₂tiin₂₃ dsa₂, quian'₅₄ juin₅ guë₄ i₂sián'₂,
qui₂'ě'₅ dsa₂ já₃ dse₃ quió'₅ Te₁gui'₅₄.

Ca₂ñó₃ Pa₄ ca₂i₁'ě₄ já₃ jě₁ca₂tě₂ tin₃ ráun₂

36 Cang₂ jaun₂, ca₂juá'₂ Pa₄ ca₂tsí'₃ Bernabé:

§ 15:33 A₂lin₅₄ chog₅₄ si₂ chi₁ton₅ versículo 34: “La₁ Silas ně₃,
ca₂dsia₃ dsí₅ jñia₃.”

—Dsau₅₄ táng₃ dsi₁jín₁ rín'₅₄ ca₂le₃jě₃ juig₂
ja₁ma₂ca₂i₁'ë'₅₄ dsa₂ jág₁ dse₃ quió'₅ Te₁gui'₅₄,
dsi₁jag₅₄ ně₁jua'₂ 'a₂ lia'₂ chain₂.

³⁷ Bernabé ně₃ jme₁'nio₃ jñiai₃ Juan₅₄, i₂chen₂
Marcos ján₃.

³⁸ La₁ Pa₄ guë'₂ ně₃ tsá₃ ca₂gue₃ jiog₃, ia₁ ca₂téi₂
bá₄ 'éi₂ lia'₂ con'₂ jme₁i₁nioi₁₂ 'uë₃ Panfilia,* tsá₃
ma₃ca₂jme₃quiong'₅₄ jua'₅₄ a₂jme₃'o₅₄.

³⁹ Jaun₂ ca₂tsín₂ 'ñio₅ lín₃, ca₂lia'₂ ca₂i₃léin₂
jma₃quén₅. Jaun₂ Bernabé bá₄ ca₂jñia₃ Marcos,
ca₂tóin'₂ ni₁barco, ca₂i₃léin₂ jui₅ Chipre.

⁴⁰ Pa₄ guë'₂ ca₂quióin'₂ Silas. Jme₁ma₂ně₂jáng'₂
rín'₅₄ o₄gú₃ Te₁gui'₅₄ i₂'nio₃, jaun₂ qui₂ca₂'ág'₃ jág₁
rín'₅₄, ca₂i₃léin₂.

⁴¹ Jaun₂ ca₂i₁ñi₁₂ le₂tan₅₄ 'uë₃ Siria quian'₅₄ Cili-
cia, qui₂i₁cuë'₂ bí₂ rín'₅₄ i₂tián'₅ ja₁jaun₂.

16

*Ca₂jme₃quiong'₅₄ Timoteo ca₂jme₃quian'₅₄ Pa₄
quian'₅₄ Silas*

¹ Ca₂dsióg₃ Pa₄ quian'₅₄ Silas juig₂ Derbe, juig₂
Listra ně₃. Ja₁jaun₂ ca₂jein'₂ jan₂ dsa₂ 'én₂ i₂chen₂
Timoteo. Chog₅₄ Timoteo 'éi₂ jme₁lín₄ 'io₅₄ judía
i₂ma₂'én₂ jág₁ dse₃. Jmei₂ guë'₂ jme₁lín₄ jan₂ griego.

² Jaun₂ dsa₂ i₂'én₂ i₂jme₁tián'₄ Listra quian'₅₄ Ico-
nio, dse₃ bá₄ jme₁'ag₂₃.

³ Jaun₂ 'nio₃ Pa₄ jiog₃ quiong'₅₄, jaun₂ ca₂ti₃ ni₁lo₁
'éi₂,* ia₁jaun₂ tsá₃ jén'₄ 'lig'₅₄ dsa₂ judíos i₂tián'₅

* **15:38** 'Nio'₂ ja₁ton₅ Hechos 13:15.

* **16:3** o₃, “ca₂jmo₃ a₂ca₂ti₃
dsa₂ ni₁lo₁ 'éi₂.”

ja₁jaun₂. Ia₁ ma₂ŋi₅ bá₄ ca₂le₃jín₃ dsa₂, a₂lín₅ griego jmei₂ 'éi₂.

⁴ Ca₂le₃jě₃ juig₂ ja₁ca₂ŋí₃, qui₂ca₂jme₃jein'₂ riin'₅₄ ca₂cuë₃ 'éi'₃ con'₂ lě₅ jág₁ quió'₅ dsa₂ i₂chen₄ quián₅ Jesús, jág₁ quió'₅ dsa₂ can'₅₄ i₂tián'₅ Jerusalén ně₃.

⁵ Jaun₂ ně₃, ca₂le₃jín₃ dsa₂ i₂lín₅ guá'₅, ca₂ŋa'₃ tiá₂ jág₁ dse₃ a₂'éin₂, jaun₂ le₂o₃ jmig₄ bá₄ ca₂i₃jui_{in}₂.

*Ca₂qui₃ Pablo a₂ca₂jíin₂ jan₂ dsa₂ chan₂ Macedo-
nia*

⁶ Tsá₃ ca₂cuë₃ Jme₂dsí₂ ŋi_ó₅ jmig₄ a₂'ě₂ dsa₂ jág₁ dse₃ 'uë₃ Asia. Jaun₂ lě₃ ca₂i₁lein₅₄ ca₂i₁ŋi_i₁₂ le₂tan₅₄ 'uë₃ Frigia quian'₅₄ 'uë₃ Galacia.

⁷ Jaun₂ ca₂dsi₃lén₂ ja₁jén₂ 'uë₃ Misia. Ja₁jaun₂ jme₁'nio₃ jme₁dsi₃lén₂ 'uë₃ Bitinia. La₁ tsá₃ ca₂cuë₃ jmig₄ Jme₂dsí₂ quián₅ Jesús dsi₃lén₂ ja₁jaun₂.

⁸ Jaun₂ con'₂ ca₂ŋí₃ bá₄ 'uë₃ Misia, ca₂dsi₃lén₂ 'o₄ jmi₁ŋí'₄ ja₁chei₂ Troas.

⁹ Ja₁jaun₂ ca₂qui₃ Pa₄ a₂'uë₂ jaun₂ a₂ca₂jíin₂ jan₂ dsa₂ chan₂ 'uë₃ Macedonia, a₂chéin'₅ mi_i₂₃, a₂juá'₂: “Ŋi_i₅₄ jui₅ 'uë₃ Macedonia i₂jme₁'o₁ jnia'₅₄.”

¹⁰ Dsi₂jui₅ jme₁ca₂qui₃ Pa₄ le₂ně₅, jaun₂ ca₂jmó₁ jnia'₅₄ co₂ŋia₅₄ a₂dsi₁ná_u₄ jui₅ Macedonia. Ia₁ dsón'₂ lág₂ jnia'₅₄ a₂tě₂ Diú₄ ja₁jaun₂ a₂dsi₁'ě₄ jnia'₅₄ jág₁ dse₃,†

Pa₄ quian'₅₄ Silas tioin'₅₄ juig₂ Filipos

¹¹ Ca₂tió'₄ jnia'₅₄ 'ŋi_ó₃ ni₁barco juig₂ Troas. Ca₂i₃ná_u₅ jnia'₅₄ co₂dsau₅ jui₅ 'uë₃ Samotracia

† **16:10** Ja₁lá₃ ca₂jme₃lióg₃ Lucas ca₂jme₃quian'₅₄ Pa₄ quian'₅₄ riin'₅₄ ja₁jme₁i₂nioi₅₄. Ja₁lá₃ ca₂jme₃lióg₃ juá'₂ “jnia'₅₄” lia'₂ con'₂ jme₁ca₂jmo₃ Si₂ Hechos la₂.

a₂nig₅ jë₄ jm_iñí'₄. Jme₁jnia₃ jaun₂, ca₂dsi₃náu₅ jnia'₅₄ Neápolis.

12 Tio'₅₄ jnia'₅₄ ja₁jaun₂, i₂náu₅ táng₃ ja₁chei₂ Filipos. Ja₁jaun₂ lë₅ caun₂ colonia romana ja₁lë₄ juig₂ dsen₅₄ guë₄ quió'₅ dsa₂ chan₂ 'uë₃ Macedonia. Ja₁jaun₂ ca₂tió'₄ jnia'₅₄ tin₃-ni₅ jmig₄.

13 Caun₂ jmig₄ sa₅₄ ca₂i₁náu₄ juí₅ 'ni'₂ juig₂, cau₅ chei'₅₄ cuá₃, caun₂ ja₁jme₁lë₄ ja₁dsi₂lén₂ dsa₂ a₂chi₂lén'₂ Diú₄. Ja₁jaun₂ ca₂'io₄ jnia'₅₄, ca₂jme₁tin₅ jnia'₅₄ 'io₅₄ i₂ca₂ñí'₂, jág₁ dse₃ quió'₅ Diú₄.

14 Jan₂ 'io₅₄ i₂jme₁'en₅₄ jë₄ jaun₂ i₂chen₂ Lidia i₂chan₂ juig₂ Tiatira, jme₁lín₄ dsa₂ i₂'nag₅ 'mi'₂ 'ui'₃ jlá'₁. 'Io₅₄ 'éi₂, jme₁jme₂juin'₂ Diú₄. Jaun₂ ca₂jmo₃ Te₁gui'₅₄ ca₂lë₃ dsí₅ 'io₅₄ 'éi₂ a₂nag₃ a₂tón'₂ juí₅ a₂juá'₂ Pa₄.

15 Jaun₂ ca₂jñói₂ jmig₂ co₂dsia₅ quian'₅₄ ca₂le₃jín₃ dsa₂ dsi₂néi₂ quió'₅. Jme₁co₂lág₂ jaun₂, ca₂mi₃ tság₅ jnia'₅₄:

—Chi₂jua'₂ jmo'₂ 'nia'₂ 'au'₂ a₂lín₅ jniá₂ të₃dsón'₂ dsa₂ i₂'én₂ jág₁ quió'₅ Te₁gui'₅₄, i₂nó'₅ 'nia'₂ ja₁quió₃ i₁jñia'₄.

Jaun₂ ca₂juá'₂ tion₅₄ a₂ca₂jñia₄ jnia'₅₄.

16 Co₂ráun₂ ca₂lë₃, lia'₂ con'₂ jme₁i₃náu₅ jnia'₅₄ ja₁chi₂lén'₂ dsa₂ Diú₄, ca₂jen'₂ jnia'₅₄ jan₂ 'io₅₄ chi'₂ i₂jme₁'en₅₄ jme₂dsí₂ 'lín'₅₄ të₂dsí₅, i₂dsi₂ jág₁.[‡] 'Io₅₄ 'éi₂ a₂lë₁jmo₂₃ bá₄ ta₁, ia₁ juig₅₄ bá₄ jme₁cán₂ cu₄ a₂jme₁lí'₂ a₂dsi₂ jág₁.

17 'Io₅₄ chi'₂ 'éi₂ ca₂'ein₃ Pa₄, ca₂'ein₃ jnia'₅₄ ně₃, ca₂guió'₃ ca₂tsí'₃ dsa₂ i₂jme₁tion'₅₄:

[‡] 16:16 lit. “jan₂ 'io₅₄ chi'₂ i₂jme₁jñiog₅ jme₂dsí₂ quió'₅ dsi₂mi'₂ cua₁ pithón.”

—Dsa₂ nĕ₅ i₂jme₂ti₃ ta₁ ne₄ Diú₄ juin'₂ guĕ₄. Jaun₂ 'ĕ₂jág₁ tsí'₅ 'nia'₂ 'a₂lia'₂ lé₂ líón'₂ 'nia'₂.

18 'Lióng₂ jmíg₄ ca₂jmo₃ le₂jaun₂. Ca₂lĕ₃ jme₁ca₂lĕ₃ ca₂i₃mé'₂ dsí'₅ Pa₄. Jaun₂ ca₂jí'₂, ca₂juá'₂ ca₂tsí'₃ jme₂dsí'₂ 'lín'₅₄ i₂jme₁'en₅₄ quió'₅ 'io₅₄ 'éi'₂:

—Quian'₅₄ bí'₂ 'éi'₃ quió'₅ Jesucristo, jmo₅₄ jniá'₂ 'éi'₃, jú₅ quió'₅ 'io₅₄ nĕ₅.

Jaun₂ co₂tan₅₄ dsi₂jui₅ jaun₂, ca₂o₃'ín₃ jme₂dsí'₂ 'lín'₅₄ ca₂téin₂ 'io₅₄.

19 Jme₁ca₂rĕ₃lí'₄ dsa₂ juig₅₄ 'io₅₄ 'éi'₂, a₂tsá₃ ma₃cuin₅ jmíg₄ a₂lí'₂ guĕ₄ cu₄ quian'₅₄ 'éi'₂, jaun₂ ca₂jñai'₃ Pa₄ quian'₅₄ Silas, ca₂tág₃ jui₅ 'ma'₅₄ ne₄ dsi₂tan₅₄.

20 Jaun₂ ca₂i₁jo₅₄ ja₁tián'₄ juĕ₄, jaun₂ ca₂juá'₂:

—Dsa₂ la₂, i₂lín₅ judíos, i₂nioi₅₄ tsi₂jñin₂₃ dsa₂ juig₂ go₄ jniog₄.

21 Qui₂'ĕ'₅ jme₂tiin₂₃ dsa₂ tag₄ a₂tsá₃ dsi₂ten₅₄ guéi'₁ jniog₄, on₃ guĕ'₂ dsi₂ten₅₄ jua'₅₄ a₂jmó₁, ia₁ dsa₂ romanos bá₄ lág₅.

22 Jaun₂ ca₂nau₂ dsa₂ juig₂ 'nei₂ ca₂jmái'₂ Pa₄ quian'₅₄ Silas. Jaun₂ ca₂dsi₂ dsi₂tan₅₄ a₂dsi₂uig₅ ni₁tsin'₅₄, jaun₂ ca₂jmo₃ 'éi'₃ a₂bóg₂ nĕ₃ quian'₅₄ ni₁'ma₂.

23 Jme₁ma₂dsan₃ bóg₂ 'ñio₅ lín₃, jaun₂ guĕ₄ ca₂to'₂ né'₃ 'má₃. Ca₂jmo₃ 'éi'₃ a₂jmo₃ dsa₂ i₂niog₅ gu₂ 'né₅ 'má₃ 'í₁ dse₃ lín₃.

24 Dsa₂ 'éi'₂ nĕ₃, jme₁ca₂ñi₂ 'éi'₃ jaun₂, ca₂i₁tio'₂ ca₂tĕ₂ quióng₄ tsi₁'né₅ 'má₃, le₁tia₃ mi₂tag₅₄ 'ñio'₃ tau₂ ni₁'ma₂.

25 La₁ con'₂ dsi₃nei₅ jme₁ca₂'ĕ₃ Pa₄ alabanzas quian'₅₄ Silas qui₂ca₂tsí'₃ Diú₄, qui₂ca₂nág₂ bá₄ dsa₂ sián'₂ i₂tion'₅₄ 'né₅ 'má₃.

26 Të₃jë₄ jaun₂, con'₂ tsá₃ ján₅ dsa₂, ca₂i₁bi₅₄ 'uë₃ tiá₂ lín₃, ca₂lia'₂ qui₂ca₂jě'₂ 'uig₅₄ ni₁'ia'₂ tsi₁'né₅ 'má₃, qui₂ca₂niá'₃ ca₂le₃jě'₃ o₄'né₄, qui₂ca₂gag₂ ηí₁ cadenas a₂jme₁le₁'ηe'₅₄ ca₂le₃jín₃ dsa₂ i₂jme₁tion'₅₄ 'ηió'₃.

27 Jme₁ca₂ηé₃ dsa₂ i₂jmo₅ 'í₁, ca₂jág₃ ma₂le₁na₁ jë₂ o₄'né₄ 'né₅ 'má₃, jaun₂ ca₂dsi₂ ηi₁tág₂ quió'₅ a₂jme₁jñi'₃ 'ηiog₅. Ia₁ lín₂ ma₂ca₂lón₂ jin₂ bá₄ i₂le₁jní₅ né'₃ 'má₃.

28 La₁ dsi₂jui₅ ca₂guió'₃ Pa₄ ca₂juá'₂:

—Tsá₃ lë₁jmag'₅₄ uig₅ 'ηiag'₂, ia₁ la₂ bá₄ tio'₅₄ jnia'₅₄ ca₂le₃jág₃.

29 Jaun₂ ca₂mi₃ dsa₂ 'éi₂ si₂, jaun₂ ca₂'í₃ co₂chi'₅₄ dsi₂néi₂ tē₃ gó'₅ jlein₂₃ ηó₃ ca₂chi₃jnē₃ ne₄ Pa₄ quian'₅₄ Silas.

30 Jaun₂ ca₂'uág'₂ tē₂ca₁'né₄, jaun₂ ca₂ηag₃:

—'Nia'₂ dsa₂, ¿'e₂ 'nió'₅ jmo₅₄ jniá₂ ia₁ jaun₂ lión₂ jniá₂?

31 Jaun₂ ca₂juá'₂ 'éi₂:

—'Én₃ tē₂le₃ quió'₅ Te₁gui'₅₄ Jesucristo, jaun₂ bá₄ tíng'₄, quiang'₅₄ ca₂le₃jín₃ dsa₂ dsi₂néi₂ quiáng'₂.

32 Jaun₂ ca₂cuë'₃ Pa₄ quian'₅₄ Silas jág₁ dse₃ quió'₅ Te₁gui'₅₄ ca₂cuë'₃ dsa₂ 'éi₂ quian'₅₄ ca₂le₃jín₃ dsa₂ i₂tián'₅ dsi₂néi₂ quió'₅.

33 Hora jaun₂ a₂'uë₂, dsa₂ i₂niog₅ gu₂ 'né₅ 'má₃ 'éi₂ qui₂ca₂rín'₃ ja₁qui₂le₁cuí'₃ quió'₅ Pa₄ quian'₅₄ Silas. Jaun₂ 'éi₂ quian'₅₄ ca₂le₃jín₃ dsa₂ dsi₂néi₂ quió'₅, ca₂jñói₂ jmig₂.

34 Jme₁co₂lág₂ jaun₂, ca₂tág₃ ja₁quió'₄, ca₂i₁cuë₂ a₂guë'₃. Jaun₂ 'io'₂ jmo₂₃ ca₂le₃jín₃, ia₁ ca₂rë'₃éin₂ jág₁ quió'₅ Diú₄.

35 Jme₁jnia₃ jaun₂, ca₂chen₃ juě₄ chi'₂ 'í'₅₄
a₂ca₂i₁chi'₄ dsa₂ i₂nio_g₅ gu₂ 'né₅ 'má₃, a₂lióin₂ dsa₂
'éi₂.

36 Jaun₂ ca₂juá'₂ dsa₂ i₂nio_g₅ gu₂ 'né₅ 'má₃ ca₂tsí'₃
Pa₄:

—Ma₂ŋig₂ 'éi'₃ quió'₅ juě₄ a₂long₅₄ 'nia'₂. Jaun₂
ma₂lé₂ o₁no'₄ 'nia'₂ tei₄ quiáng'₂.

37 Jaun₂ ca₂juá'₂ Pa₄ ca₂tsí'₃ chi'₂ 'í'₅₄:

—Ca₂chóng'₂ dsa₂ jnia'₅₄, qui₂ca₂bóg₂ tē₃jñ₄ dsa₂
juin₅ tē₃ tsá₃ ca₂cáun₃ de'₂ jág₁ dsau₅ quián₂ jnia'₅₄
i₂lág₅ dsa₂ tén₅ juig₂ Roma. Jaun₂ guě₄ ca₂to'₂ né'₃
'má₃. ¿Ně₃ ně₃ 'nio₃ lió₂ jnia'₅₄ con'₂ tē₃co'₅₄? Tsá₃
le₂jaun₂. Jui₁ja₂léin₂ guioin₅₄ jui₁ja₂'uag'₅₄, jui₁lia'₂
ca₂to'₂.

38 Jaun₂ guě₄ ca₂i₁con₂ chi'₂ 'í'₅₄ jág₁ jaun₂ ne₄ juě₄,
jaun₂ ca₂rě₃gó'₅ jme₁ca₂rě₃ŋi₅ a₂lín₅ Pa₄ quian'₅₄
Silas dsa₂ tén₅ Roma.

39 Jaun₂ ca₂i₁len₅₄ dsi₂tan₅₄ ca₂i₁mi₂ o₂'én₂ dso₄ ne₄
Pa₄ quian'₅₄ Silas. Ca₂'uág'₂ bá₄ jaun₂ ně₃, jaun₂
ca₂juá'₂ a₂'uín₃ 'éi₂ juig₂ jaun₂.

40 Jme₁ma₂'uin₂ 'éi₂ 'né₅ 'má₃, ca₂i₃lein₃ ja₁quió'₄
'io₅₄ Lidia. Jme₁ca₂ŋi'₂ quiaín'₅₄ riín'₅₄, qui₂ca₂cuě₃
bí₂ ně₃, jaun₂ guě₄ ca₂'uin₂ ja₁jaun₂, ca₂i₁lein₅₄ guě₄
juig₂ siá'₂.

17

Ca₂lě₃ mi'₅₄ juig₂ Tesalónica

¹ Jui₅ ja₁ca₂ŋe₄ Pa₄ quiaín'₅₄ Silas jaun₂, ca₂i₁ŋi₁₂
juig₂ Anfípolis quian'₅₄ juig₂ Apolonia ně₃. Jaun₂
ca₂dsi₃léin₂ juig₂ chei₂ Tesalónica. Ja₁jaun₂ jme₁chí'₄
guá'₅ sinagoga quió'₅ dsa₂ judíos.

2 Pa₄ ně₃, ia₁ le₂jaun₂ tin₂ quió'₅, ca₂ŋei₅₄ guá'₅. Të₁lia'₂ ca₂l'₃ tin₃-ni₅ semana ja₁jaun₂, qui₂ca₂dsia₃ jág₁ quian'₅₄ dsa₂ ca₂le₃jě₃ jmig₄ sa₅₄, ju₁lia'₂ jág₁ a₂juá'₂ ne₄ Si₂.

3 Qui₂ca₂cuë₃ jág₁ dsau₅ 'a₂ lia'₂ dsón'₂ 'i₄ 'éi'₃ ne₄ Si₂ quió'₅ Diú₄ a₂juá'₂ a₂tion₅₄ ŋág₃ uig₅ I₂rë₂'ín₁ quián₅ Diú₄, jaun₂ cang₂ jë₁ma₂join₂₃, a₂tion₅₄ niog₅ jein'₅₄ táng₃. Jaun₂ caun₂ ca₂juá'₂ bá₄:

—Jesús i₂'ín₅ jniá₂, jág₁ a₂'ě₅ juíg₂ 'nia'₂, I₂rë₂'ín₁ quián₅ Diú₄ bá₄ 'éi₂.

4 Jaun₂ ca₂rë₃'én₂ i₂lin₅₄ dsa₂ judíos, ca₂jme₃quaiin'₅₄ Pa₄ quian'₅₄ Silas. Ján₃ bá₄ ca₂rë₃'én₂ juin₅ dsa₂ griegos i₂jme₁jme₂juin'₂ Diú₄, ca₂rë₃'én₂ juin₅ 'io₅₄ dsen₅₄ ně₃.

5 La₁ dsa₂ judíos i₂tsá₃ 'én₂ ně₃, ca₂rë₃'néi₃ a₂dsi'₅. Jaun₂ ca₂jme₃quaiin'₅₄ co₂nió'₃ dsa₂ juí'₅ i₂lë₁jme₁i₂nio₄ ts₁j₁in₁ jë₄ calle. Ca₂quin'₃ jág₁ quió'₅, ca₂l₁nioi₁₂ ca₂tó'₂ mi'₅₄, ts₁j₂j₁in₂₃ dsa₂ juig₂. Jaun₂ ca₂i₁toin'₁ tion₅₄-jan₃ ja₁quió'₄ Jasón, a₂jme₁'nio₃ dsein₂₃ Pa₄ quaiin'₅₄ Silas, a₂jme₁të₂ 'éi₂ jin₄ dsa₂ juig₂.

6 Ia₁ tsá₃ ca₂dsáin'₂ 'éi₂ ja₁jaun₂, Jasón bá₄ qui₂ca₂tsi₃cuin'₂ quaiin'₅₄ gué₄ riin'₅₄ i₂'én₂, jaun₂ ca₂tág₃ juí₅ ne₄ta₁, ca₂i₁jang'₂ ne₄ dsi₂tan₅₄, jaun₂ ca₂juá'₂ ca₂lia'₂ quió'₅ tioin'₅₄.

—I₂la₂ bá₄ dsa₂ i₂ŋí₄ lë₃ ma₂jmo₃ tsá₃ ma₃caun₂ 'ei₅ jág₁, qui₂ma₂jéin'₂ dsa₂ ta₁caun₂ mi₂güig₃. Le₂jaun₂ bá₄ 'nio₃ jmo₃ ja₁lálá₃ ján₃, ta₁ jaun₂ bá₄ ja₂léin₂.

7 Jasón la₂ ně₂cuë₃ jmig₄ ně₂ŋia₃ dsa₂ 'éi₂ ja₁quió'₄. Ca₂le₃jín₃ 'éi₂ jmo₂₃ a₂tsá₃ dsi₂ten₅₄ jmo₃ lia'₂ con'₂

lě₅ 'éi'₃ quió'₅ gui'₅₄ emperador. Ia₁ i₂nioi₅₄ tsí'₅ dsa₂
a₂chan₂ guě₄ jan₂ rag₅₄ sián'₂, jan₂ i₂chen₂ Jesús.

⁸ Jme₁ca₂nág₂ dsa₂ le₂ně₅, ca₂tóin'₂ go₂'i₃ quian'₅₄
dsi₂tan₅₄.

⁹ La₁ Jasón quian'₅₄ riin'₅₄ ca₂quí₃ cu₄ ne₄ dsi₂tan₅₄,
jaun₂ guě₄ ca₂lió₂ dsa₂.

Pablo quian'₅₄ Silas tioin'₅₄ juig₂ Berea

¹⁰ Dsi₂jui₅ le₂jaun₂ ca₂jmo₃ riin'₅₄ a₂ηó₃ Pa₄
quaiin'₅₄ Silas tē₃ a₂'uě₂ jui₅ Berea. Jme₁ca₂dsi₃lén₂
ja₁jaun₂, i₁lein₅₄ dsi₂jui₅ dsi₂néi₂ guá'₅ sinagoga
quió'₅ dsa₂ judíos.

¹¹ Dsa₂ judíos i₂jme₁tián'₄ ja₁jaun₂ jme₁dsein₃
con'₂ guě₄ dsa₂ juig₂ Tesalónica. Lia'₂ 'i₄ rě₂ jág₁
bá₄ ca₂gue₃ jág₁ dse₃ quió'₅ Diú₄. Jaun₂ ca₂le₃jě₃
jmig₄ bá₄ jme₁'no'₂ ne₄ Si₂ quió'₅ Diú₄, ia₁ 'nio₃
le₃ηi₅ chi₂jua'₂ dsón'₂ bá₄ le₂jaun₂ lě₅ jág₁ a₂cuě₅ Pa₄
quian'₅₄ Silas.

¹² Juin₅ bá₄ dsa₂ judíos 'éi₂ ca₂rě₃'én₂. Ján₃ bá₄
le₂jaun₂ juin₅ dsa₂ griegos, lia'₂ dsa₂ ηe'₂ lia'₂ 'io₅₄
dsen₅₄ ně₃.

¹³ La₁ jme₁ca₂rě₃ηi₅ dsa₂ chan₂ Tesalónica a₂'en₅₄
Pa₄ 'ě'₅ dsa₂ jág₁ dse₃ quió'₅ Diú₄ juig₂ Berea ján₃,
jaun₂ ca₂l₃lén₂ ja₁jaun₂, ca₂chi₂ca₂jain₃ dsa₂.

¹⁴ La₁ co₂tan₅₄ ca₂chei₃ riin'₅₄ ca₂chein₃ Pa₄ chei'₅₄
jm₁ηí'₄. Ca₂ηia₃ bá₄ Silas quian'₅₄ Timoteo juig₂
Berea.

¹⁵ Ca₂l₁jiog₃ dsa₂ i₂jme₁quian'₅₄ Pa₄ ca₂l₁ηia₃
'éi₂ ca₂tě₂ juig₂ Atenas. Jaun₂ ca₂l₃lein₃ táng₃
le₁quion₂ jág₁ quió'₅ Pa₄ a₂jiá₃ Silas quaiin'₅₄ Timo-
teo a₂dsi₃jme₃quiong'₅₄ dsi₂jui₅.

'En₅₄ Pablo juig₂ Atenas

16 Të₁lia'₂ 'en₅₄ Pa₄ chi₁n₁jia₂₃ Silas quian'₅₄ Timo-
te_o juig₂ Atenas, tsá₃ dse₃ 'ei₅ dsí₅, ia₁ ca₂jín₂ juin₅
lin₃ diú₄ lag₄ tión₂ le₂tan₅₄ jë₄ juig₂.

17 Jaun₂ ca₂i₁'ë₄ jág₁ dse₃ dsi₂néi₂ guá'₅ sinagoga,
ca₂tsí'₃ dsa₂ judíos, dsa₂ sián'₂ ně₃ i₂jme₂juin'₂ Diú₄
të₃dsón'₂. Ca₂le₃jë₃ jmig₄ ně₃, qui₂ca₂'ë₂ Pa₄ jág₁ dse₃
jë₄ 'ma'₅₄ ca₂tsí'₃ ca₂le₃jín₃ dsa₂ i₂jme₁jein'₂ ja₁jaun₂.

18 I₂lin₅₄ dsa₂ i₂jme₁jme₂tag₅ si₂ quió'₅ dsa₂ i₂të'₂
dsa₂ epicúreos, i₂lin₅₄ guë'₂ i₂jme₁jme₂tag₅ si₂ quió'₅
i₂të'₂ dsa₂ estoicos, dsa₂ 'éi₂ ca₂jme₃lió₃ ca₂dsia₃
jág₁ quian'₅₄ Pa₄. I₂lin₅₄ guë'₂ dsia₅ tsí'₅ rin'₅₄:

—Tsá₃ ne₄ 'e₂ bá₄ jág₁ quian₅ i₁ten'₅₄ ně₅ a₂juá'₂
tság₃ jniog₄.

I₂lin₅₄ guë'₂ juá'₂ táng₃:

—Mei'₂ tsá₃ i₂'ë₂ jág₁ quió'₅ diú₄ sián'₂ i₂quián₅
dsi₂nau₂ bá₄ ně₅.

Jaun₂ bá₄ juá'₂ le₂jaun₂, ia₁ 'en₅₄ Pa₄ 'ë₂ jág₁ dse₃
quió'₅ Jesús, 'a₂ lia'₂ ca₂jein'₅₄ táng₃.

19 Jaun₂ ca₂n₁jia₃ Pa₄ caun₂ ja₁chei₂ Areópago.
Jme₁ca₂dsi₃léin₂ ja₁jaun₂, ca₂n₁jí'₃ Pa₄ ca₂juá'₂:

—¿Lé₂ le₃ne₄ jnia'₅₄ 'e₂ jág₁ 'mí₂ dsia'₂ a₂jme₂tág'₂?

20 'Niog₂ jnia'₅₄ le₃ne₄ 'e₂ jein₅ jág₁ a₁juá'₂ 'ne₂ ně₅.
Ja₂lin₃ guë'₄ siá'₂ né'₂.

21 Ia₁ ca₂le₃jín₃ bá₄ dsa₂ chan₂ Atenas, quian'₅₄
dsi₂nau₂ i₂jme₁tián'₄ ja₁jaun₂, jmá'₃ a₂jaun₂ bá₄
jme₁tiin₂ qui₂jmo₂₃: qui₂nag₂₃, qui₂dsia₂₃ ně₃, jmá'₃
ca₂ne₅₄ jág₁ 'mí₂ a₂cha₂.

22 Jaun₂ ca₂nau₂ Pa₄ dsi₂jo₂ ja₁le₁n₁'₂ dsa₂ jaun₂,
jaun₂ ca₂juá'₂:

—'Nia'₂ dsa₂ chan₂ Atenas, jág₅ jniá'₂ 'nio₅ 'én'₂
'nia'₂ të₂le₃ quió'₅ diú₄ lag₄ quián'₂ 'nia'₂.

23 Ia₁ lia'₂ con'₂ ca₂ŋi₅ jniá'₂ ca₂jág₃ ja₁chi₁len'₄ 'nia'₂ diú₄ lag₄ quiáng'₂, ca₂jág₃ caun₂ ja₁lě₄ ne₄chei₂ le₁ton₅ letras la₂, a₂juá'₂: “QUIÓ'₅ DIÚ₄ I₂TSÁ₃ CUIN₅ DSA₂.” Ia₁ dse₃ bá₄ guě'₂ jaun₂. Diú₄ 'éi₂ i₂chi₁len'₄ 'nia'₂, Diú₄ i₂tsá₃ cuin'₂ 'nia'₂, i₂'éi₂ bá₄ 'ín₄ jniá'₂, jág₁ quió'₅ 'éi₂ bá₄ 'ě₅ jniá'₂, juíg₂ 'nia'₂.

24 'Diú₄ 'éi₂ i₂ca₂jmo₃ mi₂güí₃, ca₂jmo₃ ca₂le₃jě₃ 'e₂ a₂cha₂ ja₁jaun₂, 'éi₂ bá₄ quió'₅ guei'₅₄ mi₂güí₃ quian'₅₄ gua'₅₄ 'uě₃ ně₃. La₁ tsá₃ guá₅ dsi₂néi₂ guá'₅ a₂jmo₅ dsa₂ mi₂güí₃,

25 on₃ guě'₂ chi₁quian₁₂ jmi₃g₄ jua'₅₄ a₂'nió'₅ jmo₃ dsa₂ 'e₂ jmo₃ quió'₅. Ia₁ 'ŋiog₅ bá₄ Diú₄ jmo₂₃ cuě₂₃ jme₂dsi₂ quián₂ jniog₄, jmo₂₃ dsi₂ a₂quian₂ jniog₄, ca₂jmo₃ ca₂le₃jě₃ guě'₂ 'e₂ a₂cha₂.

26 'Quian'₅₄ ca₂cho'₅₄ dsa₂ bá₄ ca₂jmo₃ ca₂le₃jě₃ juíg₂, ia₁jaun₂ tian'₃ ta₁caun₂ mi₂güí₃. Jaun₂ ca₂jmo₃ Diú₄ 'éi'₃ ca₂'ě₃ ja₁tian'₃ dsa₂ ně₃, 'a₂ con'₂ uě₂ 'io₃ bí₂ le₂caun₂ le₂caun₂ juíg₂,

27 ia₁jaun₂ 'nai'₂ Diú₄, a₂jnia'₅₄ chi₂lá'₂ quian'₅₄ gu₂, con'₂ tsá₃ ŋó₅ ně₅ca₂dsáu'₂, o₁jnia'₅₄ la₂ tsá₃ uíng₂ guá₅ Diú₄ ja₁con₂ jniog₄ le₂jau₂ le₂jau₂.

28 Ia₁ a₂chan₂ Diú₄ bá₄ a₂chong₂ jniog₄ a₂i₂nio₄ jniog₄ ně₃. * Jui₁lia'₂ ma₂ca₂juá'₂ i₂lín₅₄ dsa₂ poetas quián'₂ 'nia'₂ ján₃, jme₁ca₂juá'₂: “Chi'₂-guein₂ quián₅ Diú₄ bá₄ lág₅ jniog₄.”

29 Chi₂jua'₂ lág₅ jniog₄ chi'₂-guein₂ quián₅ Diú₄, jaun₂ tsá₃ dse₃ jua'₅₄ a₂jmo₁ jniog₄ dsi₅ a₂lín₅ Diú₄ jui₁lia'₂ lě₅ caun₂ nió'₄ dsa₂ lag₄ cu₄nióg₄, on₃ guě'₂

* 17:28 lit. “a₂chong₂, a₂i₂nio₄ jniog₄, a₂'i₄ jme₂dsi₂ jniog₄.”

cu₄tiog₂, on₃ guè'₂ ni₁cang₁ a₂tin₂ dsa₂ jmo₂₃ con'₂ lě₅
dsi₂jio₅ dsí₅ guioin₅₄.

³⁰ Tsá₃ lín₄ ca₂tón'₃ Diú₄ jui₅ 'a₂ lia'₂ ca₂jmo₃ dsa₂
ma₂líg'₂, ia₁ tsá₃ 'e₂ ŋi₅ dsa₂. La₁ rē₂ně₃ ně₃, jmo₅
Diú₄ 'éi'₃ quió'₅ dsa₂ chan₂ ta₁caun₂ mi₂güí₃ a₂'nió'₅
dsi₃quén'₅ dsí₅.

³¹ Ia₁ ma₂lě₅ 'éi'₃ quió'₅ Diú₄ a₂já₅ caun₂ jmi₄
jë₁qui₃dsi₂₃ 'éi'₃ rē₂ con'₂ dsi₂ten₅₄ quió'₅ dsa₂
mi₂güí₃, tē₂le₃ quian'₅₄ jan₂ dsa₂ i₂ca₂quióin'₂
quiáin₅. Jaun₂ ma₂ca₂jmo₃ léi₄ lia'₂ con'₂
jme₁ca₂jme₃jein'₅₄ 'éi₂ jin₄ 'lag₄.

³² Jme₁ca₂nág₂ dsa₂ ca₂juá'₂ Pa₄ a₂jen'₅₄ 'lag₄,
i₂lín₅₄ dsa₂ jñia'₅₄ ca₂ñág₂ bá₄. I₂lín₅₄ guè'₂ ca₂juá'₂:

—Ně₅ néi₁ táng₃ jnia'₅₄ caun₂ jmi₄ siá'₂ quiáng'₂.

³³ Jaun₂ ca₂o₂'ín₃ bá₄ Pa₄ jē₄ jaun₂.

³⁴ La₁ i₂lín₅₄ dsa₂ ca₂rē₃'éin₂ bá₄, jaun₂ ca₂'ein₃
'éi₂. Jē₄ jaun₂ jme₁'en₅₄ i₂chen₂ Dionisio i₂lín₅ rin'₅₄
dsi₂tan₅₄ quián₅ Areópago; jan₂ guè'₂ 'io₅₄ ně₃ i₂chen₂
Dámaris; lě₂ bá₄ guě₄ dsa₂ i₂quiong'₅₄.

18

'En₅₄ Pablo juig₂ Corinto

¹ Cang₂ jaun₂ ca₂o₃'ín₃ Pa₄ juig₂ Atenas, ca₂ñó₃ jui₅
Corinto.

² Ja₁ jaun₂ ca₂jein'₂ jan₂ dsa₂ judío i₂chen₂ Aquila
i₂chan₂ 'uē₃ Ponto. Jme₁guá₄ 'uē₃ Italia le₃jñiá₅, la₁
ca₂jmo₃ 'éi'₃ gui'₅₄ emperador Claudio a₂ca₂'uíin'₂
ca₂le₃jín₃ dsa₂ judíos i₂jme₁tián'₄ juig₂ Roma. 'Uí₅₄
jaun₂ ca₂o₃'ín₃ quíain'₅₄ Priscila 'io₅₄ quiáin₅,
a₂ma₂tián'₅ juig₂ Corinto. Jme₁ca₂dsióg₃ Pa₄
ca₂i₁jün₁₂ dsa₂ 'éi₂,

3 jaun₂ ca₂ í₃ ja₁ quió'₄, ca₂ jmo₃ ta₁ co₂ lë₅ quiong'₅₄, ia₁ já_{n3} bá₄ tî_{n2} 'me₃ tsi'₁ mî'₂ a₂ jmo₅ dsa₂ tsi'₁ né₅.

4 Jaun₂ ca₂ le₃ jë₃ jmig₄ sa₅₄, jme₁ dsó₅ Pa₄ guá'₅ sinagoga a₂ jme₂ tî_{n23} dsa₂ já_{g1} dse₃, a₂ jme₁ jme₂ 'uáin₂ dsí₅ dsa₂, lia'₂ dsa₂ judíos lia'₂ dsi₂ nau₂ ně₃.

5 Jme₁ dsióg₃ Timoteo quiain'₅₄ Silas a₂ ca₂ 'uáin₂ Macedonia, a₂ dsi₃ léin₂ tē₂ ja₁ 'en₅₄ Pa₄, jaun₂ guě₄ ca₂ 'ě₂ Pa₄ dsen₅₄ dsí₅ já_{g1} quió'₅ Diú₄. Jaun₂ guě₄ ca₂ tsí'₃ dsa₂ judíos a₂ lín₅ Jesús dsa₂ I₂ rē₂ 'ín₁ quián₅ Diú₄.

6 La₁ dsa₂ ně₃, 'io'₅₄ ca₂ tî_{n2} já_{g1} jaun₂, jaun₂ ca₂ jme₃ lióg₃ qui₂ ca₂ jnáí'₂ já_{g1} uig₅ Pa₄. 'Éi₂ ně₃ qui₂ ca₂ séi'₂ 'liog₂ ni₁ tsin'₅₄, jaun₂ ca₂ tsí'₃ dsa₂:

—Guion'₅₄ bá₄ 'nia'₂ le₁ cáng'₄ a₂ dsián'₃ 'nia'₂ lia'₂ jma₃ quian'₅₄ dsáu'₂. Tsá₃ ma₃ 'e₂ le₁ cán'₄ jniá₂. Le₃ ne₄ juí₅ ně₃ nei₅₄ ja₁ con₂ dsi₂ nau₂.

7 Ca₂ o₃ 'ín₃ bá₄ Pa₄ dsi₂ néi₂ guá'₅ sinagoga jaun₂ ně₃. Ca₂ ŋ₃ ja₁ quió'₄ jan₂ dsa₂ i₂ chen₂ Justo i₂ jme₁ jme₂ juin'₂ Diú₄. Justo 'éi₂ ně₃, jme₁ guá'₄ cau₅ guá'₅.

8 Dsa₂ i₂ jme₁ lín₄ dsa₂ dsen₅₄ quián₅ guá'₅, dsa₂ i₂ chen₂ Crispo, ca₂ rē₃ 'éin₂ tē₂ le₃ quió'₅ Te₁ gui'₅₄, co₂ dsia₅ quian'₅₄ dsa₂ dsi₂ néi₂ quió'₅. Juin₅ bá₄ dsa₂ chan₂ Corinto ca₂ rē₃ 'én₂ já_{g1} dse₃ jme₁ ca₂ nág₂, jaun₂ qui₂ ca₂ choin₃ jmig₂.

9 Caun₂ a₂ 'uē₂, a₂ lē₁ ca₂ jén'₃ Pa₄ ca₂ jín₂ Te₁ gui'₅₄, a₂ juá'₂:

—Tsá₃ lē₁ jmo₂ gang'₃ a₂ 'ě'₄ já_{g1}. Caun₂ dsia₄ bá₄, tsá₃ lē₁ jmo₂ tei₄.

10 Ia₁ quian'₅₄ bá₄ jniá₂ 'ne₂; 'i₁ jan₂ tsá₃ téi₂ gu₂ jua'₅₄ a₂ jmóg'₂ uig₅. Ia₁ juin₅ dsa₂ chan₂ juig₂ la₂

i₂le₃'én₂ quiáng₃.

11 Caun₂ η₂ tē₂ ca₂'nau₅₄ ca₂'í₃ Pa₄ juig₂ Corinto, qui₂ca₂jme₃t̄in₂₃ dsa₂ jág₁ quió'₅ Diú₄.

12 La₁ jmig₄ jaun₂ ca₂lin₃ dsi₄má'₂ 'uē₃ Acaya jan₂ dsa₂ i₂chen₂ Galión. Jaun₂ ca₂ηi'₂ dsa₂ judíos i₂ηia₅₄ Pa₄, ca₂tág₃ jui₅ ne₄ta₁.

13 Jaun₂ ca₂juá'₂ ca₂tsí'₃ dsi₄má'₂ 'éi₂:

—Le₂siá'₂ bá₄ jme₂tag₅ i₂nē₅, toin'₂ jág₁ dsa₂, a₂jme₃juin'₂ Diú₄ on₃juá'₅₄ lia'₂ con'₂ lē₅ 'Éi'₃.

14 Jē₁jme₁ma₂ηag₃ Pa₄, jme₁ca₂juá'₂ Dsi₄má'₂ Galión ca₂tsí'₃ dsa₂ judíos:

—Jua'₅₄ mei'₂ guē₃ dso₄ juē'₂ ca₂rē₃cán'₂ dsa₂ nē₅, jme₁jmo₅₄ bá₄ jniá'₂ juin'₂ dsi₃ a₂jme₁nag₅₄ jág₁ quián'₂ 'nia'₂.

15 La₁ tsá₃ le₂jaun₂. Chi₂juá'₂ 'uig₅₄ jág₁ 'éi'₃ juá'₅ siá'₂ quián'₂ 'nia'₂ guiong'₅₄, tsá₃ 'éi'₃ qui₁dsi₅ jniá'₂. Jme₁rē₂ bá₄ 'nia'₂ guiong'₅₄ quiáng'₂.

16 Jaun₂ ca₂'uág'₂ ca₂'uín'₂ 'éi₂ ne₄ta₁ jaun₂.

17 Jaun₂ ca₂ηau'₃ ca₂le₃jín₃ dsa₂ griegos ca₂ηai'₃ Sóstenes i₂lín₅ juig₅₄ quián₅ guá'₅ sinagoga, qui₂ca₂bóg₂ tē₃ jág₅ dsi₄má'₂. La₁ tsá₃ ma₃a₂jaun₂ dsan₂ dsí₅ gui'₅₄ Galión, 'i₁caun₂.

Ca₂jón'₃ táng₃ Pablo juig₂ Antioquía, jaun₂ ca₂ηó₃ táng₃ ca₂i'₄ 'ě₄ jág₁ dse₃ jē₁ca₂tē₂ 'nag'₂ ráun₂

18 Uē₂ bá₄ guē₄ ca₂ηia₃ Pa₄ jē₄ juig₂ Corinto. Cang₂ guē₄ jaun₂ ca₂'ág'₃ jág₁ riin'₅₄. Jme₁ma₂toin'₅₄ juig₂ Cencrea nē₃, ca₂chéi₃ Pa₄ dsi₅₄ ca₂jmo₃ léi₄ a₂ca₂jme₃ti₃ jág₁ a₂ma₂cuē'₃ Diú₄ le₂ηiá₅. Jaun₂ ca₂'í₃ ni₁barco ca₂ηó₃ jui₅ ja₁tén₄ Siria quiain'₅₄ Priscila, Aquila nē₃.

19 Jme₁ca₂dsi₃léin₂ juig₂ Efeso, ca₂tén₂ Pa₄ Priscila quian'₅₄ Aquila, ca₂ηó₃ jui₅ guá'₅ sinagoga ca₂i₁dsia₂ jág₁ quian'₅₄ dsa₂ judíos i₂jme₁tion'₅₄ le₁ηi'₂.

20 Jme₁ca₂juá'₂ guě₄ dsa₂ ja₁jaun₂ a₂jme₁ηia₃ guě₄ uě₂ Pa₄, la₁ tsá₃ ma₃ca₂gue₃ 'éi₂.

21 Jaun₂ ca₂'ág'₃ jág₁ jin₄ riin'₅₄, ca₂juá'₂:

—Tion₅₄ niog₅ nég'₄ Jerusalén i₁jmo₃ jmig₄ a₂já₅. La₁ guáng₂ bá₄ táng₃ i₁jing₁₂ 'nia'₂ ně₁juá'₂ 'nio₃ Diú₄.

Jaun₂ ca₂'í₃ ni₁barco ca₂o₃'iin₃ juig₂ Efeso.

22 Jme₁ca₂dsióg₃ Cesarea, ca₂ηe₄ Pa₄ i₁cuin₃ Diú₄ riin'₅₄ i₂tián'₅ Jerusalén. Jaun₂ ca₂ηái'₃ táng₃ jui₅ Antioquía.

23 Jme₁ma₂ne₁ηó₄ jmig₄ 'ein₅₄ ja₁jaun₂, ca₂ηei₅₄ táng₃ ca₂i₁ηi₂ le₂caun₂ le₂caun₂ juig₂ ja₁tén₄ 'uě₃ Galacia quian'₅₄ Frigia, qui₂ca₂cuě'₃ bí₂ ca₂le₃jín₃ dsa₂ i₂'én₂ riin'₅₄.

Ca₂'ě₂ Apolos jág₁ dse₃ juig₂ Efeso

24 Jmig₄ jaun₂ ca₂dsióg₃ Efeso jan₂ dsa₂ judío i₂chen₂ Apolos, dsa₂ chan₂ juig₂ Alejandría. 'Nio₅ lin₃ jme₁tin₂ dsa₂ 'éi₂ 'ě₂ jág₁ quió'₅ Diú₄, dse₃ jme₁cuí'₅ Si₂ quió'₅ Diú₄.

25 Jme₁ma₂ηi₅ Apolos 'éi₂ 'a₂ lia'₂ lě₅ jui₅ quió'₅ Te₁gui'₅₄. Jaun₂ 'ηio₂ dsí₅ qui₂ca₂dsia₃ jág₁ qui₂ca₂jme₂tin₂₃ dsa₂ co₂rě₂ jág₁ quió'₅ Jesús, ton'₂ jmá'₃ ηia'₅₄ a₂jaun₂ bá₄ jme₁ηi₅ Apolos 'a₂ lia'₂ jme₁jme₂tag₅ Juan₅₄ jui₁lia'₂ a₂choin₂₃ dsa₂ jmig₂.

26 Ca₂jme₃lióg₃ Apolos ca₂juá'₂ dsi₂néi₂ guá'₅ sinagoga ca₂tsí'₃ dsa₂, ca₂dsia₃ tiá₂ dsí₅; la₁ jme₁ca₂nág₂ Priscila quian'₅₄ Aquila, ca₂tě'₃ Apolos cau₅, ca₂jme₃tag₂₃ guě₄ rě₂ 'a₂ lia'₂ lě₅ jui₅ quió'₅ Diú₄.

27 Jaun₂ ně₃, lia'₂ con'₂ jme₁'nio₃ Apolos jme₁ŋí₃ jui₅ Acaya, ca₂cuē₃ riin'₅₄ bí₂, ca₂chein₃ si₂ carta ne₄ dsa₂ 'én₂ i₂tián'₅ ja₁jaun₂, a₂guein₃ 'éi₂. Jme₁ca₂dsióg₃ Apolos 'uē₃ Acaya, ca₂jme₃'oin₅₄ 'ŋio₅ dsa₂ 'én₂ i₂tián'₅ ja₁jaun₂. Ia₁ a₂dse₃ dsí₅ Diú₄ ca₂jmo₃ a₂ca₂rē₃'én₂ dsa₂ 'éi₂.

28 Jaun₂ qui₂ca₂tsín₂ quian'₅₄ dsa₂ judíos, jaun₂ ca₂lí₃ bá₄ Apolos ne₄ ja₁tsiin₂₃ jaun₂, tē₃ jág₅ ca₂le₃jín₃ dsa₂. Ia₁ lia'₂ con'₂ lě₅ Si₂ quió'₅ Diú₄ bá₄ ca₂'ě₃ dsa₂ 'éi₂, a₂dsón'₂ bá₄ lín₅ Jesús I₂rē₂'ín₁ quián₅ Diú₄.

19

'En₅₄ Pablo juig₂ Efeso

1 Tē₁lia'₂ 'en₅₄ Apolos juig₂ Corinto, Pa₄ guē'₂ ca₂ŋí₃ le₂tan₅₄ jui₅ má'₂ a₂ca₂dsióg₃ Efeso. Ja₁jaun₂ ca₂jein'₂ i₂lín₅₄ dsa₂ 'én₂.

2 Jaun₂ ca₂ŋag₃ 'éi₂ ca₂ŋí'₃ dsa₂ ca₂juá'₂:

—¿Ca₂guen'₅₄ 'nia'₂ Jme₂dsí₂ Jŋió₅ lia'₂ con'₂ jme₁ca₂rē₃'én'₂ 'nia'₂ jág₁ dse₃?

Jaun₂ ca₂ŋag₃ dsa₂:

—Ca₂lia'₂ jŋia'₅₄ tsá₃ ma₂ne₄ jnia'₅₄ jua'₅₄ chan₂ jan₂ Jme₂dsí₂ Jŋió₅.

3 Jaun₂ ca₂ŋag₃ táng₃ Pa₄:

—¿'A₂ guē'₂ lia'₂ ca₂jŋó'₂ 'nia'₂ jmig₂?

Ca₂ŋag₃ táng₃ dsa₂:

—Jui₁lia'₂ ca₂jme₃tag₅ Juan₅₄ bá₄.

4 Ca₂juá'₂ Pa₄:

—Jme₁chon₅ Juan₅₄ jmig₂ dsa₂ co₂'nió'₄ léi₄ a₂jme₃tsín₃ dsa₂ dsí₅. La₁ jme₁juá'₂ ján₃, a₂'nió'₅

le₃'én₂ dsa₂ le₃quió'₅ i₂jiá₃ chi₁quín₃, a₂'iin₂₃
Jesucristo.

⁵ Jme₁ma₂nē₂néi₂ dsa₂ le₂nē₅, qui₂ca₂choin₃ jmig₂
lia'₂ con'₂ lě₅ 'éi'₃ quió'₅ Te₁gui'₅₄ Jesús.

⁶ Jaun₂ jme₁ca₂quiog₂ Pa₄ gu₂ ne₄ quió'₅ dsa₂
'éi₂, ds_ijui₅ le₂jaun₂ ca₂guan₃ Jme₂dsí₂ Jñió₅ ca₂'í₃
tē₂dsí₅ dsa₂. Jaun₂ qui₂ca₂dsia₃ dsa₂ jág₁ jmei₅ siá'₂,
qui₂ca₂juá'₂ jág₁ a₂ca₂cuē₃ Diú₄ ně₃.

⁷ Con'₂ guia₃-tín₂ dsa₂ jme₁lě₂ le₃jín₃.

⁸ Con'₂ 'ni₅ tsí'₂ ca₂dsin₃ a₂jme₁dsó₅ Pa₄ guá'₅ sina-
goga ca₂dsia₃ tiá'₂ dsí₅ ca₂jme₃tiin₂₃ dsa₂ qui₂co₂jéin'₂
dsa₂ tē₂le₃ ja₁gon₂ Diú₄.

⁹ La₁ i₂lin₅₄ dsa₂ ca₂jmo₃ 'ua'₂ dsí₅, tsá₃ ca₂rē₃'éin₂.
Jñia'₅₄ qui₂ca₂ton₃ 'lig'₅₄ bá₄ Jui₅ quió'₅ Te₁gui'₅₄
jin₄ dsa₂. Jaun₂ ca₂té'₃ Pa₄ co₂nío'₃ jmá'₃ dsa₂
i₂'én₂ ca₂'u_iin₂ ja₁jaun₂ ca₂i₃lén₂ caun₂ escuela
ja₁té'₂ quió'₅ Tirano ja₁táun₂ dsa₂ jág₁. Ja₁jaun₂
ca₂i₁jme₁tiin₂₃ dsa₂ ca₂le₃o₃ jmi_g₄.

¹⁰ Ca₂dsin₃ tin₃ ñi₂ ca₂'í₃ ja₁jaun₂, jaun₂ le₃jín₃
dsa₂ i₂jme₁tián'₄ 'lióng₂ juig₂ ja₁tén₄ Asia ca₂nág₂
jág₁ quió'₅ Te₁gui'₅₄ Jesús lia'₂ dsa₂ judíos lia'₂ dsa₂
griegos ně₃.

¹¹ Jaun₂ 'lióng₂ léi₄ juē'₂ ca₂jmo₃ Diú₄ tē₂le₃
quian'₅₄ Pa₄,

¹² le₂jio_g₅ ni₁tsin'₅₄ dsa₂, o₃ pe₁guí₄'e₂ a₂qui₂ca₂ní'₃
quió'₅, jme₁qui₂dsi₂con₃ dsa₂ ja₁con₂ dsa₂ dso'₅₄,
qui₂ca₂'lón₂ dsa₂ 'e₂ caun₂ dso₄ niog₅ lín₅,
qui₂ca₂'u_iin₂ jme₂dsí₂ 'lin'₅₄ quió'₅ dsa₂ ně₃.

¹³ La₁ i₂lin₅₄ dsa₂ judíos i₂jme₁i₂nio₄ jmo₂₃ 'u_iin'₂
jme₂dsí₂ 'lin'₅₄ quió'₅ dsa₂,* dsa₂ 'éi₂ jme₁'nio₃

* 19:13 griego: exorkiston (exorcistas).

jme₁'iin₃ Te₁gui'₅₄ Jesús ju_{i1}lia'₂ jë₁'u_{iin}'₂ jme₂dsí₂
'lin'₅₄, ca₂juá'₂ tsí'₅ jme₂dsí₂ 'lin'₅₄:

—Éi'₃ jmo₅ jniá₂ quian'₅₄ bí₂ 'éi'₃ quió'₅ Jesús i₂'in₅
Pa₄ ně₅, 'uin'₂ 'nia'₂.

14 Le₂jaun₂ jme₁jmo₅ ta₁guion₃ chi'₂ ja₁ŋi'₅₄ jan₂
dsa₂ judío i₂chen₂ Esceva, i₂jme₁lín₄ jan₂ juig₅₄
jme₂dsa₂.

15 La₁ jme₁ca₂jmo₃ le₂jaun₂, jaun₂ ca₂ŋag₃
jme₂dsí₂ 'lin'₅₄:

—Cuín₅ bá₄ jniá₂ Jesús, ján₃ bá₄ guion₄ bá₄ jniá₂
'ein₂ 'éi₂ Pa₄. La₁ 'nia'₂ ně₃, ħ'ein₂ bá₄ 'nia'₂ jmo'₂ 'éi'₃
a₂jú₄ jniá₂?

16 Jaun₂ dsa₂ i₂jme₁'en₅₄ jme₂dsí₂ 'lin'₅₄ quió'₅,
ca₂cuë₃ 'ŋio₅ lin₃ ca₂cuë'₃ ca₂le₃jín₃ dsa₂ 'éi₂, ca₂lia'₂
ca₂l₃lein₃ cuŋg₂₃ le₁cuáin'₃ qui₂le₁cuín'₂ ně₃.

17 Jaun₂ ca₂le₃jín₃ dsa₂ judíos, quian'₅₄ dsa₂ grie-
gos ně₃, i₂jme₁tián'₄ juig₂ Efeso, ca₂rë₃gó'₅ 'ŋio₅ lin₃
jme₁ca₂rë₃ŋi₅. Jaun₂ ca₂rë₃juin'₂ Te₁gui'₅₄ Jesús 'ŋio₅
lin₃.

18 Jaun₂ juin₅ dsa₂ i₂ca₂rë₃'én₂, ca₂dsi₃lén₂ ca₂jmo₃
qui₂ŋí₃ quió'₅ ca₂le₃jě₃ a₂'lig'₅₄ a₂qui₂ma₂jmo₃.

19 Jaun₂ juin₅ dsa₂ i₂jme₁jmo₅ ta₁ a₂chan₂ dsí₅ ně₃,
ca₂i₁quian₅₄ si₂ lia'₂ quió'₅, jaun₂ ca₂dsí'₂ tē₃ jág₅
dsa₂. Jme₁ca₂chen'₃ dsa₂ cuenta je₂liá'₂ dsin₅ 'i₄
'ma'₅₄ le₃jě₃ si₂ jaun₂, ca₂dsióg₃ con'₂ tē₂láu₃-guiá₂
mei₅ 'éi'₃ cu₄ tiog₂.

20 Jaun₂ ně₃, quian'₅₄ bí₂ quió'₅ Te₁gui'₅₄ caun₂
ca₂l₃'ág₃ jág₁ quió'₅, caun₂ ca₂lí'₃ bá₄.

21 Cang₂ jaun₂ ca₂'ág₂ Pa₄ caun₂ dsí₅ a₂dsi₃jág₂
le₂tan₅₄ juig₂ ja₁tén₄ 'uë₃ Macedonia quian'₅₄ Acaya,
lia'₂ ma₂ŋó₅ jaun₂ tē₂ Jerusalén. Ján₃ bá₄ ca₂juá'₂

táng₃, jë₁ma₂ca₂dsióg₃ Jerusalén, a₂tion₅₄ dsó₃ ca₂të₂
Roma ján₃.

22 Jaun₂ ca₂chein₃ on₃ dsa₂ i₂jme₂'o₅₄† quiáin₅:
Timoteo, quiain'₅₄ Erasto, a₂dsi₃léin₂ jui₅ Macedo-
nia. Ca₂rë₃'in₅₄ bá₄ guë₄ 'ñiog₅, 'uë₃ Asia.

Ca₂nio₃ mi'₅₄ juig₂ Efeso

23 Jmig₄ jaun₂, 'ñio₅ lin₃ ca₂nio₃ mi'₅₄ o₄quió'₄ Jui₅
quió'₅ Te₁gui'₅₄.

24 Ia₁ jan₂ dsa₂ i₂chen₂ Demetrio i₂jme₁lín₄ të₅ñí₁
cu₄tiog₂, jme₁jmo₂₃ chéi₂ a₂rë₂lag₄ lia'₂ lë₅ guá'₅
ja₁chén'₄ 'io₅₄ diú₄ Diana.‡ 'Ñio₅ jme₁tin₂₃ cu₄
quian'₅₄ ta₁ jaun₂ quió'₅, quian'₅₄ të₅ñí₁ rin'₅₄ i₂jmo₅
ta₁ le₂jaun₂.

25 Jaun₂ Demetrio në₃, ca₂ñí'₂ 'éi₂ quian'₅₄ guë₄
dsa₂ sián'₂ i₂jmo₅ ta₁ le₂jaun₂ ján₃. Jaun₂ ca₂juá'₂:

—'Nia'₂ dsa₂ rin'₅₄ jniog₄, ñi'₅₄ bá₄ 'nia'₂ rë₂,
a₂chong₂ jniog₄ dse₃ quian'₅₄ ta₁ quían₂.

26 Jaun₂ jág'₂ bá₄ 'nia'₂ a₂jmo₅ Pa₄ ñi₂₃ juá'₂ tsí'₅
dsa₂, a₂tsá₃ 'e₂ quen₅ diú₄ i₂jmó'₂ dsa₂ mi₂güí₃, ia₁
tsá₃ lín₅ diú₄, juá'₂. Jaun₂ juin₅ dsa₂ i₂ma₂ca₂rë₃'én₂
në₃, on₃ jua'₅₄ jmá'₃ juig₂ Efeso la₂, mei'₂ tsá₃ le₂tan₅₄
'uë₃ Asia bá₄.

27 Jaun₂ go'₂ të₂le₃ quían₂ jniog₄, ia₁ dsi₃'én₂
ta₁ quían₂ lé₂. Ján₃ guë'₂ le₂jaun₂, të₂le₃ quió'₅
guá'₅ quió'₅ diú₄ Diana juin'₂, go'₂ a₂dsi₃'én₂ ján₃.
Ia₁ në₁jua'₂ tsá₃ ma₂'nio₃ dsa₂, jaun₂ dsi₃'én₂ bá₄
bí₂ quió'₅ a₂lín₅ dsa₂ juin'₂. Ia₁ rë₂në₃ ta₁caun₂
'uë₃ Asia, ta₁caun₂ mi₂güí₃ në₃ jme₂go₃ dsa₂
a₂jme₂juag'₂.

† 19:22 griego: diákonos. ‡ 19:24 griego: Artemis; (Diana chein₂
quian'₅₄ latín, jág₁ jmei₅ romano).

28 Jme₁ca₂dsan₃ nag₅ dsa₂ le₂në₅, ca₂rë₃'néi₃ 'ñio₅ lin₃, ca₂tóin'₂ ca₂guió'₃ ca₂juá'₂:

—i'Ñio₅ juin'₂ diú₄ Diana quián₅ dsa₂ juig₂ Efeso!

29 Jaun₂ ca₂lë₃ mi'₅₄ quió'₅ ca₂le₃jín₃ dsa₂ juig₂ jaun₂. Jaun₂ le₃on₃ dsa₂ chan₂ Macedonia i₂chen₂ Gayo quiain'₅₄ Aristarco i₂jme₁quian'₅₄ Pa₄, ca₂jñau'₃ ca₂i₃toin'₅₄ co₂dsia₅ ca₂të₂ ja₁ñi'₂ § dsa₂ juig₂.

30 Jaun₂ jme₁'nio₃ Pa₄ jme₁dsó₃ jin₄ dsa₂ juig₂ a₂jme₁dsi₃chi'₅₄ dsa₂. La₁ tsá₃ ca₂cuë₃ jmig₄ riin'₅₄ i₂'én₂.

31 I₂lin₅₄ dsa₂ dsen₅₄ quián₅ 'uë₃ Asia, i₂lín₅ dsa₂ a₂mei₅₄ quián₅ Pa₄, ján₃ bá₄ ca₂chein₃ jág₁ a₂tsá₃ dsi₂ten₅₄ jua'₅₄ a₂dsi₃'í₂ Pa₄ ja₁jaun₂.

32 Të₁lia'₂ jaun₂ në₃ ja₁tion'₅₄ dsa₂ juig₂ le₁ñii'₂ tioen'₅₄ co₂mi'₅₄, lë₅ bá₄ qui₂juá'₂ jan₂-jan₂, tsá₃ caun₂ jág₁ 'ei₅, lë₅ gué₄ ca₂dsion₄ dsa₂ jñia'₅₄ tsá₃ ñi₅ 'e₂ lë₃ le₁ñii'₂.

33 La₁ jë₄ jaun₂ jme₁tion'₅₄ bá₄ i₂lin₅₄ dsa₂ i₂ñi₅. Jaun₂ ca₂juá'₂ 'a₂ lia'₂ lë₅ ca₂tsí'₃ jan₂ i₂chen₂ Alejandro i₂jme₁ca₂'lian'₃ dsa₂ judíos a₂ca₂dsióg₃ të₂ne₄ dsa₂ juig₂. Jaun₂ ca₂jmo₃ Alejandro léi₄ quian'₅₄ gu₂ a₂jme₁mi₂₃ a₂jmo₃ dsa₂ tei₄, ia₁ a₂jme₁'nio₃ juá'₂ jág₁ a₂jme₁tsí'₃ dsa₂ a₂jme₁lióin₂ dsa₂ on₃ i₂ca₂jña'₃ dsa₂ 'éi₂.

34 La₁ jme₁ca₂rë₃lí'₄ dsa₂ a₂lín₅ Alejandro 'éi₂ jan₂ dsa₂ judío, jaun₂ ca₂tóin'₂ co₂mi'₅₄, con'₂ tin₃ hora qui₂guió'₅ ca₂juá'₂:

—i'Ñio₅ juin'₂ diú₄ Diana quián₅ dsa₂ juig₂ Efeso!

§ 19:29 griego: theatron (co₂'nió'₄ caun₂ estadio a₂lë₅ dso'₂ dsi₂con'₂).

35 Jaun₂ dsa₂ i₂lín₅ tē₅sí₃ quián₅ dsa₂ juig₂ jaun₂, ca₂tió'₃ jme₁ca₂tió'₃, ca₂jmo₃ ca₂i₃lén₂ dsa₂ tei₄. Jaun₂ gué₄ ca₂juá'₂:

—'Nia'₂ dsa₂ chan₂ Efeso, ta₁caun₂ mi₂güí₃ bá₄ le₁ñi₅ dsa₂ a₂ca₂tín₂ dsa₂ juig₂ Efeso jmo₃ 'í₁ guá'₅ quió'₅ diú₄ juin'₂ Diana, ton'₂ jmo₃ 'í₁ nió'₄ quió'₅ a₂ca₂sió'₃ guei'₅₄ i₂juí₃.*

36 'I₁jan₂ jua'₅₄ le₃juá'₂ a₂tsá₃ ñi₅. Jaun₂ tei₄ jmo₄ 'nia'₂, 'nio'₂ 'nia'₂ 'au'₂ dse₃ né'₃ gué₄ a₂jmó'₂ 'e₂ jmó'₂.

37 Ia₁ dsa₂ i₂nē₂chan'₂ 'nia'₂, tsá₃ 'ang₂₃ a₂ca₂tín₂ guá'₅, on₃ gué₄ 'iin₂₃ 'lig'₅₄ diú₄ quián₂ jniog₄.

38 Chi₂jua'₂ 'nio₃ Demetrio mi₃ dso₄, quiain'₅₄ ca₂le₃jín₃ i₂jmo₅ ta₁ quiain'₅₄, jaun₂ gué'₂ chan₂ dsi₂tan₅₄ ne₄ta₁ ja₁lé₂ dsi₃mi₃ dso₄.

39 La₁ nē₁jua'₂ a₂mi'₂ 'nia'₂ lē₅ caun₂ dso₄ jué'₂ gué₄ con'₂ gué₄ a₂jaun₂, 'nió'₅ le₃rē₂ ne₄ dsi₂tan₅₄ jē₁ma₂le₁ñi'₂ dsa₂ juig₂.

40 Ia₁ go'₂ quián₂ jniog₄ a₂jmo'₂ 'nia'₂ le₂nē₅, nē₁jua'₂ ca₂'nag₃ dsa₂ a₂ñí₄ lē₃ 'niog₂ mi'₅₄, ju₁lia'₂ mi'₅₄ a₂ca₂lē₃ nē₃. Ia₁ nē₁jua'₂ ca₂ñag₃ dsa₂ 'e₂ 'uig₅₄ ca₂lē₃ mi'₅₄ la₂, tsá₃ 'e₂ cha₂ le₃ñag₄.

41 Jme₁ma₂ca₂dsan₃ juá'₂ le₂nē₅, ca₂jme₃dsiain₂₃ bá₄ jág₁ a₂le₁ñi'₂ dsa₂. Jaun₂ ca₂dsiáin'₂ bá₄ dsa₂, qui₂ca₂i₃lein₃ quió'₅.

20

Ca₂ñó₃ Pablo 'uë₃ Macedonia quian'₅₄ Grecia

1 Jme₁ca₂dsan₃ mi'₅₄ jaun₂, qui₂ca₂té'₃ Pa₄ le₃jín₃ dsa₂ 'én₂, qui₂ca₂cué'₃ bí₂. Jme₁ca₂lē₃ jaun₂,

* 19:35 A₂lín₅₄ chog₅₄ si₂: "a₂ca₂sió'₃ ja₁con₂ diú₄ Júpiter."

qui₂ca₂'ág'₃ jág₁ riin'₅₄. Jaun₂ guě₄ ca₂ηó₃ jui₅
Macedonia.

² Jaun₂ qui₂i₁jag₅₄ le₂tan₅₄ juig₂ te'i₁ ja₁jaun₂.
Quian'₅₄ jág₁ quió'₅ qui₂i₁cuë'₂ bí₂ riin'₅₄. Cang₂ guě₄
jaun₂ ca₂ηó₃ táng₃ jui₅ Grecia.

³ Ja₁jaun₂ ca₂'í₃ 'ni₅ tsi'₂. Jme₁ma₂'ein₅₄ jui₅ 'í₂
ni₁barco a₂dsó₃ jui₅ Siria, jme₁ca₂rë₃ηi₅ a₂ma₂jmo₅
dsa₂ judíos caun₂ jág₁ a₂tsáun'₂. Jaun₂ co₂ηei'₅₄ tsá₃
ma₃ca₂ηái'₃ jui₅ jaun₂. Ca₂ηái'₃ bá₄ táng₃ jui₅ 'uë₃
ca₂ηi₃ Macedonia.

⁴ Jaun₂ ca₂jme₃quiong'₅₄ dsa₂ le₂i₄ jui₅ i₂chen₂
Sópater ja₁ηi'₅₄ Pirro,* i₂chan₂ Berea, Aristarco
quian'₅₄ Segundo i₂chan₂ Tesalónica, Gayo i₂chan₂
Derbe; Timoteo, Tíquico quian'₅₄ Trófimo ně₃
i₂chan₂ juig₂ gu'₂ ja₁tén₄ 'uë₃ Asia.

⁵ Jaun₂ ně₃, rin'₅₄ jniog₄ 'éi₂ ca₂i₃ηiái₄ ca₂i₁ηiog₁₂
juig₂ Troas.

⁶ Cang₂ jme₁ca₂gú'₃ jmig₄ aguě'₅ dsa₂ i₁ηí'₄ a₂tsá₃
levadura quian'₅₄, jaun₂ ca₂tió'₄ jnia'₅₄ ni₁barco
ca₂'uag₂ Filipos. A₂ηiái₂ jmig₄ jaun₂, ca₂join₃ jnia'₅₄
juig₂ Troas. Ja₁jaun₂ ca₂ηia₄ jnia'₅₄ guio₃ jmig₄.

'En₅₄ Pablo juig₂ Troas

⁷ Jmig₄ jë₁le₂'uig₅₄ semana, ca₂ηag'₂ jnia'₅₄
a₂ca₂dsiό'₄ i₁ηí'₄. Jaun₂ tē₃jë₄ jaun₂ ca₂jme₃tag₅ Pa₄
ca₂jme₃tii₂₃ dsa₂. Caun₂ ca₂ton₃ jág₁ ca₂lia'₂ ca₂tē₂
dsi₃nei₅, ia₁ a₂ma₂'ein₅₄ jui₅ dsáin'₃ jë₁ma₂jnia₃
jaun₂.

⁸ Jme₁tio'₅₄ jnia'₅₄ le₁ηag'₂ caun₂ dsi₂néi₂ ja₁lë₄
guei'₅₄. 'Lióng₂ tsí₅ jme₁le₁'ág₄ le₁guí'₂ si₂.

* **20:4** A₂i₁n₅₄ chog₅₄ si₂ tsá₃ chi₁ton₅ “ja₁ηi'₅₄ Pirro.”

9 Jan₂ guè'₂ dsó₂ jme₁guá'₄ caun₂ o'₄ né'₄ tau₂ quei₂ i₂jme₁chen₂ Eutico. Ia₁ a₂ñí'₄ lë'₃ uë'₂ qui₂ca₂dsia₃ Pa₄ jág₁, jaun₂ tsá₃ ma₃ca₂tió'₃ 'éi₂ a₂i₁güi_{in}₃. Jme₁ma₂rë'₂güi_{in}₃ tsá₃ ma₃lí'₄ jme₁ca₂táin'₂ ca₂të'₂ ja₁lë'₄ 'ni₅juín₃ guei'₅₄. Ma₂join₂₃ jme₁ca₂i₁cho'₄ dsa₂.

10 Jaun₂ ca₂sión₃ Pa₄ ján₃, ca₂ñai'₃ 'lag₄ ca₂quiog₂ ne₄ quió'₅, jaun₂ ca₂juá'₂ ca₂tsí'₃ riin'₅₄:

—Tsá₃ lë'₁jmo₂ 'nia'₂ gang'₃, ia₁ 'i'₄ bá₄ jme₂dsí₂ quió'₅ chí'₂.

11 Jaun₂ në'₃ ca₂úig₂ táng₃ Pa₄ guei'₅₄. Jaun₂ ca₂dsió'₃ i₁ñí'₄, ca₂gué'₃ bá₄ jaun₂ në'₃. Caun₂ ca₂dsia₃ bá₄ guë'₄ Pa₄ jág₁ ca₂lia'₂ ca₂jnia₃. Ca₂ñái'₃ bá₄ jaun₂ në'₃.

12 La₁ dsó₂ 'éi₂ në'₃, jéin'₃ bá₄ ca₂tág₃ dsa₂, jmo₅ dsa₂ 'io'₂ ca₂le₃jíin₃.

Ca₂'uin₂ dsa₂ Troas, ca₂i₃lén₂ táng₃ juí₅ Mileto

13 Ca₂i₃ñjió'₄ bá₄ jnia'₅₄ i₂náu₅ quian'₅₄ ni₁barco ca₂të'₂ Asón ca₂i₁te₁ Pa₄, ia₁ jme₁ma₂lë'₅ jág₁ a₂'nio₃ dsó₃ 'ñiog₅ juí₅ tag₅₄.

14 Jme₁ca₂rë'₃quian'₅₄ jnia'₅₄ juig₂ Asón, ca₂'í₃ ni₁barco quian'₅₄ jnia'₅₄ a₂ca₂i₃náu₅ juí₅ Mitilene.

15 Ca₂'uag₂ jnia'₅₄ ja₁jaun₂. Jme₁jnia₃ jaun₂, ca₂ñag₅₄ cau₅ ja₁të'₂ dsa₂ Quío, (a₂ñiog₅ jë'₄ jmí₁ñí'₄). Caun₂ jmig₄ cang₂ jaun₂, ca₂dsi₃náu₅ jnia'₅₄ 'o₄ jmí₁ñí'₄ ja₁chei₂ Samos. [Jaun₂ ca₂ñia₁ jnia'₅₄ juig₂ Trogilio].† Jme₁jnia₃ jaun₂ guë'₄ ca₂dsi₃náu₅ jnia'₅₄ të'₂ juig₂ Mileto.

16 Jaun₂ le₂në'₅ ca₂lë'₃, ia₁ tsá₃ 'nio₃ Pa₄ 'í₂ uë'₂ 'uë'₃ Asia, tsá₃ ma₃ca₂ñei₅₄ juí₅ Efeso. Ia₁ 'nio₃ dsáin'₄ ñi'₅₄

† 20:15 A₂lin₅₄ chog₅₄ si₂ tsá₃ le₁ton₅ jág₁ në'₅.

ta₁ jui₅ Jerusalén, a₂'nio₃ ηi₅ ja₁jaun₂ Jm_{ig}₄ Të₂láu₃-
guiá₂ në₁jua'₂ ca₂lë₃.

*Ca₂ton₃ Pablo jág₁ jn₄ dsa₂ can'₅₄ quián₅ riin'₅₄
chan₂ Efeso*

17 'En₅₄ Pa₄ juig₂ Mileto, jaun₂ ca₂ηi'₂ ca₂le₃jín₃
dsi₂gui'₅₄ can'₅₄ quián₅ riin'₅₄ i₂chan₂ Efeso.

18 Jme₁ca₂dsi₃lén₂ dsa₂, jaun₂ ca₂juá'₂ Pa₄:

—Ni'₅₄ bá₄ 'nia'₂ 'a₂ lia'₂ ma₂jmo₃ jniá₂ ca₂le₃
guang₃ le₂'uig₅₄ 'uë₃ Asia.

19 Ca₂le₃jë₃ jm_{ig}₄ bá₄ lia'₂ con'₂ ca₂'ú₃ jn'₄ 'nia'₂,
ca₂jme₁ti₁₂ ta₁ ne₄ Te₁gui'₅₄. Tsá₃ ca₂jme₁juing'₂
'ηi₃. Tsá₃ caun₂ ca₂i₃ηig₂ 'uig₅₄ ca₂le₃jë₃ a₂jme₁'nio₃
dsa₂ judíos jme₁jmóg'₂.

20 La₁ on₃jua'₅₄ jaun₂ tsá₃ ma₃ca₂jme₁tin₅ jniá₂
'nia'₂ a₂dse₃ quián'₂ 'nia'₂, ca₂i₁'ë₄ jn₄ dsa₂, ca₂ηeg₅₄
të₂ dsi₂néi₂ quián'₂ 'nia'₂ në₃.

21 Lia'₂ dsa₂ lín₅ judíos lia'₂ dsa₂ griegos në₃,
qui₂ma₂juig₂ jniá₂ a₂'nió'₅ jme₃tsín₃ dsa₂ dsí₅ ne₄
Diú₄, a₂le₃'éin₂ të₂le₃ quió'₅ Te₁gui'₅₄ Jesucristo
quián₂ jniog₄.

22 Jaun₂ në₃, ma₂'eng₅₄ ju_{i5} nei₅₄ ju_{i5} Jerusalén, ia₁
chi₂quióng₂ jm_{ig}₄ Jme₂dsí₂ quián₅ Diú₄. Tsá₃ a₂jaun₂
guion₅₄ 'e₂ dsi₃ηig₂ ja₁jaun₂.

23 Jnia'₅₄ lia'₂ jaun₂ bá₄ guion₅₄, ia₁ le₂caun₂
le₂caun₂ juig₂ ja₁ma₂ηeg₅₄, ma₂'ë₂ jág₁ Jme₂dsí₂ Jnió₅
a₂i₁ηag₁₂ uig₅, a₂to'₂ dsa₂ 'né₅ 'má₃ në₃.

24 La₁ tsá₃ a₂jaun₂ 'i₅ dsi₃ jniá₂, o₁jnia'₅₄ ca₂quín₂
'mú₃ quió₃, ia₁jaun₂ bá₄ le₃tei₅₄ jniá₂ ta₁ a₂ma₂chei'₃
Te₁gui'₅₄ Jesús a₂jmo₅₄, a₂jme₁ting₅ dsa₂ jág₁ dse₃
a₂'ua₁ dsí₅ Diú₄.

25 'Jaun₂ ně₃ dsón'₂ lín₂ jniá'₂, 'nia'₂ rín'₅₄ jniog₄
i₂ma₂nei'₂ jág₁ a₂ma₂qui₂ma₂'ě₃ jniá'₂ ŋi₂₃, o₁líg'₂
jmig₄ tsá₃ ma₃jag'₅₄ 'nia'₂ jniá'₂ táng₃.

26 Jaun₂ lě₃ juíg₂ jniá'₂ 'nia'₂ tsá₃ ma₃'e₂ rě₂cán'₄
jniá'₂ ja₁con₂ ca₂le₃jín₃ dsa₂,

27 ia₁ ma₂ca₂juíg₂ bá₄ jniá'₂ 'nia'₂ lia'₂ con'₂ lě₅
dsi₂jio₅ dsí₅ Diú₄ jmo₃, tsá₃ 'e₂ ca₂'ma₃ jniá'₂ ja₁con'₂
'nia'₂.

28 Jaun₂ ně₃, jmo₄ 'nia'₂ 'í₁ guiong'₅₄, jmo₄ 'í₁
ca₂le₃jín₃ dsa₂ ríng'₂ i₂'én₂ ně₃. Ia₁ o₄gog'₂ 'nia'₂ bá₄
ma₂dsiog₃ Jme₂dsí₂ Jŋió₅ † a₂jmó'₂ 'í₁ dsa₂ i₂lín₅ guá'₅
quián₅ Diú₄ i₂'lian'₅₄ tē₂le₃ quian'₅₄ jmi₂ 'an₅₄ 'ŋiog₅
ja₁ŋi'₅₄.

29 Guion₄ bá₄ jniá'₂ a₂ja₃lén₂ dsa₂ sián'₂
jě₁ma₂ŋág'₅, a₂'nio₃ 'éin₂ 'nia'₂ ca₂le₃jíng'₃, a₂jmo₃
ju₁lia'₂ jmo₅ dsí₂jí'₅₄ náu₂ tsau₂ dsí₅, jme₂dsiain₂₃
ju₁lia'₂ já'₂ cha'₂.

30 Ná₄ jě₄ quián'₂ 'nia'₂ guiong'₅₄ dsa₂ i₂jme₃tag₅
le₃jen₅ ia₁jaun₂ 'ein₃ ju₁'s quió'₅ 'éi₂ ju₁lia'₂ dsa₂
i₂ma₂'én₂ jág₁ dse₃.

31 Jaun₂ rě₂ján'₁ 'nia'₂, dsá₂ 'au'₂ 'nia'₂ jmo₄, ia₁ 'ni₅
ŋi₂ ca₂dsin₃ ca₂cuě₃ 'nia'₂ jág₁ lia'₂ 'uě₂-jmi₂, ca₂le₃jě₃
ca₂'o₃.

32 'Jaun₂ ně₃ rín'₅₄ jniog₄, dsián₄ jniá'₂ 'nia'₂ o₄gú₃
Diú₄, ne₄ jág₁ dse₃ quió'₅ a₂'ua₁ dsí₅, a₂lé₂ jmo₃
a₂'uan'₂ 'nia'₂, a₂lé₂ jmo₃ a₂tín'₅₄ 'nia'₂ a₂dse₃ a₂cha₂
quió'₅, ju₁lia'₂ a₂tín₅₄ ca₂le₃jín₃ dsa₂ i₂lě₅ 'í₁ quián₅.

33 Tsá₃ 'e₂ ma₂ca₂rě₃'ín₂ dsí₃ a₂jmo₅₄ quió₃, ju₁lia'₂
a₂cha₂ quió'₅ i₂sián'₂, on₃ guě'₂ cu₄nióg₄, on₃ guě'₂

† 20:28 griego: (ma₂chei'₃ Jme₂dsí₂ Jŋió₅ a₂lén'₂ 'nia'₂) epískopos (dsa₂
i₂con₂ 'í₁).

cu₄tiog₂, on₃ guë'₂ tsin'₅₄ në₃.

³⁴ Ni'₅₄ bá₄ 'nia'₂ rë₂, tē₂le₃ ma₂jmo₃ bá₄ ta₁ 'ñió₃
quian'₅₄ gu₂-tag₃ ma₂'no₃ a₂'nió'₅ dsi₃ñíg₂ quian'₅₄
i₂quiang'₅₄.

³⁵ Ca₂le₃o₃ jmíg₄ bá₄ ma₂'ë₃ 'nia'₂ 'a₂ lia'₂ 'nió'₅
jmo₃ dsa₂ ta₁, a₂'nió'₅ jme₃'on₅₄ dsa₂ dsa₂ i₂'nió'₅
quió'₅. Dsá₂ 'au'₂ 'nia'₂ jmo₄ jág₁ quió'₅ Te₁gui'₅₄
Jesús, jme₁ca₂juá'₂: “Ja₂lin₃ guë'₄ dse₃ 'ei₅ dsi₅ dsa₂
i₂cuë₅, con'₂ guë'₄ dsa₂ i₂gue₅.”

³⁶ Jme₁ca₂dsan₃ juá'₂ Pa₄ le₂në₅, ca₂chi₃jné₃
quian'₅₄ ca₂le₃jín₃ dsa₂, ca₂chi₃lén'₂ Diú₄.

³⁷ Ca₂le₃jín₃ qui₂ca₂'o₃, qui₂ca₂jñai'₃ Pa₄, ca₂chen'₃
quió'₅.

³⁸ La₁ ja₂lin₃ guë'₄ 'lia'₂ dsi₅ dsa₂ ca₂tóin'₂
jme₁ca₂juá'₂ Pa₄, ca₂lia'₂ o₁líg'₂ jmíg₄ tsá₃ ma₃jín₂
guë'₄ riin'₅₄. Jaun₂ ca₂jme₃quiong'₅₄ dsa₂, ca₂i₁join₅₄
Pa₄ tē₂ ja₁'ei₅ ni₁barco.

21

Ca₂ñá'₃ Pa₄ juí₅ Jerusalén

¹ Jme₁ca₂tén'₂ dsi₅ jnia'₅₄ dsa₂ rin'₅₄, jaun₂
ca₂i₃náu₅ juí₅ ne₄ jmi₁ñí'₄ co₂dsau₅ tē₂ Cos (a₂niog₅
jē₄ jmi₁ñí'₄). Jme₁jnia₃ jaun₂ táng₃, ca₂ñag₅₄ ja₁chei₂
Rodas, jaun₂ guë'₄ dsi₃náu₅ jnia'₅₄ juig₂ Pátara.

² Juig₂ Pátara jaun₂, cane₅₄ táng₃ jnia'₅₄ caun₂
ni₁barco a₂ñó₃ juí₅ 'uë₃ Fenicia, jaun₂ ca₂tió'₄ jnia'₅₄,
ca₂i₃náu₅ táng₃.

³ Jaun₂ ca₂ñag₅₄ jnia'₅₄ ja₁jniá₂ Chipre tē₂le₃ gu₂
jen₅, jaun₂ ca₂i₃náu₅ jnia'₅₄ tē₂ Siria. Jaun₂ ca₂dsióg₃
ni₁barco juig₂ Tiro, ia₁ i₁con₂ lio₅₄ ja₁jaun₂. Jaun₂
ca₂sió₄ jnia'₅₄ ja₁jaun₂.

4 Jaun₂ ca₂jen'₂ jnia'₅₄ dsa₂ 'én₂ rin'₅₄ tián'₅ ja₁jaun₂.
Jaun₂ ca₂tió'₄ jnia'₅₄ guio₃ jmig₄ quiaín'₅₄. Dsa₂ 'éi₂
ně₃, ca₂'ě₂ jág₁ a₂ca₂cuë₃ Jme₂dsí₂ Jñi_ó₅, ca₂tsí'₃ Pa₄
a₂tsá₃ dsi₂ten₅₄ dsó₃ jui₅ Jerusalén.

5 Jme₁ca₂dsin₃ guio₃ jmig₄ tio'₅₄ jnia'₅₄ jaun₂, jaun₂
ca₂'uag₂ táng₃. Jaun₂ ca₂le₃jín₃ dsa₂ i₂'én₂, quiaín'₅₄
'io₅₄ quiaín₅, chi'₂ quiaín₅ ně₃, ca₂jme₃quiong'₅₄ tē₂
'ni'₂ juig₂, ca₂i₁jo₅₄ tē₂ chei'₅₄ jm₁ñí'₄. Ja₁jaun₂
ca₂chi₁jne₁ jnia'₅₄ ca₂le₃jág₃, ca₂chi₁len'₄ jnia'₅₄ Diú₄.

6 Jaun₂ qui₂ca₂chan'₅₄ jnia'₅₄ rin'₅₄ ca₂'ei'₅₄ jág₁.
Jaun₂ gué₄ ca₂uig₅₄ jnia'₅₄ 'ñi_ó'₃ ni₁barco. 'Éi₂ ně₃
ca₂i₃lein₃ bá₄ quió'₅.

7 Jme₁ca₂'uag₂ jnia'₅₄ juig₂ Tiro, ca₂i₃náu₅ jui₅ ne₄
jm₁ñí'₄ a₂ca₂i₃náu₅ jui₅ Tolemaida. Ca₂cuin₅₄ jnia'₅₄
Diú₄ rin'₅₄ i₂tián'₅ ja₁jaun₂, ca₂jnia₄ jnia'₅₄ co₂jmig₄
quiaín'₅₄.

8 Jme₁jnia₃ jaun₂, ca₂le₃jág₃ con'₂ i₂quian'₅₄
Pa₄ ca₂'uag₂ ja₁jaun₂, ca₂dsi₃náu₅ juig₂ Cesarea.
Ja₁jaun₂ ca₂i₁náu₄ jnia'₅₄ ja₁quió'₄ Felipe i₂'ě₂
jág₁ dse₃, i₂lín₅ jan₂ rin'₅₄ dsa₂ guion₃ i₂jme₂'o₅₄*
i₂ca₂quión'₂ dsa₂ le₂ñiá₅.

9 Felipe 'éi₂ jme₁chan₂ quén₂ ja₁míg₄ on₃jua'₅₄
i₂ma₂jen'₂ gu₂. 'Io₅₄ quén₂ 'éi₂ jme₁'ě₂₃ 'é'₅ dsa₂ jág₁
a₂cuë₅ Diú₄.

10 Ma₂ne₁ñó₄ ca₂la₂ jmig₄ tio'₅₄ jnia'₅₄
jme₁ca₂dsió₃ jan₂ dsa₂ i₂tě'₂ dsa₂ Agabo, i₂'ě₂ jág₁
a₂cuë₅ Diú₄, a₂ca₂o₃jag₅₄ jnia'₅₄.

11 Jaun₂ jme₁ca₂guan₃ 'éi₂ ně₃, ca₂can₃ lau₂ jén'₅
tú'₅ Pa₄, jaun₂ qui₂ca₂'néi₂ mi₂tag₅₄ 'ñiog₅ quian'₅₄
mi₂gu₂ ně₃. Jaun₂ ca₂juá'₂:

* 21:8 dsa₂ guion₃ i₂jme₂'o₅₄: 'Nio'₂ ja₁ton₅ Hechos 6:1-7; Filipenses 1:1.

—Le₂la₂ juá'₂ Jme₂dsí₂ Jñi₅: “Le₂la₂ jmo₃ dsa₂ judíos jë₄ juig₂ Jerusalén jmái'₂ dsa₂ i₂quió'₅ ni₁lau₂ la₂, jaun₂ jáng'₂ o₄gú₃ dsi₂nau₂.”

12 Jme₁ca₂néi₁ jnia'₅₄ le₂në₅, jaun₂ ca₂mí₁ jnia'₅₄ quian'₅₄ dsa₂ chan₂ Cesarea ca₂chei'₅₄ Pa₄ a₂tsá₃ ma₃dsó₃ Jerusalén.

13 La₁ jaun₂ ca₂ñag₃ Pa₄:

—¿'E₂ lë₃ qui'₂-'au'₂ 'nia'₂, jmo'₂ 'nia'₂ 'ag₅ 'lia'₂ dsi₃? Ia₁ ma₂rë₂ján₁ bá₄ jniá₂, on₃jua'₅₄ jmá'₃ ca₂ne₅₄ a₂'nei₃ dsa₂. Ján₃ bá₄ ma₂'ei₅ caun₂ dsi₃ a₂jóng₂, jñag'₃ dsa₂ juig₂ Jerusalén, o₄quió'₄ Te₁gui'₅₄ Jesús.

14 Ia₁ tsá₃ jág₁ ca₂can₃ Pa₄ a₂ca₂chei'₅₄ jnia'₅₄ a₂tsá₃ dsó₃, jaun₂ ca₂jmo₁ jnia'₅₄ tei₄ jme₁ma₂në₂jua'₅₄:

—Ju₁le₅₄ bá₄ a₂'ñio₂ dsí₅ Te₁gui'₅₄ jaun₂.

15 Cang₂ jaun₂ ca₂jmo₁ jnia'₅₄ co₂jnia₅₄ quián₂, ca₂tió'₄ ju₁i₅ i₃náu₅ ju₁i₅ Jerusalén.

16 I₂lín₅₄ dsa₂ 'én₂ i₂chan₂ Cesarea ca₂jme₃quiong'₅₄. Jë₄ jaun₂ ñó₃ jan₂ dsa₂ i₂chen₂ Mnasón i₂chan₂ Chipre. Ma₂líg'₂ bá₄ ma₂já₅ dsa₂ 'éi₂ a₂lín₅ dsa₂ i₂'én₂. Ja₁quió'₄ 'éi₂ ca₂i₁jnia₄ jnia'₅₄ Jerusalén.

Ca₂i₁jñ₁ Pa₄ Jacobo

17 Jme₁ca₂dsi₃náu₅ jnia'₅₄ juig₂ Jerusalén, jaun₂ rin'₅₄ i₂tián'₅ ja₁jaun₂ ca₂guei₃ ca₂lia'₂ 'io'₂ jén'₅.

18 Jme₁jnia₃ jaun₂, ñó₃ Pa₄ quiain'₅₄ jnia'₅₄ a₂ca₂i₁jñ₁ jnia'₅₄ Jacobo. Ja₁quió'₄ 'éi₂ jme₁tion'₅₄ jñ₂gui'₅₄ can'₅₄.†

19 Jaun₂ qui₂ca₂cuag₃ Pa₄ Diú₄. Jaun₂ ca₂dsia₃ Pa₄ ca₂le₃jë₃ 'e₂ a₂ma₂jmo₃ Diú₄ jñ₄ dsi₂nau₂ tē₂le₃ quian'₅₄ 'éi₂.

† 21:18 griego: presbíteros.

20 Jme₁ca₂nág₂ dsa₂ jág₁, jaun₂ ca₂jme₃juin'₂ Diú₄.
Jaun₂ ca₂juá'₂ ca₂tsí'₃ Pa₄:

—Dse₃ jaun₂ rin'₅₄ jniog₄, la₁ ñi'₅₄ bá₄ 'ne₂, tē₂le₃
mei₅ bá₄ dsa₂ judíos i₂ma₂'én₂. Ca₂le₃jín₃ 'éi₂ ně₃,
dsen₅₄ dsí₅ le₃quió'₅ 'Éi'₃ Juá'₅.

21 Jaun₂ ma₂juá'₂ dsa₂ a₂ñi'₂ 'ne₂ jme₂tíng'₁ dsa₂
judíos i₂tían'₅ go₄ dsi₂nau₂, a₂tsá₃ ma₃tón'₂ jui₅, tsá₃
ma₃jme₃ti₃ 'éi'₃ ca₂jmo₃ Moisés, a₂tsá₃ ma₃ti₃ dsa₂
ni₁lo₁ chi'₂ dsa₂ ñe'₂ quián₅, on₃ guē'₂ jmo₃ ju₁lia'₂
tag₄ chí'₅ quián₂ jniog₄.

22 ¿E₂ lé₂ ně₃? Ia₁ tion₅₄ ja₃lén₂ dsa₂ a₂ñi'₂
jë₁ma₂ca₂rē₃ñi₅ a₂'eng'₅₄ ja₁lá₃.[‡]

23 Co₂ñei'₅₄ guē₄ dse₃ jmó'₂ a₂jua'₅₄ jnia'₅₄ la₂:
Chan₂ jë₄ la₂ quián₂ jnia'₅₄ quén₂ dsa₂ i₂tion₅₄ niog₅
jme₃ti₃ caun₂ jág₁ quió'₅ a₂ma₂cuē'₃ Diú₄.

24 Jñiai₅ ju₁dsi₂léin₂ quian'₅₄ 'ne₂, jmo₄ le₁jě₃
quiáng'₂ quiain'₅₄. Jaun₂ 'ne₂ bá₄ qui'₅₄ 'lia'₅₄
ia₁jaun₂ ma₂lé₂ jme₃ti₃ a₂chéi₃ jñi₂ dsi₅₄, ia₁jaun₂
ca₂le₃jín₃ bá₄ dsa₂ le₃lí'₄ a₂tsá₃ dsau₅ jág₁ a₂dsia₅ dsa₂
a₂'in₂₃ 'ne₂. Jaun₂ le₃ñi₅ dsa₂ a₂jme₂ti'₅₄ bá₄ 'ne₂ ján₃
con'₂ lě₅ 'Éi'₃ Juá'₅ quió'₅ Moisés.Š

25 La₁ ma₂ca₂chen₅₄ bá₄ jnia'₅₄ si₂ ne₄ dsi₂nau₂,
a₂ca₂chei₅₄ jnia'₅₄ a₂tsá₃ lín₄ jmo₃ o₂i₁ dsi₅ quian'₅₄
'Éi'₃ Juá'₅, * a₂jñia'₅₄ lia'₂ tsá₃ quíg'₃ ñi₄ já'₂ i₂ma₂cuin₃
dsa₂ diú₄ lag₄, on₃ guē'₂ guē'₃ jmi₂, on₃ guē'₂ ñi₄ já'₂
i₂güí'₃ dsa₂ dsi₂lag₄, tsá₃ nió'₃ jág₁ quian'₅₄ dsa₂ i₂tsá₃
lín₅ dsi₂i₂gu₂ ně₃.

‡ 21:22 A₂lín₅₄ chog₅₄ si₂: “Ia₁ tion₅₄ bá₄ le₃ñi₅ dsa₂ a₂'eng'₅₄ ja₁lá₃.”

Š 21:24 Í₂ Números 6. 'Nio'₂ ja₁ton₅ Hechos 18:18. * 21:25 A₂lín₅₄
chog₅₄ si₂ tsá₃ chi₁ton₅ “a₂tsá₃ lín₄ jmo₃ o₂i₁ dsi₅ quian'₅₄ 'Éi'₃ Juá'₅.”

Ca₂jña'₃ dsa₂ Pa₄ i₁dsi₅ guá'₅ templo

26 Jaun₂ ca₂jña₃ bá₄ Pa₄ dsa₂ quén₂ 'éi₂. Jme₁jnia₃ jaun₂ ně₃, Pa₄ quiain'₅₄ dsa₂ quén₂ 'éi₂ ca₂jmo₃ le₁jě₃ quió'₅. Jaun₂ ca₂'í₃ i₁dsi₅ guá'₅ templo ca₂i₁'ě₄ jág₁ i₂líg'₂ dsian₅ ta₁guio₃ jmig₄ a₂jmo₂₃ le₁jě₃ quió'₅, jě₁ma₂tě₂ rě₁dsín'₂ dsa₂ já'₂ ne₄ ne₄chei₂ o₄quió'₄ le₂jain₂ le₂jain₂.†

27 La₁ jme₁ja₂quíán₃ dsín'₅₄ ta₁guio₃ jmig₄ jaun₂, jan₂-on₃ dsa₂ judíos i₂chan₂ 'uě₃ Asia ca₂o₃lén₂, jaun₂ ca₂jín₂ Pa₄ i₁dsi₅ guá'₅. I₂'éi₂ ca₂jmo₃ ca₂tón'₂ dsa₂ co₂mí'₅₄, jaun₂ ca₂jña'₃ dsa₂ Pa₄.

28 Jaun₂ qui₂ca₂tón'₂ ca₂guió'₃ ca₂juá'₂:

—i'₁Nia'₂ dsa₂ juig₂ Israel, jme₁'o₁ jnia'₅₄! I₂la₂ bá₄ dsa₂ i₂ñí₄ lě₃ ñi₅ ca₂le₃jě₃ juig₂ jme₂tiin₂₃ dsa₂ jág₁ 'líg'₅₄ ja₁con₂ juig₂ go₄ jniog₄, a₂jme₂tiin₂₃ dsa₂ a₂tsá₃ jme₃ti₃ dsa₂ 'Éi'₃ Juá'₅ quió'₅ Moisés, a₂tsá₃ 'e₂ quen₅ guá'₅ templo la₂ quián₂ jniog₄. Ně₃ ně₃, ma₂ně₂tióin'₂ i₂lín₅₄ dsa₂ griegos i₁dsi₅ guá'₅ templo, a₂ma₂ně₂jme₂'ióg₃ ja₁jñi₅ la₂.

29 Juá'₂ le₂ně₅, ia₁ ma₂jág₂ dsa₂ le₂jñiá₅ ma₂jín₂ Trófimo i₂chan₂ Efeso a₂i₂ñí₅₄ quiain'₅₄ Pa₄ jě₄ juig₂ Jerusalén, jaun₂ lín₂ a₂ma₂jña₃ Pa₄ 'éi₂ i₁dsi₅ guá'₅.

30 Ta₁caun₂ juig₂ ca₂tón'₂ dsa₂ co₂mí'₅₄, jaun₂ ca₂o₃lén₂ dsa₂ co₂chi'₅₄. Jaun₂ ca₂jña'₃ dsa₂ Pa₄ qui₂ca₂tsag'₂ tě₂le₃ ca₁'né₄ i₁dsi₅ guá'₅, jaun₂ ca₂jnéi₃ dsa₂ dsí₂juí₅ o₄'né₄.

31 Jme₁ma₂'nio₃ jme₁jñi₃ bá₄ Pa₄ jme₁ca₂dsióg₃ jág₁ ca₂rě₃ñi₅ juig₅₄ 'lióg₂ dsen₅₄, ca₂le₃jín₃ bá₄ dsa₂ juig₂ Jerusalén tióin'₅₄ co₂mí'₅₄.

† 21:26 'Í₂ Números 6.

32 Dsi₂jui₅ jaun₂ ca₂ñí₂' jui_g₅₄ 'lióg₂ quian'₅₄ ca₂le₃jín₃ 'lióg₂ quiáin₅, ca₂i₃lén₂ co₂'ei₅ ja₁tion'₅₄ dsa₂ co₂mi'₅₄. Jaun₂ dsi₂jui₅ jme₁ca₂jág₃ dsa₂ dsi₃lén₂ 'lióg₂ quiain'₅₄ jui_g₅₄ 'lióg₂ dsen₅₄, jaun₂ ca₂téin₂ bá₄ Pa₄, ia₁ jme₁tioin'₅₄ cuë₂₃.

33 Jaun₂ jme₁ca₂dsióg₃ jui_g₅₄ 'lióg₂ dsen₅₄, ca₂ñai'₃ Pa₄ ca₂jmo₃ 'éi'₃ ca₂'néi₂ 'lióg₂ quian'₅₄ tin₃ ñí₁ cades. Jaun₂ guë₄ ca₂ñí₃' dsa₂ 'ein₂ 'éi₂ Pa₄, 'e₂ ca₂jmo₃.

34 Jaun₂ jma₃quén₅ qui₂ca₂guió'₃ dsa₂ jui_g₂ le₂jain₂ le₂jain₂. Ca₂lia'₂ ñja'₅₄ tsá₃ ca₂ñí'₂ jui_g₅₄ 'lióg₂, ia₁ a₂ñí₄ chí'₅ co₂mi'₅₄. Jaun₂ ca₂jmo₃ 'éi'₃ ca₂tág₃ dsa₂ Pa₄ jui₅ 'né₅ ja₁tion'₅₄ 'lióg₂.

35 Jme₁ja₂quián₃ dsi₁len₃ dsa₂ ja₁lë₄ ni₁ta₅ 'né₅ ja₁tion'₅₄ 'lióg₂, jaun₂ ca₂jio_g₃ 'lióg₂ ca₂ñjai₃ Pa₄ jui₅ guei'₅₄ ia₁ a₂ñí₄ 'ñio₅ lin₃ 'ne₂ dsa₂ jui_g₂.

36 Ia₁ ca₂le₃jín₃ bá₄ dsa₂ jui_g₂ jme₁ja₂lén₂ chi₁co'₅₄ qui₂guió'₅ qui₂juá'₂:

— ¡Jui₁jon₅₄ i₂në₅!

Ca₂ton₃ Pa₄ jág₁ a₂lióin₂ 'ñiog₅ ne₄ dsa₂ jui_g₂

37 Jë₁jme₁ma₂to'₂ 'lióg₂ toin'₂ Pa₄ dsi₂néi₂ ne₄ta₁ quió'₅, jaun₂ ca₂juá'₂ Pa₄ ca₂tsí'₃ jui_g₅₄ 'lióg₂ dsen₅₄:

— ¿Lé₂ le₃juá'₄ jniá₂ ca₂jon₄ jág₁?

Jaun₂ ca₂ñag₃ jui_g₅₄ 'lióg₂:

— ¿Tin'₂ 'ne₂ dsiá'₁ jág₁ jmei₅ griego?

38 Jaun₂, ¿on₃jua'₅₄ 'ne₂ líng'₅ dsa₂ egipcio i₂ca₂jmo₃ mi'₅₄ qui₂ca₂tsi₂jain₃ dsa₂ ma₂i₁jáun₃, ca₂'uín'₂ quén₂ mei₅ dsa₂ i₂ma₂ca₂jme₃dsian₅ dsa₂ jui₅ 'uë₃ quein₂?

39 Jaun₂ ca₂juá'₂ táng₃ Pa₄:

—Dsa₂ judío bá₄ lín₅ jniá₂, i₂chan₂ juig₂ Tarso, caun₂ juig₂ dsen₅₄ tén₅ 'uë₃ Cilicia. La₁ jmo₄ dse₃ 'au'₂ cué'₁ jmig₄ a₂juig₅₄ jniá₂ dsa₂ juig₂ jág₁.

⁴⁰ Ca₂cuë'₃ bá₄ jmig₄ jaun₂ ně₃. Jaun₂ ca₂nau₂ Pa₄ ne₄ ni₁ta₅ jaun₂. Jaun₂ ca₂jmo₃ léi₄ quian'₅₄ gu₂ ca₂tsí'₃ dsa₂ a₂jmo₃ tei₄. Jme₁ma₂chí'₅ tei₄, jaun₂ ca₂jme₃lióg₃ ca₂juá'₂ jág₁ quian'₅₄ jág₁ jmei₅ hebreo, † ca₂tsí'₃ dsa₂:

22

¹ —'Nia'₂ dsa₂ go₂ rín'₅₄ jniog₄, gui'₅₄ can'₅₄ ně₃, nei₂ de'₂ 'nia'₂ a₂juá'₄ jniá₂ juig₅₄ 'nia'₂ a₂jáng'₄ jág₁ dsau₅ quió'₃.

² Të₂le₃ tei₄ guë'₄ ca₂i₃lén₂ dsa₂ jme₁ca₂nág₂ a₂juá'₂ Pa₄ quian'₅₄ jág₁ jmei₅ hebreo.* Jaun₂ caun₂ ca₂juá'₂ bá₄ 'éi'₂:

³ —Dsa₂ judío bá₄ lín₅ jniá₂. Juig₂ Tarso bá₄ chang₂, ja₁tén₄ 'uë₃ Cilicia. La₁ Jerusalén la₂ bá₄ ca₂i₃juig'₂. Ca₂'i₃ jniá₂ si₂ a₂ca₂jme₃tag₅ të₅ Gamaliel. Co₂rë₂ bá₄ ca₂jme₃tag₂₃ con'₂ lë₅ Si₂ 'Éi'₃ quió'₅ dsa₂ quián₂ jniog₄ ma₂líg'₂. A₂dsen₅₄ dsí₃ jme₁lín_g₄ le₃quió'₅ Diú₄, ju₁lia'₂ jmo'₂ 'nia'₂ ca₂le₃jín_g₃ rë₂ně₃.

⁴ Qui₂ca₂co₃'én₃ jniá₂ dsa₂ i₂tion'₅₄ Jui₅ quió'₅ Te₁gui'₅₄ le₂jniá₅, ca₂lia'₂ ca₂quín₂ 'mú₃ quió'₅. Qui₂ca₂toin'₂ 'né₅ 'má₃ lia'₂ dsa₂ ŋe'₂ lia'₂ dsa₂ mí₂.

⁵ Lé₂ bá₄ jáng'₃ jág₁ dsau₅ jme₂dsa₂ dsen₅₄, ca₂le₃jín₃ guë'₄ dsí₂gui'₅₄ can'₅₄ ně₃, ia₁ guoin₅₄ bá₄ ca₂jáng'₃ si₂ jniá₂ a₂ca₂chein₃ ne₄ rín'₅₄ i₂tián'₅ Damasco, ca₂jmo₃ 'éi'₃ a₂jme₁i₁chán'₃ jniá₂ rín_g₃

† 21:40 o₃, arameo. * 22:2 o₃, arameo.

i₂tián'⁵ ja₁jaun₂, a₂jme₁të₁₂ le₁'ñei'⁵⁴ ia₁jaun₂ gue₃
ui_g⁵ jë₄ juig₂ Jerusalén la₂.

*Ca₂dsia₃ Pa₄ 'a₂ lia'₂ jme₁ca₂jéin'₃ ca₂rë₃'éin₂ jág₁
dse₃*

(Hechos 9:1-19; 26:12-18)

⁶ 'La₁ia₁ lia'₂ con'₂ jme₁ñó₃ jniá₂ le₂'i₄ jui₅ né'₃
a₂dsió_g₄ juig₂ Damasco, con'₂ dsi₂ñí'₃, con'₂ tsá₃
jáng₅ jme₁ca₂téng₃ caun₂ si₂ tá_g₅ jmá'₅ a₂já₃ jui₅
guei'⁵⁴ i₂juíg₃.

⁷ Jaun₂ i₃'íng₃ 'uë₃. Dsi₂jui₅ le₂jaun₂ ca₂nag₃ jág₁
a₂juá'₂: “Saulo, Saulo, ¿'e₂ lë₃ co₂'éin'⁵ jniá₂?”

⁸ Jaun₂ ca₂ñag₄ jniá₂: “¿'Ein₂ 'ne₂ gui'⁵⁴?” Jaun₂
ca₂juá'₂ tsá_g₅ jniá₂: “Jesús chan₂ Nazaret bá₄ jniá₂
i₂co₂'én'⁵ 'ne₂.”

⁹ Ján₃ bá₄ ca₂jág₃ dsa₂ i₂jme₁quian'⁵⁴ jniá₂ si₂
jaun₂, jaun₂ ca₂rë₃gó'⁵. La₁ tsá₃ ca₂nág₂ jág₁ quió'⁵
i₂ca₂juá'₂ ca₂tsá_g₃ jniá₂.

¹⁰ Jaun₂ ca₂ñag₄ jniá₂ jaun₂ ně₃: “Te₁gui'⁵⁴, ¿'e₂
'nió'⁵ jmo⁵⁴ jniá₂?” Jaun₂ ca₂juá'₂ Te₁gui'⁵⁴: “Nau₂,
gua₂ jui₅ juig₂ Damasco. Ja₁jaun₂ juá'₂ dsa₂ ca₂le₃jë₃
'e₂ 'nió'⁵ jmó'₂.”

¹¹ Ia₁ co₂dsia₅ ca₂téng₂ bá₄ quian'⁵⁴ si₂, jaun₂ dsa₂
i₂quiang'⁵⁴ bá₄ ca₂jiog₃ le₁chan'₂ gu₃ a₂ca₂dsió_g₃ të₂
Damasco.

¹² Ja₁jaun₂ jme₁guá₄ jan₂ dsa₂ chen₂ Ananías,
i₂jme₁jme₂ti₃ con'₂ lë₅ Si₂ 'Éi'₃ Juá'₅ quió'⁵ Moisés,
jaun₂ ca₂le₃jín₃ dsa₂ judíos i₂tián'⁵ Damasco ca₂juá'₂
dse₃ 'iin₂₃ 'éi₂.

¹³ Jaun₂ ca₂dsió_g₃ Ananías i₁jag⁵⁴ ja₁jme₁'eng⁵⁴.
Jme₁ca₂dsió_g₃, ca₂juá'₂: “Saulo rin'⁵⁴ jniog₄, guei'⁵⁴
táng₃ jme₁ne'₄.” Dsi₂jui₅ jaun₂ bá₄ ca₂lág₃ táng₃ míg₂
ne₃, jaun₂ ca₂jin⁵⁴ jaun₂ ně₃.

14 Jaun₂ ca₂tság₃ táng₃ jniá₂: “Diú₄ quián₅ dsa₂ can'₅₄ quián₂ jniog₄ ma₂ca₂quióin'₂ 'ne₂ le₂jniá₅, ia₁jaun₂ le₃cuing'₂ 'e₂ jaun₂ a₂ηio₂ dsí₅, ia₁jaun₂ jing'₅₄ i₂qui₂dsi₅ 'éi'₃ rē₂ quián₅, ia₁jaun₂ nág'₁ jág₁ quió'₅ 'ηiog₅ a₂tio'₅₄ mi₂'o₅₄.”

15 Jaun₂ 'ne₂ gog'₅₄ a₂chi₂o₁'iin'₃ o₁dsia'₄ o₁chei'₄ ca₂le₃jín₃ dsa₂ ca₂le₃jě₃ 'e₂ ma₂jag'₅₄ 'e₂ qui₂ma₂nei'₂ ně₃.”

16 Jaun₂ ně₃, tsá₃ ma₃jme₁'ag₁₂. Nau₂, o₂chon₅₄ jmig₂, mi₄ ne₄ 'éi₂, ia₁jaun₂ jní₃ dsáu'₂.”

Ca₂dsia₃ Pa₄ 'a₂ lia'₂ ca₂lě₃ a₂chein₅₄ ηei₅₄ ja₁con₂ dsí₂nau₂

17 'Jme₁ca₂guáng'₃ Jerusalén, ηeg₅₄ guá'₅ templo i₂chi₁leng'₄ Diú₄. Jaun₂ a₂lě₁ca₂jéin₃ ca₂jág₃,

18 ca₂jing'₅₄ Te₁gui'₅₄, jaun₂ ca₂juá'₂: “I₂ηáu'₂ jú₅ tē₂le₃ dséi₂ jui₂ Jerusalén, ia₁ tsá₃ tón'₂ dsa₂ jui₅ jág₁ a₂jui₂'₅₄ a₂'ág'₄ jniá₂.”

19 Jaun₂ ca₂ηag₄ jniá₂ ca₂jui₂'₂: “Te₁gui'₅₄, ca₂le₃jín₃ bá₄ dsa₂ 'éi₂ le₁ηi₅ a₂jme₁ηi₅ jniá₂ a₂jme₁nei₂₃ ca₂le₃jě₃ guá'₅ sinagogas a₂co₂'éng₅ qui₂cuě₅ ca₂le₃jín₃ dsa₂ i₂'én₂ jág₁ dse₃ quiáng'₂, a₂jme₁i₂tioin'₂ 'né₅ 'má₃.”

20 Jme₁ca₂jñi'₃ dsa₂ Esteban, dsa₂ i₂jme₁jáng'₅ jág₁ dsau₅ quiáng'₂, jaun₂ bá₄ jme₁chén'₄ jniá₂ ján₃, ia₁ jme₁lě₄ caun₂ jág₁ quió₃ quian'₅₄ dsa₂ i₂ca₂jñi'₃ 'éi₂. Jaun₂ ca₂jmo₃ jniá₂ 'í₁ ni₁tsin'₅₄ dsa₂ i₂ca₂jñag'₃.”

21 La₁ jaun₂ ca₂juá'₂ Te₁gui'₅₄ ca₂tság₃ jniá₂: “La₁ gua₂, ia₁ tsag₅₄ jniá₂ úing₂ quiáng'₂, a₂o₁'ě₃ jág₁ ja₁con₂ dsí₂nau₂.”

Ma₂niog₅ ne₄ jui₂'₅₄ 'lióg₂ bá₄ Pablo

22 Co₂jaun₂ bá₄ ca₂nág₂ dsa₂ juig₂. Jaun₂ ca₂jme₃lióg₃ ca₂tóin'₂ co₂mi'₅₄ ca₂guió'₃ ca₂juá'₂:

—¡Jui₁jon₅₄ i₂ně₅! ¡Tsá₃ ma₃'nió'₅ le₃chain₂ gué₄!

23 Jaun₂ dsa₂ juig₂ ně₃, caun₂ qui₂ca₂tě₂ca₂'oin'₂ bá₄ Pa₄, qui₂ca₂gág₃ tsin'₅₄ tioin'₅₄, † qui₂ca₂cho₃ dsa₂ 'liog₂ ju₁₅ guei'₅₄.

24 Jaun₂ ca₂jmo₃ juig₅₄ 'lióg₂ dsen₅₄ 'éi'₃ ca₂toin'₂ Pa₄ dsi₂néi₂ ja₁tion'₅₄ dsi₂'lióg₂. Jaun₂ ca₂jmo₃ 'éi'₃ a₂báin₂ Pa₄ ia₁jaun₂ jmo₃ jág₁ 'e₂ dso₄ riin₂, 'e₂ 'uig₅₄ ca₂rě₃'né₃ dsa₂ juig₂ quiong'₅₄.

25 La₁ jme₁ma₂rě₂'ŋei'₅₄ a₂jme₁ma₂bóg₂ dsa₂, ca₂juá'₂ Pa₄ ca₂tsí'₃ jan₂ juig₅₄ 'lióg₂ i₂chén'₅ cau₅:

—¿Ca₂tín'₂ 'nia'₂ báng'₄ jan₂ dsa₂ i₂tén₅ Roma tě₃ tsá₃ ma₂ně₂quion'₂ 'nia'₂ jág₁ dsau₅ quió'₅?

26 Jme₁ca₂nág₂ juig₅₄ 'lióg₂ a₂ně₅, jaun₂ ca₂ŋei₅₄ i₁chi'₂ juig₅₄ dsen₅₄ quiáin₅ ca₂juá'₂:

—Tě₃ŋi'₅₄ quiáng'₂ ně₁jua'₂ 'e₂ ca₂jmag'₅₄ dsa₂ ně₅, ia₁ dsa₂ tén₅ Roma bá₄ ně₅.

27 Jaun₂ ca₂jme₃quián₃ juig₅₄ 'lióg₂ dsen₅₄ ja₁'en₅₄ Pa₄, jaun₂ ca₂ŋag₃:

—¿Dsón'₂ lín'₅ 'ne₂ dsa₂ tén₅ Roma?

Jaun₂ ca₂ŋag₃ táng₃ Pa₄:

—Ján₅.

28 Jaun₂ ca₂juá'₂ juig₅₄ 'lióg₂ jaun₂ ně₃:

—'Lióng₂ cu₄ ca₂quín₂ quió₃ a₂ca₂ling₃ dsa₂ tén₅ Roma.

Jaun₂ ca₂juá'₂ táng₃ Pa₄:

—La₁ jniá₂ ně₃, a₂ma₂lín₅ bá₄ jniá₂ lia'₂ con'₂ ca₂rě₃cháng₃.

† 22:23 ca₂gág₃ tsin'₅₄: Le₂jaun₂ jme₁jmo₅ dsa₂ léi₄ chi₂jua'₂ 'e₂ tsá₃ tě₃ dsí₅.

29 Dsi₂jui₅ jme₁ca₂nág₂ dsa₂ i₂jme₁bán₂ Pa₄, jaun₂ ca₂l₃lén₂ cau₅, ján₃ bá₄ le₂jaun₂ juig₅₄ 'lióg₂ dsen₅₄ ně₃. Ia₁ jme₁ca₂rě₃ŋi₅ a₂lín₅ Pa₄ dsa₂ tén₅ Roma, ca₂rě₃gó₅ bá₄ jaun₂ ně₃ ia₁ a₂ca₂'nei'₂ Pa₄.

Ma₂chén'₅ Pa₄ ne₄ dsi₂tan₅₄ quián₅ dsa₂judíos

30 Jme₁jnia₃ jaun₂, jme₁'nio₃ le₃ŋi₅ juig₅₄ 'lióg₂ dsen₅₄ 'e₂ 'uig₅₄ jme₁cué'₅ dsa₂ judíos dso₄ Pa₄. Jaun₂ ca₂chén'₂ 'éi₂ ia₁ a₂jme₁chi₁'nei'₅₄ quian'₅₄ ni₁ŋí₁ cadenas. Jaun₂ ca₂jmo₃ 'éi'₃ a₂ŋi'₂ juig₅₄ jme₂dsa₂ quian'₅₄ ca₂le₃jín₃ dsi₂tan₅₄ quián₅ dsa₂ judíos. Jaun₂ guě₄ ca₂dsein₂₃ Pa₄ ca₂chei'₃ ne₄ dsa₂ 'éi₂.

23

1 Jme₁ma₂chén'₅ Pa₄ ne₄ dsi₂tan₅₄ quián₅ dsa₂ judíos, jaun₂ ca₂jín₂ ca₂le₃jín₃ dsa₂ can'₅₄ 'éi₂, jaun₂ ca₂juá'₂:

—Rin'₅₄ jniog₄, tei₄ bá₄ 'ei₅ dsi₃ ma₂guio₃, chang₂ tē₂ jmig₄ ně₃, ne₄ Diú₄.

2 Jaun₂ Ananías, i₂lín₅ jme₂dsa₂ dsen₅₄, ca₂tsí'₃ dsa₂ i₂jme₁tión₂ cau₅ quió'₅ Pa₄, a₂jnú₃ mi₂'o₄ 'éi₂.

3 Jaun₂ ca₂ŋag₃ Pa₄ ca₂tsí'₃ jme₂dsa₂ dsen₅₄ 'éi₂:

—iDiú₄ jnú₃ quiáng'₂ 'ŋiag'₂, 'ne₂ i₂lín₅ lia'₂ lě₅ caun₂ ni₁'ia'₂ a₂jŋia'₅₄ jniá₂ tiog₂ tē₂le₃ co'₅₄! * ě'Néi'₂ 'ne₂ ja₁ně₅ qui₂dsí'₁ 'éi'₃ ja₁con₂ jniá₂ con'₂ lě₅ Si₂ 'Éi'₃? ěJaun₂ 'e₂ lě₃ jmo'₂ 'éi'₃ a₂cuě₃ dsa₂ jniá₂, ton'₂ tsá₃ le₂jaun₂ ta₁ qui'₅ Si₂ 'Éi'₃?

4 Jaun₂ ca₂ŋag₃ dsa₂ i₂tion'₅₄ guě₄ ja₁jaun₂:

—ě'E₂ lě₃ ŋag'₅₄ le₂ně₅ ne₄ jme₂dsa₂ dsen₅₄ quián₅ Diú₄?

5 Ca₂ŋag₃ táng₃ Pa₄:

* 23:3 ni₁'ia'₂ tiog₂: 'Nio'₂ ja₁ton₅, Mateo 23:27.

—Rin'⁵⁴ jniog₄, tsá₃ jaun₂ guion₅₄ a₂lín₅ jme₂dsa₂ dsen₅₄. Ia₁ juá'₂ ne₄ Si₂ quió'₅ Diú₄: “Tsá₃ chi'₁íng'₄ 'lig'₅₄ dsi₂tan₅₄ juig₂ go'₅₄.”†

6 Jaun₂ ca₂rē₃lí'₄ Pa₄, i₂lín₅₄ dsa₂ 'éi₂ lín₅ dsa₂ saduceos, i₂lín₅₄ guē'₂ lín₅ dsa₂ fariseos. Jaun₂ guē'₄ ca₂juá'₂ Pa₄ tiá'₂, ca₂tsí'₃ dsa₂:

—Rin'⁵⁴ jniog₄, dsa₂ fariseo bá₄ lín₅ jniá₂. Fariseos bá₄ jme₁lín₄ dsa₂ can'₅₄ quiáng₃ ně₃. 'Uig₅₄ ia₁ a₂'éng₂ jág₁ a₂jen'₅₄ táng₃ 'lag₄ bá₄ a₂'iog₅₄ dsa₂, a₂con₂ dsa₂ jág₁ dsau₅ chéng'₅ la₂.

7 Jme₁ca₂juá'₂ Pa₄ le₂ně₅, dsa₂ i₂lín₅ fariseos, quian'₅₄ dsa₂ i₂lín₅ saduceos ně₃, ca₂jme₃lióg₃ qui₂ca₂tsín₂ guioin₅₄, ca₂lě₃ le₁dsoin'₅₄.

8 Ia₁ dsa₂ saduceos, tsá₃ 'e₂ 'éin₂ a₂jen'₅₄ dsa₂ jě₁ma₂dsain₃, on₃ guē'₂ 'éin₂ a₂chan₂ ángeles, on₃ guē'₂ 'éin₂ a₂chan₂ jme₂dsí₂. La₁ dsa₂ fariseos guē'₂ ně₃, 'éin₂ bá₄ ca₂le₃jě₃ a₂jaun₂.

9 Jaun₂ ca₂tóin'₂ ca₂tsín₂ co₂mi'₅₄. Jaun₂ i₂lín₅₄ dsa₂ i₂lín₅ tē₅juá'₅ i₂tión₂ tē₂le₃ quió'₅ dsa₂ fariseos, ca₂nau₂ ca₂juá'₂:

—'I₁caun₂ 'lig'₅₄ tsá₃ 'e₂ ma₂jmo₃ dsa₂ ně₅. ¿'E₂ lé₂ chi₂juá'₂ dsón'₂ bá₄ ca₂juá'₂ jan₂ ángel, o₃ jan₂ jme₂dsí₂ 'e₂, ca₂tsí'₃ i₂ně₅?

10 Jaun₂ 'nio₅ ca₂tón'₂ dsa₂ ca₂tsín₂, calia'₂ ca₂rě₃gó'₅ juig₅₄ 'lióg₂ dsen₅₄ jme₁ca₂jág₃. Ia₁ ně₅ tsá₃ ma₂jmo₃ dsa₂ jma₃quén₅ quió'₅ Pa₄, lín₂. Jaun₂ ca₂jmo₃ 'éi'₃ ca₂o₃lén₂ 'lióg₂ ca₂dsein₂₃ Pa₄ jě₄ quió'₅ dsa₂, ca₂tág₃ juí₅ ne₄ta₁ ja₁tion'₅₄ 'lióg₂.

† 23:5 Éxodo 22:28.

11 Jme₁ca₂tě₂ tin₃ nei₅ 'en₅₄ Pa₄ ja₁jaun₂,[‡]
ca₂jme₃jnia₅ Te₁gui'₅₄ ne₅₄, jaun₂ ca₂juá'₂:

—Qen'₂ bí₂, Pa₄, ia₁ jui₁lia'₂ ma₂ně₂jang'₅₄ jág₁
dsau₅ ně₂ag'₅₄ jniá₂ jě₄ juig₂ Jerusalén la₂, le₂ně₅ bá₄
o₁jang'₁ jág₁ dsau₅ o₁ág'₃ jniá₂ jě₄ juig₂ Roma ján₃.

Ca₂jmo₃ dsa₂ judíos jág₁ a₂jme₁jñi'₃ Pa₄

12 Jme₁jnia₃ jaun₂, ca₂jmo₃ jág₁ i₂lin₅₄ dsa₂ judíos
a₂jñi'₃ Pa₄. Ca₂'iin₃ Diú₄ a₂ca₂juá'₂ a₂tsá₃ 'e₂ guě'₃,
a₂tsá₃ 'e₂ 'ín'₂ ně₃, ca₂lia'₂ ca₂lě₃ a₂nio₅ dsí₅ jmo₃.

13 Jme₁lě₂ lě₅ guě'₄ con'₂ tē₂lón₃ dsa₂ i₂jme₁ma₂lí'₅
jág₁ jmo₃ le₂jaun₂.

14 Jaun₂ ca₂i₁lein₅₄ i₁jñin₅₄ juig₅₄ jme₂dsa₂,
ca₂le₃jín₃ guě'₄ gui'₅₄ can'₅₄ quián₅ dsa₂ judíos ně₃,
a₂ca₂i₁jua'₁:

—Jnia'₅₄ ma₂'ín₃ Diú₄ a₂tsá₃ 'e₂ tí₄ 'o₄, ca₂lia'₂
ma₂ně₂jñi'₄ jnia'₅₄ Pa₄.

15 Jaun₂ 'nia'₂ ně₃, quian'₅₄ dsí₂tan₅₄ quián₅ guá'₅,
o₂chei'₅₄ 'nia'₂ juig₅₄ 'lióg₂ a₂ja₂jñiai₃ Pa₄ ne'₅₄ 'nia'₂
'ióg₃. A₂lě₁juig'₅₄ bá₄ 'nia'₂ a₂caun'₅₄ jág₁ dsau₅ co₂rě₂
quió'₅, ia₁jaun₂ bá₄ ja₃jio₃. Jaun₂ jnia'₅₄ guě'₂ ně₃,
ma₂lág₅ co₂jñia₅₄ a₂jñi'₄ né'₃ a₂guáin₂ tē₂la₂.

16 La₁ ja₁ñi'₅₄ 'io₅₄ rin'₅₄ Pa₄ ca₂rě₃ñi₅ jág₁ jaun₂.
Jaun₂ ca₂ñei₅₄ ne₄ta₁ quió'₅ 'lióg₂ ca₂i₁'ě₄ jág₁ ne₄ Pa₄.

17 Jaun₂ Pa₄ ně₃ ca₂tě'₃ jan₂ juig₅₄ 'lióg₂, jaun₂
ca₂juá'₂:

—Jnia₅ chi'₂ la₂ ne₄ juig'₂ 'nia'₂, ia₁ cha₂ jág₁ quian₅
dsí₃'ě₃.

18 Jaun₂ ca₂ñe₄ 'éi₂ ca₂i₁jñiai₃ chi'₂, jaun₂ ca₂juá'₂:

—Pa₄ i₂lě₅ 'í₁ quián₅ 'lióg₂ ně₂té₂ jniá₂ a₂ně₂mi₃
a₂i₁jñia₂g₂ chi'₂ la₂, ia₁ cha₂ jág₁ quian₅ a₂'ě₂ ne'₅₄.

‡ 23:11 o₃, “A₂uě₂ jmig₄ jaun₂.”

19 Jaun₂ ca₂jŋa'₃ juig₅₄ 'lióg₂ dsen₅₄ 'éi₂ mi₂gu₂ chi'₂ 'éi₂, con'₂ ca₂jio₃g₃ cau₅, jaun₂ ca₂ŋag₃:

—¿'E₂ jág₁ quian'₅₄ juig'₅₄ jniá'₂?

20 Jaun₂ ca₂ŋag₃ chi'₂ 'éi₂:

—Ma₂në₂jmo₃ dsa₂ judíos caun₂ jág₁ a₂mi₃ ne'₅₄ a₂o₁jŋiag'₂ Pa₄ 'ióg₃ ne₄ dsi₂tan₅₄ quián₅ dsa₂ judíos. A₂'nio₃ jme₃gain₂₃ 'ne₂ jmo₃ në₂jag₄ bá₄ a₂con₂ dsi₂tan₅₄ jág₁ dsau₅ quió'₅ 'éi₂.

21 La₁ tsá₃ o₁'eng'₅₄, ia₁ lě₅ guě₄ tē₂lón₃ dsa₂ quián₅ ma₂le₁'mai₅₄ cau₅ jui₅ le₁jŋiog₂₃. Ma₂'in₃ Diú₄ a₂tsá₃ 'e₂guě'₃, 'ín'₂, ca₂lia'₂ ca₂jŋi'₃ Pa₄. Jŋia'₅₄ lia'₂ a₂jaun₂ bá₄ le₁jŋia₂₃ chi₂jua'₂ 'e₂ jág₁ juig'₅₄ 'ne₂.

22 Jaun₂ ca₂'ág'₃ jág₁ juig₅₄ dsen₅₄ 'éi₂, ca₂juá'₂ a₂tsá₃ 'ein₂ tsí'₃ jág₁ a₂ca₂dsia₃ jaun₂.

Ca₂dsián'₂ dsa₂ Pa₄ ne₄ Dsi₄má'₂ Félix

23 Jaun₂ ca₂tě'₃ juig₅₄ 'lióg₂ dsen₅₄ on₃ juig₅₄ 'lióg₂ quián₅, ca₂jmo₃ 'éi'₃ a₂jmo₃ 'éi₂ co₂jŋia₅₄ tin₃ 'ŋiá'₂-lón₂ 'lióg₂ a₂dsi₃lén₂ jui₅ tag₅₄; 'nag'₂ ne₂guión₂ rē₂dsí₂ guian₃ guě'₂ (70) dsi₃lén₂ co₁dsin₅₄ cua₁, tin₃ 'ŋiá₂-lón₂ guě'₂ i₂cán₂ ŋí₁ chen'₂, a₂dsi₃lén₂ jui₅ Cesa₂rea con'₂ hora ŋí₁ ŋi₃ le₃ca₂nei₂. §

24 Jaun₂ ca₂chein₃ jág₁ a₂jmo₃ dsa₂ co₂jŋia₅₄ cua₁ i₂co₃dsin₅₄ Pa₄. Ca₂jmo₃ 'éi'₃ a₂jmo₃ dsa₂ 'í₁, dsi₃jóin₂ 'éi₂ o₄gú₃ Dsi₄má'₂ Félix tē₂dsein₃ jéin'₃ le₂jaun₂.

25 Jaun₂ quian'₅₄ dsa₂ i₂1jon₅₄ Pa₄, ca₂chen₃ juig₅₄ dsen₅₄ si₂ la₂ a₂juá'₂:

26 Jniá'₂, Claudio Lisias, tsíng₂ si₂ la₂ ne'₅₄ 'ne₂, gui'₅₄ Dsi₄má'₂ juin'₂ Fé₁. Cuíng₅ Diú₄ 'ne₂.

27 Ca₂jŋau'₃ dsa₂ judíos ca₂jŋai'₃ dsa₂ në₅, a₂jme₁jŋag'₃. La₁ jme₁ca₂rē₃guion₅₄ a₂lín₅ dsa₂

§ 23:23 lit. “hora 'ni₅ a₂'uě₂.”

tén₅ Roma, jaun₂ ca₂ɲeg₅₄ i₁lioin₁₂ quian'₅₄ 'lióg₂ quiáng₃.

28 Ia₁ jme₁'nio₃ le₃guion₅₄ 'e₂ 'uig₅₄ 'nag₅ dsa₂, jaun₂ ca₂i₁ɲiá₂ ne₄ dsi₂tan₅₄ quiáin₅.

29 Jaun₂ ca₂rē₃léi₄ jniá₂, 'uig₅₄ quió'₅ Si₂ 'Éi'₃ quió'₅ guion₅₄ bá₄ dsa₂, cué'₅ i₂nē₅ dso₄. Jaun₂ tsá₃ cha₂ 'e₂ lē₃ jua'₅₄ a₂'i₄ 'éi'₃ a₂ɲag'₃ dsa₂, on₃ guè'₂ dsi₂ten₅₄ jua'₅₄ a₂'í₂ 'né₅ 'má₃ ně₃.

30 Jaun₂ jme₁ca₂rē₃guion₅₄ a₂ma₂jmo₃ dsa₂ judíos caun₂ jág₁ a₂ɲag'₃, jaun₂ bá₄ lē₃ dsiain'₄ jniá₂ o₄gog'₂ 'ne₂. Jaun₂ ma₂juig₂ bá₄ jniá₂ ján₃, dsa₂ i₂'nag₅ 'ni₅ i₂nē₅, a₂dsi₃lén₂ ne'₅₄ 'ne₂, a₂dsi₃can₅ dso₄ a₂bóin'₂ i₂nē₅. Co₂nē₅ bá₄.

31 Jaun₂ 'lióg₂ ně₃, con'₂ lē₅ 'éi'₃ ma₂ɲi₂, ca₂dsein₂₃ Pa₄ ca₂tág₃ tē₃ 'uē₂ ca₂dsi₃lén₂ tē₂ juig₂ Antípatris.

32 Jme₁jnia₃ jaun₂, 'lióg₂ i₂i₃lén₂ jui₅ tag₄ ca₂jéin'₃ táng₃ jui₅, ja₂lein₃ táng₃. Jmá'₃ 'lióg₂ i₂co₁dsin₅₄ cua₁ bá₄ ca₂i₃lén₂ i₃jón₂ gué₄ Pa₄.

33 Jme₁ca₂dsi₃lén₂ tē₂ juig₂ Cesarea, jaun₂ ca₂jíin'₃ dsi₄má'₂ si₂ carta a₂quian₅. Ca₂jíin'₂ Pa₄ ně₃.

34 Jme₁ma₂nē₂'í₂ dsi₄má'₂ si₂, jaun₂ ca₂ɲii'₃ Pa₄ a₂já'₄ chain₂. Jme₁ca₂rē₃ɲi₅ a₂chan₂ 'éi₂ 'uē₃ Cilicia,

35 jaun₂ ca₂juá'₂:

—Nē₅ nag₅₄ jág₁ quiáng'₂ jē₁ma₂o₂lén₂ dsa₂ i₂'nag₅ quiáng'₂.

Jaun₂ ca₂jmo₃ dsi₄má'₂ 'éi'₃ a₂jmo₃ 'lióg₂ 'í₁ Pa₄ dsi₂néi₂ ne₄ta₁ palacio quió'₅ Rag₅₄ Herodes.

24

Ca₂jáng'₃ Pa₄ jág₁ dsau₅ a₂lióin₂ 'ɲiog₅ ne₄ Dsi₄má'₂ Fé₁

1 A₂'ŋiá₂ jmig₄ cang₂ jaun₂, ca₂dsióg₃ Ananías i₂lín₅ jme₂dsa₂ dsen₅₄, quiaín'₅₄ i₂lín₅₄ gui'₅₄ can'₅₄ ně₃, quiaín'₅₄ Tértulo i₂lín₅ i₂chén'₅ ne₄ jág₁ quiaín₅, ca₂dsi₃léin₂ Cesarea. Jaun₂ ca₂dsi₃léin₂ ne₄ dsi₄má'₂ a₂'ni₃ Pa₄.

2 Jme₁ca₂i₁quian₅₄ dsa₂ Pa₄, jaun₂ ca₂jme₃lióg₃ Tértulo ca₂tsí'₃ dsi₄má'₂ a₂'ni₂₃ Pa₄, ca₂juá'₂:

—Ti₁'mag'₄ 'ne₂, tei₄ bá₄ 'ei₅ tio'₅₄ jnia'₅₄, jaun₂ dse₃ bá₄ lia'₂ con'₂ lě₅ 'éi'₃ quiáng'₂ a₂ting'₂.

3 Jaun₂ con'₂ lě₅ 'éi'₃ qui'₂ 'ne₂ bá₄ qui₂jmo₅ dsa₂, a₂jmo₂ jnia'₅₄ ján₃. Jaun₂ cuē₂ jnia'₅₄ ti₁'mag'₄ 'ne₂, Fé₁ juin'₂.

4 La₁ jaun₂ tsá₃ uē₂ jme₁'ag₁₂ jnia'₅₄ quiáng'₂, mi₂ jnia'₅₄ jmó'₂ dse₃ 'au'₂ a₂nág'₁ jág₁ quián₂ jnia'₅₄ a₂juá'₅₄.

5 Ma₂ne₅₄ jnia'₅₄ ca₂le₃jě₃ 'e₂ 'lig'₅₄ jmo₅ dsa₂ ně₅, ŋi₂₃ ca₂le₃jě₃ juig₂ qui₂dsiain₂₃ mi'₅₄ dsa₂ judíos qui₂jmo₃ le₁dson'₅₄ dsa₂. Jaun₂ i₂ně₅ bá₄ lín₅ jan₂ dsa₂ i₂quian₅ ne₄ ju₅ quió'₅ co₂nió'₃ dsa₂ i₂tě'₂ dsa₂ nazarenos.

6 Jme₁'nio₃ jme₁jme₂'ióg₃ guá'₅ templo quián₂ jnia'₅₄. Jaun₂ bá₄ lě₃ ca₂chain'₅₄ jnia'₅₄, [jme₁'niog₂ jme₁qui₂dsi₂ 'éi'₃ con'₂ lě₅ Si₂ 'Éi'₃ quián₂ jnia'₅₄].

7 La₁ jme₁ca₂'í₃ juig₅₄ 'lióg₂ Lisias, ca₂jñiái'₂ Pa₄ jin₄ jnia'₅₄ quian'₅₄ bí₂ quió'₅ 'lióg₂ quiaín₅, a₂ca₂tág₃.

8 Ca₂juá'₂ Lisias 'éi₂ a₂'nió'₅ ja₃lén₂ dsa₂ i₂'nag₅ ne'₅₄ 'ne₂.]* Dse₃ ŋag'₅₄ 'ne₂ 'ñiag'₂ ia₁jaun₂ le₃ñi'₅₄ lia'₂ tí₅ jág₁ 'e₂ lě₃ 'ni₅ jnia'₅₄.

9 Jaun₂ ca₂le₃jín₃ guē₄ dsa₂ judíos i₂jme₁tión₂ ja₁jaun₂ ca₂juá'₂ a₂dsón'₂ dsau₅ bá₄ jág₁ ně₅.

* 24:8 A₂lin₅₄ chog₅₄ si₂ tsá₃ le₁ton₅ jág₁ a₂tio'₅₄ 'ñjó'₃ corchetes [le₂la₂].

10 Jaun₂ ca₂jmo₃ léi₄ dsi₄má'₂ ca₂tsí'₃ Pa₄ a₂juá'₂ 'éi₂ jág₁. Jaun₂ ca₂juá'₂ 'éi₂ jaun₂ ně₃:

—A₂'ňio₂ dsi₃ jáng'₄ jág₁ dsau₅ a₂long₅₄ 'ňió₃ ne'₅₄ 'ne₂, ia₁ guion₅₄ bá₄ jaun₂ a₂líng'₅ dsi₂tan₅₄ ma₂ne₁ňó₄ ňi₂ a₂qui₂dsí'₁ 'éi'₃ quió'₅ ta₁caun₂ 'uě₃ la₂.

11 Lé₂ bá₄ le₃caun'₅₄ jág₁ dsau₅, mei'₂ tsá₃ guia₃-tín₂jmig₄ bá₄ ma₂tě₂ a₂guang₃ Jerusalén a₂chi₁leng'₄ Diú₄.

12 Tsá₃ jua'₅₄ ca₂jo₃ dsa₂ a₂tsíng₂ quian'₅₄ dsa₂, on₃ guě'₂ jua'₅₄ a₂qui₂dsia₂₃ mi'₅₄ i₁ dsi₅ guá'₅ templo, on₃ guě'₂ dsi₂něi₂ guá'₅ sinagogas, on₃ guě'₂ jě₄ juig₂.

13 Tsá₃ qui'₅₄ jmig₄ i₂ně₅ jme₃jniai₂₃ ca₂le₃jě₃ a₂'nag₂₃.

14 La₁ a₂juá'₅ jniá'₂ ne'₅₄, a₂jme₂ti₅₄ ne₄ Diú₄ quián₅ dsa₂ can'₅₄, con'₂ lě₅ Jui₅ a₂juá'₂ i₂ně₅ a₂tsá₃ dsau₅, Ia₁ 'éng₂ ca₂le₃jě₃ a₂tio'₅₄ ne₄ Si₂ 'Éi'₃ quian'₅₄ Si₂ quió'₅ dsa₂ i₂jme'₁ě₂ jág₁ quián₅ Diú₄ ně₃.

15 Le₂jaun₂ bá₄ 'éng₂ le₃quió'₅ Diú₄, ju₁lia'₂ 'éin₂ guioin₅₄ bá₄ ján₃, ia₁ 'éng₂ a₂qui₂jen'₅₄ 'lag₄, lia'₂ dsa₂ dsen₃ lia'₂ dsa₂ 'lin'₅₄ ně₃.

16 'Ui₅₄ jaun₂, le₃jě₃ jmig₄ bá₄ quín'₅ jniá'₂ bí₂ a₂tsá₃ 'e₂ dsi₃jñi₅ dsi₃, lia'₂ ne₄ Diú₄ lia'₂ ne₄ dsa₂ mi₂güig₃ ně₃.

17 'Jme₁ca₂dsin₃ tin₃-'ni₅ ňi₂ a₂ňi₂₃ juig₂ siá'₂, ca₂guáng'₃ táng₃ Jerusalén a₂jme₁'ong₁₂ dsa₂ te₂ňé₂, a₂dsíng'₄ já'₂ ne₄ ne₄chei₂ ně₃.

18 A₂jaun₂ bá₄ 'eng₅₄ jmo₂₃ i₁ dsi₅ guá'₅ templo jme₁ma₂ně₂jmo₃ le₁jě₃ quió'₃ lia'₂ con'₂ lě₅ tag₄ chí'₅ quián₂ jnia'₅₄. La₁ on₃jua'₅₄ a₂jme₁tion'₅₄ dsa₂ juin₅, on₃ guě'₂ jua'₅₄ ca₂dsia₃ jniá'₂ mi'₅₄. Jaun₂ ca₂dsi₃lén₂

i₂lin₅₄ dsa₂ judíos i₂ja₂lén₂ juig₂ siá'₂ ja₁tén₄ 'uë₃ Asia.
I₂'éi₂ bá₄ ca₂jo₃ 'eng₅₄ i₁dsi₅ guá'₅ templo.

19 I₂'éi₂ bá₄ 'nió'₅ ja₃lén₂ ja₁lá₃ ia₁jaun₂ 'nag₃
chi₂jua'₂ cha₂ a₂'nag₃ jniá'₂.

20 Nē₁jua'₂ tsá₃ a₂cha₂ 'nag₃ 'éi₂, jaun₂ jui₁'nag₅₄
i₂tión₂ nē₅ chi₂jua'₂ cha₂ dso₄ ca₂'no₃ ja₁con₂
dsi₂tan₅₄ quián₅ dsa₂ judíos.

21 O₃ 'uig₅₄ jaun₂ 'e₂, ia₁ a₂'én₂ jniá'₂ ajen'₅₄ 'lag₄,
ju₁lia'₂ ca₂juá'₃ jniá'₂ tiá'₂ ca₂juig₂ 'éi₂ lia'₂ con'₂
jme₁'eng₅₄ jē₄ quió'₅, ca₂juig₂: “A₂cáun'₂ 'nia'₂ jág₁
dsau₅ quió'₃ jniá'₂, ia₁ a₂'éng₂ ajen'₅₄ 'lag₄.”

22 Jme₁ca₂nag₂ gui'₅₄ Dsi₄má'₂ Fé₁ le₂nē₅, jaun₂
tsá₃ ma₃'e₂ ca₂jme₃rē₃. Ia₁ jme₁ma₂η₁₅ rē₂ bá₄ i₂'e₂
jaun₂ a₂tē'₂ dsa₂ “Jui₅”. Jaun₂ ca₂juá'₂:

—Nē₅ bá₄ jme₁rē₂ jniá'₂ jág₁ nē₅ quián'₂ 'nia'₂,
jē₁ma₂guan₅ juig₅₄ 'lióg₂ dsen₅₄ Lisias.

23 Jaun₂ ca₂jmo₃ gui'₅₄ dsi₄má'₂ 'éi'₃ ca₂tsí'₃ juig₅₄
'lióg₂ quiáin₅ a₂toin'₂ Pa₄ né'₃ 'má₃. La₁ ca₂cuē₃ bá₄
jmig₄ lé₂ bá₄ dsi₃jag₅₄ a₂mei₅₄ quián₅ Pa₄ a₂jme₃'o₅₄
nē₁jua'₂ 'e₂ ca₂rē₃'nió'₅ quió'₅.

24 Jme₁ca₂dsin₃ tin₃'-ni₅ jmig₄ cang₂ jaun₂,
ca₂dsióg₃ táng₃ Fé₁ quiain'₅₄ 'io₅₄ quiáin₅ i₂chen₂
Drusila, i₂lín₅ judía. Jaun₂ ca₂jmo₃ Fé₁ 'éi'₃
ca₂i₁quian₅₄ dsa₂ Pa₄, jaun₂ ca₂nág₂ tē₂lia'₂ ca₂dsia₃
'éi₂ ju₁lia'₂ 'a₂ lia'₂ lē₅ a₂'éin₂ tē₂le₃ quió'₅ Cristo
Jesús.

25 La₁ jme₁ca₂dsia₃ Pa₄ a₂'nió'₅ cán₂ dsa₂ caun₂
ju₁₅ co₂dsau₅, a₂'nió'₅ jme₃'uán₂ dsa₂ dsí₅ 'ηiog₅;
jme₁ca₂dsia₃ Pa₄ a₂já₅ caun₂ jmig₄ a₂con₂ Diú₄
jág₁ dsau₅ quió'₅ le₂jan₂ le₂jan₂ dsa₂, jaun₂ guē₄
ca₂rē₃gó'₅ gui'₅₄ Fé₁. Jaun₂ ca₂juá'₂:

—Dse₃ bá₄ guang' táng₃ ja₁jme₁'eng'⁵⁴. Nē₅ bá₄ tē₄ táng₃ jmig₄ siá'₂ jē₁ma₂jing⁵⁴.

²⁶ Jme₁'ín₂ dsí₅ Fé₁ a₂jme₁jén'₃ Pa₄ cu₄ ia₁jaun₂ jme₁lió₂. Jaun₂ 'lióng₂ ráun₂ jme₁ca₂tē₃ a₂dsia₂₃ jág₁ quióng'⁵⁴.

²⁷ Tin₃ η₁₂ ca₂η₁₂ le₂jaun₂ jme₁ca₂o₃'ín₃ gui'⁵⁴ Fé₁ ta₁ a₂jme₁lín₄, a₂ca₂'í₃ táng₃ Porcio Festo. Jaun₂ lia'₂ ma₂'en⁵⁴ jaun₂ bá₄ Pa₄ né'₃ 'má₃ ca₂jmo₃ Fé₁, ia₁jaun₂ tē₃tsin'⁵⁴ dse₃ quian'⁵⁴ dsa₂ judíos.

25

Ca₂η₄ Pa₄ ne₄ Dsi₄má'₂ Festo

¹ Ma₂'ni₅ jmig₄ a₂ca₂gue₃ Festo ta₁ dsi₄má'₂, ca₂'u₁in₂ juig₂ Cesarea ca₂u₁ig₂ juig₂ Jerusalén.

² Ja₁jaun₂ ca₂jmo₃ jme₂dsa₂ dsen⁵⁴ quian'⁵⁴ ca₂le₃jín₃ juig⁵⁴ jme₂dsa₂ quián₅ dsa₂ judíos, ca₂mi₃ dso₄ ne₄ Festo a₂'ni₂₃ Pa₄.

³ Ján₃ bá₄ ca₂mi₃ a₂jmo₃ 'éi₂ dse₃ dsí₅, a₂jmo₃ 'éi'₃ a₂dsi₃quián₂ dsa₂ Pa₄ a₂dsi₃jó₂ juig₂ Jerusalén. Ia₁ a₂jme₁ma₂l'⁵⁴ jág₁ a₂jme₁jñi'₃ Pa₄ le₂'l₄ juí₅.

⁴ La₁ jaun₂ ca₂ηag₃ Festo a₂'ein⁵⁴ juí₅ dsáin'₃ ηi'⁵⁴ ta₁ tē₂ juig₂ Cesarea ja₁'en⁵⁴ Pa₄ né'₃ 'má₃.

⁵ Jaun₂ ca₂juá'₂:

—Juí₁ja₂lén₂ dsa₂ i₂lín₅ ta₁ quián'₂ 'nia'₂ quian'⁵⁴ jniá₂ juí₅ Cesarea, juí₁'nag₁₂ ja₁jaun₂ chi₂jua'₂ cha₂ a₂rín₂.

⁶ Jñia'⁵⁴ con'₂ jñia₃ o₃ guia₃ jmig₄ bá₄ ca₂'í₃ Festo Jerusalén, jaun₂ ca₂ηái'₃ Cesarea. Jme₁jñia₃ táng₃ jaun₂, ca₂i₁gua₂ ne₄ta₁ ja₁qui₂dsi₂₃ 'éi'₃, jaun₂ ca₂jmo₃ 'éi'₃ a₂ca₂l₁quian'⁵⁴ dsa₂ Pa₄.

7 Jme₁ca₂'í₃ Pa₄ dsi₂néi₂ ne₄ta₁, jaun₂ ca₂jme₃quián₃ dsa₂ judíos i₂ja₂lén₂ juig₂ Jerusalén. Jaun₂ 'líong₂ ne₅₄ dso₄ juë'₂ qui₂ca₂bóin'₂ Pa₄. La₁ tsá₃ ca₂tió'₃ jme₃jniai'₂₃ a₂dsón'₂ dsau₅ ca₂le₃jě₃ dso₄ a₂bóg'₂ jaun₂.

8 Jaun₂ ca₂jáng'₃ Pa₄ jág₁ dsau₅ a₂lióin₂ 'ŋiog₅, ca₂juá'₂:

—'I₁caun₂ dso₄ në₅ tsá₃ ma₂'no₃ jniá₂, on₃ guë'₂ jua'₅₄ a₂tsá₃ ma₂ca₂rě₃tei₅₄ con'₂ lě₅ Si₂ 'Éi'₃ quió'₅ dsa₂ judíos, on₃ guë'₂ le₃quió'₅ guá'₅ templo jua'₅₄ a₂ma₂'no₃ dso₄, on₃ guë'₂ jua'₅₄ a₂cha₂ dso₄ ma₂ca₂táng'₂ ja₁con₂ gui'₅₄ emperador romano.

9 La₁ia₁ jme₁'nio₃ Festo tē₃tsiin'₅₄ rě₂ quian'₅₄ dsa₂ judíos, jaun₂ ca₂ŋí'₃ Pa₄:

—ċ'Niog'₂ guang'₅₄ tē₂ juig₂ Jerusalén ia₁jaun₂ ja₁jaun₂ jme₁rě₂ jniá₂ quiáng'₂?

10 Jaun₂ ca₂ŋag₃ Pa₄:

—Jaun₂ guë'₂ ma₂chén'₅ jniá₂ ja₁lá₃ caun₂ ne₄ta₁ ja₁tén₄ gui'₅₄ emperador romano ja₁dsi₂ten₅₄ qui₃dsi₅ dsa₂ 'éi'₃ quió₃. Ia₁ rě₂ bá₄ ŋi'₅₄ 'ne₂, tsá₃ 'e₂ dso₄ rin₂ jniá₂ ja₁con₂ dsa₂ judíos.

11 Chi₂jua'₂ cha₂ guë'₂ dso₄ a₂ma₂'no₃, a₂ca₂tíng₂ jóng₂, jaun₂ guén₄ bá₄ jniá₂ 'mú₃ quió₃. La₁ chi₂jua'₂ tsá₃ dsau₅ dso₄ a₂bóg'₂ dsa₂ në₅, jaun₂ 'i₁jan₂ tsá₃ 'ein₂ ca₂tín₂ jua'₅₄ a₂jáng'₂ jniá₂ o₄gú₃ dsa₂ 'éi₂. Jaun₂ mi₅ jniá₂ nég'₄ ne₄ gui'₅₄ emperador, ia₁jaun₂ 'éi₂ qui₃dsi₅ 'éi'₃ ja₁cong₂.

12 Jme₁ca₂lě₃ dsia₅ Festo jág₁ quian'₅₄ dsa₂ i₂to'₂ jág₁ dse₃ quiáin₅, jaun₂ ca₂juá'₂ ca₂tsí'₃ Pa₄:

—Ia₁ ma₂ně₂mi'₅₄ guang'₅₄ ne₄ gui'₅₄ emperador, ne₄ 'éi₂ guang'₅₄ guë'₂ jaun₂.

Ma₂chén'⁵ Pa₄ ne₄ Rag₅₄ Agripa

13 Tin₃-ni₅ jmig₄ cang₂ jaun₂, ca₂dsióg₃ Rag₅₄ Agripa quiain'⁵⁴ Berenice ca_{2i1}lein₅₄ juig₂ Cesarea i₁cuin₃ Diú₄ Festo.

14 Ca₂tóin'² bá₄ tin₃-ni₅ jmig₄ ja₁jaun₂, jaun₂ ca₂dsia₃ Festo ca₂tsí'³ Rag₅₄ Agripa jág₁ jaun₂ quió'⁵ Pa₄. Jaun₂ ca₂juá'²:

—'En₅₄ jan₂ dsa₂ 'né₅ 'má₃ ja₁lá₃, i₂ca₂ton'² Fé₁.

15 Lia'² con'² jme₁'en₅₄ jniá₂ juig₂ Jerusalén, ca₂mi₃ dso₄ ne₃ jniá₂ juig₅₄ jme₂dsa₂ quián₅ dsa₂ judíos, dsa₂ can'⁵⁴ quiáin₅ ně₃, a₂'ni₂₃ dsa₂ 'éi₂, a₂jme₁mi₂₃ jme₁qui₁dsi₅ jniá₂ 'éi'³ quió'⁵, a₂'ě₄ uig₅ ně₃.

16 Jaun₂ bá₄ lě₃ ca₂ηag₄ jniá₂ ca₂juig₂: “Tsá₃ le₂jaun₂ tin₂ quió'⁵ dsi₂tan₅₄ romano jua'⁵⁴ qui₃dsi₅ 'éi'³ quió'⁵ jan₂ dsa₂, tě₃ tsá₃ ma₂ně₂jín₂ dsa₂ i₂qui₂'nag₅ quió'⁵, tě₃ tsá₃ ma₂cuin₅ jmig₄ lióin₃ 'e₂ dso₄ bóg'² dsa₂.”

17 Jaun₂ lě₃, jme₁ca₂o₃lén₂ ja₁lá₃, dsi₂jui₅ bá₄ ca_{2i1}gua₂ ne₄ta₁ quió'³ jme₁jnia₃ jaun₂, jaun₂ ca₂jmo₃ 'éi'³ ca_{2i1}quian₅₄ dsa₂ dsa₂ 'éi₂.

18 La₁ jme₁ca₂o₃lén₂ dsa₂ i₂'nag₅, tsá₃ 'e₂ dso₄ ca₂bóg'² dsa₂ ju₁lia'² dso₄ jme₁lín₂ jniá₂ a₂jme₁bóg'².

19 Jnia'⁵⁴ lia'² a₂jaun₂ bá₄ 'ni₂₃ 'éi₂ lia'² con'² lě₅ 'Éi'³ Juá'⁵ quió'⁵, ia₁ a₂juá'² 'iin₂₃ jan₂ i₂chen₂ Jesús i₂ca₂jon₃, jaun₂ juá'² Pa₄ i₂chan₂ bá₄ 'éi₂.

20 Ia₁ tsá₃ guion₅₄ 'a₂ lia'² jme₁rě₂ jág₁ jaun₂, jaun₂ bá₄ lě₃ ca₂juig₂ Pa₄ chi₂jua'² 'nio₃ dsó₃ ju₁₅ Jerusalén, ia₁jaun₂ qui₃dsi₅ dsa₂ 'éi'³ ja₁jaun₂.

21 La₁ 'niog₅ ně₃ ca₂mi₃ a₂qui₃dsi₅ 'éi'³ gui'⁵⁴ emperador Augusto, jaun₂ bá₄ lě₃ ca₂jmo₃ jniá₂ 'éi'³ lia'² ma₂'ein₅₄ ně₅ 'né₅ 'má₃, ca₂lia'² ca₂cuin₃ jmig₄ a₂tsiin₅₄ ne₄ gui'⁵⁴ emperador.

22 Jaun₂ ca₂juá'₂ gui'₅₄ Agripa ca₂tsí'₃ Festo:
—Ján₃ bá₄ 'nio₃ jniá'₂ nag₅₄ jág₁ quió'₅ dsa₂ 'éi₂.
Jaun₂ ca₂ḡag₃ táng₃ Festo:

—'Ióg₃ nág'₁ jág₁ quió'₅.

23 Jaun₂ jme₁jnia₃ jaun₂, ca₂dsióg₃ gui'₅₄ Agripa
quian'₅₄ Berenice. 'Nio₅ lín₃ jlá'₁ ca₂i₃toin'₅₄ dsi₂néi₂.
Ca₂dsi₃lén₂ juig₅₄ 'lióg₂ dsen₅₄, ca₂le₃jín₃ dsa₂ dsen₅₄
quián₅ juig₂ ca₂dsi₃lén₂. Jaun₂ ca₂jmo₃ Festo 'éi'₃
a₂ca₂i₁quian₅₄ dsa₂ Pa₄.

24 Jaun₂ ca₂juá'₂:

—'Ne₂ Rag₅₄ Agripa, ca₂le₃jín'₃ 'nia'₂ dsa₂ i₂le₁ḡi'₂
ja₁lá₃ quian'₅₄ jniá'₅₄, la₂ chén'₅ dsa₂ la₂. Ju₁n₅ dsa₂
judíos i₂chan₂ juig₂ Jerusalén, dsa₂ chan₂ juig₂ Ce-
sarea ja₁lá₃ ně₃, 'ni₁i₂₃ dsa₂ la₂. Jaun₂ ca₂le₃jě₃ jmig₄
tsá₃ cán₂ jág₁, a₂mi₂₃ jón₂ i₂ně₅.

25 La₁ con'₂ lín₂ jniá'₂, tsá₃ 'e₂ dso₄ riin₂ jua'₅₄
a₂dsi₂ten₅₄ jón₂. Ton'₂ mi₂₃ táng₃ 'ḡiog₅ a₂dsáin'₃ ne₄
gui'₅₄ emperador Augusto, jaun₂ lě₃ ma₂i₂jio₅ dsi₃
dsiain'₅₄ co₂ḡei'₅₄ ne₄ 'éi₂.

26 Ia₁ tsá₃ guion₅₄ 'e₂ jág₁ dsón'₂ tó'₄ ne₄ si₂
a₂juig₅₄ gui'₅₄ emperador a₂'nig₄ i₂ně₅. Jaun₂ bá₄ lě₃
i₂jñiá'₂ ne'₅₄ 'nia'₂, la₁ 'ḡio₅ dsen₅₄ guě₄ le₂'uig₅₄ ne'₅₄
'ne₂ gui'₅₄ Rag₅₄ Agripa, ia₁jaun₂ caun'₅₄ jág₁ dsau₅
quió'₅, ia₁jaun₂ cha₂ a₂tó'₄ ne₄ si₂ 'e₂ a₂rě₂cáin'₂.

27 Ia₁ tsá₃ dse₃ jniá'₂, lín₂ jniá'₂, jua'₅₄ a₂dsiang'₅₄
jan₂ dsa₂ chi₁'ḡei'₅₄ jua'₅₄ a₂tsá₃ juig₅₄ 'e₂ lě₃ 'nag₅
dsa₂.

26

Ca₂jáng'₃ Pablo jág₁ dsau₅ quió'₅ ne₄ Rag₅₄ Agripa

¹ Jaun₂ ca₂juá'₂ Rag₅₄ Agripa ca₂tsí'₃ Pa₄:

—Lé₂ bá₄ jua'₅₄ jág₁ a₂jang'₅₄ jág₁ dsau₅ o₄quiáng'₂ 'ŋiag'₂.

Jaun₂ ca₂chóg'₃ Pa₄ gu₂ ca₂jme₃lióg₃ ca₂juá'₂ le₂la₂:

² —Jmo₅ jniá'₂ dsi₃, 'e₂ bá₄ dsen₃ jniá'₂, a₂ma₂chéng'₅ ne'₅₄ 'ne₂ Rag₅₄ Agripa, a₂long₅₄, juig'₅₄ 'ne₂ 'a₂lia'₂ lě₅ ca₂le₃jě₃ dso₄ a₂bóg'₂ dsa₂ judíos jniá'₂.

³ Ia₁ ma₂ŋi'₅₄ bá₄ 'ne₂ co₂rě₂ 'a₂lia'₂ lě₅ tag₄ a₂chí'₅ quián₂ jnia'₅₄ dsa₂ judíos, quian'₅₄ jág₁ a₂tság₂ jnia'₅₄ jīn₄ rīn'₅₄ ně₃. Jaun₂ lě₃ mī₅ jniá'₂ ne'₅₄ a₂jmo'₂ juin'₂ 'au'₂ a₂nág'₁ jág₁ quió₃.

Ca₂dsia₃ Pablo, le₂la₂ bá₄ jme₁līn₄ né'₃ a₂jéin'₃ le₃quió'₅ Te₁gui'₅₄

⁴ Ca₂le₃jīn₃ bá₄ dsa₂ judíos le₁ŋi₅ 'a₂lia'₂ jme₁jmo₅ jniá'₂ juig₂ go₃ quian'₅₄ jě₄ juig₂ Jerusalén ně₃. Jaun₂ le₁ŋi₅ bá₄ dsa₂ 'a₂lia'₂ jme₁ŋi₅ jniá'₂ lia'₂ bīng'₅₄.

⁵ Le₁ŋi₅ 'éi₂ ján₃, jaun₂ lé₂ bá₄ jáng₃ jág₁ dsau₅ ně₁juá'₂ 'nio₃, lia'₂ con'₂ jme₁i₃juing'₂ bá₄, ma₂līn₅ bá₄ jniá'₂ dsa₂ fariseo. Jaun₂ jnia'₅₄ i₂jme₁lág₄ fariseos jme₁jme₂tí₁ guě₄ 'ŋio₅ līn₃ juá'₅ quián₂.

⁶ Ia₁ a₂'éng₂ a₂jme₃jen'₅₄ Diú₄ 'lag₄, ju₁lia'₂ lě₅ jág₁ quió'₅ ca₂cuě'₃ gui'₅₄ can'₅₄ quián₂ jnia'₅₄ ma₂líg'₂, 'uig₅₄ jaun₂ bá₄ a₂chéng'₅ ja₁láš₃, a₂con₂ dsa₂ jág₁ dsau₅ quió₃.

⁷ Ta₁guia₃-tīn₂ bá₄ cho'₅₄ tsi₁jon₂ dsa₂ juig₂ jnia'₅₄ jme₂juin'₂ Diú₄, jaun₂ lia'₂ 'uě₂-jmi₂ bá₄ jme₂ti₃ ta₁ ne₄ Diú₄ ia₁ le₁'īn₂ dsi₅ a₂jme₂ti₃ Diú₄ jág₁ jaun₂ quió'₅ ca₂cuě₃. 'Uig₅₄ jaun₂ bá₄ ně₃, 'ne₂ gui'₅₄ Rag₅₄ Agripa, 'uig₅₄ ia₁ a₂'īn₂ dsi₃ jniá'₂ le₂jaun₂ bá₄, a₂'nag₅ dsa₂ judíos jniá'₂.

⁸ ¿'E₂ 'uig₅₄ jmo'₂ 'nia'₂ 'au'₂ a₂tsá₃ qui'₅₄ Diú₄ jmig₄ jme₃jen'₅₄ 'lag₄?

Ca₂dsia₃ Pa₄ 'a₂ lia'₂ qui₂ca₂co₃'ein₃ quió'₅ dsa₂ quián₅ Jesús

⁹ 'Jniá₂ 'ñi₃, jme₁dsi₂jio₅ dsi₃ le₂jniá₅ jme₁jmo₅₄ 'lióng₂ ne₅₄ cosas a₂jme₁jmag'₅₄ dsa₂ quián₅ Jesús chan₂ Nazaret.

¹⁰ Jaun₂ le₂nē₅ ca₂jmo₃ jē₄ juig₂ Jerusalén. Quian'₅₄ 'éi'₃ ca₂cuē₃ juig₅₄ jme₂dsa₂, qui₂ca₂tong'₂ 'né₅ 'má₃ juin₅ lin₃ dsa₂ 'én₂. * Caun₂ bá₄ jág₁ jme₁lē₄ quió₃ quian'₅₄ dsa₂ i₂ca₂jme₃dsian₅ i₂lin₅₄ dsa₂ i₂'én₂ 'éi₂.

¹¹ 'Lióng₂ ráun₂ qui₂ca₂'ě₃ jniá₂ uig₅, ia₁jaun₂ jmo₃ tion₅₄ a₂tí₂ a₂'éin₂. Le₂jaun₂ bá₄ qui₂ca₂jmo₃ jniá₂ le₂tan₅₄ guá'₅ sinagogas, ca₂lia'₂ ca₂i₁'éin₄ le₂tan₅₄ juig₂ go₄ dsa₂ sián'₂ ně₃, ia₁ 'ñio₅ lin₃ jme₁'ñiai₅₄ jniá₂.

*Ca₂dsia₃ táng₃ Pa₄ 'a₂ lia'₂ ca₂lě₃ a₂ca₂jéin'₃
(Hechos 9:1-19; 22:6-16)*

¹² 'Ta₁ jaun₂ jme₁ñó₃ jniá₂ juí₅ Damasco ca₂chei₃ dsa₂ quian'₅₄ bí₂ 'éi'₃ ca₂cuē₃ juig₅₄ jme₂dsa₂ a₂jme₁i₂cháng'₃ dsa₂ 'én₂ i₂jme₁tion'₅₄ ja₁jaun₂.

¹³ La₁ lia'₂ con'₂ jme₁ñó₃ le₂'i₄ juí₅, 'ne₂ gui'₅₄ rag₅₄, con'₂ dsi₃ñí'₃ bá₄ jaun₂, ca₂jág₃ jniá₂ caun₂ si₂ a₂já₃ juí₅ guei'₅₄ i₂juíg₃, ca₂tág₃ le₃lág'₃ quió₃, quian'₅₄ dsa₂ i₂jme₁quiang'₅₄. 'Ñio₅ lin₃ guě₄ tág₅ con'₂ guě₄ 'iog₂.

¹⁴ Jaun₂ ca₂le₃jág₃ bá₄ jnia'₅₄ i₂gau'₅₄ 'uě₃ dsi₂juí₅ le₂jaun₂. Jaun₂ ca₂nag₃ caun₂ jág₁ ca₂juá'₂ dsa₂ quian'₅₄ jág₁ jmei₅ hebreo:† “Saulo, Saulo, ¿'e₂ lě₃ co₂'éin'₅ jniá₂? A₂jnia'₅₄ jmag'₅₄ uig₅ 'ñiag'₂ bá₄, jmo'₂ juí₁lia'₂ jmo₅ ca₁juí₅ quia'₂ 'uě₃ a₂jnú₅ nei'₅₄ ni₁'ma₂ chen'₂.”

¹⁵ Jaun₂ ca₂ñag₄ jniá₂: “¿'Ein₂ bá₄ 'ne₂, gui'₅₄?” Jaun₂ ca₂ñag₃ táng₃: “Jesús bá₄ jniá₂ i₂co₂'én'₅ 'ne₂.”

* 26:10 lit. “juin₅ lin₃ dsa₂ jñi₅.” † 26:14 o₃, arameo.

16 La₁ nau₂, chí'₂ tag'₅₄, ia₁ ně₂jme₁jniag₅ ne'₅₄ 'ne₂, ia₁ 'nio₃jme₁ti'₄ ta₁ ne₃, ia₁jaun₂jang'₅₄ jág₁ dsau₅ 'e₂ ně₂jag'₅₄ ně₃, quian'₅₄ a₂jag'₅₄ gué₄ cang₂ a₂jme₁jnia₅ jniá₂.

17 Tsin₅₄ jniá₂ 'ne₂, jaun₂ gog'₅₄ ja₁con₂ dsi₂nau₂, jaun₂ jmo₅₄ bá₄ jniá₂ 'í₁ 'ne₂ ia₁jaun₂ tsá₃ jmóg'₂ dsa₂ juig₂, on₃ gué'₂ dsi₂nau₂ ně₃.

18 Jaun₂ jui₅ ja₁con₂ dsa₂ 'éi₂ tsin₅₄ jniá₂ 'ne₂, ia₁jaun₂ le₃jnio₂ ne₄ dsa₂, ia₁jaun₂ 'u₁in₃ jě₄ qui₁né'₃, qui₃jéin'₃ ne₅₄ ja₁tág₅ si₂; ia₁jaun₂ tsá₃ lě₅ jua'₅₄ tioin'₅₄ gué₄ 'éi'₃ quió'₅ Satanás, ia₁jaun₂ dsi₁lein₃ ja₁con₂ Diú₄, dsi₃'én₂ bá₄ dsáu₁, ia₁jaun₂ gue₃ ju₁lia'₂ a₂ca₂tín₂ dsa₂ i₂lě₅ 'í₁ quián₅ Diú₄, 'uig₅₄ ia₁ a₂'éin₂ le₃quió₃ jniá₂.”

Ca₂jme₃ti₃ Pa₄ a₂ca₂jág₃ jaun₂

19 'Jaun₂ le₂ně₅ bá₄, 'ne₂ gui'₅₄ Rag₅₄ Agripa, tsá₃ jua'₅₄ a₂tsá₃ ca₂jme₁ti₁₂ con'₂ lě₅ a₂ca₂jág₃ a₂já₃ guei'₅₄.

20 Jaun₂ lě₃, jě₄ juig₂ Damasco ca₂'ě₃ le₂'uig₅₄ jág₁ dse₃. Jaun₂ gué₄ ca₂neg₅₄ jui₅ Jerusalén, le₂tan₅₄ juig₂ ja₁tén₄ 'uě₃ Judea ně₃. Ján₃ bá₄ ca₂neg₅₄ jin₄ dsi₂nau₂, ca₂i₁chei₁₂ a₂'nió'₅ dsi₃quén'₅ dsí₅, jéin'₃ le₃quió'₅ Diú₄, a₂jme₃li₅₄ a₂ma₂ca₂rě₃tsin₃ dsí₅ tē₂le₃ quian'₅₄ ca₂le₃jě₃ a₂jmo₂₃.

21 'Uig₅₄ jaun₂ bá₄ a₂ca₂jñau'₃ dsa₂ judíos jniá₂ i₁dsi₅ guá'₅ templo a₂jme₁'nio₃ jme₁jñag'₃.

22 La₁ Diú₄ bá₄ jme₂'o₅₄ cuē₂₃ bí₂ a₂chan'₅₄ tiá₂ jág₁ quió'₅ ca₂tě₂ jmig₄ ně₃, qui₂jáng'₅ jág₁ dsau₅ a₂juig₂ lia'₂ dsa₂ dsen₅₄ lia'₂ dsa₂ lě₁dsa₂ ně₃. 'I₁caun₂ jág₁ siá'₂ tsá₃ juig₂ jniá₂ dsa₂, jñia'₅₄ con'₂ lě₅ jág₁ ca₂juá'₂

dsa₂ i₂jme₁'ě₂ jág₁ quián₅ Diú₄ ma₂líg'₂, quian'₅₄
a₂ca₂juá'₂ Moisés, jme₁ca₂juá'₂ ca₂le₃jě₃ 'e₂ niog₅ lé₂,

²³ co₂'nió'₄ a₂tion₅₄ 'nió'₅ nág₃ uig₅ I₂rě₂'ín₁ quián₅
Diú₄; jaun₂ 'éi₂ bá₄ lén₂ i₂le₂'uig₅₄ i₂jen'₅₄ jin₄ 'lag₄,
ia₁jaun₂ dsi₃'ě₃ jág₁ dse₃ a₂lión₂ dsa₂, jui₁lia'₂ caun₂
si₂ a₂tág₅ lia'₂ jin₄ dsa₂ juig₂ quián₂ jnia'₅₄, lia'₂ jin₄
dsi₂nau₂ ně₃.

*Ca₂jmo₃ Pa₄ bí₂ a₂jme₁le₂'én₂ Rag₅₄ Agripa tē₂le₃
quió'₅ Jesús*

²⁴ Jme₁ca₂juá'₂ Pa₄ jág₁ jaun₂ a₂jme₁lióin₂ 'niog₅
ne₄ dsi₂tan₅₄, jaun₂ ca₂guió'₃ Dsi₄má'₂ Festo ca₂juá'₂:

—₁A₂lě₁tě₂'i'₂ bá₄ 'ne₂, Pa₄! Ia₁ a₂ñí₄ lě₃ 'i'₂ si₂, jaun₂
ma₂ca₂rě₃nág'₅.

²⁵ Jaun₂ ca₂nag₃ táng₃ Pa₄:

—Tsá₃ nág₅ jniá₂, 'ne₂ gui'₅₄ Dsi₄má'₂ Festo. Jág₁
dsau₅ dsón'₂ bá₄ a₂juá'₅ jniá₂ la₂.

²⁶ La₂ bá₄ guá₅ gui'₅₄ Rag₅₄ Agripa i₂cuí'₅ dse₃ 'a₂
lia'₂ lě₅ jág₁ ně₅. A₂jaun₂ bá₄ lě₃ tiá₂ dsi₃ a₂juá'₅ ne₅₄,
ia₁ dsón'₂ ni₅ ca₂le₃jě₃ jág₁ ně₅, ia₁ on₃jua'₅₄ a₂ca₂lě₃
caun₂ ja₁quióng₄ con'₂ tē₃co'₅₄.

²⁷ ¿'Én'₂ 'ne₂ gui'₅₄ Rag₅₄ Agripa jág₁ a₂ca₂juá'₂ dsa₂
i₂jme₁'ě₂ jág₁ quián₅ Diú₄? Guion₄ bá₄ jniá₂ a₂'én'₂
'ne₂.

²⁸ Jaun₂ ca₂nag₃ Rag₅₄ Agripa:

—Ca₂juig₄ mei'₂ tsá₃ jme₂'uang'₅₄ dsi₃ a₂lěng₂ jan₂
dsa₂ cristiano.

²⁹ Jaun₂ ca₂juá'₂ táng₃ Pa₄:

—Chi₂jua'₂ ca₂juig₄ o₃ tsá₃ ca₂juig₄ 'e₂, 'e₂ guě₄
dse₃ ně₁jua'₂ jmo₃ Diú₄ on₃jua'₅₄ jmá'₃ 'ne₂, ján₃ bá₄
le₂jaun₂ ca₂le₃jin₃ dsa₂ i₂nag₅ jág₁ quió₃ ně₃, a₂lěin₂
jui₁lia'₂ lín₅ jniá₂, o₁jnia'₅₄ guě₄ on₃jua'₅₄ quian'₅₄
ni₁ñí₁ cadena jui₁lia'₂ chén'₅ jniá₂ la₂.

30 Jme₁ma₂ca₂lë₃ juá'₂ Pa₄ le₂jaun₂, ca₂nau₂ Rag₅₄ Agripa quian'₅₄ Dsi₄má'₂ Festo, 'io₅₄ Berenice ně₃, ca₂'ui_{in}₂ co₂lë₅ quia_{in}'₅₄ ca₂le₃jín₃ guë₄ dsa₂ i₂jme₁tion'₅₄.

31 Con'₂ ca₂i₃lén₂ cau₅, ca₂i₁dsia₂ 'a₂ lia'₂ jmo₃ jág₁ jaun₂ quió'₅ Pa₄, jaun₂ ca₂juá'₂ ca₂tsí'₃ rñin'₅₄:

—'I₁ca₂juig₄ tsá₃ 'e₂ ma₂jmo₃ dsa₂ ně₅, jua'₅₄ a₂ca₂tín₂ 'i₄ 'éi'₃ jóin₂, on₃ guë'₂ jua'₅₄ a₂dsi₂ten₅₄ 'ein₅₄ né'₃ 'má₃ ně₃.

32 Jaun₂ ca₂juá'₂ Rag₅₄ Agripa ca₂tsí'₃ Dsi₄má'₂ Festo:

—Jme₁lé₂ bá₄ jme₁lión₂ dsa₂ ně₅, jua'₅₄ mei'₂ guë₃ tsá₃ ca₂mi₃ 'ñiog₅ a₂jme₃rë₃ gui'₅₄ emperador jág₁ quió'₅.

27

Ca₂dsián'₂ dsa₂ Pa₄ juí₅ Roma

1 Jme₁ca₂jmo₃ dsa₂ jág₁ a₂chei₃ jnia'₅₄ juí₅ 'uë₃ Italia, jaun₂ Pa₄ quian'₅₄ guë₄ dsa₂ i₂le₁'ñe'₅₄ rñin'₅₄ ca₂jáng'₂ dsa₂ o₄gú₃ jan₂ juig₅₄ 'lióg₂ i₂chen₂ Julio, i₂tén₅ tē₂le₃ quió'₅ co₂nió'₃ 'lióg₂ i₂tē'₂ dsa₂ quián₅ Augusto.

2 Jaun₂ ca₂tió'₄ jnia'₅₄ caun₂ ni₁barco a₂já₃ juí₅ 'o₄ jmi₁ñí'₄ ja₁chei₂ Adramitio a₂jme₁ma₂chí'₅ dsáu'₃ juí₅ 'o₄ jmi₁ñí'₄ a₂niog₅ 'uë₃ Asia. Jme₁quian'₅₄ jnia'₅₄ Aristarco dsa₂ chan₂ Tesalónica, juig₂ tén₅ 'uë₃ Macedonia.

3 Jme₁jnia₃ táng₃ jaun₂, ca₂dsi₃náu₅ jnia'₅₄ 'o₄ jmi₁ñí'₄ juig₂ Sidón. Ja₁jaun₂ ca₂dsia₃ néi₂ dsí₅ Julio ja₁con₂ Pa₄, ca₂cuë₃ bá₄ jmig₄ ca₂i₁jñin₁₂ a₂mei₅₄ quián₅, ia₁jaun₂ jme₃'o₅₄ 'éi₂ 'e₂ a₂'nió'₅ quió'₅.

4 Jme₁ca₂'uag₂ jnia'₅₄ juig₂ Sidón, ca₂i₃náu₅ jnia'₅₄ juí₅ ja₁jniá'₂ Chipre të₂le₃ gu₂ jen₅, ia₁ të₂le₃ siá'₂ bá₄ jme₁'ei₅ dsí₂.

5 Jaun₂ ca₂ḡag₅₄ jnia'₅₄ jmi₁ḡí'₄ chei'₅₄ 'uë₃ Cilicia quian'₅₄ Panfilia. Jaun₂ dsi₃náu₅ jnia'₅₄ ja₁chei₂ Mira, juig₂ tén₅ 'uë₃ Licia.

6 Ja₁jaun₂ ca₂dsó'₂ juig₅₄ 'lióg₂ caun₂ ni₁barco já₃ juig₂ Alejandría, a₂ma₂'i₄ juí₅ dsáu'₅ juí₅ Italia. Jaun₂ ca₂jmo₃ 'éi'₃ ca₂tió'₄ jnia'₅₄ ni₁barco, jaun₂ ca₂i₃náu₅ táng₃.

7 'Lióng₂ jmig₄ ca₂tió'₄ jnia'₅₄ ni₁barco, ia₁ a₂i₃náu₅ të₂'ua₁. Jaun₂ të₃ quian₅ ta₁ le₂jaun₂ bá₄ dsi₃náu₅ ja₁chei₂ Gnido. Ia₁ lia'₂ ma₂'ei₅ jaun₂ bá₄ dsí₂ le₃siá'₂, jaun₂ ca₂ḡag₅₄ jnia'₅₄ cau₅ ja₁chei₂ Salmón, ca₂i₁jein'₅₄ le₃ja₁chei₂ Creta, 'uë₃ 'i₄ jë₄ jmi₁ḡí'₄.

8 Jaun₂ të₃ quian₅ ta₁ le₂jaun₂ bá₄ ca₂dsi₃náu₅ jnia'₅₄ ja₁të'₂ dsa₂ 'O₄ Jmi₁ḡí'₄ Dse₃, ja₁ma₂quián₅ juig₂ Lasea.

9 'Lióng₂ jmig₄ ca₂rë'₃ag₄ jnia'₅₄. Ma₂të₂ jein₂ a₂ma₂go'₂ i₃nio₄ dsa₂ juí₅ ne₄ jmi₁ḡí'₄, ia₁ a₂ma₂ja₂quián₃ jein₂ güí₂. Jaun₂ lë₃, jme₁ca₂juá'₂ Pa₄ ca₂tsí'₃ dsa₂:

10 —'Nia'₂ dsa₂, já₃g₅ jniá'₂ 'ḡio₅ ma₂go'₂ quián₂ jniog₄ të₂le₃ ja₁dsau₅₄ në₅, ia₁ dsi₃'én₂ ni₁barco, lio₅₄ në₃, ca₂të₂ guio₅₄ jniog₄ go'₂ dsióg₃ në₁jua'₂ 'e₂ ca₂lë₃.

11 La₁ juig₅₄ 'lióg₂ në₃, tsá₃ juí₅ ca₂tón'₃ já₃g₁ jaun₂ quió'₅ Pa₄. Ca₂tón'₃ bá₄ juí₅ já₃g₁ quió'₅ dsa₂ juig₅₄ ni₁barco quian'₅₄ dsa₂ i₂quian₄ ni₁barco në₃.

12 Ia₁ tsá₃ dse₃ 'O₄ jmi₁ḡí'₄ jaun₂ jua'₅₄ a₂jḡia₃ dsa₂ jein₂ güí₂ ja₁jaun₂, jaun₂ mei'₂ tsá₃ ca₂le₃jín₃ dsa₂ ca₂jmo₃ já₃g₁ a₂jme₁dsi₁náu₄ juí₅ ja₁tág'₄ juig₂ Fenice, caun₂ 'O₄ jmi₁ḡí'₄ quió'₅ Creta ja₁jniá'₂ të₂le₃

noroeste quian'⁵⁴ tē₂le₃ suroeste, ia₁jaun₂ dsi₁njia₁ jnia'⁵⁴ ja₁jaun₂ tē₁lia'₂ ηag₅ jein₂ güig₂.

Ca₂'ág₂ dsi₂ tiá₂ lin₃ ne₄ jmi₁ηí'₄

¹³ Jaun₂ ca₂jme₃lióg₃ ca₂'ág₂ dsi₂ 'ua₁ a₂já₃ tē₂le₃ sur. Jaun₂ caun₂ lé₂ dsi₃léin₂ bá₄ líin₂. Jaun₂ ca₂'u_{in}₂ jaun₂ ně₃, ca₂i₃léin₂ jui₅ ma₂quián₅ chei'⁵⁴ 'uē₃ Creta.

¹⁴ La₁ jme₁co₂lág₂ jaun₂, ca₂já₃ dsi₂ tiá₂ lin₃ a₂chei₂ Nordecte ca₂tē₂ ni₁barco.

¹⁵ Jaun₂ ca₂jio_g₃ dsi₂ le₃siá'₂ quió'⁵ ni₁barco, ia₁ tsá₃ ma₃lé₂ jua'⁵⁴ dsau⁵⁴ jnia'⁵⁴ co₂dsau⁵, jaun₂ co₂ηei'⁵⁴ ca₂cuē₁ jnia'⁵⁴ jmig₄ a₂jio_g₃ dsi₂.

¹⁶ Jaun₂ ca₂ηag⁵⁴ jnia'⁵⁴ le₃co'⁵⁴ caun₂ 'uē₃ pí'₁ ja₁chei₂ Cauda* a₂niog₅ jē₄ jmi₁ηí'₄. Ja₁jaun₂ tsá₃ lin₄ ma₃'ei₅ dsi₂ tiá₂, jaun₂ tē₃ quian₅ ta₁ le₂jaun₂, ja₂lag₃ bá₄ ca₂tián₃ jnia'⁵⁴ a₂ca₂quiong⁵⁴ táng₃ tsi₁mu₅ a₂jme₁le₁'in₁ le₃chi₁co'⁵⁴.

¹⁷ Jme₁ca₂lě₃ ca₂tó'₂ dsa₂ tsi₁mu₅ guei'⁵⁴ 'ηi₃ó'₃ ni₁barco, jaun₂ qui₂ca₂'néi₂ dsa₂ dse₃ ni₁barco quian'⁵⁴ tsi₁'nei₅₄ ia₁jaun₂ jmo₃ bēn₂ guē₄. Jaun₂ ia₁ jme₁g₅' dsa₂ a₂'í₂ ni₁barco ne₄ ti₁tsag₁ ja₁tē'₂ dsa₂ Sirte, jaun₂ ca₂sió₂ tsi₁'mi'₂ quió'⁵ ni₁barco, jaun₂ ca₂cuē₃ jmig₄ a₂jio_g₃ dsi₂.

¹⁸ Jme₁jnia₃ jaun₂, ia₁ tiá₂ bá₄ guē₄ 'ei₅ dsi₂, jaun₂ ca₂jme₃lióg₃ qui₂ca₂tó'₂ lio⁵⁴ ne₄ jmi₁ηí'₄.

¹⁹ Jme₁ca₂tē₂ 'ni₅ jmig₄, jaun₂ guio⁵⁴ jnia'⁵⁴ quian'⁵⁴ gu₂ qui₂ca₂tio'⁵⁴ dsi₂jmig₂ le₂jio_g₅ a₂jmó'₂ ta₁ ni₁barco 'ηiog₅.

²⁰ 'Lióng₂ jmig₄ tsá₃ ma₃ca₂jnia₃ 'iog₂, on₃ guē'₂ nei₅ ně₃. Tsá₃ ma₃lág₂ jnia'⁵⁴ jua'⁵⁴ a₂tág'₄ guē₄, ia₁ a₂ηí₄ lě₃ tiá₂ jme₁'ei₅ dsi₂.

* **27:16** A₂lin₅₄ chog₅₄ si₂: "Clauda."

21 Ia₁ ma₂ne₁ŋó₄ 'lióng₂ jmíg₄ tsá₃ ma₃'ein₂ jnia'₅₄ guě'₅, jaun₂ ca₂nau₂ Pa₄ jë₄ quió'₅ dsa₂ 'éi₂, jaun₂ ca₂juá'₂:

—'Nia'₂ dsa₂, dse₃ jua'₅₄ co₂ŋei'₅₄ ca₂tion'₂ bá₄ 'nia'₂ juí₅ jág₁ quió₃ a₂tsá₃ jme₁'uág₃ Creta. Jnia'₅₄ ca₂l₃'én₂ bá₄ quián₂, ton'₂ ca₂ŋag₅₄ rë'₂ uig₅ ně₃.

22 La₁ ně₃ ně₃, quen'₂ 'nia'₂ bí₂, ia₁ 'i₁jan'₂ 'nia'₂ tsá₃ 'ein₂ dsián₃, o₁jnia'₅₄ dsi₃'én₂ ni₁barco.

23 Ia₁ a₂'uë₂ la₂ ně₂jme₃jnia₅ jan₂ ángel ne₃, i₂chen₄ quián₅ Diú₄ i₂jme₂tí₁ jniá₂ ne₅₄.

24 Jaun₂ ně₂juá'₂ ángel ně₂chéi₃ jniá₂: “Tsá₃ lë₁jmo₂ gang'₃ Pa₄, ia₁ tion₅₄ niog₅ bá₄ gog'₅₄ a₂jme₁jniag'₂ ne₄ gui'₅₄ emperador romano. 'Uig₅₄ quián'₂ 'ne₂ bá₄ a₂lión₂ Diú₄ ca₂le₃jín₃ dsa₂ i₂quiang'₅₄ 'ŋió₃ barco, tsá₃ ma₃dsián₃.”

25 Jaun₂ lë₃, 'nia'₂ rin'₅₄ jniog₄, quen'₂ 'nia'₂ bí₂, tsá₃ jmo₂ 'nia'₂ o₂i₁ dsi₅. Ia₁ dsón'₂ bá₄ 'én₂ jniá₂ tē₂le₃ quió'₅ Diú₄ a₂tion₅₄ jmo₃ con'₂ lë₅ jág₁ a₂ně₂juá'₂ ángel ně₂chéi₂ jniá₂.

26 La₁ tion₅₄ niog₅ dsi₁tió'₄ bá₄ jniog₄ caun₂ 'uë₃ dsi₂jo₂ jmi₁ŋí'₄.

27 Caun₂ 'uë₂ jme₁ma₂tě₂ tin₃ semanas a₂tio'₅₄ jnia'₅₄ juí₅, lia'₂ ma₂jiog₅ jaun₂ bá₄ dsí₂ ne₄ Jmi₁ŋí'₄ Adria,† jme₁ca₂rë₃lí'₄ dsa₂ i₂quian₅ ni₁barco con'₂ dsi₃nei₅ jaun₂, a₂ja₂quián₃ dsi₁lén₂ 'uë₃.

28 Jaun₂ ca₂can₃ dsa₂ 'éi'₃ 'a₂ con'₂ jí'₂ guě₄ jmíg₂. Jme₁ca₂jág₃ dsa₂, con'₂ guióg₂-guiá₂-jŋéi₂ (36) metros bá₄ jí'₂ guě₄. Ca₂juig₄ guě₄ le₃cau₅ jaun₂ ca₂can₃ táng₃ dsa₂ 'éi'₃. Jme₁ca₂jág₃ táng₃, guióg₂-guio₃ (27) metros bá₄ tí₅ guě₄ jí'₂.

† 27:27 o₃, “Jmi₁ŋí'₄ Mediterráneo.”

29 Ia₁ a₂gó'₅ dsa₂ jná'₃ ni₁barco con'₂ tiá'₂ dso'₂ ni₁cang₁ 'lau₂, jaun₂ ca₂sió'₂ le₃chi₁co'₅₄ ni₁barco quén₂ ni₁ñí'₁ 'lá'₁ guei₂ quian'₅₄ tsi₁'nei₅₄ juí₅ né'₃ jmi₁ñí'₄. Të₃ tion'₅₄ dsa₂ gó'₅ le₂jaun₂, qui₂ca₂chi₃léin'₂ Diú₄ a₂jnia₃.

30 Të₁lia'₂ jaun₂, jme₁ma₂dsi₂jio₅ dsí'₅ dsa₂ i₂quian₅ ni₁barco a₂jme₁cuing₃. Qui₂ca₂sió'₂ tsi₁mu₅ ne₄ jmi₁ñí'₄, a₂jmo₂₃ juí₁lia'₂ a₂tioin'₅₄ tó'₅ ni₁ñí'₁ guei₂ të₂le₃ ne₄ ni₁barco.

31 La₁ jaun₂ ca₂juá'₂ Pa₄ ca₂tsí'₃ juig₅₄ 'lióg₂ quian'₅₄ ca₂le₃jín₃ gué'₄ 'lióg₂ ně₃, ca₂juá'₂:

—Në₁juá'₂ tsá₃ jnia₅ i₂në₅ 'ñió'₃ ni₁barco, tsá₃ jaun₂ lión'₂ 'nia'₂.

32 Jaun₂ qui₂ca₂ti₃ 'lióg₂ 'nei₅₄ a₂jme₁chi₁quian₅ tsi₁mu₅, ca₂tá'₂ jaun₂ ně₃ ne₄ jmi₂g₂.

33 Të₂ o₃ 'iog₂ lin₃, ca₂juá'₂ Pa₄ ca₂tsí'₃ ca₂le₃jín₃ dsa₂ a₂'nió'₅ gué'₃. Jaun₂ ca₂juá'₂:

—Ma₂të₂ tin₃ semanas a₂tsá₃ ma₂güin'₂ 'nia'₂ on₃ gué'₂ ma₂qué'₂.

34 Jaun₂ lë₃ juá'₅ jniá'₂, qué'₂ 'nia'₂ ca₂la₂. Tion₅₄ 'nió'₅ qué'₅₄ 'nia'₂ ia₁jaun₂ bá₄ lión'₂ 'nia'₂. 'I₁jan₂ jniog₄ tsá₃ 'ein₂ dsi₂'én₂ ja₁lá₃. Ca₂lia'₂ jnia'₅₄ ca₂mi'₂ jñi₂ dsi₄ jniog₄ tsá₃ 'e₂ dsi₃'én₂.

35 Dsi₂juí₅ jme₁ca₂juá'₂ Pa₄ le₂në₅, ca₂can₃ i₁ñí'₄ jaun₂ ca₂cué'₃ ti₁'mag'₄ Diú₄ të₃ jág₅ dsa₂ ca₂le₃jín₃. Jaun₂ ca₂dsion₃ Pa₄ i₁ñí'₄ ca₂gué'₃ jaun₂ ně₃.

36 Jaun₂ ca₂le₃jín₃ dsa₂ ca₂tiin'₃ táng₃ bí₂ jme₁ma₂në₂gué'₃.

37 Ca₂le₃jág₃ jnia'₅₄ con'₂ jme₁tio'₅₄ ni₁barco jme₁téi₄ tin₃ 'ñiá₂-lón₂ rë₂dsí₂ 'nag'₂ co₂ne₂guióg₂ rë₂dsí₂ guia₃-jñé₂ (276) dsa₂.

38 Jme₁ca₂lí₃ guě₅ dsa₂ con₂' jme₁'nio₃, jaun₂ ca₂guia₃ lío₅₄ trigo ne₄ jmi₁ñí₄' ia₁jaun₂ sión₂' guě₄ guei₂ ni₁barco.

Ca₂i₃guen₅₄ ni₁barco né₃ jmi₁ñí₄'

39 Jme₁jnia₃ jaun₂, dsa₂ i₂quian₅ ni₁barco tsá₃ ca₂rě₃cuí₅' 'uě₃ jaun₂. La₁ jaun₂ ca₂jág₃ caun₂ dsiog₅ jmi₁ñí₄' a₂nio₅ jě₄' 'uě₃, ja₁'ei₅ tei₄ guě₄ jmi₁g₂. Chei₅₄ jaun₂ tio₅₄' 'lióng₂ ti₁tsag₁ ja₁lě₄ jo₂ guě₄. Jaun₂ ca₂'náu₃ dsí₅ chi₂jua₂' lé₂ jñióg₃' ni₁barco ca₂tě₂ jaun₂.

40 Jaun₂ ca₂ti₃ 'nei₅₄ a₂jme₁le₁quian₅ ni₁ñí₁' 'lá₁. Né₃' jmi₁ñí₄' jaun₂ bá₄ ca₂tí₂ dsa₂ ni₁ñí₁ jaun₂. Qui₂ca₂jiá₂' dsa₂ 'ma₂ a₂jmo₅ dsó₃ ni₁barco 'a₂ jui₅ 'nio₃ dsa₂. Jaun₂ ca₂chóg₃' tsí₁'mi₂' le₃ne₄ jui₅ quió₅' ni₁barco, ia₁jaun₂ tě₃ dsí₂. Jaun₂ dsi₂jui₅ bá₄ ca₂jme₃lióg₃ ca₂ñi₃ ni₁barco ca₂jme₃quián₃ le₃chei₅₄' 'uě₃ ja₁lě₄ ti₁tsag₁.

41 La₁ jui₅ ja₁ñó₃ ni₁barco jaun₂ ca₂dsi₃quén₅' caun₂ ja₁lě₄ tin₃ ne₅₄ la₅₄' ja₁'ei₅ tiá₂ jmi₁g₂. Tě₂le₃ ja₁lě₄ le₃ne₄ jui₅ quió₅' ni₁barco ca₂i₃'ó₅' jě₄ ti₁tsag₁, ca₂quí₃' tiá₂ lín₃, ca₂lia₂' tsá₃ ma₃ca₂tió₃' dsa₂ dsí₃. Jaun₂ le₃ja₁lě₄ le₃chi₁co₅₄' qui₂ca₂juin₃, ia₁ a₂ñí₄ lě₃ tiá₂ qui₂jná₅' jmi₁ñí₄'.

42 Jme₁'nio₃ 'lióg₂ jme₃dsiain₂₃ dsa₂ i₂nio₅ gu₂' 'éi₂ ia₁jaun₂ tsá₃ lióin₂ jě₁ma₂qui₂ca₂'ain₂ jmi₁g₂.

43 La₁ tsá₃ ca₂cuě₃ jmi₁g₄ jui₅g₅₄, ia₁ 'nio₃ lióin₂ Pa₄. Jaun₂ ca₂jmo₃ 'éi₃ ca₂tsí₃' ca₂le₃jín₃ dsa₂ i₂tin₂ qui₃dsi₅ jmi₁g₂, ju₁tióin₅₄ jmi₁g₂ le₂'uig₅₄ ia₁jaun₂ tñin₄' 'uě₃;

44 dsa₂ sián'₂ guě₄ ně₃, jui'₁ain₅₄ jmi_g₂ le₁chan'₂
 jau₅₄ 'ma₂, O₃ ni₁'nau₅₄ quió'₅ ni₁barco 'e₂. Le₂jaun₂
 bá₄ ca₂lě₃ qui₂ca₂ló₂ jnia'₅₄ a₂ca₂tág'₃ táng₃ 'uě₃.

28

'En₅₄ Pablo 'uě₃ Malta a₂niog₅ jě₄ jmi₁ńí'₄

1 Jme₁ma₂ca₂ló₂ jnia'₅₄ ca₂le₃jág₃, jaun₂ guě₄
 ca₂rě₃ne₄ jnia'₅₄ a₂chei₂ Malta 'uě₃ jaun₂, a₂niog₅ jě₄
 jmi₁ńí'₄.

2 Dsa₂ chan₂ ja₁jaun₂ ca₂jmo₃ bá₄ dse₃ dsí₅ ja₁con₂
 jnia'₅₄. Ca₂dsia₃ dsa₂ si₂ pa₁ jaun₂ ca₂tě₃ jnia'₅₄
 a₂jme₁dsion'₂, ia₁ a₂ńí₄ lě₃ gúí_g₂, dsó₅ jmí₅ ně₃.

3 Pa₄ guě'₂ ně₃ qui₂ca₂cág'₃ ni₁'ma₂ quein₂. Lia'₂
 con'₂ jme₁'ein₅₄ tó'₅ dsi₂si₂, con'₂ tsá₃ jáin₅ ca₂O₃'ín₃
 jan₂ dsi₂mi'₂ a₂cuíng₂₃ jme₁ca₂'ě'₂ dséi₂ quió'₅,
 ca₂chi₃dséin₂ mi₂gu₂ Pa₄.

4 Jme₁ca₂jág₃ dsa₂ chan₂ ja₁jaun₂ 'en₅₄ dsi₂mi'₂
 chi₁dsein₅₄ mi₂gu₂ 'éi₂, qui₂ca₂dsia₃ jág₁ guioin₅₄
 qui₂ca₂tsí'₃ riin'₅₄:

—I₂ma₂jńi'₃ dsa₂ bá₄ dsa₂ ně₅. O₁jnia'₅₄ la₂ ca₂lóin₂
 ne₄ jmi₁ńí'₄, la₁ tsá₃ 'i₄ 'éi'₃ a₂le₃chain₂ guě₄.

5 La₁ qui₂ca₂bí₂ Pa₄ mi₂gu₂ jaun₂ ně₃, ca₂tán'₂
 dsi₂mi'₂ dsi₂si₂. La₁ tsá₃ 'e₂ ca₂jén'₃ Pa₄ 'i₁ca₂juig₄.

6 Ca₂le₃jín₃ dsa₂ jme₁le₁jńia₂₃ guióng₃ dsi₂jui₅
 quió'₅ Pa₄, o₃ jme₁dsi₃'iin₅ 'e₂, jóin₂ dsi₂jui₅. La₁
 jme₁co₂lág₂ jaun₂, ia₁ ca₂jág₃ tsá₃ 'e₂ i₁jén'₄ guě'₂ Pa₄,
 jaun₂ ca₂i₃jiog₅ dsí₅ tē₂le₃ siá'₂, qui₂ca₂tsí'₃ riin'₅₄
 a₂lín₅ Pa₄ jan₂ diú₄.

7 Cau₅ jaun₂ jme₁ron₅ 'uě₃ quió'₅ dsa₂ dsen₅₄
 quián₅ dsa₂ chan₂ ja₁jaun₂, dsa₂ i₂chen₂ Publio.

Ca₂jmo₃ dse₃ dsí₅ ca₂ag'₃ jnia'₅₄, 'ni₅ jmi_g₄ ca₂tág₃
jnia'₅₄ ja₁quió'₄.

⁸ Jmei₂ Publio 'éi₂ jme₁ron₅ dso'₅₄ 'i₄ dséi₂, a₂tag₂₃
jmi₂ ně₃. Pa₄ ně₃ ca₂nei₅₄ ca₂i₁jii_n₁₂ dsa₂ dso'₅₄ 'éi₂.
Jme₁ma₂ně₂chi₃lén'₂ Diú₄, jaun₂ guě₄ ca₂quiog₂ gu₂
ne₄ quió'₅ dsa₂ dso'₅₄, ca₂jme₃'lió₂.

⁹ Jme₁ca₂lě₃ le₂jaun₂, caun₂ ca₂dsi₃lén₂ bá₄ dsa₂
dso'₅₄ sián'₂ i₂chan₂'uě₃ jaun₂, caun₂ ca₂jme₃'lió₂ bá₄
guě'₂ Pa₄.

¹⁰ 'Io'₂ ca₂jmo₃ dsa₂ quian'₅₄ jnia'₅₄. Jaun₂ ca₂cuě₃
dsa₂ ca₂le₃jě₃ 'e₂ 'nió'₅ quián₂ jnia'₅₄ jě₁ma₂tě₂ rě₁tió'₄
táng₃ jnia'₅₄ jui₅.

Ca₂dsi₃o₃ Pa₄ jě₄ juig₂ Roma

¹¹ Cang₂ jme₁ma₂ca₂ŋí₂ 'ni₅ tsi'₂, jaun₂ ca₂tió'₄
táng₃ jnia'₅₄ caun₂ ni₁barco a₂jme₁chí'₄ ja₁jaun₂
tě₁lia'₂ jein₂ güig₂. Ni₁barco jaun₂ ca₂já₃ juig₂ Ale-
jandría. Guei'₅₄ ni₁barco jaun₂ jme₁tióng₂ nió'₅
quió'₅ diú₄ Cástor quian'₅₄ diú₄ Pólux.*

¹² Ca₂dsi₃náu₅ jnia'₅₄ 'o₄ jmi₁ŋí'₄ juig₂ chei₂ Sira-
cusa. Ja₁jaun₂ ca₂jŋia₄ jnia'₅₄ 'ni₅ jmi_g₄.

¹³ Ca₂'uag₂ jnia'₅₄ ja₁jaun₂, ca₂i₁ŋag₅₄ jnia'₅₄ quián₅
chei'₅₄ 'uě₃ ca₂lia'₂ ca₂dsi₃náu₅ tě₂ ja₁chei₂ Regio.
Jme₁jnia₃ jaun₂, ca₂'ág₂ dsí₂ a₂já₅ tě₂le₃ sur. Jě₁ca₂tě₂
tin₃ jmi_g₄ guě₄ ca₂dsi₃náu₅ jnia'₅₄ ca₂tě₂ juig₂ Puteoli.

¹⁴ Ja₁jaun₂ ca₂jen'₂ jnia'₅₄ i₂lín₅₄ dsa₂ rin'₅₄ i₂én₂.
I₂'éi₂ ca₂tě₃ jnia'₅₄ ca₂i₁jŋia₁ jě₄ quió'₅ caun₂ semana.
Jaun₂ guě₄ ca₂i₃náu₅ jnia'₅₄ jui₅ Roma.

¹⁵ Ca₂le₃jín₃ dsa₂ rin'₅₄ i₂tián'₅ Roma jme₁ma₂le₁ŋi₅
a₂dsi₁náu₅ jnia'₅₄. Jaun₂ i₁lein₅₄ i₁jŋiog₁₂ le₂'i₄ jui₅

* **28:11** griego: Dioskouri, co₂'nió'₄ le₃jua'₅₄ on₃ dsa₂ tsin'₅₄ i₂lín₅
ja₁ŋi'₅₄ diú₄ Zeus quian'₅₄ Leda. Co₂'nió'₄ diú₄ patrón quián₅ ni₁barco.

ca₂tě₂ ja₁chei₂ Foro de Apio quian'₅₄ ja₁tě'₂ dsa₂ Las Tres Tabernas. Jme₁ca₂jág₃ Pa₄ ca₂jín₂ dsa₂ 'éi₂, jaun₂ ca₂cuě'₃ ti₁'mag'₄ Diú₄ ca₂tíin₂ táng₃ bí₂ ca₂lág₃ dsí₅.

¹⁶ Jme₁ca₂dsi₃náu₅ jnia'₅₄ Roma, [ja₁jaun₂ guě₄ ca₂jáng'₂ juig₅₄ 'lióg₂ ca₂jín'₂ ne₄ juig₅₄ 'lióg₂ i₂jmo₅ 'í₁ ja₁jaun₂ ca₂le₃jín₃ dsa₂ i₂ñjai₂₃ i₂nio₅ gu₂. La₁]† Pa₄ ně₃ ca₂cuě₃ juig₅₄ 'lióg₂ jmig₄ a₂guá₃ 'éi₂ ja₁siá'₂ con'₂ 'ñiog₅ quian'₅₄ jan₂ 'lióg₂ i₂jmo₃ 'í₁ quió'₅.

Ca₂'ě₂ Pa₄ jág₁ dse₃ juig₂ Roma

¹⁷ 'Ni₅ jmig₄ cang₂ jme₁ca₂dsió₃ Pa₄ juig₂ Roma, ca₂tě'₃ ca₂le₃jín₃ dsa₂ dsen₅₄ quián₅ dsa₂ judíos juig₂ jaun₂. Jme₁ma₂le₁ñi'₂ dsa₂, jaun₂ ca₂juá'₂ Pa₄:

—Rin'₅₄ jniog₄, o₁ñia'₅₄ guě₄ tsá₃ 'e₂ ma₂ca₂jmo₃ jniá₂ ja₁con₂ dsa₂ judíos, on₃ guě'₂ jua'₅₄ cha₂ a₂ma₂ca₂jmo₃ quian'₅₄ tag₄ chí'₅ quió'₅ dsa₂ quián₂ jniog₄ ma₂líg'₂, tion₅₄ bá₄ a₂lě₁ca₂jáng'₂ dsa₂ jniá₂ chi₁'ñeg₂₃ o₄gú₃ dsa₂ romanos.

¹⁸ Jaun₂ jme₁ca₂ñag₃ dsa₂, tsá₃ 'e₂ dsáu₅ jniá₂ ca₂dsó'₂, jua'₅₄ a₂'i₄ 'éi'₃ jóng₂. Jaun₂ jme₁'nio₃ jme₁lió₂.

¹⁹ La₁ dsa₂ judíos tsá₃ cán₂ jág₁. Jaun₂ bá₄ lě₃ ca₂mi₃ jniá₂ a₂'nio₃ jme₃rě₃ gui'₅₄ emperador, on₃jua'₅₄ ia₁ a₂cha₂ dso₄ jme₂cán'₂ jniá₂ dsa₂ go₃.

²⁰ 'Uig₅₄ jaun₂ bá₄ ně₂tě₃ jniá₂, ia₁ a₂'nio₃ jing₅₄ 'nia'₂, a₂'nio₃ dsia₅₄ jág₁ quian'₅₄ 'nia'₂. Ia₁ 'uig₅₄ jág₁ quió'₅ Diú₄ a₂'éin₂ jniog₄ con'₂ dsa₂ lág₅ israelitas, 'uig₅₄ a₂'ín₂ dsí₅ jniog₄ a₂jme₃ti₃ Diú₄ jág₁ quió'₅

† 28:16 A₂lin₅₄ chog₅₄ si₂ tsá₃ le₁ton₅ jág₁ a₂tio'₅₄ 'ñjó'₃ corchetes [le₂la₂].

a₂ma₂cuë₃, 'uig₅₄ jaun₂ bá₄ chi₁'ñe'₅₄ jniá₂ ni₁ñí₁ ca-
dena la₂.

21 Jaun₂ ca₂ñag₃ dsa₂ ca₂tsí'₃ Pa₄:

—Tsá₃ 'e₂ si₂ ma₂ca₂gú'₃ ne₄ jnia'₅₄, quió'₅ dsa₂
chan₂ Judea, a₂'iin₂₃ 'ne₂. On₃ guë'₂ 'i₁jan₂ dsa₂ rin'₅₄
jniog₄ dsa₂ judíos i₂ja₂lén₂ ja₁jaun₂ jua'₅₄ a₂ma₂juá'₂
'iin₂₃ 'ne₂ 'lig'₅₄.

22 'Niog₂ jnia'₅₄ néi₁ 'a₂ guë'₂ lia'₂ lë₅ jág₁ quián'₂
'ne₂ chi₂jua'₂ 'a₂ lia'₂ líng'₂. Ia₁ ne₄ bá₄ jnia'₅₄ jág₁,
ta₁caun₂ mi₂güig₃ bá₄ dsia₅ dsa₂ tsá₃ tē₅ dsí₅ jág₁ 'mí₂
nē₅ a₂'én'₂ 'nia'₂.

23 Jaun₂ ně₃, ca₂jmo₃ dsa₂ jág₁ ca₂tióng₃ caun₂
jmig₄. Jmig₄ jaun₂ ně₃ ca₂dsi₃lén₂ juin₅ dsa₂ ja₁'en₅₄
Pa₄. Jaun₂ ca₂jme₂lióg₃ ca₂'ě'₃ dsa₂ tē₃ o₃'iog₂ jág₁
ju₁lia'₂ ja₁gon₂ Diú₄, qui₂ca₂dsia₃ ca₂lia'₂ ca₂jen₃
'iog₂ tē₂le₃ ca₂'láu₂. Tē₂le₃ quian'₅₄ 'Ei'₃ Juá'₅
quió'₅ Moisés, quian'₅₄ ca₂le₃jě₃ guë'₄ Si₂ quió'₅ dsa₂
i₂jme₁'ě₂ jág₁ quián₅ Diú₄ ně₃, qui₂ca₂cuë'₃ dsa₂ jág₁
dsau₅ ia₁jaun₂ le₃'én₂ dsa₂ 'éi₂ tē₂le₃ quió'₅ Jesús.

24 I₂lin₅₄ dsa₂ ca₂gue₃ bá₄ jág₁ a₂ca₂juá'₂ Pa₄ jaun₂,
ca₂rē₃'én₂ bá₄. I₂lin₅₄ guë'₂ tsá₃ ca₂rē₃'én₂, tsá₃ 'nio₃.

25 Ia₁ tsá₃ caun₂ jág₁ 'ei₅ quió'₅, i₂lin₅₄ ca₂jme₃lióg₃
ca₂'u₁in₂ bá₄ i₃lein₃. Jaun₂ ca₂juá'₂ Pa₄ ca₂tsí'₃ dsa₂
'éi₂:

—Rē₂ bá₄ ju₁lia'₂ ca₂juá'₂ Jme₂dsí₂ Jñi₀5 ca₂tsí'₃
dsa₂ quián₂ jniog₄ ma₂líg'₂ tē₂le₃ quian'₅₄ Isaías,
i₂jme₁'ě₂ jág₁ o₄quió'₄ Diú₄, jme₁ca₂juá'₂:

26 Gua₂ o₂chei'₅₄ dsa₂ juig₂ nē₅ le₂la₂:

“Dsón'₂ qui₁nág'₁ bá₄ 'nia'₂,

la₁ tsá₃ le₃ñí'₂ 'nia'₂.

Jag'₅₄ bá₄ 'nia'₂,

la₁ tsá₃ le₃len'₄ 'nia'₂.”

27 Ia₁ a₂ma₂'ua'₂ dsí₅ bá₄ dsa₂ la₂,
 ja₂lag₃ bá₄ nag₂₃,
 në₂jag₄ bá₄ i₂ma₂rë₂jni₅ rë₂gua₄;
 ján₃ bá₄ le₂në₅, në₂jag₄ bá₄ a₂tsá₃ jniá₂ mi₂ne₅₄,
 ia₁jaun₂ tsá₃ jág₃ quian'₅₄ mi₂ne₅₄,
 on₃ guë'₂ nag₃ quian'₅₄ rë₂gua₅₄,
 on₃ guë'₄ le₃ñí'₂ dsí₅,
 ia₁jaun₂ tsá₃ jén'₃ dsí₅ ja₁con₂ jniá₂
 ia₁jaun₂ jme₁lioin_{1,2} jniá₂.‡

28 'Dsá₂ 'au'₂ 'nia'₂ jmo₄ —ca₂juá'₂ Pa₄—, jág₁
 dse₃ la₂ a₂lión₂ dsa₂, a₂jén'₂ Diú₄ le₃ne₄ jui₅ quió'₅
 dsi₂nau₂. 'Éi₂ në₃, tón'₃ bá₄ jui₅.

29 Jme₁ca₂lë₃ juá'₂ Pa₄ le₂në₅, ca₂i₃len₃ dsa₂ judíos
 tsin₂₃ 'ñio₅ lin₃ quian'₅₄ riin'₅₄. §

30 Tin₃ ñi₂ lia'₂ tí₅ ca₂guá₂ Pa₄ 'né₅ ja₁quí₅ 'lia'₅₄.
 Ja₁jaun₂ ca₂guein₃ ca₂le₃jín₃ dsa₂ i₂jme₁dsi₂lén₂
 dsi₂jag₅₄.

31 Jaun₂ ca₂jme₃tiin₂₃ dsa₂ qui₂ca₂'ë₂ jág₁ 'a₂ lia'₂
 lë₅ ja₁gon₂ Diú₄. Ca₂jme₃tiin₂₃ bá₄ dsa₂ jág₁ quió'₅
 Te₁gui'₅₄ Jesucristo. Ja₁jaun₂ ca₂'í₃ tei₄, tsá₃ 'ein₂
 ca₂jné₃ jui₅ a₂'ë₂ Pa₄ jág₁ dse₃.

Co₂në₅.

‡ 28:27 Isaías 6:9-10.
 versículo 29.

§ 28:29 A₂lin₅₄ chog₅₄ si₂ tsá₃ chi₁ton₅

Jag₁ 'mí₂ a₂ma₂li'₅₄ quian'₅₄ Diu₄
New Testament in Chinantec, Tepetotutla
(MX:cnt:Chinantec, Tepetotutla)

copyright © 1994 Wycliffe Bible Translators, Inc.

Language: Chinantec, Tepetotutla

Translation by: Wycliffe Bible Translators, Inc.

Chinanteco, Tepetotutla [cnt], Mexico

Copyright Information

© 1994, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Chinantec, Tepetotutla

© 1994, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 18 Apr 2025 from source files
dated 30 Dec 2021

5c52af9e-3086-5d57-9b7e-2e495fea8899